



رواية مزرعة الدموع بقلم بنوثة أسمره

رواية مزرعة الدموع روايتى الأولى

مقدمة

القلب دائم البحث عن يسكن فيه ويعمره ويزرع به أزهار الحب والألفة والسرور , كالبيت الفارغ فهو بلا ساكن بلا حياة وبلا حراك , لا تضاء به أنوار ولا تجد به استقرار , إلا بوجود الساكن الأمين , الذى يعشق الألفة والحنين....

فيتأثر البيت إن فقدته فلا ترى ضوءاً يشق ظلماته , ولا عطراً يفوح بجنباته فتبكيه الجدر والأبواب بعد أن كان ساكنه جزءاً أصيلاً يملأ فضاءه الواسع , وهكذا القلب الساكن بلا حراك منعزل عن الجوارح والأعضاء , لا يشعر به جيرانه من هذه الأعضاء إلا بوجود ذلك الساكن الأمين فيضئ به النور فيبعث عليهم السرور , فيتزاورون ويلتقون ويباركون لجارهم الحبيب , هنيئاً لك الساكن القريب , فيتعاهدون جميعاً مع القلب على اسعاده حتى يأنس الساكن بوجداده.

الفصل الأول

داعبت النسومات الناعمة شعر "ياسمين" , كانت ملامحها الهادئة الساكنة تشير الى استغراقها في النوم فلم تسمع والدتها "سمية" وهي تفتح نافذة حجرتها التي تسللت منها تلك النسومات فأخذت تداعب شعيراتها السوداء المتساقطة على جبينها في رقة , اقتربت الأم من فراشها ونادتها بنبرة حانية:

"-ياسمين" .. "ياسمين" قومي يا بنتى أبوكى نزل تملمت "ياسمين" في فراشها وفتحت عينيها في بطء وارتسمت ابتسامة صغيرة على شفيتها ونظرت الى أمها قائلة:

-ماما ... صباح الخير يا ست الكل
-صباح الفل يا حبيبتي .. قومي أبوكى نزل يصلي الجمعة .. بلا عشان نشوف اللي وانا
أزاحت "ياسمين" الغطاء الذى تدرت به ونهضت فى تكاسل وطبعت قبلة على وجنته أمها
-حاضر يا قمر .. هدخل الحمام وأجي أشوف هنعمل ايه
-أنا هدخل المطبخ أبدأ في تحضير الغدا وانتى يا حبيبتي عليكي التنضيف زى كل جمعة .. يلا
شهلى أوام قبل ما أبوكى يرجع .. انتى عارفه ما بيحبش يرجع يلاقي البيت مكركب

نظرت "ياسمين" الى الفراش الفارغ الموجود بجوار فراشها والتفتت الى أمها قائلة:

-أمال فين "ريهام" ؟
-نزلت تجيب شوية طلبات .. أنا عارفة اتأخرت ليه
دخلت "ياسمين" الحمام وتوضأت وصلت ركعتي الضحى وشرعت فى مساعدة والدتها فيما اعتادت أن تقوم به من أعمال.

كانت "ياسمين" ابنة لأسرة متوسطة الحال أو أقل من المتوسطة بقليل , من تلك الأسر التي نقول عنها (عايشين مستورين) , والدها موظف على المعاش لا يملكون من حطام الدنيا إلا هذا البيت الذى يأويهم والذى يقع فى أحد الأحياء البسيطة ب القاهرة , أمها من تلك الأمهات اللاتي تراهن فى معظم البيوت المصرية من هذه الطبقة , سيدة طيبة لم تنل حظها من التعليم لكنها تراعى ربها فى بيتها وزوجها وبناتها على أكمل وجه , سيدة حانية تجمع بين الطيبة والبساطة , لدى "ياسمين" شقيقة واحدة تصغرها بـ 4 أعوام تدرس فى السنة الأخيرة بكلية تجارة جامعة عين شمس .

أما "ياسمين" فكانت فى ال السادسة والعشرون من عمرها طبيبة بيطرية لا تعمل منذ أن تخرجت , نجحت البنتان فى نيل حظ وافر من التعليم , فكان هذا هو ما يطمح اليه والدهما الذى يفتخر بهما كلما اجتمع بأصدقائه على المقهى الذى يجلس عليه عادة , كم يشعر بالفخر لأنه بالرغم من مستواه المتواضع إلا أنه لديه ابنتان كانتا سبب فخره دائماً ليس بتعليمهما فحسب بل بأدبهما وأخلاقهما وتربيتهما أيضاً.

رن جرس الباب فنظرت "ياسمين" من العين السحرية ثم فتحت الباب لأختها "ريهام"

-طبعا "ريهام" هانم هربانه على الصبح من شغل البيت

-يا باي على الظلم .. كنت بجيب حاجات ماما طلباها
-طيب , يلا يا حلوة شوفي ماما فى المطبخ ساعديها
-من غير ما تقولى كنت داخلها
كانت "ياسمين" و"ريهام" على وفاق دائماً ويحبان مشاكسة بعضهما البعض والمزاح
والضحك وساعد على ذلك تقارب سنهما.

وفى وقت الغداء التف الجميع حول طاولة الطعام وشرعوا فى تناول طعامهم واشتركوا فى
الحديث والمزاح , ثم بعد فترة قال رب الأسرة "عبد الحميد":
-النهاردة جه عريس لـ "ياسمين"
احمرت وجنتا "ياسمين" بشدة , فهذه هي المرة الأولى التي يتم فتح مثل هذه المواضيع
أمامها , فقد كانت تتسم دائماً بالخجل والهدوء خاصة فى الحديث مع والدها الذى تقدره
وتحترمه كثيراً
الأم "سمية": بجديا "عبد الحميد" , طيب هو مين ؟ وقالك ايه ؟
"ريهام" بمزاح :ايه ده بجدي .. أخيراً حد عبرك
لم تستطع "ياسمين" الجلوس أكثر فنهضت بسرعة
"سمية": ايه يا بنتى مش هتكملى أكلك
"ياسمين": شبعت يا ماما

دخلت مسرعة الى غرفتها ونظرت الى وجنتيها الحمران فى المرأة , وشعرت بدقات قلبها
تتسارع وتساءلت فى نفسها (يا ترى شافني فين ؟ وعرفني منين ؟ يا ترى ليه اخترنى أنا
بالذات ؟)

كانت "ياسمين" طوال سنين دراستها الجامعية ترفض تماماً الإختلاط بالشباب والإنضمام الى
مجموعات التي تضم الجنسين معاً فيما يسمى بالصدائة , فلم تكن تهتم إلا بدراستها وتفوقها ,
وساعدها تربيتها وتدينها على المحافظة على نفسها ومشاعرها , كانت "ياسمين" تتمنى دائماً
أن يكون زوجها هو أول من يطرق باب قلبها فإحتفظت بكل مشاعرها وعواطفها له وحده ,
فكانت ترى أن الحب الحلال أبرك كثيراً من أى علاقة محرمة تغضب ربها.

ومن جهة أخرى لم تكن "ياسمين" تحظى بإهتمام الشباب وخاصة أولئك الذين يبحثون عن
حب سريع وعلاقات عابرة لأنها لم تكن تملك مقاومات جمال تبهر الرجال , فلامحها الهادئة
ليس بها شئ مميز باستثناء عينيها السوداوين برموشها الكثيفة التي تشكل مع ابتسامتها
الرقيقة جمالاً هديناً ناعماً بريئاً

فتحت "ريهام" الباب ونظرت الى "ياسمين" ضاحكة : قومتى ليه يا عروسة ؟

"ياسمين" وهي تشير الى الباب : بطلى بأه واقفلى الباب ده
دخلت "ريهام" وأغلقت الباب خلفها قائلة بشقاوتها المعهودة:
-تدفعى كام وأقولك المعلومات اللى بابا قالها عن العريس؟

"ياسمين" بلهفة : قولى بأه ما تبقيش رخمة
-ايه هي سايبه .. مش هقول إلا لما أخذ الحلاوة
-حلاوة ايه هو لسه حصل حاجة
-هيحصل ان شاء الله وبكرة تقولى "ريهام" قالت
-قولى بأه يا "ريهام" , "بابا قال ايه؟
"ريهام" باستسلام مصطنع : طيب صعبتى عليا , هأرف بحالك وأقولك من انتى زى أختى
برده
-أوف , مش هنخلص النهاردة

جذبت "ريهام" "ياسمين" من ذراعها وأجلبتها على السرير : بصى يا موزة ..العريس اللي
أمه داعية عليه .. يووووه قصدى اللي أمه دعياله عنده 35 سنة خريج هندسة بيشتغل مهندس
بترول .. جاهز من مجاميعه .. عنده شقة بتاعته فى منطقة راقية مش ناقصها غيرك يا جميل
-اسمه ايه؟

"ريهام" ضاحكة : هههههههه هيفرق ايه اسمه معاكى .. افرضى مثلاً اسمه "عتريس"
هترفضى؟

"ياسمين" غاضبة: عشان أما أجي أصلى استخارة يا أدكى اخواتك أقول اسمه فى الدعاء
"ريهام" بهيام : اسمه "تيفه"

"ياسمين" باستغراب : "تيفه" .. ايه "تيفه" دي

"-تيفه" يا "ياسمين" .. "يعنى" مصطفى"

صمتت "ياسمين" قليلاً ثم قالت : طيب هو شافني فين يعني ؟

-لا هو أنا ما قولتلكيش .. يقطعني

"ياسمين" وهى تقرص "ريهام" فى ذراعها: بطلي أم الاستظراف ده .. مش وقتك خالص
"ريهام" وهى تفرك ذراعها : آآآآآه .. يا متوحشة , ربنا يكون فى عونك يا "تيفه" .. بصى
يا موزة أبو "تيفه" الله يمسيه بالخير هو و بابا وبيصيعوا مع بعض على القهوة وصحاب من
زمان

-احترمى نفسك ايه بيصيعوا دى

-الله .. ما تسببني أكمل بأه .. المهم شكل كدة الواد "تيفه" شافك فى مرة وانتى واقفة مع باب
وعرف من أبوه كل حاجة عنك , وشكل الصنارة غمزت يا جميل

رغم محاولات "ياسمين" الاستغراق فى النوم إلا أن النوم أبى أن يسيطر عليها وقضت معظم
ليلتها فى التفكير فى شكل هذا الـ " مصطفى" , وأهم شئ أخلاقه وطباعه , ولم تنسى قبل أن
تخلد الى النوم أن تصلى صلاة الاستخارة لتسأل الله -عز وجل- أن ييسر لها إن كان هذا الأمر
خير لها وأن يصرفه عنها إن كان فيه شر لها .. وفى النهاية استسلمت "ياسمين" الى سلطان
النوم.

"- عبد الحميد " : "ياسمين" يا بنتى شوفتى عريسك ؟
"-ياسمين _____ : "
"- عبد الحميد : "لازم تشوفيه يا بنتى ده جواز يعني لازم قبول من الطرفين
"-ياسمين _____ : "
"-كوثر" : اظاهر عروستنا مكسوفة
"-صادق" والد " مصطفى" : والعريس كمان شكله محرج
"- عبد الحميد" : طيب يا جماعة نسيبهم شوية لوحدهم عشان يعرفوا يتكلموا براحتهم

نهض الجميع وتوجهوا الى المجلس الذى لا يبعد كثيرا عن المكان الذى يجلس فيه
"مصطفى" و "ياسمين"
"-مصطفى" : ازيك عامله ايه؟
"-ياسمين" بخجل : الحمد لله
-انتى دكتورة بيطرية مش كدة ؟
-أيوة
-طيب أنا عارف كل حاجة عنك من والدك انتى بأه عايزة تعرفى عني ايه ؟
"-ياسمين _____ : "

-طيب بصيلي على الأقل
-حضرتك اتكلم عن نفسك أنا مفيش عندى أسئلة معينه
-طيب أنا اسمي "مصطفى" عندى 3 4 سنة و 9 شهور , مهندس بترول فى شركة كبيرة فى
البحر الأحمر بنزل القاهرة اسبوع كل شهر , يعني عايز واحدة مستعدة تتحمل ظروف شغلى
لأني هغيب عنها 3 أسابيع كل شهر , هواياتى هى لعب الملاكمة وكمان بحب سباق السيارات.

أثناء حديثه كانت "ياسمين" تختلس النظر اليه , رأته شابا هادئ الملامح عينيه بنيتين خمري
البشرة بنفس لون بشرتها لديه شعر قصير جدا أسود اللون , أكمل "مصطفى" قائلاً :
-شقتى جاهزة على الفرش بس , ولو قبلتيني وكان لينا نصيب مع بعض ان شاء الله الفرح
هيكون خلال شهرين بالكثير
-شهرين !؟

-أيوة ان شاء الله الأمر مش هيطول عن كدة أنا متكلم مع والدك فى الموضوع ده , وأنا هاخذ
أجازة من شغلى الفترة الجاية عشان أقدر أخلص الشقة قبل معاد الفرح

انتهت الزيارة ورحلوا فى انتظار رد العروس
, توجهت "ياسمين" الى الحمام وتوضأت وصلت استخارة مرة أخرى فهى لم تتوقف عن
أدائها منذ أن بدأ هذا الموضوع , شعرت بأنها لم تستطع أن تكون فكرة واضحة عنه ولا
تستطيع الحكم جيداً على مشاعرها فهى لا تشعر بشئ على الاطلاق , لا برغبة فى القبول ولا

برغبة فى الرفض لذلك تركت الاختيار بيد الله - عز وجل , -كان أكثر ما يقلقها هو هذه الخطوبة القصيرة التى لن تتعدى الشهرين , تساءلت فى نفسها هل تستطيع أن تتعرف عليه وتعتاد عليه فى هذه الفترة القصيرة !؟

كان من الواضح أن "عبد الحميد" سعيداً جداً بـ "مصطفى" فهو لم يكن ليتمنى شخص أفضل منه لابنته , وما زاد من تمسكه به هو أن "مصطفى" اتفق معه أن يتكفل بمعظم الجهاز والفرش حتى ينتهى سريعاً من اعداد شقة الزوجية فرفع بذلك عن كاهله حمل ثقيل من النفقات.

أخبرت "ياسمين" والدها عن مخاوفها من قصر فترة الخطوبة , لكنه لم يلتفت لذلك وأخبرها أنه سأل عليه جيداً وأنه شاب ممتاز لا غبار عليه.

الفصل الثالث

جاء اليوم الموعود وارتدت فيه "ياسمين" فستانها الذى عثرت عليه بعد عناء وأجرته من أجل هذا اليوم , فكان اختيارها موفق إذ أنها لطالما كانت تتمتع بذوق راقٍ في اختيار ملابسها رغم بساطتها , كان فستانها ذو لون موف هادئ بسيط وارتدت طرحه من نفس اللون .. كان وجهها بلا زينة فُبدت بمظهر هادئ برئ

كانت الزغاريد لا تنقطع منذ الصباح فهي البكرية والفرح بها له مذاق خاص , كانت حفلة الخطوبة صغيره فى منزلها المتواضع تضم الأسرتان فقط , و "سماح" احدى صديقات "ياسمين" المقربات من أيام الثانوية

"-سماح" : قمر يا اخواتى .. قمر اللهم بارك
"-ياسمين" : بجد يا "سماح" .. حلو الفستان والطرحه
"-سماح" : بقولك قمر
"-ياسمين" : قمر بالستر يختى
"-ريهام" : يلا يا عروسة الناس مستنيه بره
"-ياسمين" : حاضر خارجه أهو
خرجت "ياسمين" من غرفتها وتعالق الزغاريد مرة أخرى فى أرجاء المنزل.

قبل يومين خرجت الأسرتان وانتقت "ياسمين" دبلة الخطوبة والشبكة المكونة من خاتم رقيق و سلسلة بسيطة يتدلى منها قلب صغير , كانت سعيدة للغاية فهذه هي المرة الأولى التي ترتدى فيها ذلك المعدن الذهبى النفيس الذى يخطف عقول النساء , فلم تكن ظروف اسرتها تسمع بشراء مثل هذه الرفاهيات.

جلست "ياسمين" بجوار "مصطفى" وقدمت "كوثر" صنية ذهبية اللون مزينة بالورود عليها الشبكة الى ابنها ليلبسها لعروسته , قالت "ياسمين" بحرج:
-معلش يا طنط ممكن حضرتك اللي تلبسيني الشبكة
"-كوثر" : ليه يا حبيبتي ده "مصطفى" خلاص بأه خطيبك وقريب أوى هيبقى جوزك
"-ياسمين" بحرج أكبر : معلش يا طنط مش هينفع
نظرت اليها أمها نظرة معناها (عديها مفيهاش حاجة)

لكن "ياسمين" أصرت ألا يلمس يدها قبل كتب الكتاب فمازال رجل غريب عنها , شعرت بضيق "مصطفى" من تصرفها لكنها حدثت نفسها قائلة (من أَرْضَى الله بسخط الناس رضى الله عنه وأرضى عنه الناس) , ألبستها "كوثر" الشبكة , شعرت "ياسمين" بأن قلبها يرقص فرحاً فها هي لحقت بركب صديقاتها وجاراتها المخطوبات.

=====

فى هذه اللحظة وفى حديقة فيلا كبيرة فى المعادى كان هناك حفل خطوبة لأحد أكبر رجال الأعمال بالقاهرة .. "عمر نور الدين الألفى" .. كان "عمر" فى الـ السابعة والثلاثون من عمره , أسمر طويل عريض المنكبين ذو شعر أسود حريري , تجمع ملامحه بين الوسامة

والرجولة .. رجل تتمناه الكثير من النساء ليس لشكله ووسامته فقط بل لمركزه الإجتماعى
وثرأه الفاحش أيضاً , فبالرغم من صغر سنه إلا أنه يملك ويدير العديد من المصانع
والأراضى والشركات التي كانت ملكاً لأجداده ولكنه بذكانه وحسن ادارته لأعماله نجح فى
توسيع أعماله حتى ذاع صيته داخل مصر وخارجها.

أقبل رجل فى العقد السادس من عمره على "عمر" قائلاً:

-ابني حبيبى , أخيراً عشت وشوفت اليوم ده

"-عمر" وهو يقبل يد والده : بابا , ربنا ما يحرمني منك

-مبروك يا "عمر" أخيراً هنفرح بيك , بقولك ايه ما تطولش فى الخطوبة ها اعزيز أشيل
ولادك قبل ما أموت

"-عمر" ضاحكاً : ربنا يدملك طولة العمر يا بابا , ما تقلقش هو ده أصلاً اللى أنا ناوى عليه

رأى "عمر" والدته "كريمة" مقبلة عليه فإستقبلها بإبتسامة قائلاً : أمى الغالية , هى فين

العروسة مش هتنزل بأه

-الأم ضاحكة : هههههه اصبر على رزقك , خلاص خلصت لبس والكوافير كمان خلص شغلته

"-عمر" واجماً : كوافير ؟ يعنى راجل اللى بيزوقها ؟

"-كريمة" : بقولك ايه ما تضايقش البنت النهاردة , يوم سييها تفرح بيه وبعدين انت ابقى
طبعها بطبعك

أقبلت "نانسى" فى فستانها زهرى اللون الذى صُمم على يد أشهر مصممي الأزياء فى العالم
, كانت فاتنة تخطف الأنظار بعينيها الخضراويين وشعرها الأشقر الذى رفعتة الى الخلف ,
وبشرتها الملساء ناصعة البياض , كانت كالأميرة تنزل على سلالم الفيلا ليستقبلها أميرها
الساحر.

-أمسك "عمر" يديها وقبلها وهمس لها : حبيبتي

"-نانسى" بإبتسامتها الساحرة : عجبتيك ؟

-امتلات عيناه بنظرات الحب والإعجاب قائلاً : عجبتيني بس , ده انتى هوستيني .. اعلمى

حسابك فترة الخطوبة هتكون قصيرة جدا

ضحكت "نانسى" بنعومة , وسارت يدها فى يده بينهما يهنئهما الجميع وباركون لهدين
العروسين , كانت نظرات الجميع اليهم تجمع ما بين الحسد والإعجاب والانبهار , فالإثنان
يمثلان ثنائي العام , " نانسى" ابنة رجل أعمال شهير ولا تقل ثراءا عن "عمر" , فكان
الجميع يراهما مثالين لبعضهما البعض.

أقبلت "نيرمين" صديقة "نانسى" المقربة حاملة وسادة من الستان الوردى موضوع عليها
دبل الخطوبة , كانت الدبلتان مربوطتان ببعضهما البعض بشريط ستان أحمر , أليس "عمر"
الدبلة لـ "نانسى" وفعلت "نانسى" معه بالمثل , وأقبل والد "عمر" ليقص الشريط .. ووسط
تصفيق ومباركة الحضور قبلها "عمر" على وجنتيها قائلاً :

-مبروك يا حبيبتي أنا النهاردة أسعد راجل فى الدنيا

رقص الخطيبان على أنغام موسيقى حالمة ..كانت نظرات "عمر" اليها تحمل الكثير من
معانى الحب والحنان ود لو تمر الأيام سريعاً ليجتمعاً معاً فى بيت واحد , نظر اليها قائلاً :
-فاكرة أول مرة شوفتك فيها ؟

"-نانسي" ضاحكة :
-طبعاً ودي حاجة تنتسي
-كنت راجع من الشغل وشوفتك راكنه عربيتك على جنب وكان شكلك مضايكك .. طلبت من
السواق يوقف العربية ونزلت أعرض عليك المساعدة.. قولتيلي ان عربيتك عطلت فجأة
ومش راضية تدور , سبت السواق مع عربيتك وخذتك معايا فى عربيتي
-أهاا وفضلت تعاكسنى طول الطريق
-حد يبقى جنبه القمر ده وميعاكسهوش
أسعدتها كلمات "عمر" فلطالما أحبت سماع كلمات الاعجاب التى يلقيها الرجال على مسامعها
دائماً , كانت مدركة لمدى جمالها وجاذبيتها جيداً

وعلى احدى الطاومات جلست سيدتان تنظران اليهما وتتحدثان
"-جيهان" : بنتك وقعت واقفة يا "نادين"
"-نادين" ضاحكة : طول عمرها شاطرة , جابت الرجل على ملا وشه , شايقة بيصلها ازاي
-لا ومش أى راجل , ده "عمر الألفى" يعني هتضمنى ان بنتك هتعيش ملكة طول عمرها
وطبعاً هينوبك من الحب جانب
"-نادين" باستعلاء : ما هى كانت عايشة ملكة طول عمرها , انتى نسييتى هى بنت مين وانا
مرأة مين ولا ايه ؟
-لا منستش يا حبيبتي , بس أنا وانتى عارفين كويس ان جوزك غرقان فى الديون بسبب لعب
القمار اللى أدمنه
"-جيهان" بغضب : وطى صوتك انتى عايزة تفضحيننا
-لا أبداً يا قلبي هو أنا قولت ايه يعني
-اقفلنى على الموضوع ده , مش عايزاه يتفتح تانى ,الحيطان ليها ودان , انتى عايزة الجواز
تيوظ ولا ايه
-مش قصدى , أنا..
-قالت "نادين" والشرر يتطاير من عينيها : قولتلك مش عايزة أسمع كلمة تانية فى
الموضوع ده , انتى عارفانى كويس يا "جيهان" اتقى شرى أحسنلك
-بلعت "جيهان" ريقها بصعوبة قانلة : طيب يا "نادين" خلاص أنا آسفة .. مش هفتح
الموضوع ده تانى

كانت تعلم جيداً أن "نادين" امرأة قاسية ولن تتردد فى أذيتها فأثرت الصمت.

-صباح الخير يا باشمهندس "عمر"

-صباح الخير يا مدام "حنان"

دخل "عمر" مكتبه وخلفه سكرتيرته الخاصة ومديرة مكتبه ذات المظهر الجاد والتي يبدو عليها أنها فى العقد الرابع من عمرها, والتي يآتمنها على الكثير من أسرار الشركة لثقته الشديدة بها

-باشمهندس , محتاجين امضة حضرتك على الملف ده حالياً

"عمر" وهو يجلس على مكتبه ويلتقط منها الملف ويتصفحه :ها .. جمعوا الكمية المطلوبة ؟

-أيوه يا فندم وقبل المعاد المحدد كمان

-ممتاز .. الشحنة هتدخل الجمارك امتى ؟

-هى حالياً فى الطريق وفى انتظار امضة حضرتك

ذيل "عمر" الملف بتوقيعه الأنيق وأغلقه وأعطاه لمديرة مكتبه , وبمجرد خروجها من المكتب أغلقت الباب الفاصل بين مكتبها ومكتبه , تناول "عمر" هاتفه النقال من جيبه واتصل برقم يحفظه عن ظهر قلب .. صوت جرس .. ثم:

-ألو

-حبيبي صباح الخير

-صباح النور يا "عمر"

-وحشتيني أوى

-وانت كمان

-كنتى امبارح زى القمر , لا زى القمر ايه ده القمر كان مكسوف منك

"-نانسي" بدلع : امبارح بس ؟

-لا طبعاً انتى يوم انتى قمر .. قمري اللى بينور لياليا واللى قريب أوى هيبقى معايا ومش هيفارقنى لحظة

"-نانسي" بجديّة : "عمر" يا ريت مانستعجلش , يعنى احنا لسه خطوبتنا كانت امبارح مش معقول هنتكلم فى جوازنا النهاردة

"-عمر" فى ضيق : يعنى انتى مش حبه تكونى معايا فى بيتي ؟

-تداركت "نانسي" خطأها بسرعة : لا طبعاً يا حبيبي عايزة أكون معاك النهاردة قبل بكرة , بص خلىنا دلوقتى نفرح بخطوبتنا ,ها هتوديني فىن النهاردة ؟

-أى مكان حبيبي يختاره ,أنا تحت أمره

-ممممم ايه رأيك نطلع يومين شرم ؟

-يومين .. بس يا "نانسي" اليومين دول أنا مضغوط جامد فى الشغل

"-نانسي" فى ضيق واضح : خلاص متبقاش تتكلم بقلب جامد وتقولى أختار وتحت أمرك طالما شغلك أهم منى

-خلاص يا عمرى أنا ميهونش عليا زعلك هفضى نفسى عشانك , ولا تزعلنى نفسك , أنا مفيش عندى أهم منك

"-نانسي" ضاحكة : تسللمى حبيبي , هجهز نفسى وانت خلص اللى وراك وعدى عليا فى الفيلا , اوعى تتأخر

"-عمر" باسماء : مقدرش أتأخر على حبيبتى , بحبك , هتوحشيني لحد ما أشوفك , سلام يا

عمري
-سلام.

بعد انتهاء المكالمة قالت "نادين" لـ "نانسي" والتي كانت تستمع الى المكالمة:
-انتي غبية يا بنت انتى .. بيتكلم عن الجواز تقوليله أما اتمتع بخطوبتنا .. انتى عايزة تنقطيني
-يوم يا مامى أنا مش مستعدة للجواز ولتقييد الحرية دلوقتي
-هو بمزاجك .. انتى مش عارفه المصيبة اللى احنا واقعين فيها
"نانسي" بتأفف :

-عارفة عارفة مش كل شوية تفكريني
-لا لازم كل شوية تفتكرى ومتنسيش أبداً إن كل أملاكنا تقريباً مرهونة ..وإن ما أنقذناش
نفسنا هنلاقى نفسنا قريب أوى فى الشارع
"-نانسي" بعصبية : كل ده بسبب جوزك ولعبه للزفت القمار
"-نادين" غاضبة : بنت احترمي نفسك ده أبوكى مايصحش تتكلمى عنه بالطريقة دى
-أوف

-اسمعيني كويس , "عمر" مش عايزاه يفلت من ايدينا ..فهمانى .. محدش غيره هيقدر
يخرجنا من الورطة اللى احنا فيها
-عارفة .. مع انه مش الشخصية اللى كنت أحلم انى أتجوزها بس فلوسه تخلىني أتغاضى عن
كل حاجة تانية

-أهم حاجة ان الجواز تتم في أقرب وقت ممكن .. عشان لو حصل أى حاجة يكون خلاص
اتجوزك وانتى ملزمة منه وبالتالي مش هيقدر يسبب أهلك فى ورطتهم دى وأكد هيساعدنا
"-نانسي" بابتسامة خبيثة : متقلقيش ده خلاص بأه بيتنفس حاجة اسمها "نانسي"
ومايقدرش يعيش من غيري .. انتى عارفه كويس ان مفيش راجل يقدر يقاوم سحر "نانسي"
-عارفة يا بنت أمك

تبادلنا نظرات مأكرة والابتسامة تعلقو شفاهما.

الفصل الخامس

أثناء استغراق "عمر" وانهماكه في مراجعة الأوراق التي أمامه .. سمع دقات صغيرة على الباب ثم انفتح ليدخل شاباً طويل أبيض البشرة عسلي العينين يرتدى بدلة أنيقة ويهتف بمرح:
-مبروك يا عريس , عقبال ما نشوفك فى الكوشة
اتسعت ابتسامة "عمر" وهو ينهض ليعانق صديقه:

-الله يسلمك يا "كرم" ,عقبالك

-بعد الشر تف من بقك

"-عمر" ضاحكاً : ليه بس كده

-محلها عيشة الحرية , ايه اللي يخليني أجيب لنفسي القرف ووجع القلب يا ابني , أنا كدة

100 فل و 10

-بكرة تيجي اللي تغيرك رأيك ده وألاقيك بتقولى الحقنى يا "عمر" أنا طيبت

-ههههههههه ما أظنش ان اليوم ده هيجي أبداً

-لا هيجي بكرة تشوف

-ماشى يا عم أنتم السابقون ونحن اللاحقون إن شاء الله

عاود "عمر" الجلوس خلف مكتبه وجلس "كرم" على المقعد أمامه : ها أخبار حفلة امبارح اياه؟

-كانت ممتازة .. مكنش ناقصها غيرك

-يا راجل قول كلام غير ده .. آل يعنى افتقدتني أوى .. لو كان همك انى أحضر خطوبتك

مكنش حدفتنى الحدفة السوداء دي وبعتنى السفرية دي يوم خطوبتك

"-عمر" معللاً ذلك : أعمل ايه يا "كرم" .. انت عارف اللخبطة اللي حصلت فى تسليم شحنة

العنب ومكنش فى حد غيرك هيقدر يقوم بالمهمة دي ولو كنا اتأخرنا شوية كان زمان الشحنة

كلها فسدت وكانت الخسارة هتبقى كبيرة

-عارف يا سيدي انى دراعك اليمين .. وانى أكثر حد انت بتثق فيه

-مش بس كدة .. انت صاحبي وأخويا اللي ما ولدتهوش أوى .. احنا صحاب من أيام ابتدائي يا

"كرم" ولحد دلوقتي ما افترقناش أبداً

-أه أيام .. فاكراً أما كنا فى ثانوي والبنت أخت "أيمن المنشاوى" أم عنين زرقا دي اللي كانت

كل ما تشوفك فى بيتهم تعاكسك .. حركاتها كانت مفقوسة أوى

دوى ضحك الصديقان فى مرح وهما يستعيدان ذكرياتهما معاً:

-أه طبعا فاكرها .. دي كان عليها تقل دم مفيش بعد كدة

-هتقولى ده أنا كنت لما بشوفها بحس انى مخنوق أكن روحى بتطلع

دوت الضحكات مرة أخرى , ثم نظر "عمر" الى ساعته ونهض فجأة قائلاً :

-ياه ده أنا كدة هتأخر , سلام يا "كرم"

-سلام يا "كرم"؟! .. استنى يا ابني سلام ايه ملحقتناش نقعد مع بعض ولا قولتلك تفاصيل السفرية

-معلش أصلى هعدى على "نانسى" طالعين يومين شرم

-ماشى يا عم الله يسهلوهو .. أنا مش بحسد أنا بقر بس

"-عمر" فى جدية : "كرم" مش هوصيك على الشغل ولو فى أى حاجة كلمنى فى أى وقت

صبح أو ليل

-يلا انت بس ومتقلقش كله هيمشى أكنك موجود بالظبط

-ربت "عمر" على كتفه قائلاً : عارف يا "كرم"

ثم حمل هاتفه النقال وانصرف.

نظرت "نانسي" من نافذة غرفتها الى سيارة "عمر" الفارهة وهي تعبر بوابة الفيلا .. كانت الفيلا تتكون من طابقين ويحيط بها حديقة كبيرة يبدو عليا علامات الالهال وكأنه لم يراعيها أحد منذ وقت طويل.. نزلت "نانسي" الدرج وجدت والدتها تجلس فى الطابق السفلي فقالت لها :

-مامي "عمر" جه .. يلا سلام

"-نانسي" زى ما نبهت عليكي ركزي فى كل كلمة وفى كل تصرف مش عايزة غلطات يا "نانسي"

-متقلقيش قولنا.. سلام

نزلت "نانسي" درجات الفيلا تتبعها خادمتها بحقيبته تحوى بعض ملابسها ,كانت ترتدى بنطلون جينز وبالطو أحمر شكل مع شعرها الأشقر المتطاير لوحة فنية مثيرة ..وجدت عمر قد خرج من سيارته بعدما فتح له السائق الباب:

-حبيبي وحشتيني

-وانت كمان

قبلته نانسى على وجنتيه , ابتسم لها عمر:

-جاهزة؟

-جاهزة أوى يلا بينا

-مامتك موجودة ؟

-ايوة جوه

-طيب حبيبي ما يصحش آجي هنا وتكون ومامتك موجودة وأنا ما أسلمش عليها

"-نانسي" وهي تحاول أن تخفى ضيقها : اهاا طيب يلا بسرعة سلم عليها

دخل الاثنان الفيلا واستقبلتهما "نادين" التى سلمت على "عمر" : "عمر" ازيك يا حبيبي

-الحمد لله .. ازي حضرتك مدام "نادين"

-بخير يا "عمر" .. رجعتوا تانى ليه .. "نانسي" نسييتي حاجة

-لا يا مامي "عمر" حب يسلم عليكي أما عرف انك موجودة

-ابتسمت "نادين" قائله : حقيقي يا عمر كلك ذوق

: -نانسي" : يلا يا "عمر" بأه

"-نادين" : مستعجلة ليه يا "نوسة" لسه مشبعناش من "عمر" , ان شاء الله بعد ما ترجعوا

من شرم كل العيلة يا "عمر" معزومة عندنا

-تسلمي يا مدام "نادين" أكيد طبعا يشرفنا اننا نلبي دعوة حضرتك

"-نادين" : صحيح يا "عمر" هتجيب ايه لـ "نانسي" هدية الخطوبة .. توعى تكون سفرية

شرم هي هدينها كدة هقولك عليك بخيل على طول

"-عمر" : لا طبعاً مقامها عندي أكبر من كدة
قال ذلك ثم أخرج من جيب معطفه علبه قطيفة والتفت الى "نانسي" قائلاً :
-مبروك عليكى يا حبيبتي
-قالت "نانسي" وقد لمعت عيناها من الفرحة : ميرسي يا "عمر"

فتحت العلبة لتجد سوار رائع من الماس , كادت "نادين" أن تشهق من فرط حماستها لرؤية
السوار والتفت عيناها بعين ابنتها وقد اتسعت عيناها هي الأخرى ,التفتت "نانسي" الى
"عمر" قائلة بدلع :
-لبسهولى انت يا "عمر" بليز

نظرت "نادين" لـ "نانسي" نظرة رضى وقد أعجبها ما فعلت ' ألبسها "عمر" السوار فى يدها
اليسرى فتحسسته بيدها اليمنى وداعبت فصوصه التى تساوى كل منها مبلغاً لا يستهان به , ثم
طبعت قبلة على وجنت "عمر" قائلة:
-حبيبي ميرسي بجد على الهدية الجميلة دى
"-عمر" مبتسماً : المهم انها تكون عجبك
-نظرت اليه نظرات معبرة قائلة : عجبنتى جدا كفاية انها منك انت

قالت فجأة بمرح : يلا بأه عشان متأخرش أكثر من كدة
-التف "عمر" الى "نادين" قائلاً : مع السلامة يا مدام "نادين"
-مع السلامة يا "عمر" .. مع السلامة يا "نانسي" .. خلى بالك منها مش هوصيك
-دى فى عنيا متقلقيش عليها

تابعتهما "نادين" بعينها وابتسامة كبيرة مرسومة على شفيتها حتى ركبا الاثنان السيارة
وانطلقا الى المطار ومنه الى شرم.

الفصل السادس

بعد صلاة المغرب رن جرس الباب ففتح "عبد الحميد" واستقبل القادم:

- أهلاً بيك يا "مصطفى" يا ابني اتفضل

- أهلاً بيكي يا عمى ازى صحتك

دخل "مصطفى" حاملاً علبة جاتوه كبيرة

- بخير يا ابني اتفضل اعد .. ليه بس مكلف نفسك

- لا أبداً ده فضلة خيرك يا عمى

جلس "مصطفى" وتوجه "عبد الحميد" الى المطبخ ليجد "ياسمين" وأمها يعدان العصير ,
نظر اليها قائلاً:

- يلا يا "ياسمين" يا بنتى خطيبك جه بره

ازدادت سرعة دقات قلبها عندما سمعت كلمة (خطيبك) فلكم تمننت سماعها وها هي أحلامها
تتحقق شيئاً فشيئاً

حملت صنية العصير والكيك وتوجهت الى الصالون بعدما ألقت نظرة على نفسها فى المرآة
المعلقة على الحائط بجوار الحمام , دخلت الى الصالون قائلة:

-السلام عليكم

-وعليكم السلام

توجهت حيث يجلس "مصطفى" وقدمت اليه العصير قائلة:

-اتفضل

-متشكر تسلم ايديك

وضعت "ياسمين" الصنية على المنضدة الصغيرة التى أمامه وجلست فى معقد بعيد عنه
"عبد الحميد": اتفضل يا "مصطفى" يا ابني .. دوق عمايل عروستك شوف هيعجبك ولا لا

-طالما هي اللي عملاه أكيد هيعجبني

ضحك "عبد الحميد" .. ودخلت "سمية" مرحبة به:

-ازيك يا "مصطفى" يا ابني وازى الست الوالده والحاج ان شاله يكونوا بخير

نهض "مصطفى" ومد يده وسلم عليها قائلاً:

-الحمد لله بخير يا طنط بيسلموا على حضرتك

"عبد الحميد": شوية وراجعلك يا "مصطفى" .. البيت بيتك

-براحتك يا عمى اتفضل

خرج "عبد الحميد" جاذباً معه "سمية" وتركها "مصطفى" و"ياسمين" بمفردها لأول مرة
بعد الخطوبة

-ازيك يا "ياسمين"

ردت "ياسمين" بخجل وهي تنظر الى الأرض : الحمد لله

-ايه .. كل مرة هتفضلى بصره للأرض كدة ؟

ابتسمت بخجل قائلة : يعني لسه مخدمتش على حضرتك

-وكمان حضرتك .. لأ كدة كتير احنا خلاص بقينا مخطوبين

تناول "مصطفى" قطعة من الكيك الذى أمامه , ثم نظر اليها قائلاً:

-تسلم ايديك شكلك ممتازة فى المطبخ
ابتسمت قائله : ماما عودتنى أنا و "ريهام" على دخول المطبخ من صغرنا
-ممتاز يعني دكتورة وفى نفس الوقت ست بيت كمان
اتسعت ابتسامه" ياسمين" وسعدت كثيراً لهذا الإطراء

-احم احم .. "ياسمين" أنا هطلب من والدك اننا نخرج مع بعض بكرة .. يعني عشان نتعرف
على بعض أكثر ونكون براحتنا أكثر
-مفيش مشكلة بس هسأل الأول "ريهام" اذا كانت فاضية بكرة ولا لا
"-مصطفى" باستغراب : "ريهام" مين ؟
"-ريهام" أختى
-ضحك "مصطفى" قائلاً : أنا عايز أخرج معاكى انتى مش مع أختك
-ما أنا فاهمة .. بس مينفعش نخرج من غير "ريهام"
-قال لها بحده : ليه مينفعش يعني ؟
-قالت بحرج : كده .. عشان مينفعش أنا وحضرتك نخرج لوحدنا
-قال وقد ازدادت حدته : أنا خطيبك مش واحد من الشارع

-تضايقت "ياسمين" وازداد ارتباكها بسبب حدته : مش قصدى .. بس مينفعش نخرج لوحدنا
قبل كتب الكتاب
-ما تقلقيش .. لو على باباكي أنا هعرف أفنعه
-قال له بحزم : ما أعتقدش ان بابا ممكن يوافق وحتى لو وافق أنا مستحيل أخرج معاك
لوحدى .. لو مصر على الخروج لازم "ريهام" أختى تكون معانا

استسلم "مصطفى" مضطراً لانضمام "ريهام" اليهما .. لكنه شعر بالضيق من هذا الأمر فلکم
كان يتمنى أن يخرجاً بمفردهما مثلما يفعل أصدقائه مع الخطيبه .. كان يتوقع مثل هذه العلاقة
وأن يباح له الخروج والتجاوز بما انه قد أصبح خطيبها .. لكنه لم يتوقع أن يخطب فتاة تفكر
بهذه الطريقة.

=====

تناولت " كريمة" هاتفها واتصلت بـ " عمر " أتاها صوته عبر الهاتف:

-السلام عليكم حبيبة قلبي
-وعليكم السلام .. وصلت بالسلامة يا "عمر" ؟
-أيوة يا أمى الحمد لله
-طيب يا ابنى كنت بتظمن عليك .. "نانسي" جمبك ؟
-لا "نانسي" فى اوضتها أنا أعد تحت فى المطعم منتظرها
-طيب يا حبيبي سلمى عليها
-يوصل يا أمى .. مع السلامة
-مع السلامة

انهى المكالمة ووضع هاتفه على طاولة الطعام أمامه , نظر الى ساعته وأخذ يتململ فى جلسته
,كان يرتدى حلة داكنة اللون أضفت عليه وسامة وجاذبية كبيرة .. لم ينتبه لنظرات تلك الفتاة

التي تجلس على الطاولة التي أمامه .. كانت تتفرس فيه بجرأه .. وتلك التي تجلس على يمينه تختلس اليه النظر رغم جلوسها مع رجل .. كان "عمر" يعلم تماماً بأنه محط أنظار النساء بل ومحط أطماعهن أيضاً .. ورغم ثقته الكبيرة في نفسه إلا أنه لم يتلفت أبداً لتلك العلاقات العابرة ولا لتلك النساء اللاتي يحاولن ايقاعه في شباكهن ونيل صداقته .. كان التفكير بالمرأة يمثل له معنى واحد فقط .. وهو الحب الذي يتوج بالزواج والاستقرار .. فلم يكن رجل هوائي أو عابث .. بل كان جاداً نشيطاً طموحاً .. نظر مرة أخرى الى ساعته وأمسك هاتفه وأوشك على الاتصال بها عندما وجدها تتوجه نحو .. نهض "عمر" وعلامات العبوس واضحة على محياه .. أزاح لها الكرسي المواجه له لتجلس عليه

-أنا واقعة من الجوع .. ياريت تطلبنا الأكل

عندما لم تتلقى رداً رفعت نظرها اليه فواجهتها نظراته الصارمة .. لم تفهم "نانسي" سبب تلك النظرات .. فقالت له:

-ايه فى حاجة ؟ مالك ؟

-ايه اللي انتى لابساه ده ؟

نظرت الى فستانها زهري اللون الذى يصل الى ركبتها ويكشف عن ذراعيها وعنها وجزء من مقدمة صدرها , رفعت نظرها اليه قائلة:

-ايه ماله ؟ وحش ؟ ده فستان من تصمم...

-قاطعها فى صرامة : ما يهمني مين صممه .. انتى مش شايقة انه مفتوح زيادة عن اللزوم

-قالت بتأفف : مفتوح ايه يا "عمر" .. ما الناس كلها بتلبس كده

-أنا ماليش دعوة بالناس .. ليا دعوة بواحدة بس من الناس وهى انتى يا "نانسي"

-محسنى انى لابساه لبس فاضح .. ده فستان عادى جدا ومحترم

-ده محترم !؟

-والله ده لبسي وانت شايق لبسي من أول ما اتعرفنا .. احنا اتعرفنا لمدة 3 شهور قبل الخطوبة وشوفتنى بلبس أصعب من كدة كمان

-أيوة قبل كدة مكنش في رابط بيربطنا ببعض أما دلوقتى انتى خطيبتي يعني اللي يمسك يمسنى .. وأنا ما أحبش مراتى حد يشوف جسمها غيري أنا وبس

-صاحت بغضب : شوية شوية تقولى غطى شعرك

-لأ مش هقولك البسيه دلوقتى .. أنا عارف انك لسه مش مستعدة للخطوة دى

-انفعلت قائلة : لا دلوقتى ولا بعدين .. بص يا "عمر" أنا كدة عشت واتببيت كدة ومش ممكن

أبدأ ألبس البتاع ده على شعري .. انت عايز تدفنى بالحيا

-قال بصرامة :ادفئك بالحيا عشان بغير عليكى ومش عايز راجل غيري يشوف أى حاجة منك

-الكلام ده ما يقولوش راجل راقى ومتقف زيك .. وبعدين انت جايبنى هنا عشان تعكنن عليا
وتتخانق معايا

-حاول "عمر" احتواء الموقف قائلاً : لا مش جايبك عشان أعكنن عليكى يا "نانسى" .. بس
راعي انى راجل وبغير على مراتى

-قالت بدلال وهى تحاول تغيير الموضوع : مش لما أبقى مراتك

أمسك يدها وقبلها ووضعها على وجنته ونظر الى عينيها قائلاً : قريب أوى هتكونى مراتى ..
مراة "عمر نور الدين الألفى"

وهنا حضر النادل ليسألها ماذا يحبان لطعام العشاء.

=====

-يا مامى ده بجد متمزت جداً وتفكيره غريب .. تصورى كنت لابسه فستان على الركبة بيقولى
انه مكشوف أمال لو شافنى بالبكيني كان قال ايه

-قالت "نادين" عبر الهاتف : حاولى تمتصى غضبه وتكسبيه على أد ما تقدرى

-أنا مش متخيلة ازاي واحد فى مركزة وفى مستواه يفكر بالإسلوب المتخلف ده .. عايز
يرجعنا لزمان سي السيد .. هو يأمر وأمينة تنفذ .. وأمشى فى الشارع بالملاية اللف .. ما بنت
عمته بتلبس نفس ستايلي محدش بيوجهلها كلام ليه

"-نانسى" حاولى تسيطرى على أعصابك شوية

-مش قادرة ده بجد انسان مستفز وقال ايه عايزنى أعطى شعري ناقص يقولى اعدى فى البيت
وماتخرجيش الا بإذنى

-لا مش للدرجة دى "عمر" انسان متحضر وابن ناس ومتعلم

-ما هو واضح التحضر!

-خلاص يا "نانسى" أفلى على السيرة دى .. وحاولى تكسبيه وتطوعيه وتوافقيه على كلامه
حتى لو مش هتنتفديه بعد كده .. المهم دلوقتى ان الدبلة اللى فى ايدك تنتقل لايدك الشمال
بأسرع وقت

-قالت بغنج : متقلقيش "عمر" بأه زى الخاتم فى صباعى

-أبوة كدة ده الكلام اللي عايزة أسمعہ ..يلا باى عشان خارجه

-باى.

الفصل السابع

انتهت "ياسمين" من ارتداء ملابسها وخرجت حيث يجلس "مصطفى" ووالدها ووالدتها وأختها "ريهام"، بمجرد أن رآها "مصطفى" نهض ومد يده ليسلم عليها:
-ازيك يا "ياسمين"
"ياسمين": الحمد لله

وقفت أمام يده الممدودة بالسلام اليها لا تدري ماذا تفعل، فهي ليست معتادة على السلام على الرجال بيدها وفي نفس الوقت لا تريد احراجه، تمتمت بصوت خافت:
-معلش أنا اسفة مش بسلم بالإيد
شعر "مصطفى" بمزيد من الضيق والحرج، سحب يده وجلس في مكانه وعلامات التبرم ظاهرة على محياه قال في نفسه (قال ما بتسلمش بالايدي قال ده أنا شكلي هشوف معاكى أيام بمبي منقطة باسود، (جلست "ياسمين" على المقعد الفارغ بجوار والدها

"- عبد الحميد": ما فيهاش حاجة يا بنتى أما تسلمي عليه ده برده خطيبك

لم ترد "ياسمين" لأنها لا ترغب في الجدل مع والدها أمام "مصطفى" .. جلسوا قليلاً ثم انصرف "مصطفى" و "ياسمين" و "ريهام" معاً.

=====

التف ثلاثتهم حول مائدة أحد المطاعم التي تطل على النيل، كان الوضع غريباً بالنسبة لـ "ياسمين" فهذه هي المرة الأولى التي تخرج فيها مع رجل ولم تستطع حتى الآن أن تعتاد عليه كخطيب.

حاول "مصطفى" استدراجها للاشتراك في الحديث معه و بالفعل تخلت "ياسمين" شيئاً فشيئاً عن جمودها وشاركته الحوار .. تحدثت عن عمله وعن أسرته وعن أحلامه ونظراته للمستقبل .. أعجبت "ياسمين" بطموحه وتفانله .. تحدثت معه عن دراستها وعن رغبتها في العمل والتي لم تضعها حيز التنفيذ .. كانت "ريهام" صامته معظم الوقت تفسح لهما المجال ليتحدثا معاً .. كانت سعيدة بروية أختها وهي تعتاد شيئاً فشيئاً على خطيبها .. كانت "ياسمين" أيضاً في غاية السعادة لأنها وجدت موضوعات مشتركة كثيرة يتحدثان فيها .. كانت "ياسمين" شخصية قوية واثقة في نفسها لكن حيائها كان يعطى انطباعاً خاطئ عنها بالضعف.

استمتع "مصطفى" بالحديث مع "ياسمين" وشعر بالألفة معها، وبعد ساعتين أوصلهم الى المنزل وعاد هو الى بيته.

=====

في اليوم التالي وقف "عمر" على الشط ينظر الى البحر تارة وتارة أخرى ينحني لينتقط شيئاً

ويعبث به .. رأته "نانسي" وهى مقبلة من بعيد , بمجرد أن رآها ابتسم وأقبل نحوها قائلاً:

-وحشتيني

-ضحكت بنعومة : ده أنا كنت لسه معاك من ساعة

-أنا عايزك معايا كل ساعة

نظرت "نانسي" الى ما يحمله فى يده , قائله:

-ايه ده ؟

-دي قطع صخور صغيرة متكسرة بتلاقيها على الشط دايماً , كل صخرة منهم ليها شكل وأبعاد وألوان وملمس مختلف

قالت وهى ترفع حاجبها بإندهاش:

-وانت بتعمل بيهم ايه ؟

-ابتسم قائلاً : بجمعهم

-بتجمعهم ازاي يعنى ؟

-مسمعتيش عن هواية جمع الطوابع وهواية جمع العملات أنا بأه أختلف عن الآخرين طول عمرى مميز عشان كدة أما فكرت أجمع حاجة جمعت ضحور

قال ذلك و أطلق ضحكة عالية ثم قال:

-دى هواية كانت عندى وأنا طفل صغير .. كل مكان ماما وبابا ياخدوني فيه ويكون فيه بحر .. أجمع شوية من الصخور الصغيرة وأفضل فترة طويلة أنقيهم زى ما أنا عايز عشان تكون ذكرى حلوة لليوم ده .. عندى مجموعة كبيرة منها لسه محتفظ بيها لحد دلوقتى.

صمتت "نانسي" فهى لا تدرى ماذا تقول , حدثت نفسها قائلة (مجنون ده ولا ايه بأه ده رجل أعمال ده ولا عيل فى كى جى)

فى هذه الأثناء أقبلت مجموعة تضم رجلين وثلاث نساء .. هتف أحد الرجلين:

"-نانسي "عاش مين شافك

التفتت "نانسي" الى محدثها وانفرجت أساريرها وهتفت:

"-عماد" هاى هاو آر يو

أقبل المدعو "عماد" قائلاً : مبروك يا "نانسي" وأسف انى مقدرتش أحضر الخطوبة انحنى "عماد" ليقبل "نانسي" .. وقبل أن يفعل دفعه "عمر" فى صدره وصاح غاضباً:
-ايه يا كابتن أنا مش مالى عينك ولا ايه

قال ذلك ثم سحب "نانسي" من ذراعها وانطلق عائداً وسط دهشة "عماد" الذى أخذ يراقبهما .. كانت "نانسي" تجرى للحاق بخطوات "عمر" وهو مازال مطبقاً على ذراعها ويسحبها منه .. توقفت فجأة وسحبت ذراعها من يده بقوة قائلة:

-انت ايه اللي انت عملته ده

قال لها غاضباً:

-ايه اللي أنا عملته ولا ايه اللي الحيوان ده كان عايز يعمله
-ده كان هيسلم عليا وبيباركلى على الخطوبة عادى يعني

صاح عمر وقد ازداد غضبه : عادى يعني ايه , بيوسك وأنا واقف .. ليه شيفانى قفص جوافه
أدامك

-ده "عماد" ابن صاحبة مامى الأنتيم يعني مش حد غريب ومترببين مع بعض و "عماد"
بجد حد كويس أوى
-كل اللي انتى قولتية ده ما يسواش عندى حاجه

أخذ نفس عميق يحاول به السيطرة على غضبه : اسمعي يا "نانسي" أنا ليا طباعى ومبادئى
اللى اتربيت عليها ومش هتنازل عنها أبداً فى يوم من الأيام .. حاولى انك متعمليش الحاجات
اللى بتضايقتى منك .. والحاجه اللي هقولهاك مرة هتبقى خط أحمر متقربيش ليها تانى ..
وأولهم اللي اسمه "عماد" ده

-يعني ايه ؟ انت عايز تلغى شخصيتي تماماً وتمشيني وراك ..مين بأه اللي هتسمحك بكده

نظر اليها مهدداً : ده اللي عندى ومفيش كلام تانى أقوله
ثم انصرف وتركها تغلى من الغضب

=====

-وبكدة نكون خلصنا محاضرة النهاردة .. اتفضلوا

تعالت الأصوات داخل المدرج وهم ينهضون لمغادرته , سارت "ريهام" نحو بوابة الجامعة فقد
كانت تلك هى المحاضرة الأخيرة لها اليوم .. سمعت صوتاً يناديها:
"-ريهام" .. "ريهام"

التفتت لتجد "معتز" الذى يسرع فى خطواته ليلحق بها .. التفتت "ريهام" يميناً ويساراً
تخشي أن يراها أحد زملائها أو زميلاتهما , أقبل "معتز" قائلاً:

"-ريهام" مالك بتعامليني كدة ليه ؟

نظرت اليه قائلة : نعم ؟ .. عايزنى أعاملك ازاي ؟

"-ريهام" قولتلك مليون مرة أنا مش بلعب .. ولو هلعب بأى حد مش ممكن ألعب بيكي انتى
بالذات

-أستاذ "معتز" أنا معنديش إلا الكلام اللي قولتهولك قبل كدة .. اللي عايزنى هيدخل البيت من بابيه مش يفضل مستنى تحت الشباك منتظرة الفرصة اللي يلاقى فيها الشباك مفتوح يمكن يعرف يدخل منه .. وأظن انت عارف باب بيتنا كويس لأنه أدام باب بيتكوا على طول .. عن اذنك

التفتت لتغادر المكان فجذبها "معتز" من ذراعها ليووقفها , نزعت ذراعها منه بقوة وصاحت غاضبة : انت ازاي تسمح لنفسك تمسكنى كدة
-أنا أسف بس عايزك بس تسمعيني
-مش محتاجه أسمع لأنى عارفه الكلام اللي هتقوله كويس
-لا مش عارفه .. اديني بس فرصة أتكلم .. ماشي ؟
نظرت اليه صامته تاركة له المجال ليتحدث بما لديه

-قولتك قبل كدة ان بابا مستحيل يوافق يخطبلى قبل ما أخلص السنة دى انتى عارفه اننا فى آخر سنة فى الكلية
قاطعته قائلة : خلاص اصبر لحد ما تخلص السنة دى زى ما باباك عايز

-ما أنا صابر أهو أصلا مش فى ايدي حاجة غير انى أصبر .. بس ليه تحرميني منك وتفضلى بعيده عنى كل ده .. لسه السنة طويلة يا "ريهام"
-انت عايز ايه بالظبط يا "معتز "

-يعني فيها ايه لو خرجنا مع بعض فى مكان عام والناس كلها شيفانا ..مفياش حاجة وطالما انتى واثقة فى نفسك خلاص يباه مش هتخافى من حاجة , فيها ايه لو اتكلمنا فى التليفون بكل احترام مجرد نطمئن على بعض من وقت للتانى أحس أنك معايا وتحسى انى معاكى انا مش عايز غير انى أطمئن عليكى وتطمنى عليا , أعتقد ده مش غلط ولا عيب

صمتت "ريهام" لبرهه ثم قالت له فى حزم:
-عارف .. الكلام اللي انت قولته دلوقتى خلاك تنزل فى نظرى من سابع سما لسابع أرض

قالت ذلك ثم تركته وانصرفت , تابعها "معتز" بعينيه والشرر يتطاير منهما قائلاً:
-ماشى يا "ريهام" .. مش "معتز" اللي يتعامل بالطريقة دى .. انتى لسه متعرفيش مين هو "معتز".

الفصل الثامن

جلس "عمر" فى شرفة الفيلا واجماً , أقبلت "كريمة" وتطلعت الى ابنها الساكن , اقتربت منه ووضعت كفها على كتفه , فإنتبه "عمر" لوجودها وأمسك يدها وقبلها وابتسم لها , بادلتة أمه الإبتسامه وجلست على المقعد المجاور له قائله:

-مالك يا "عمر" شكك مش عاجبنى من ساعة ما رجعت انت و "نانسي" من شرم .. حصل حاجة يا ابني ؟ ..قولى احكيلى .. أنا أمك ويمكن أقدر أساعدك
-لا أبداً يا أمي مفيش حاجة
"عمر" انت طول عمرك صريح معايا , مش عايز تقولى مالك خلاص هحترم رغبتك لكن ما تكديش عليا

شعر بالحرج من كلامها واعتذر اليها قائلاً:

-أسف يا أمي بس مضايق شوية

-من "نانسي" ؟

-لا مش من "نانسي" .. من تصرفات "نانسي"

-فزورة دى ولا ايه ؟

-لا مش فزورة .. "نانسي" اتربت تربية مختلفة عنى شوية .. وده لأن أصلاً أهلها مختلفين عنك وعن بابا .. ادوها حرية بدون حدود او قيود .. ويمكن كانت فاكرة عشان أنا راجل وغني يبقى مفيش عندى خطوط حمرا .. بس أنا بحاول أطبعها بطبعي بس شكلها هتتعبنى شوية

-فكرت كريمة فى كلامه ثم قالت : "عمر" انت لسه على البر , يعني لو شايف ان "نانسي"

.....

قاطعها "عمر" قائلاً:

-ماما أنا بحب "نانسي" ومش هسيبها .. وبعدين أنا واثق انها تقدر تتغير للأحسن وتقدر تتنازل عن الحاجات اللى بتضايقتى .. لأنها بتحبني .. وطالما بتحبني بياها هتحاول على أد ما تقدر انها ترضيني زى ما أنا بحاول أرضيها .. هى بس مشكلتها مدلعه شويتين تلاته ومش واخدة على ان حد يقولها اعلمى كذا وما تعمليش كذا ..بس بكرة تتعود وتفهم يعني ايه جواز ومسؤليه

-انت أدري بمصلحتك يا ابني .. وأنا من جهتى مش هبطل الدعوة اللى بدعيهاك ليل ونهار وفى صلاتى وفى كل وقت (ربنا يحميك وينورك بصيرتك ويكفيك شر ولاد الحرام)

-ده انسان لا يُطاق

هتفت "نانسي" بهذه العبارة فى غضب بعدما قصت على "نادين" نا حدق بينها وبين "عمر" فى شرم..

-تمتمت "نادين" قائله : مضطرين نستعمله

نظرت "نانسي" اليها وقالت فى عصبية:

-لا أنا مش مضطرة أستحمل أى حاجة .. مستحيل أتجوز بني آدم متخلف وعديم الذوق بالشكل ده , نفسي أفهم ازاي ده واحد المفروض انه من أرقى عائلات مصر.. ده ابن رئيس الخدم بتاعنا متحضر عن اللي اسمه "عمر" ده

قالت "نادين" فى برود :

-بس ابن رئيس الخدم بتاعنا مش هيقدر ينقذنا من ورطتنا .. مفيش حد غير "عمر" يقدر يلحقنا قبل ما نتفضح أدام الناس

استعادت "نانسي" هدوءها بعدما تنبعت لمشكلتهم الأساسية وقالت بتأفف :
-طيب أعمل ايه دلوقتي من ساعة ما رجعنا مكلمنيش وقبل ما نرجع يدوب قالى كلمتين بالعافية

ألتقطت "نادين" هاتف "نانسي" وناولتها اياه قائله:

-اتصلى بيه انتى .. متستنيش اتصاليه .. اعتذريه .. وصلحى الموقف بكلمتين حلوين .. واياكى ثم اياكى تحصل مشكلة تانية .. خلى الموضوع يعدى على خير لأن شكل "عمر" مش سهل أبداً .. ثم أردفت بسخرية:
-فالحة بس تقوليلى ده زى الخاتم فى صباعى يا مامى

أمسكت "نانسي" هاتفها متبرمة واتصلت به

تررررر تررررر تررررر

أخرج عمر خاتفه من جيبه وارتسمت ابتسامه صغيره على محياه عندما رأى أن المتصل "نانسي" .. ابتسمت "كريمة" لابتسامه ابنها وعرفت المتصل دون أن تنظر الى الهاتف , ربتت على كتفه وغادرت فى صمت

" -عمر" وهو يتصنع الجديه : ألو

" -نانسي" بصوت ناعم : ألو

ثم صمت كلاهما .. تكلمت "نانسي" أخيراً وقالت:

-وحشتنى أوى

اتسعت ابتسامه "عمر" ولكنه صمت ولم يتفوه ببنت شفاه

-قالت له بنيره مستكينه : أتا عارفه انك زعلان منى .. أنا فعلاً غطت .. ومهنش عليا تنام

وانت زعلان منى .. أنا أسفة يا حبيبي

اتسعت ابتسامته أكثر ولمعت عيناه لكنه ظل محتفظاً بنبرته الجادة وقال لها:

-أسفة على ايه بالظبط ؟

-انت كان معاك حق .. ما ينفعش بعد ما اتخطبتك انى أستمر بنفس الطريقة اللي كنت بتعامل

بيها قبل الخطوبة مع صحابي .. عشان دلوقتي أنا بتاعتك انت وبس
لم يستطع "عمر" الاستمرار في التظاهر وهمس قانلاً:
-وانتي كمان وحشتيني أوى

ارتسمت ابتسامة خبيثة على شفيتها وأطلقت نفساً عميقاً فقد استطاعت احتواء المشكلة وعاد
لها "عمر" كما كان

كانت "ريهام" تجلس ساهمة على فراشها ولم تشعر بـ "ياسمين" وهي تفتح باب الغرفة
وتدخل وتغلقه خلفها , لاحظت "ياسمين" شرود أختها فسألتها :
-في حاجة يا "ريهام" ؟
لم تجبها "ريهام" بل لم تسمعها أصلاً , فنادت "ياسمين" بصوت أعلى:
" -ريهام" .. "ريهام"
-هه .. بتنادى ؟
-بنادى ؟ .. ايه يا بنتي فين عقلك ؟
-مفيش أصلى بفكر في مشكلة واحدة صحبتي
-مشكلة ايه ؟

توجهت "ياسمين" اليها وجلت بجوارها على السرير .. شعرت "ياسمين" بأن المشكلة
خاصة بـ "ريهام" وليس بصديقتها كما ادعت , لكنها لم تُفصح عما يدور في عقلها لتتركها
تتحدث بحرية
-ها .. ايه بأه يا ستي مشكلة صحبتك ؟
اعتذلت "ريهام" في جلستها ووضعت يديها في حجرها وفركتهما بتوتر وقالت:
-بصى هي حكلي المشكلة دي وأنا معرفتش أرد عليها فقولت أحكيك انتي .. لأنك أختي
الكبيرة وأنا بنق في نصايحك يا "ياسمين"

مررت "ياسمين" كفها على شعر أختها في حنان وقال لها:
-قولى يا حبيبتي سمعاكى

-في واحد معانا في الجامعة في نفس الكلية بتاعتنا وفي نفس السنة .. يعني تقدرى تقولى انه
.. يعني .. بيحب صحبتي دي
سكنت "ياسمين" قليلاً ثم قالت:
-يعني ايه بيحبها ؟

-نظرت اليها "ريهام" باستغراب قانلة : مالك يا "ياسمين" هي فيزيا .. بيحبها يعني بيحبها
-ايوة يعني ايه بيحبها .. ايه اللي هو عمله وهي فسرتة انه حب
-بصراحة هو قالهاها بطريقة مباشرة

شعرت "ياسمين" ببعض القلق لكنها سيطرت على ردود أفعالها:
-وهي بتتكلم معاه فين ؟

-لا .. هي مش بتتكلم معاه خالص .. هو وقفها بس كذا مرة في الجامعة وقالها الكلام ده .. بس هي لا بتخرج معاه ولا بتعد معاه لا في الجامعة ولا بره الجامعة ولا مدياله ريق حلو أصلاً

شعرت "ياسمين" بالإرتياح ,سألتها قائلة:
-طيب فين المشكلة تحديداً ؟

-المشكلة انها بتصدده جامد لأنه طبعا عايز نظام خروج وموبايلات وكدة يعني .. زى أى اتنين بيحبوا بعض
-طيب طالما بيحبها زى ما بتقولى ليه ما يتقدملهاش وكل ده يبقى في النور

قالت "ريهام" بإحباط : أبوه السبب .. مش راضى يخطبله قبل ما يخلص دراسته ويأخذ شهادته
-طيب برده يا "ريهام" معرفتش فين المشكلة

-المشكلة انها مضايقة يا "ياسمين" وحسه انها بتظلمه , يعني هو بيحبها وأكد بيحب يكلمها يعني غصب عنه عشان بتوحشه , وهي آخر مرة صدته جامد أوى وقالتله كلام صعب وهو أكيد زعل منها..

وقصت عليها "ريهام" تفاصيل آخر حوار لها مع "معتز .." ثم قالت:
-يعني فيها ايه لو كانت استجابت لكلامه .. يعني هو مش عايز حاجة وحسة هو كل اللي طلبه انه يظمن عليها بالتليفون كل فترة بكل احترام مش أكثر من كدة , هو ممكن يفهم صدها له ان هي مش عايزاه فيصرف نظر عنها
-طيب هو وبتقولى بيحبها .. طيب هي مشاعرها ايه ناحيته ؟
-بصراحة هي حسه انها معجبه بيه جداً وشكلها كده بتحبه

صمتت "ياسمين" قليلاً لتفكر جيداً فيما ستقوله ,, فهي تعلم الآن أن الشيطان يلعب في رأس أختها ,قالت بعد تفكير :

-يعني هو بيحبها وهي بتحبه .. طيب قوليلي يا "ريهام" مين الوحيد اللي في ايده انه يجمع بينهم أو يفرق بينهم ؟

-قالت "ريهام" فوراً : ربنا
جميل .. يعني هي عايزه الولد ده وبتحبه واللى في ايده انه يجمع بينها وبينه هو ربنا .. طيب انتى لما بتعوزى حاجة من ماما أو من بابا بتعملى ايه ؟

-مش فاهمة

-يعني أما بتعوزى تخرجى , أو تزورى صحبتك , أو لما بتعوزى فلوس , أو لبس جديد .. بتحاولى تراضى بابا وتكونى مطيعة ليه وتسترضيه وبعدين تطلب طلبك , ولا بتغضبيه وتضايقيه منك وبعدين تطلب اللي انتى عايزاه ؟
-أكيد بطيعة وأرضيه عشان يرضى يعملى اللي أنا عايزاه

-هى عايزه من ربنا اللى فى ايده قلبه وقلبه انه يجمع بينهم , ازاي باه عايزه تعصيه وبأى وش هتقدر تطلب منه وتدعوه يحققها طلبها وهى مخلياه غضبان منها

تسللت علامات الارتياح على وجه "ريهام" وابتسمت ابتسامة كبيرة وحضنت أختها ثم قالت:
-معاكى حق يا "ياسمين" .. الى هى عملته هو الصح , ربنا ما يحرمني منك يا أحلى
"سمسة" فى الدنيا

استسلمت "ريهام" للتوم أخيراً , فلقد اطمئن قلبها أن ما فعلته هو الصواب , أغمضت عينيها
وقبل أن تغوص فى سبات عميق تمتت قائله:
-يارب لو هو خير ليا قربنا من بعض فى الحلال ولو هو شر ليا متعلقش قلبي بيه.

الفصل التاسع

-معقولة .. يعني عايزة تفهميني انك لحد دلوقتي محبتيهوش !؟

خرج هذا السؤال من فم "سماح" صديقة" ياسمين "وهي تجلس معها على سريرها في غرفتها .. فلقد اعتادت الصديقتان على التزاور من فترة لأخرى فكل منهما تمثل للأخرى الأخت والصديقة المخلصة

-بصي بصراحة مشاعري حيادية .. يعني أبوة مش بحبه بس برده مش بكرهه .. هو انسان كويس ومشتفش منه حاجة وحشة ومناسب ليا

-أمال بأه خايفة ليه ؟

-تنهدت "ياسمين" قائلة : عشان معدش فاضل على الفرغ غير اسبوعين بس .. حسه ان فترة الخطوبة كانت قصيرة أوى , حسه انى لسه ما أعرفوش ولسه مش قادرة أفهمه أو أكون رأى واضح فى شخصيته ..مش متخيله ان بعد اسبوعين بالطبط هيتقفل عليا أنا وهو باب واحد

-بسيطة قولى لباباكي انك مش عايزة تتجوزي دلوقتي وانك محتاجة فترة خطوبة أطول

تنهدت مرة أخرى فى حسرة قائلة:

-للأسف بابا مصر ان الفرغ يكون فى معاده ومش شايف أى معنى لكلامي ولا مديه أى أهمية ,بيقولى هتبقى تعرفيه بعد الجواز

-قالت "سماح" باستغراب : منطقت عجب

بالطبع يجب أن تتعجب "سماح" من تفكير والد "ياسمين" لأنها تربت فى بيئة مختلفة عن تلك التى تربت فيها "ياسمين" .. "سماح" هى ابنة لتاجر كبير يعمل فى مجال التصنيع يملك مصنعاً لإنتاج المربي والعصائر , ووالدتها دكتورة نسا ناحجة ومشهورة .. رغم اختلاف المستوى الإجتماعى للفتاتين لكن هذا لم يمنع خيوط الصداقة من أن تمتد بينهما ونحول تلك الخيوط مع الأيام والسنون الى روابط متينة لا تنقطع أبداً .. ولربما ساعد فى ذلك أن أسرى "سماح" كانت أسرة طيبة ومحترمة , لم يكن كل اهتمام والداها منصب على المادة وتوفير المستوى اللائق لإبنتهما بل اهتمتا أيضاً بالجانب التربوى وبث الأخلاق والفضائل فيها ولم يتركها لها الحبل على الغارب ككثير ممن تراهم من هذه الطبقة.

-قالت "ياسمين" لصديقتها فى حزن : ياريت كان عندى أب يسمعني ويفهمني ويعبر اعتبار لرأبي ولكلامي خاصة فى الحاجات اللى تخصني .. زى باباكي يا "سماح" ما شاء الله عليه ربنا يحفظهولك عرف ازاي يكسبك ويصاحبك عشان كدة انتوا دايماً متفاهمين مع بعض وعشان كدة انتى مستغربة من تفكير بابا

صدره.. ثم نظر اليها وهو يبتسم فى صمت ..تطلعت اليه "نانسي" قائلة:

-مالك .. مبسوط ليه ؟

-يعني مش عارفه ؟

-لأ مش عارفه

-مبسوط عشان من يوم ما رجعنا من شرم وانتي بقيتي "نانسي" تانية وبطلتى تعملى الحاجات اللى تضايقتي .. خاصة لبسك

-يعني عجبك لبسي دلوقتى

-قال "عمر" فى تردد : أحسن كتير عن الأول .. بس .. يعني .. برده لسه

شعرت "نانسي" بالغضب وهو يبدأ فى الإشتعال بداخلها , فهى ومنذ خلافهما الأخير لم ترتدى شئ مكشوف رغم عشقها لفساتينها وتنوراتها القصيرة .. فكانت تظهر أمامه دائماً ببناطيل جينز و اسكيني وعليها شيميز أو توب ذو أكمام طويلة .. كانت تشعر بالضيق والإختناق من الإلتزام بهذه النوعية من الملابس فهى تحب التنوع ولا تحسب السير على وتيرة واحدة .. لكنها فى نفس الوقت كانت حريصة ألا يحدث بينهما خلاف آخر

-قالت له فجأة : "عمر" انت ما بتحبنيش

-اندهش قائلاً : ليه بتقولى كدة ؟!

-قالت فى دلال معاتبه اياه : عشان اللى بيحب حد بيحب يشوفه كل يوم وكل ساعة وما يفترقش عنه أبداً

-أزاح بيده خصلات شعرها الذهبية التى تساقطت على جبهتها فى حنان قائلاً:

-ومين قال انى مش عايز كدة

-قالت بحزن مفتعل : عشان لحد دلوقتى محددتش معاد الفرح , رغم انك قولتلى ان خطوبتنا مش هتطول

-قال لها فى جدية : أنا آسف يا حبيبتي بس فعلاً الفترة اللى فاتت كان عندى ضغط كبير فى الشغل .. بس خلاص هانت

-طيب متيجي نحدد المعاد دلوقتى

-ضحك قائلاً : ده انتى واقعة أوى

تظاهرت "نانسي" بالغضب مما قال وأزاحت ذراعه التى تحيط بكتفها وهمت بأن تتركه

وتبتعد عنه , لكن "عمر" لم يفسح لها المجالى وجذبها من ذراعها الى حضنه مرة أخرى قائلاً :

-شهرين كويس ؟

-حاولت رسم علامات الفرحة على وجهها وقالت : بجد يا "عمر"

-نظر اليها فى حب قائلاً : أيوة بجد .. شهرين وتكونى مراتى

-عانقته وقالت : با حبيبي أهو أنا دلوقتى اتأكدت ان انت فعلاً بتحبني

-عاتبها قائلاً : هو انتى كنتى لحد دلوقتى متأكدتيش

-نظرت اليه وقالت فى دلح وهى تلف ذراعها حول عنقه : كنت متأكده بس كنت عايزة أتأكد أكثر

-طب تفتكرى عندك فى البيت هيكون فى أى اعتراض على المعاد ؟

قال لنفسها (يعترضوا ايه بس دول هيغمى عليهم من الفرحة)

-لا يا حبيبتي ما اعتقدش يعارضوا وحتى لو حد اعترض أنا هقفلهم

-قال لها "عمر" بعتاب : لا يا حبيبتي ما ينفعش تتحدى أهلك كدة وتقفى أدامهم .. لو حصل واعترضوا أنا اللي هتفاهم معاهم.

=====

دخلت "نانسي" الى غرفتها بعدما أخبرت "نادين" بتلك البشري التي استقبلتها بفرحة عارمة فالتفتت الى هاتفها الذى أعلن عند ورود مكالمة لها .. التقطته وردت قائلة:

" -عماد" ازيك

-أهلاً بالناس الوحشة

-ضحكت قائلة : أنا وحشة ؟ .. ده انت ما بتشوفش بأه

-هو أنا عارف أشوفك انتى فى غطساته فى من يوم الموقف الزباله بتاع شرم مشفتكيش ولا اللي بتتخطب اليومين دول بيحبسوها فى بيتها

-قالت "نانسي" فى حزن : والله وحشنى أوى وكل الجروب وحشونى أوى ازي "أنور" و "مهاب" و "خالد" و "جيرمين .." كلهم وحشونى

-واضح أوى اننا وحشينك بدليل ان سيادتك بتسألنى وبتعبرنى

-أوف .. أعمل ايه يعني "عمر" مش حابب انى أروح الديسكو خالص وانتوا ما بتتقابلوش غير هناك

-تعالت ضحكاته قائلاً : أمال عايزانا نتقابل فين .. فى الجامع ..وبعدين استنى هنا من امتى حد بيمشى كلامه على "نانسي"

-قالت بحدده واستعلاء : محدش يقدر يمشي كلامه عليا يا "عماد"
-ما هو واضح أهو .. قالك ما تروحيش الديسكو يا "نانسي" وانتى قولتيله حاضر يا سي "عمر" اللي تشوفه .. ده حتى لبسك سمعت انك بقيتي عاملة زى يتى الحاجة .. بس تعرفي مش لايق عليكي دور أمينة ده خالص

-غضبت "نانسي" قائله " : عماد" ما تستفزنيش

-اسكتى بأه ده انتى طلعتى فشنك وأنا اللي كنت فاكرك شخصية

-أنا شخصية غصب عنك وعن الكل

-طيب اثبتيلي

-قالت بإندفاع : انتوا هتروحوا امتى ؟

شعر "عماد" بالسعادة لأنه استطاع تحقيق هدفه ,قال لها:

-شويه وهنكون هناك

-خلاص استنوني عشان أنا جايه النهاردة

-ضحك "عماد" بصوت عالٍ قائلاً : أحبك يا "نانسي" يا جامد .. مستنيك ما تتأخرش عليا

أغلقت "نانسي" هاتفها وفتحت خزانة ملابسها لتختار فستان يتكون من قطع رقيقة من القماش التي فشلت بأن تبقى على اتصال ببعضها البعض !

الفصل العاشر

أنهى "عبد الحميد" صلاة العشاء وظل يسبح ربه ويستغفره , أقبلت زوجته من خلفه قائلة:
-ربنا يتقبل منك يا سي "عبد الحميد"
نهض فأسرعت "سمية" بأخذ سجادة الصلاة من يده وطوتها ووضعها على الكرسي
-الله يكرمك
اتجه "عبد الحميد" الى السرير , فأسرعت "سمية" بفرد الغطاء عليه , ووقفت بجوار
الفراش ويبدو عليها علامات التردد , انتبه اليها قائلاً:
-خير فى حاجه ؟
-قالت بتردد : بصراحة فى موضوع كنت عايزه أكلمك فيه
-خير إن شاء الله ؟

-لأ خير .. خير إن شاء الله .. أصل .. يعني .. الموضوع بخصوص "ياسمين"
اعتدل "عبد الحميد" فى جلسته قائلاً:
-خير حصل حاجة بينها وبين خطيبها ؟
أسرعت "سمية" بإجابته:
-لأ .. لأ كفى الله الشر , ده الجدع بصراحة ما يتعيبش
-أمال فى ايه ما تقولى وقعتى قلبى
-أصل بصراحة كدة "ياسمين" مضايقة ان معاد الفرحة اتحدد بسرعة
قال وقد ظهرت عليه ملامح الغضب : بسرعة ايه وزفت ايه .. هو لعب عيال .. المعاد متحدد
من يوم ما الجدع جه اتقدم
-أه يا أخويا ما قولناش حاجة .. بس هي يعني بتقول انها لسه معرفتهوش كويس وعايزة
فترة الخطوبة تطول شوية عشان تفهم شخصيته
ازدادت حدته قائلاً : بلا داه بنات بلا مسخره .. قال تفهم شخصيته قال .. ما كلنا اتجوزنا وبعد
الجواز فهمنا كل حاجة .. ده أنا خطبتك وأنا معرفش شكلك يا وليه
حاولت "سمية" امتصاص غضبه قائلة : أيوة معاك حق يا أخويا .. هي بس عايزه....
قاطعها فى غضب : لا عايزه ولا مش عايزه .. البت المتربيه كويس بتسمع كلام أبوها .. أنا
مش هضرها الجدع ده مش هتلاقى زيه .. متربى ومتعلم وكفاية انه شايل الليله لوحده
ومطلبش مننا أكثر من طاقتنا .. أما بقى تروح بيته تبقى تفهم شخصيته براحتها .. دلح مرئ
-خلاص متزعش نفسك يا أخويا .. انت برده أبوها وأدرى بمصلحتها
-اطفى النور خلىنا ننام .. ومش عايز كلام فى الموضوع ده تانى

تعالت أصوات الموسيقى وامتلاً البست برجال ونساء وقد أخذتهم حمى الرقص والميل مع
نغمات تلك الموسيقى الصاخبة
قال "عماد" لـ "نانسى" الجالسة بجواره:

-يلا نقوم نرقص
قامت من فورها وهى تبسّم له , وشرعا اللاتنان فى الإنغماس والاندماج فى تلك الرقصة
المحمومة , قال بصوت مرتفع لتستطيع سماعه:
-كنت خايف متجيش
-ليه بأه

-يعني .. قولت هتخافى من خطيبك
-أنا مبخفش من حد أنا أعمل اللى أنا عايزاه
-وربنا انت جامد

انتهت الرقصة فاقترب "عماد" منها ونظر الى عينيها قائلاً:
-وحشتيني على فكرة
-قالت له فى دلال : وانت كمان
-مين اللى وحشك .. "عماد" صحبك .. ولا "عماد" حبيبك ؟
ابتسمت وأخذت خصله من شعرها تتسلى بلفها حول صابعها وقالت:
-الاتنين
-لو كنت فارق معاكى مكنتيش اتخطبتى
-قال يعنى لو مكنتش اتخطبت كنت انت هتخطبنى , أنا وانت عارفين كويس انك مش بتاع
حواز
-بس ده ميمنعش انك تهمنيى أوى , ومش قادر أعيش من غيرك
-لا انت عايش وعايش أوى كمان
-دى حلاوة روح , أنا بموت من غيرك
" -عماد" أنا دلوقتى مخطوبة وهتجوز قريب
-بالسرعة دى !?
-أها
-انتى حكايتك ايه بالظبط .. خطوبة وبحاول أبلعها .. لكن جواز ومن واحد معقد زى ده .. أكيد
فى ان فى الموضوع
تنهدت "نأسي" بحسره فجذبها من ذراعها وسار بها نحو طاولتهم قائلاً:
-أنا برده قولت كده ..تعالى قوليلى بأه حكايتك ايه بالظبط

كانت "ريهام" تقف مع زميلاتها خارج المدرج , كانت الكلية مزدحمة فى ذلك اليوم لوجود
امتحان لطلاب الفرقة الرابعة , كانت تتحدث مع صديقتها وتراجع اجابات ما جاء فى الإمتحان
من أسئلة حينما اقترب منها "معتز" فجأة ووقف أمامها , نظرت اليه وقلبها يدق بشدة وقال
فى نفسها (اتجنن ده ولا ايه , (رمقته بنظرات دهشة ممزوجة بالتوتر .. انتظرت أن يتحدث ..
لكنها فوجئت به وقد أخرج سلسلة صغيرة ذهبية من جيبه وحركها أمام وجهها حيث كانت
تحمل السلسلة فى نهايتها حرف

R

نقلت نظرتها من السلسلة الى "معتز" وهى مندهشة ولا تفهم ما يرمى اليه , قال بصوت
مرتفع وقد ارتسمت على وجهه ابتسامة ساخرة:

" -ريهام" نسيتي دى معايا امبارح

خفق قلبها بشدة وقالت بإندهاش

-مش فاهمة

-قال لها وهو يرمقها بنظرات التشفى : وقعت منك لما كنتى معايا يا حبيبتى .. فجيت أرجعها لك
-قالت بصوت خافت مبحوح : دى مش بتاعتى
شعرت بأن الأرض تنهار تحت أقدامها , ونظرت حولها لتجد بعض زملائها وزميلاتها يتابعون
ما يحدث ويتهايمسون , وفجأة أظلمت الدنيا أمام عينيها.

دخل "عمر" الى غرفة الطعام وقد ارتدى حلة أنيقة داكنة اللون , سار عبر الغرفة وتوجه الى
والده الذى يجلس على رأى الطاولة ومندمجاً فى قرعة جريدته قائلاً:

-صباح الخير يا بابا

رفع والده رأسه ونظر اليه قائلاً:

-صباح الخير يا "عمر"
التفت الى أمه التي تجلس على يسار الأب وأمسك يدها وطبعا عليها قبلة صغيره وقال:
-صباح الخير يا أمي
-صباح الخير يا حبيبي .. يلا عشان نفطر سوا
جلس "عمر" فى مكانه على يمين الأب الذى ترك الجريدة من يده وشرع ثلاثتهم فى تناول
طعام الفطور , قالت "كريمة" موجهه حديقها الى "عمر":
-ازى خطيبتك ؟
-الحمد لله يا ماما بتسلم عليكي كتير
-مش المفروض يا "عمر" نعزمها عندنا هى وأهلها ؟
نقل نظرة بين أمه وأبيه وقال:
-اللى تشوفوه .. أساساً كانت مدام "نادين" قالتلى انها هتعزمننا ملنا على الغدا عندهم فى
الفيلا بس محددتش معاد
-مفيش مشكلة احنا أو هما واحد مش هتفرق .. بس احنا خلاص هنكون عيلة واحدة فلازم
يكون بينا زيارات وود عشان نقرب من بعض أكثر
-معاكى حق يا ماما .. بابا ايه رأيك ؟
-طبعاً يا ابني وأنا بنفسى هكلم باباها النهاردة وأعزمهم
" -كريمة" : وأنا هكلم "نادين"
-ابتسم "عمر" قائلاً : يا سلام هى جت عليا .. أنا كمان هكلم "نانسى" أعزمها
ضحك ثلاثتهم فى مرح .. وبدأت "كريمة" فى الاتفاق مع الخدم والأعداد لترتيبات تلك الزيارة.

وقفت "ياسمين" شارده فى شرفة حجرتها تتسلى بالنظر الى الناس فى الشارع ..كان عقلها
يعمل بدون توقف .. لديها عشرات الأسئلة فى رأسها لا تجد لها اجابه .. ولديها الكثير من
المخاوف .. كانت تفكر فى شكل حياتها الجديدة ومستقبلها مع "مصطفى" .. نرى ماذا تُخبئ
لها الأيام ؟
أفاقت من شرودها على جرس هاتفها .. ابتسمت وهى ترد:
-السلام عليكم .. "سماح" ازيك
أتاها صوت "سماح" عبر الهاتف وعلامات الحزن باديه عليه:
-وعليكم السلام .. ازيك انتى يا "ياسمين"
-ايه يا بنتى مال صوتك فى حاجة حصلت ؟
-عايزة أتكلم معاكى
-خير قلقتيني .. انتى كويسة .. و طنط وعمو كويسين
-آه يا بنتى ماتقلقيش بس فى موضوع يخصنى عايزة أتكلم معاكى فيه
-طيب اتكلمى سمعاكى
-لا مش هينفع فى التليفون .. يا تجيلى يا أجيلك .. بصراحة أفضل انى أجيلك عشان أعرف
أتكلم معاكى براحتى
-انتى بتستأذنى يا "سماح" .. طبعا تعالى يا بنتى ده بيتك
-تسلمى يا حبيبتي .. طيب يناسبك بكرة الساعة 5 كده ؟
-لا خليها الضهر عشان نتغدا سوا
-غدا ايه بس مش وقت كدة خالص
-قالت "ياسمين" بإصرار : هستناكى الضهر .. ما تأوحيش
-قالت "سماح" فى استسلام : حاضر .. أشوفك بكرة ان شاء الله
-ان شاء الله يا حبيبتي .. منتظراكى

-سلام

-سلام

أغلقت "باسمين" وهى تحاول أن تخمن ما هو هذا الموضوع الذى يخص "سماح" وتريد أن تحدثها فيه؟! *

نادت "نادين" خادمتها وسألتها قائلة:

-فين "نانسي"؟

-قالت الخادمة : فوق حضرتك لسه مصحتش

-ايه ده لسه نايمة ..طيب روحى انتى

صعدت "نادين" لحجرة "نانسي" ونادتها قائلة:

"-نانسي" .. "نانسي" .. قومي عايزاكى بسرعة

لم تجد استجابة منها .. فاقتربت من فراشها وهزتها بيدها:

"-نانسي" قومي .. "نانسي"

تململت "نانسي" فى فراشها وهى لا تستطيع فتحت عينيها وانزاح الغطاء عنها قليلاً فرأت

"نادين" فستان السهرة الذى مازالت ترتديه

-ايه ده ايه اللي انتى لايساه وانتى نايمة ده .. انتى خرجتى امبارح؟

قالت وهى تجد صعوبة فى ابقاء عينيها مفتوحتين:

-آه خرجت

-خرجتى روحتى فين .. خرجتى مع "عمر"؟

ضحكت "نانسي" بشدة قائلة:

-وانتى متصوره ان "عمر" ممكن يسبنى أخرج بالفستان ده .. انتى مش عارفه خطيب بنتك

ولا ايه

-أمال خرجتى فين

قالت وهى تجلس بصعوبة على السرير:

-خرجت روحى الديسكو .. قابلت "عماد" وباقى الشلة هناك

شعرت "نادين" بالغضب صرخت فى وجهها قائلة:

-ديسكو؟ .. ديسكو يا "نانسي" .. افرضى "عمر" شافك .. افرضى حد شافك وقاله .. انتى

مش عارفه انه منعك تماماً انك تروحي المكان ده

أزاحت "نانسي" الغطاء عنها وهبت واقفة :

-أوف أوف .. كل شوية "عمر" قال .. "عمر" عاد .. أنا اتخنقت أنا مش متعودة على كدة ..

متعودة أعمل اللي أنا عايزاه وفى الوقت اللي أنا عايزاه

-انتى هتفضلى مدلعة لحد امتى .. لحد ما نضيع كلنا .. أنا مكنتش عايزة أقولك عشان ما أثرش

على نفسيتك بس طالما انتى ما عندكيش احساس كدة هقولك .. البنك حجز على كل حاجة

بنملكها .. مافشلش غير الفيلا دى وعربية أبوكى وعربيتى وعربيتك واللى قريب أوى

هيضيعوا هما كمان

امتقع وجه "نانسي" بشدة .. كانت تعلم الظروف التى يمرون بها لكنها لم تتوقع أن تتدهور

أمرهم الى هذه الدرجة وبهذه السرعة , ظلت واجمة لا تنطق بشئ .. اقتربت منها "نادين"

قائلة:

-فهمتى بأه ان الموضوع جد مش هزار .. وإن "عمر" هو آخر أمل لينا وان الوضع مش

متحمل أبداً استهتارك ودلعك ده .. أنا كنت جايه أصحيكى عشان أقولك ان حماتك المستقبليه

كلمتى وعزمتنا كلنا بعد بكرة وهيكون موجود عمه "عمر" وولادها كمان .. مش عايزة غلطة

يا "نانسي" خلى الموضوع يتم على خير .. انتى سامعه

قالت ذلك وتركتها وخرجت...

أثناء انهماك "ياسمين" فى مساعدة والدتها فى تحضير طعام الغذاء سمعت باب الشقة يُفتح ثم يُغلق .. التفتت لوالدتها قائلة:

-دى أكيد "ريهام" .. بابا لسه نازل من شوية نادتها قائلة:

"-ريهام" .. "ريهام"

سمعت باب حجرتما يُغلق بقوة .. فقالت لنفسه (مالها دى)

تركت ما بيدها وذهبت لترى أختها .. صدمت "ياسمين" عندما فتحت باب الغرفة ووجدت "ريهام" منهاراً من البكاء .. أغلقت الباب بشرعة وتوجهت إليها قائلة بلووعه:

"-ريهام" مالك فى ايه .. ايه اللي حصل .. قوليلى

كانت "ريهام" ترتجف من شدة البكاء فجلست "ياسمين" بجوارها وأخذتها فى حضنها قائلة :

-بس يا حبيبتي .. بس متعيطيش .. فى ايه مالك .. طمنيني وقعتى قلبي

أزاحتها قليلاً لتنظر إليها ومسحت ما تساقط على وجهها من دمعات ثم قالت:

-حبيبتي استعيزى بالله من الشيطان الرجيم واحكيلى اللي حصل

استعادت "ريهام" بالله وروت لأختها ما حدث بالتفصيل .. قم أردفت:

-اتفضحت يا "ياسمين" .. متخيلة الكلام اللي قالهولى يوحى بيايه .. والمصيبة ان صحابي

كانوا واقفين .. ومش بس صحابي ده كمان زمايلي فى الدفعة .. هيقولوا عليا ايه دلوقتي

قالت ذلك ثم انفجرت فى البكاء مرة أخرى .. فقالت لها "ياسمين": "

-حسبي الله ونعم الوكيل .. بني آدم معدوش ريحة الضمير .. كويس انه ربنا كشفه بدرى عشان تعرفيه على حقيقته

-أنا خلاص معدتش راحه الكلية دي تانى .. معدش ينفع أورى وشى لحد

قالت لها "ياسمين" بصرامة:

-بتهرجى .. صح .. انتى ما غلطتيش عشان تستخبي من الناس .. هو اللي غلط وهو اللي

المفروض يتكسف يورى وشه للناس .. او عى تخلى واحد زى ده يكسرك .. انتى لسه صغيره

وياما هتشوفى فى حياتك .. مينفعش تسمى لحد انه يدوس عليكى بالشكل ده .. او عى تدى

لحد فرصة انه يجرحك أو يهينك .. انتى هتروحي الكلية بكره وانتى رافعة راسك لأنك

مغلطتيش وربنا عارف انك مغلطتيش وأكد هيجبك حقا منه .. لأنك مرضتتيش تغضبى ربنا

وعملتى الصح فأكيد ربنا مش هيسيبك وهيكون جمبك

-او عى تقولى حاجة لبابا يا "ياسمين" لو بابا واجهه معرفش الولد ده ممكن يتبلى عليا

ويقول ايه وانتى عارفه بابا صعب أد ايه وممكن يصدقه

-متخافيش بابا مش هيعرف .. بس الولد ده لازم يتربى .. لان لو محدش وقفله هيسوق

ويتمادى فيها .. قالوا لفرعون ايه اللي فرعنك قال ملقتش حد يلمنى

-ازاى يعنى هتعملى ايه ؟

-اسمها هنعمل .. بكره هتشوفى

فى اليوم التالى وفى مكتب سكرتيرة عميد كلية التجارة بجامعة عين شمس وقفت "ياسمين" مع "ريهام" فى انتظار السماح لهما بالدخول , خرجت السكرتيرة من حجرة العميد ونظرت

الى الفتاتان قائله:

-اتفضلوا

شعرت "ريهام" بالتوتر وكادت أن تتراجع فجذبتها "ياسمين" من يدها ودخلوا الى داخل الغرفة , قالت "ياسمين": "

-السلام عليكم يا دكتور

-قال العميد : وعليكم السلام .. اتفضلوا

جلست كل منهما على مقعد مواجهه للمكتب .. نظر اليهما العميد قائلاً:

-اتفضلوا .. ايه الموضوع المهم اللي عايزني فيه

روت له "ياسمين" تفاصيل ما حدث من "معتز" واهانتة لـ "ريهام" أمام زملائها .. ثم أردفت قائله:

-أنا بعد اللي حصل فكرت نيجي ونتكلم مع حضرتك لأنك المسؤل الأول عن الكلية هنا وأنا عارفه ان حضرتك بمرکز يُملى عليك تحمل مسؤولية الكلية كلها وأكد كل البنات والولاد اللي هنا هما أبنائك وبناتك اللي لازم حضرتك تحافظ ليهم عشان كدة احنا جينا لحضرتك النهاردة يا دكتور لأن أكيد مترضاش ان حد يهين بنت من بناتك اللي مسؤلين منك طول وجودهم فى الكلية وتحت اشرافك

-رد العميد قائلاً : طبعاً .. أكيد اهانة بنت من البنات وان ولد يتعرض لها ويضايقها ده ما أسمحش بيه أبداً فى كليتي ..والولد اللي ذكرتى اسمه فعلاً مشاغب وبيجلى اسمه كتير -ثم وجه حديثه الى "ريهام" قائلاً:

-ما تقلقيش .. محدش يقدر يتعرضك ولا يتعرض لأى بنت داخل الكلية والولد ده لازم يتعاقب -شكرته "ريهام" قائله : أنا متشكره جدا يا دكتور .. بجد ربنا يكرمك وفى اليوم التالى كانت سعادة "ريهام" غامرة عندما قرأت التنويه الموضوع فى بهو الكلية (قررنا فصل الطالب معتز محمود صبحى لمدة اسبوعين عقاباً له على اهانتة لزميلاته ومشاغبتة فى الكلية) حمدت الله عز وجل وأيقنت أن من يصدق الله يصدق

-يعني ايه الكلام ده ؟

نطق "عمر" بهذه العبارة فى غضب هادر وهو يتطلع الى الملف الموضوع أمامه على مكتبه بالشركة . قالت السكرتيرة:

-ده الفاكس اللي جلنا يا فندم

هب "عمر" واقفاً وقال فى غضب:

-أنا مشغل شوية ناس لا يعتمد عليهم .. يعني كدة الصفقة هتضيع علينا حمل هاتفه وساعته والجاكت وتوجه الى البنا قائلاً:

-الغي كل مواعيدي النهاردة وبكرة

قالت السكرتيرة بنبرة روتينيه:

-حاضر يا فندم

أقبل "عمر" على والدته التى تجلس فى حديقة الفيلا وقبلها على رأسها وجلس على المقعد المجاور لها .. رأت أمه علامات القلق والضيق باديه على محياها فسألته:

-خير يا حبيبي فى حاجة ؟

تنهد فى ضيق قائلاً:

-للأسف هنضطر نأجل عزومة "نانسي" وأهلها اللي كانت المفروض تكون بكرة

- ليه ايه حصل ؟
- فى مشكلة فى الشغل ولازم أسافر النهاردة ضرورى ومعرفش هغيب كام يوم
- ما ينفعش حد غيرك يقوم بالمهمة دى
- لا مينفعش لازم أروح بنفسى
- سكت قليلاً ثم أردت قائلاً:
- لازم أسافر النهاردة على المزرعة.

الفصل الحادى عشر

سمعت "ياسمين" جرس هاتف المنزل وهمت بترك الرواية التى تقرأها وتذهب لترى من المتصل لكن الصوت توقف فجأة فعلمت أن أحداً ممن فى البيت رد على الهاتف , ما هى الا لحظات حتى فتح والدها باب غرفتها بعدما طرق الباب وقال لها:

-كلمى يا "ياسمين" تليفون عشائك

تعجبت "ياسمين" من الذى يتصل بها على هاتف المنزل فمنذ أن تخرجت لم يبقى على اتصال بها الا "سامح" فقط والتى تتصل دائماً على هاتفها المحمول , نهضت من فراشها وتركت روايتها وسألت والدها:

-مين يا بابا

-خطيبك

-قالت بإندهاش : "مصطفى!"

-ايوة هو انتى ليكى خطيب غيره

كانت هذه هى المرة الأولى التى يتصل بها "مصطفى" , كانت العلاقة بينهما تقتصر على زيارته مرة كل اسبوع وأحياناً كل اسبوعين بسبب انشغاله بتجهيز عش الزوجية بالإضافة الى عمله الذى يلتهم معظم وقته , توجهت الى الهاتف وقالت :

-السلام عليكم

-أناها صوته عبر الهاتف:

-وعليكم السلام .. ازيك يا "ياسمين" أخبارك ايه

-تمام الحمد لله ازيك انت عامل ايه فى شغلك

-كويس الحمد لله مش ناقصنى غيرك .. وحشانى أوى

تضرجت وجنتاها بحمرة الخجل فلم تعتاد سماع مثل هذه الكلمات منه أو من غيره .. كانت تحاول قدر الإمكان الالتزام بوضع حدود للكلام بينهما .. فهى مازالت تعتبره رجلاً غريباً عنها لا يحق لها سماع تلك الكلمات منه إلا بعدما يكتب الكتاب .. استطرد "مصطفى" قائلاً:

-مش عايزة تقولى حاجه ؟ .. موحشتكىش زي ما وحشتيني ؟

التزمت "ياسمين" الصمت ولم تدرى ماذا تقول له .. أتاها صوته وقد استطاعت تمييز نبرة الضيق فى صوته:

-خلاص براحتك ..

ثم قال فى برود:

-طبعا عارفه ان الفرحة بعد أقل من اسبوعين .. أنا بس حبيت أعرفك ان خلاص تقريباً الشقة جهزت فيما عدى بعض الأمور البسيطة .. أنا حالياً فى البحر الأحمر وان شاء الله هنزل قبل الفرحة ب 3 أيام أخلص الحاجات اللى فاضله .. فى حاجه انتى عايزاها أو حاجه حابه تقوليها

تمنت لو تقول له (أيوة عايزة أقولك كلام كتير أوى واسمع منك كلام أكثر نفسى أعرفك وأفهمك نفسى أعد معاك فترة أطول مش تقولى انك نازل قبل الفرحة ب 3 أيام , نفسى فى خطوبة أطول نفسى أتجوز وأنا حاسه انى فرحانه ومبسوطه زي أى بنت بتتجوز نفسى حد يزيل القلق والخوف اللى جوايا نفسى أطمئن على حياتى معاك) لكنها لم تستطع أن تنطق بحرف مما ودت أن تقوله .. وردت قائلة:

-لا شكراً .. مش عايز انت حاجه

رد فى برود:

-لا شكراً .. سلام

-مع السلامة

وضعت "ياسمين" السماعاة ونظرت الى غرفة والدها وقالت لنفسها (كان نفسي تفهمنى يا بابا .. أنا מבحبش أعصيك ولا عايزة أكسرك كلمة .. بس ياريت تفهمنى شوية .. وتحس بيا) قامت ودخلت غرفتها مرة أخرى وجلست على فراشها لتستكمل قراءة الرواية لعلها تستطيع أن توقف عقلها عن التفكير لترتاح قليلاً

أنهى "مصطفى" اتصاله بـ "ياسمين" وأخذ يعبث فى ملفات هاتفه .. كان فى غرفته حينما طرق عليه الباب صديقه الذى يشاركه فى السكن وفى العمل .. قال "مصطفى":
- ادخل يا "رأفت"

دخل صديقه فوجده ممدداً على السرير يعبث بأزرار هاتفه .. فاقترب منه قليلاً وقال بمرح:
- فينك يا عريس .. انت هتخنفى من دلوقتى ولا ايه .. لا اسمع لو الجواز هيغيرك متتجوزش خليك كده أحسن

-ليه مالى في ايه
-شكلك زى اللى واخذ ألم على وشه ده منظر واحد فرحه بعد اسبوعين .. المفروض اللى زيك يكون طائر من الفرحة يا ابنى
قال "مصطفى" لصديقه فى تيرم:
-والله ما عارف , انا لا مبسوط ولا فرحان
-ليه بأه .. انت مبتحبش خطيبتك ولا ايه ؟
-بصراحة هى انسانه كويسه وكل حاجة يعنى زوجة مناسبة لكن مش حاسس نحييتها بأكثر من كدة

-ليه بأه .. طيب قولى هى حلوة ؟
-يعنى .. عاديه .. مفيهاش أى حاجة مميزة
-مادمت شايقها عاديه ومفيهاش حاجة مميزة كنت بتخطبها و هتتجوزها ليه ؟
-عشان بنت محترمة سألت عليها طوب الأرض محدش قالى عنها حاجة وحشة بالعكس الكل شكر فيها وفى أهلها جدا والبنت فعلا قطة مغمضة
-يعنى هتتجوزها عشان كدة بس
-بص يا "رأفت" انت عارف طبيعة شغلنا 3 أسابيع هنا و اسبوع أجازة .. لازم أتجوز واحدة أبقى واثق منها وأنا سايبها فى البيت ومسافر .. والبنت دى هبقى سايبها فى البيت وأنا مطمئن لأنها زى ما قولتلك محترمة وقطة مغمضة
-بس يا "مصطفى" ده ميكفيش عشان الحياة الزوجية بينكوا تستمر لازم يكون فى مقومات أكثر من كدة تخليها تستمر

-تقصد الحب والتفاهم و الكلام ده .. يا حبيبيى الحب والغرام ده بيكون قبل الجواز بس ..
الراجل بيعمل اللى هو عايزه لحد ما يوصل لسن خلاص لازم يتجوز ويفتح بيت لكن مفيش حاجة اسمها اتنين متجوزين بيحبوا بعض بلاش جو أفلام الأبيض واسود ده
-تفكيرك غريب

-لا تفكيري واقعى جدا

-طيب و "نهله" مش انت برده كنت بتحبها

شعر "مصطفى" ببعض الضيق للتحدث فى هذا الموضوع لكنه قال:

-بص يا "رأفت" من الآخر كدة مفيش راجل بيتجوز واحدة كان ماشي معاها
ويلا سيبنى بأه عشان أكلت ودانى وصدعتنى أكثر ما أنا مصدع

اقتربت سيارة "عمر" من المزرعة التي كانت تقع في احدى القرى بالقرب من محافظة المنصورة وبمجرد أن وصل الى البوابة ظل يطلق زهور السيارة وينادى وأخرج رأسه من الشباك منادياً الغفير:

- عم "عويس" .. عم "عويس"

فتح البوابة رجل في العقد السادس من عمره وقال وهو يمد رأسه مستطلعاً القادم:

-مين .. انت مين ؟

نظر اليه "عمر" وقال:

-افتح يا عم "عويس" .. أنا "عمر"

أسرع الغفير بفتح البوابة على مسرعها مردداً:

" -عمر" بيه يا أهلاً يا مرحباً .. المزرعة نورت .. اتفضل يا بيه

انطلق "عمر" بسيارته وتوقف أمام بين كبير مكون من طابقين .. على الرغم من أنه يبدو قديماً إلا أن له هيبه لا تغفلها العين

لحق به الغفير الذى أغلق البوابة وأسرع يجرب خلف السيارة حاملاً طرف جلبابه فى فمه .. قال الغفير فى حبور:

-يا أهلاً وسهلاً المزرعة كلها نورت .. ليه ما قولتناش ان سعادتك جاى كنت خليت "صفية" تنضف البيت زمانه مترب

قال "عمر" فى عجالة:

-تسلم يا عم "عويس" أنا أصلاً مش هطول احنا ولو خلصت احتمال ارجع النهاردة .. فين مدير المزرعة ؟

-الباشمهندس "محمد" تلاقيه دلوقتى فى استراحة الغدا

-شكراً يا عم "عويس"

قال ذلك وهو يربت على كتف الرجل وأسرع ليبحث عن مدير المزرعة كانت المزرعة ميراث والد عمر من أبيه .. أى أن هذه المزرعة ملكاً لعمر أباً عن جد .. كانت مزرعة كبيرة تخطف الأبصار بذلك اللون الأخضر الساحر الذى يريح العين والأعصاب .. تم تقسيم المزرعة وتخصيص أكبر مساحة بها لزراعة العنب الذى تميزت بزراعته مزرعة "عمر" على مر الأعوام السابقة فكان يتهافت على محصوله التجار وأصحاب المصانع بسبب عناية "عمر" الشديدة بجودة المحصول وتوفير أجود أنواع الأسمدة والمبيدات فلم يبخل عليها بشي فأعطته كل شئ .. وتحتوى المزرعة أيضاً قسماً لزراعة العديد من الموالح الأخرى .. لم يكن انتاج المزرعة نباتياً فقط فلقد توسع فيها "عمر" وخصص قسماً للإنتاج الحيوانى أيضاً

عبر "عمر" بوابة المبنى الإدارى الذى خصصه لإدارى المزرعة وللعاملين فيها .. توجه الى قسم الطعام وألقى نظرة على الموجودين ثم توجه الى طاولة يجلس عليها رجل فى العقد

الخامس من عمره كان يتناول طعامه فى نهم حينما قال له "عمر":

-ازيك يا باشمهندس "محمد"

هب الرجل واقفاً بمجرد أن رأى "عمر" وابتلع ما بقمه من طعام بسرعة ومد يده ليسلم عليه قائلاً:

-اهلاً وسهلاً ازيك يا باشمهندس "عمر"

صافحه "عمر" ثم جلس على المقعد المواجه له قائلاً:

-ايه الفاكس اللي بعتهولى النهاردة ده .. عايز أعرف المشكلة بالتفصيل

ابتلع الرجل ريقه وجلس فى مقعده مرة أخرى وقال:

-زى ما قولت لحضرتك فى الفاكس تشخيص المرض "البياض الدقيقي"

حاول "عمر" السيطرة على غضبه قائلاً:

-الإصابة وصلت لفين بالظبط؟

توتر الرجل قائلاً:

-للأسف يا باشمهندس الإصابة وصلت للأوراق والأغصان والأزهار والثمار
ضرب "عمر" بيده على الطاولة فانتفض الرجل فزعاً والتفت جميع من فى القاعة اليهما ..
هدر صوت "عمر" قائلاً:

-وكنت فين حضرتك يا باشمهندس لما المرض انتشر فى الزرع بالشكل ده ؟ .. ومخدتش
احتياطك ليه عشان تمنع الإصابة من قبل ما تحصل ؟
-والله يا باشمهندس "عمر" أنا عملت اللي عليا و....
قاطع "عمر" قائلاً:

-هنشوف .. هنشوف اذا كنت عملت اللي عليك ولا لأ .. يلا قوم هنلف على المحصول كله
توريني الإصابات

-نهض الرجل معه فى استسلام

انهى الرجل جولته مع "عمر" الذى ازدادت حدة غضبه قائلاً:

-ده اسمه اهمال يا باشمهندس انت عارف كويس ان عدم ازالة الأوراق اللي على جذر
الشجيرات ده له دور كبير فى انتشار المرض
وقف الرجل وقد أخذت حبات العرق تنبت فوق جبيه ولم يستطع النطق
أكمل "عمر" فى غضب:

-والحشائش دى ما بتتشلش أول بأول ليه انت عارف انها بتسبب الإصابة بأمراض زى الزفت
للزرع .. ده تسبب أمان بتقبض مرتبك على ايه بالظبط
بُهِت الرجل ولم ينطق ببنت شفه

فى المساء أغلق الغفير بوابة المزرعة بالحديد والسلاسل وتوجه الى غرفته ونادى زوجته:
" -صفية .. صفية "

لم ترد فبحث عنها فلم يجدها .. هم بالتوجه الى باب الغرفة ليبحث عنها بالخارج عندما وجدها
تدخل وتغلق الباب خلفها:
-كنتي فين يا "صفية"

-هكون فين يعني .. كنت بجهز الأكل للباشمهندس "عمر" وبنضفله الأوضة اللي هينام فيها
-طيب يلا عشان ننام

نام عم "عويس" وتدثر بغطائه ودخلت زوجته الفراش بجواره وأخذت تتطلع الي زوجها الذى
أولاهها ظهره لتتأكد من أنه أغمض عينيه ويغط فى النوم فأولته ظهرها وأخرجت من صدرها
حفنه من المال أخذت تنظر اليها فى فرح ثم أعادتها الى صدرها مرة أخرى

قامت "كريمة" من نومها فزعة وهى تردد:

-أعوذ بالله من الشيطان الرجيم .. أعوذ بالله من الشيطان الرجيم
انتفض زوجها واستيقظ على صوتها وقام وأضاء نور الغرفة وقال لها:
-خير فى ايه مالك يا "كريمة" ..

كان حلقها جاف فلم تستطع التحدث وأشارت الى ابريق الماء الموضوع على الكمودينو .. فهم
زوجها اشارتها وصب لها كوبا من الماء وأعطاه لها قائلاً:
-اتفضلى يا حبيبتى .. اشربي واهدى

شربت "كريمة" كوب الماء بسرعة ونهم وكأنها كانت تسير فى صحرا .. أعطت له الكوب

الفارغ فوضعه على الكمودينو مرة أخرى و قال لها:
-هنيأ .. مالك فى ايه ؟ انتى تعبانه
قالت بعدما هدأت قليلاً وبدأت ضربات قلبها فى الانتظام:

-لا .. بس شوفت حلم وحش أوى
-خير اللهم اجعله خير

-حلمت بـ " عمر " .. كان قلبي هيقف من الخوف
-يارب سترك .. خير شوفتى ايه ؟

بلعت ريقها فى صعوبة وكان تذكر الحلم يعيد اليها خوفها مرة أخرى .. قالت:
-شوفت عمر وهو واقف فى مكان فاضى مفيش أى حد شايفه وفى حيه كبيرة فاتحه بقها و
وماشيه ناحيته أول ما شافها فضل يرجع لوره وهى برده عماله تتقدم ناحيته وكان منظرها
مرعب جدا وكانت مصره تأذيه

"عمر" كان وراه بير عميق وكان ضلمه مكنش شايف البير ده فضل يرجع لوره عشان يبعد
عن الحيه فضلت أصرخ وأقوله "عمر" حاسب البير اللى وراك لكنه مكنش سامعنى حاولت
أجرى عليه لكن كنت فى الحلم حاسه ان رجلى زى ما تكون مشلوله مش عارفه أتحرك
لحد ما "عمر" وقع فى البير والحية أول ما لفته وقع بعدت عنه بسرعة وجريت بعيد عنه..
جريت عليه وقلبي هيقف من الخوف وفضلت أنادى من فوق البير عليه لحد ما شوفته رغم ان
البير كان ضلمه بس نور القمر كان منوره وكان شكله بيتألم أوى ومش قادر يتحرك فضلت
أعيط وأنادى عليه ..لحد ما رفع راسه وقالى ما تعلقيش يا ماما أنا هقدر أقوم أقف تانى "

أنهت "كريمة" كلامها ونظرت الى زوجها قائله:

-تفتكر ايه الحيه وايه البير ده ؟ أنا خايفة على "عمر" أوى
قال لها زوجها يطمئننها:

-ما تخفيش ربنا هيحميه ان شاء الله .. لعلها تكون أطغاث أحلام ..انتى بس ادعيه انتى عارفه
ان دعوة الوالدين مستجابة ان شاء الله
-والله بدعيه دايمًا وعمرى ما بطلت دعا ليه .. ربنا يحميه وينورله بصيرته ويكفيه شر ولاد
الحرام

جلست "ياسمين" مع "سماح" فى غرفتها بعدما انتهيا من تناول طعام الغداء .. قالت
"ياسمين" لها:

-ها يا ستى ايه بأه الموضوع اللى كنتى عايزانى عشانه

-بصى يا "ياسمين" من الآخر كده فى واحد تعرفت عليه فى المطار أما كنت رايحه أجيب بنت
خالى من السفر

سألته "ياسمين": "

-اتعرفتى عليه ازاي يعنى ؟

-بصراحة حاول يكلمنى وصديته جامد .. والطيارة كانت اتأخرت عن معادها ففضلت وقت كبير
فى المطار منتظرة بنت خالى .. والراجل ده فضل يحوم حوليا كتير وبعد ما اتأكد انى مستحيل
أكلمه أو أعبره .. تقريبا كدة عجبته رد فعلى ده وأول ما بنت خالى وصلت وسلمت عليها .. جينا
نمشي لقيته بيوقفنى

-ها .. كملى

-طبعا لسه هفتح بقى عشان أديله اللي فيه النصيب .. لقيته فجأى وقالى انه عايز يتقدملى

قالت "ياسمين" وهى مندهشة:

-نعم .. خبط لزق كده

-آه والله ده اللي قاله .. وفضل يتكلم ويعرفنى بنفسه .. طبعا بنت خالى كانت واقفه وهو كان محترم مطلبش اننا نعد فى مكان ولا طلب رقمى ولا أى حاجة .. وبعد ما خلص كلامه طلب منى رقم بابا

قالت "ياسمين" وقد اتسعت ابتسامتها:
-ها وبعدين كملى

-بنت خالى ادितه الرقم .. وبعدها محطتش الموضوع فى دماغى .. لكن بعد يومين لقيته بيتصل ببابا وطلب يقابله وفعلاً اتقابلوا بره البيت وشرحه ظروفه كلها

صاحت "ياسمين" فى فرح طفولى:

-الله .. حب من أول نظرة يعني .. ها كملى وبعدين

-بصى يا "ياسمين" أنا مش هكذب عليكى بصراحة أنا ارتحتله أوى .. مش بس ارتحتله تقدرى تقولى انا فعلا معجبه بيه أوى .. بس فى مشكلة

-ايه هى ؟

-هو من ساعة ما اتخرج وهو عايش بره .. بيبكون مستقبليه .. وللأسف من سنة خسر كل فلوسه اللي حوشها لأن دخل شركة مع ناس فى البلد اللي كان مسافر فيها ونصبوا عليه وخسر كل اللي حوشه طول السنين اللي فاتت

قالت "ياسمين" فى حزن:

-لا حول ولا قوة إلا بالله

-بصراحة يا "ياسمين" أنا مش فارق معايا الموضوع ده .. هو بيقول انه لسه بيبدا يكون نفسه من أول وجديد .. وانه مش مرتاح فى شغله وبيفكر يشتغل مع واحد صحبه .. هو لا يملك غير عربيته بس .. حتى الشقة اللي اشتراها هنا اضطر يبيعها عشان يسدد ديونه .. يعني هعيش معاه على مرتبه بس طيب وانتى رأيك ايه فى كل ده

-زى ما قولتلك كل ده مش فارق معايا .. بصراحة عجبني وحساه راجل بجد .. وكمان بابا انتى عرفاه بيفهم الناس بسرعه .. هو كمان أعجب بيه أوى

-تمام أوى

لا مش تمام .. لسه ماما معرفتش واللى خايفه منه انها ترفض .. انتى عارفه ماما راسمه فى خيالها شخص مثالى لبنتها الوحيدة .. خايفة أوى ترفضه عشان ظروفه

-طيب وباباكي رأيه ايه

-بابا ده حبيبي .. قالى انتى اللى هتعيشي معاه يبأه انتى اللى تختارى .. والحاجه الوحيدة اللى هيتدخل فيها هي انه يظمن انه انسان محترم ومؤدب ويسأل عنه كويس هنا فى مصر وفى البلد اللى كان شغل فيها ..أنا خايفة أوى يا "ياسمين" ادعيلى الموضوع يتم على خير

حضنتها "ياسمين" قائلة:

-ان شاء الله يا حبيبتي ربنا يقدرلك الخير ويسعدك ويفرح قلبك يارب

أثناء انهماك "مصطفى" فى دراسة أحد المخططات أمامه شعر فجأة بشخص يقف خلفه .. التفت ليجد فتاة جميلة تقف وتنظر اليه فى حزن .. بُهت لرؤيتها والتفت اليها قائلاً:
" -نهلة"

قالت الفتاة بعتاب وبصوت خافت:

-أيوة "نهلة" .. ازيك يا بشمهندس

توتر "مصطفى" وقل لها:

-ايه اللى جابك هنا

تقدمت الفتاة بخطوة وأمسكت كفة اليمنى التى احتوت دبلته , ورفعته أمام عينيه قائله فى مرارة:

-جيت أباركلك على خطوبتك .. وأباركلك على فرحك اللى هيكون كمان اسبوعين

جذب "مصطفى" يده وتنهد وقال اليها:

" -نهلة" لو سمحتى مفيش داعى للكلام ده ومفيش داعى أصلاً انك تيجي لحد هنا ده مكان شغلى

-بس انت يا باشمهندس مكنتش بتعترض لما كنت بجيلك قبل كدة هنا فى مكان شغلك .. وكنت

بتفرح وتنسى الدنيا واللى حواليك

قال لها بنبرة محذره:

" -نهلة" مش عايز مشاكل

قالت فى مرارة:

-متخفش أنا مش جاية أسبيلك مشاكل .. أنا خلاص فهمت .. صحيح فهمت متأخر بس فهمت

قال وقد بدأ يشعر بالضيق:

-فهمتى ايه ؟

قالت والدموع تتساقط من عينينها:

-فهمت ان مفيش راجل بيفكر يتجوز واحدة غلط معاها .. حتى لو هو اللى دفعها لكده وحتى لو

هو السبب فى كده

قال بحدة:

-أنا مضربتكيش على ايدك .. كل حاجة كانت برضاكى وبرغبتك

انفجرت فى البكاء قائلة:

-كنت بحبك .. وكنت فإكرآك بتحبني .. كنت بعمل زى مآ قولتلى .. بآول اسعدك عشآن
متبصش لغيري .. ورغم انى عملت كل اللى طلبته منى وفرط فى كل آآآة عندى برده سبتنى
وهتجوز غيري .. سبتنى لانى فى نظرك بنت رآيصة سلمت نفسها لراآل مش جوزها .. ولما
فكرت تتجوز آآرت وآآدة نضيفة مش كدة ؟
قال بغضب:

-الكلام اللى قولتية دلوقتى لو آكرر تانى مش هيحصل كويس يآ "نهلة .. "ويكون فى علمك
لو فكرتى تقلى عقلك وتقولى الكلام ده لآى آد أو توصليه لآهل خطيبتى بآى طريقة آنا هنكر
انى آعرفك أصلاً ومش هيحصلك كويس
قآلت وهى تمسح الدموع التى تسآقت على وجهها:
-دى مش آلطتك لوآدك آنا آلطت آكرر منك ودلوقتى بدفع التمن .. آنا زى مآ قولت آنا مش
آآية أسببلك مشآكل آنا آآيه بس آقولك ان آى آآآة عملتها كآنت عشآن بحبك .. بحبك آوى
قآلت ذلك ثم تركته وانصرفت.

-سببه يا "عمر" يقول اللي هو عايزه .. أنا عارفه ان مفيش ست فى الدنيا دى تملى عين باباك غيري أنا بس
ضحك كليهما .. وقال "عمر": "

-أحبك وانت واثق من نفسك يا "كريمة" يا قمر انت

نهض والده وأحاط كتفى زوجته بذراعه ونظر اليها قائلاً:
-طبعا مفيش واحده ست تملى عيني وحياتي وقلبي غيرك
قال "عمر" فى مرح:

-احم .. من الواضح كدة انكوا عملتونى شجرة , ناقص اتنين لمون وأطلع منها انا بقه

ضحك ثلاثتهم .. وقد سعد "نور الدين" لرؤية زوجته مبتسمة فى مرح بعدما قضت ليلتها فى قلق وتوتر بسببها حلمها

التف ثلاثتهم حول الطاولة وأحضرت لهم الخادمة عصير فريش .. وجه "نور الدين" حديثه الى ابنه قائلاً:

-ها يا "عمر" ما قولتليش ايه أخبار المزرعة والمشكلة اتحلّت ولا لسه

شعر "عمر" بالضيق فجأة بعدما كاد أن ينسى الهم الذى يعتل فى صدره ورد قائلاً:

-للأسف المحصول حالته صعب جداً .. اهمال فظيع .. محتاج مجهود جبار عشان نقدر ننفذ أى شئ منه

-لدرجة دى ؟

-أيوة للأسف .. غلطتى انى فى الفترة الأخيرة أهملت المتابعة الدورية اللى كنت بعملها للمزرعة .. وللأسف وثقت فى الشخص الغلط .. مدير المزرعة طلع شخص لا يعتمد عليه أبداً

شاركتم "كريمة فى الحديث قائله:

-وناوى على ايه .. لازم المدير يتغير فوراً .. وكمان متزعّش نفسك ان شاء الله حتى لو جزء من المحصول ضاع .. ان شاء الله السنة الجايه تعوض الخسارة دى ؟

تنهد "عمر" فى حسره قائلاً:

-للأسف يا ماما المحصول متباع أصلاً .. متباع لشركة عصائر ومربي والفلوس قبضناها من زمان لأننا بنمضى تعاقد كل سنتين ودى السنة الثانية

-يعني ايه ؟

-يعني لو الكمية اللى اتفقتنا عليها متسلمتش فى معادها أولاً لازم نرد العربون كاملاً .. ثانيا هندفع شرط جزائي كبير .. ده غير ان مش متوفر حالياً السيوله اللى مطلوبه دى كلها ..يعني

الخسارة كبيرة فعلاً

نظر اليه والده قائلاً:

-وناوى على ايه دلوقتي يا "عمر" ؟

-زى ما ماما قالت أول حاجه عملها هغير مدير المزرعة وأجيب مهندس زراعى بيْفهم وأقدر أَعتمد عليه

-وانت ليه ما تتابعش الموضوع ده لحد ما الأزمه تعدى

-أكيد هتابع يا بابا بس حضرتك عارف ان جوازي كمان أقل من شهرين يعني مش هبقى متفرغ كلياً للمزرعة فمحتاج حد أثق فيه وأَعتمد عليه

" -كرم" ؟

-فعلاً كلمت "كرم" فى الموضوع ده .. بس "كرم" بعيد عن الشغل العملى فى الزراعة من زمان ودلوقتي ملوش الا فى الإدارة وبس .. وأنا عايز حد خبره فى الشغل العملى

رد هاتف "عمر" وأخرجه من جيبه واتسعت ابتسامته عندما راي اسم المتصل , هب واقفا وقال:

-عن اذنكوا

سار مبتعداً وهو يتحدث قائلاً:

-ألو .. تصدق انك واطى

ضحك المتصل بشده ورد قائلاً:

-عارف

-عارف ايه

-ان أنا واطى وكل اللى انت عايز تقوله قوله

-سنتين ما اعرفش عنك حاجة يا "أيمن" انت بتستهبل بجد

-معلش يا "عمر" لو عرفت اللى حصلنى هتعدرنى بجد

-لا مفيش أى اعدار .. مكنتش عشرة عمر دى يا ابنى..

-صدقنى والله لما تعرف ظروفى هتقول الواد ده جبل انه اتحمل كل ده

قال "عمر" فى قلق:

-خير يا "أيمن" قلقتنى ؟

-خير ان شاء الله .. عايز أقابلك مينفعش نتكلم كده فى التليفون

-طبعا يا ابنى قولى انت فين ومسافة السكه وأكون عندك

-لا خلىنا بعد العصر لانى فى الشغل دلوقتى ايه رأيك نتعدى سوا

-تمام يا باشا وهجيب الواد "كرم" معايا

" -كرم" يخرب بيته ازيه

ضحك "عمر" قانلاً:

-زى ما هو

-لسه غتت ولسانه طويل ؟

-لا عقبال عندك طول أكثر

ضحك الصديقان .. وقد كان يبدو عليهما الاستمتاع بتلك المحادثة التى اشتاقا اليها

-والله وحشتنى جدا الواد ده وانت كمان يا "عمر"

-والله وانت يا ابنى ده أنا سألت عليك طوب الأرض ومعرفتش أوصلك حتى شفتك قالولى انك بعتهار ورقمك ده على طول مقفول

-أما أقابلك هحكلك على كل حاجة

-خلاص اتفقنا وأنا مش هسيبك

-خلاص معادنا العصر ان شاء الله يلا سلام

-ان شاء الله سلام

وقفت "ريهام" تنظر الى الجدول المعلق فى ردهة الكلية وهى تضم كتبها الى صدرها , عندما شعرت بشخص يقف خلفها مباشرة .. التفتت لتجد شاب متوسط القامة نحيف يرتدى عوينات أخذ فى تعديلها وقد بدا عليه شئ من الإرتباك .. ظنت "ريهام" أنها تحجم الرؤية عنه وأنه يريد بدوره الإطلاع على مواعيد المحاضرات .. فنظرت الى الأرض ومرت بجواره وأفسحت له المجال .. وبعدها خطت بضع خطوات مبتعدة وجدته ينادى من خلفها:

-يا آنسه .. يا آنسه لو سمحتي
نظرت الى الخلف وتوقفت مستفهمه عما يريد
اقترب منها بضع خطوات فتراجعت لتترك مسافة بينهما وقالت فى حزم:
-ايوة فى حاجه ؟
ازداد توتره وأعدت ضبط عويناته مرة أخرى وقال وقد بدا عليه الارتباك:
-أيوه لو سمحتي .. يعني .. احم احم .. أنا كنت عايز أعرف اسمك
نظرت اليه "ريهام" فى غضب وتركته وانصرفت .. قالت فى نفسها (مجنون ده ولا بيستهبل)
ظل الشاب واقفا فى مكانه وعيناه تتابعانها فى صمت.

دخل "عمر" مطبخ الفيلا الذى كانت تقف فيه والدته تعد شيئاً ما .. وتأمّر الخادمة بأن تأتي
لها ببعض الأغراض من المبرد ..أقبل ناحيتها قائلاً:
-بتعملى ايه يا ست الكل
نظرت اليه قائله فى غضب:
-بره يا "عمر"
ضحك "عمر" الذى يعرف مدى كره والدته لرؤية أى رجل فى المطبخ حتى ولو كان والده ..
كانت "كريمة" تهتم بأن تتعلم بعض الصفات التى تجذبها وتحاول تطبيقها لزوجها وابنها
وكانت تسعد عندما تجد أن ما صنعته لاقى اعجابهما ولم تكن لتسمح لأى منهما بمشاهدتها
وهي تعمل .. قال "عمر" مبتسماً:
-طيب هقولك بس حاجة وهطلع فوراً
تركت ما بيدها والتفتت قائله"
-ها أفندم بسرعة مشغوله
-هنعزم نانسي وأهلها امتى .. احنا أجلنا المعاد لأجل غير مسمى .. يعنى محدداش معاد جديد

فكرت "كريمة" قليلاً ثم قالت له:
-شوفهم مناسب ليهم بكرة ولا لأ
-طيب تمام هشوف نانسي وأرد عليكى
-خلاص اتفقنا

قالت ذلك ثم التفتت مرة أخرى لتكمل عملها الذى يبدو وأنه يأخذ كل تركيزها
هم "عمر" بالانصراف ولكنه تراجع وقال وعينه تلمع فى مرح:
-ماما انتى بتعملى ايه .. ممكن أعرف على الأقل الاسم العجيب اللى هتصدم لما أعرفه
التفتت اليه قائله:
-ولد

-ما هو يا ماما بصراحه انتى بتختارى أكالات ليها أسماء عجيبه .. لما بتعجبني حاجة مبعرفش
أطلبها منك تانى .. دى أسماء محتاجه خريطه
التقطت أحد الأوانى الموضوعه على الطاولة وهمت بأن تضربه بها .. لكنه اسرع بالخروج من
المطبخ وهو يضحك

انهمكت "ريهام" فى مطالعة أحد كتبها وهى جالسة فى كافيتريا الجامعة .. قالت لها صديقتها

التي تجلس بجوارها:

"-ريهام"

-هممم

-فى واحد بيراقبك

رفعت عينيها من الكتاب ونظرت الى صديقتها قائله:

-بيراقبنى ازاي يعنى؟

-معرفة من منزله عينه من عليكي

-هو فين؟

-فى الترابيزة اللي على يمينك

نظرت "ريهام" فوجدته نفس الشخص الذى سألها عن اسمها فى الصباح .. كان يجلس وينظر اليها .. فأشاحت بوجهها عنه قائله:

-سيبك منه ده عبيط

-عبيط .. عبيط ازاي يعنى؟

-تصورى جه فجأة بيقولى ممكن أعرف اسمك

ضحكت صديقتها بصوت خافت قائله:

-آه .. جو ممكن نتعرف ده عارفاه .. بس دى كانت موضه وبطلت .. ده شكله قديم أوى

-قديم ولا جديد ملناش فيه ويلا نقوم من هنا أحسن

نهضت الصديقتان وغادرتا الكافتيريا وعيون الشاب تتابعهما فى صمت

كان "عمر" يجلس فى الصالون منتظراً "نانسي" التى ذهبت والدتها لإيقاظها من النوم .. تملل فى جلسته وبعد وقت طويل وجدها تنزل الدرج فى سرعه قائله:

-حبيبي وحشتنى أوى أوى

أحاطت عنقه بذراعيها وعانفته , لف "عمر" يديها حولها قائلاً:

-وانتى كمان يا حبيبتى وحشتيني أوى

أرجعت رأسها قليلا الى الوراء ونظرت فى عينيه قائله:

-لو كنت وحشتك مكنتش لغيت العزومه وسبتنى وسافرت

-حبيبتى أنا شرحتك سفرى كان مفاجئ وكان مهم

-يعنى عايز تفهمنى ان كل الناس اللي شغالين عندك دول مفيش حد فيهم كان ينفع يسافر بذلك

مرر أصابعه فى خصلات شعرها الذهبية قائلاً:

-لو كان ينفع حد غيري يسافر مكنتش أجلت العزومة وسافرت ..

أرجع رأسه قليلا الى الوراء وقال وقد ضاقت عيناه:

-وبعدين أنا سافرت يوم واحد بس .. عايزة تفهميني انى لحقت أوحشك يعنى

قالت وهى تنظر له بعينين ناعستين:

-كل ثانية بتكون فيها بعيد عنى بتكون صعبة أوى عليا وبحس انك واحشنى أوى

اتسعت ابتسامه "عمر" قائلاً:

-لا أنا مش أد كلامك ده

قالت له فى دلال:

-اعمل حسابك بعد كدة رجلى على رجلك أى مكان هتسافر فيه هتاخذنى معاك .. فاهم يا

باشمهندس

-عيون الباشمهندس .. خلاص السفرىه الجاية هتكونى معايا ان شاء الله .. أنا اصلا هسافر

تانى المزرعة .. وهاخذك معايا لاني نفسي تشوفيها أوى المزرعة دى كبرت على ايدي وليها مكان خاص فى قلبي عشان كدة عايز أأخذك هناك أنا واثق انها هتعجبك أوى قالت بسرعة:

-طالما عجبك يبقى هتعجبني يا حبيبي
ابتسم عمر .. قم قال:

-قوليلي بأه مناسب بكرة للعزومة اللي اتأجلت دى .. نفسي انتى وماما تكونوا صحاب وتقربوا من بعض أكثر وكمان عايز أعرفك على عمى وولادها انتى اتعرفتى عليهم بس يهمنى انكوا تكونوا قرييين من بعض

قالت وقد شعرت ببعض الضيق والضجر لكنها أخفت ذلك سريعاً:

-اه طبعاً يا حبيبي .. أهلك هما أهلى دلوقتى .. ومامتك زى مامى بالنسبة لى اتسعت ابتسامه "عمر" وقد سعه ما قالت:

-خلاص اتفقى مع بابا وماما عشان منتظرينكوا بكرة ان شاء الله
-او ك حبيبي

نظر "عمر" فى ساعته ثم قال:

-حبيبتي معلش أنا مضطر امشى دلوقتى
تظاهرت بالضيق وقطبت جبينها قائله:

-زهقت منى بالسرعة دى
رد بسرعة:

-طبعاً لا .. ازاي تقولى كدة .. أنا مبشبعش منك ومن وجودك معايا .. بس عندى معاد مهم ومش عايز أتأخر
قالت بحدة مصطنعه:

-معاد .. ها وشكلها ايه بأه ؟

قال "عمر" باستغراب:

-هى مين اللي شكلها ايه ؟

-البنيت اللي هتقابلها واللي مهتم انك متأخرش عليها

قال "عمر" بجديّة:

"-نانسى" حاجة زى دى مفيهاش هزار .. انتى عارفانى كويس .. مش "عمر" اللي يعمل كدة ..

قالت وهى تحاول اصلاح الموقف:

-عارفه طبعاً يا حبيبي وواتقه فيك .. انا بس بغير عليك
لانت ملامحه وقال:

-ماشى وأنا مقدر ده لاني عارف ان اللي بيحب حد لازم يغير عليه .. وعشان أطمنك أنا هقابل واحد صحبى كان زميلى من أيام الجامعة وبعد ما اتخرجنا فضلنا مع بعض .. اختفى فترة بس رجع ظهر تانى وهنتقابل على الغدا أنا وهو و "كرم"
نظر اليها قائلاً:

-ها حبيبي اطمن ان مفيش فى قلبي ولا فى عيوني غيره ؟
قالت بدلال:

-ايوة اطمنت

ثم طبعت قبله على ثغره وقالت فى خبث:

-خد دى .. عشان تفكر فيا لحد بكرة

انتهت "ياسمين" من توضيب بعض الأغراض التي اشترتها لجهازها مؤخراً فى حقيبة سفر ..
رتبتهم بدقة وعناية وهى تنظر الى كل قطعة فى فرح
دخلت "ريهام" الغرفة وابتمت عندما رأت وجه أختها الفرحة قائلة:
-خيانه .. انتى ناويه تعيني حاجتك من غير ما أشوفها
قالت لها "ياسمين" ضاحكة:
-يا مفترية ده انتى هريتيهم من كتر الفرحة عليهم ده انتى حفظتى شكلهم أكثر منى
أقبلت عليها أختها وحضنتها قائلة:
-ربنا يسعدك يا "ياسمين" انتى طيبة أوى وتستهلئ كل خير
عانقتها أختها وقد تأثرت بكلامها .. وشعرت "ياسمين" بعينها وقد اغرورقت بالدمع قائلة:
-انتى كمان يا "ريهام" هتوحشيني أوى .. مش قادرة اتخيل انى هنام فى مكان انتى مش
موجودة فيه
" -ياسمين" بالله عليكى متعيطيش هتخلينى أعيط أنا كمان .. انا اللي مش عارفه هعمل ايه
من غيرك
نظرت كل منهما الى الأخرى والدموع فى عينيهما عندما افتح الباب ودخلت أمهما عندما
رأتها هكذا أقبلت عليهما وضمتهما الى صدرها قائلة:
حبايب قلبى انتوا الاتنين .. يارب أفرح ببيكوا وبعيالكووا ويهنيكووا ويسعدكووا فى حياتكووا يارب ..
ويرزقك يا "ريهام" يا بنت "سمية" بابن الحلال اللى يصونك ويتم فرحك يا "ياسمين" على
خير
قال ذلك ثم قبلت كل منهما على رأسها

التف الأصدقاء "عمر" و "كرم" و "أيمن" حادثة احدى الطاولات فى أحد المطاعم الفخمة ..
قال "عمر" فى حزن:
-ياه يا "أيمن" كل ده حصلك واحنا منعرفش
-شوفت بأه مش قولتلك لما تعرف هتعدرنى
-طيب وليه يا "أيمن" متقلوليش حاجة زى كده .. مش احنا اخوات يا ابنى ولا ايه
-طبعا اخوات يا "عمر" وأكثر من الإخوات كمان .. وأنا الحمد لله الديون كلها اتسددت
وبشتغل حالياً فى شركة للأسمدة الزراعية
قال "كرم":
-انت أهبل يا ابنى فى حد يعمل عملتك السوداء دى
قال "أيمن":
-اللهم طولك يا روح يا ابنى مش هتبطل طولة لسانك دى
-طولة لسان ايه وبتاع ايه خلىنا فى مصيبتك انت مش عيب واحد شحط طويل عريض زيك
وعنده 37 سنة يضحك عليه ويتنصب عليه ويخسر كل اللى وراه واللى أدامه
-يعنى خسرتهم بمزاجى يا "كرم"
-يا ابنى انت اللى طيب زيادة عن اللزوم ازاي تشارك ناس متعرفهمش وتثق فيهم كدة وتحط
فلوسك بين ايديهم
قال "أيمن" فى حزن:
-أهو اللى حصل بأه قدر الله وما شاء فعل
قال "كرم":
-ونعم بالله .. بس برده حاول تغير من طبعك ده واتحرر كده .. يا ابنى الطيب فى الزمن ده
بيفتكروه أهبل

-ما تحترم نفسك يا "كرم" ايه أهبل دى
ضحك "عمر" وهو ينظر اليهما قاشلاً:
-انتوا مش هتبتلوا نقار أبداً .. من أيام الجامعة وانتوا كده .. اكبروا بأه
ابتسلم "أيمن" و "كرم" .. وقال "أيمن": "
-تعرفوا انكوا وحشتونى أوى ووحشنى أيام ما كنا ما بنفترقش الا على النوم
ووجه حديثه الى "كرم" قانلاً:
-وبصرف النظر عن غتاتك وطولة لسانك الا ان النقار معاك واحشنى
قال "كرم": "
-وبترجعوا تزعلوا
ضحك ثلاثتهم .. ثم سأله "عمر" باهتمام:
-وانت مرتاح فى شغلك يا "أيمن": "
-بصراحة يا "عمر" هو ده الموضوع اللى كنت عايز أكلمك فيه
-خير يا "أيمن"
تنهد "أيمن" قانلاً:
-أنا مش مرتاح فى الشغل مع الناس دول خالص يعنى بحس ان فى غش ورشاوى ولعب من
تحت الطرابيزة وأنا مليش فى الجو ده
قال له "عمر" بسرعة:
-طيب ما تيجي تشتغل معانا
نظر له "أيمن" بإمتنان لأنه حافظ على عدم ماء وجهه ولم يتركه ليطلب ذلك بنفسه .. قال
"أيمن"
-بجد ؟ يعنى انتوا فعلاً محتاجنى ولا قولت كدة عشان قولت انى مش مرتاح فى شغلى
قال "عمر" على الفور:
-لا محتاجينك ومحتاجينك جدا كمان .. لاننا واقعين فى مصيبة
-مصيبة ايه يا "عمر"
تحدث "كرم" قانلاً:
-المهندس الزراعى اللى كان مسؤل على المزرعة عك الدنيا اخر عك والزرع حالته منيلة
بنيلة وكدة جزء كبير من المحصول هيصع ان مكنش كله ده لو ملحقناش نفسنا ورشينا
واهتمينا بالموضوع ومحدث فينا فاضى لمتابعتها المتابعة الكاملة
أكمل "عمر" حديث "كرم" قانلاً:
-احنا فى موقف صعب يا "أيمن" لأن المحصول اصلا متباع وفى شرط جزائى لو متسلمش
فى معاده أو لو اتسلم أقل جودة من اللى اتفقنا عليها
-خلاص طالما محتاجينى فعلا فأنا معاكوا يا شباب
قال "عمر" فى فرح:
-تمام أوى .. حضر نفسك باه يا باشا عشان السفر وطبعا اقامتك هتكون فى بيت المزرعة
-تمام هبدأ أحضر نفسي للسفر بس هروح وأرجع فى نفس اليوم .. يعنى مش هبدأ اقامه فى
المزرعة الا بعد اسبوع ولا اتنين كده
سأله "عمر" قانلاً:
-واشمعنى يعنى
قال "أيمن" وهو يبتسم:
-أصل أخوكوا هيخطب قريب
سعد كل من "عمر" و "كرم" لهذا الخبر .. وقال له "كرم": "
-ياااه .. اخيراً فى واحدة رضيت تعبرك
قال له "أيمن": "

"كرم" اتلم
"عمر": سيبك منه وقولنا بالتفصيل الممل عرفتها ازي وفين وامتى
ضحك أيمن قانلاً:
-حيلك حيلك ايه هو تحقيق ده أبويا وأمى الله يرحمهم لو كانوا عايشين مكنوش هجموا عليا
بالأسئلة كده
قال له "عمر" فى مرح:
-خلص .. مش هسيبك الا لما آخذ منك اعتراف كامل
-طيب يا سيدى وأنا هعترف .. كنت فى المطار بوصل واحد صحبى .. لفت نظرى بنت كانت
واضح انها مستنيه حد
ابتسم "عمر" قانلاً:
-حب من أول نظرة يعني ؟
ابتسم "أيمن" وقال:
-يعني حاجة زى كدة
سأله "عمر":
-ايه اللي لفت نظرك فيها ؟
-لما شوفتها حسيتها غير كل الناس اللي حواليتها .. أكنها فى دنيا تانيه لوحدها .. يعني المطار
كان زحمه وناس داخله وناس خارجه .. ودى كانت أعده على الكرسي و ماسكه مصحف
صغير وبتقرأ فيه كانت محجبه ولبسها محترم .. لفت نظرى انها كانت بريئة وعلى طبيعتها
يعني مش زى ما بنشوف الأيام دى الواحدة بتبقى خارجه وناقعه وشها فى شوال دقيق قبل ما
تخرج
ضحك "كرم" قانلاً:
-ايوة عارفهم بتوع الدقيق دول
حته "عمر" على الحديث قانلاً:
-كمل .. وبعدين
-بصراحة فضلت أحوم حواليتها عايز أعرف هى لابسه دبلة ولا لا .. وبعد ما اتأكدت ان ايديها
الانين مفاهيمش دبلة حاولت أقرب منها واتكلم معاها .. لكننا صدتنى جامد ومدتنيش فرصة
أبدأ وقامت وسابت المكان اللي كانت أعده فيه .. بعدها جت البنت اللي كانت مستنياها فى
المطار و لقيتهم خلاص ماشيين وأنا فعلا كنت حاسس ان هى دى الانسانه اللي بدور عليها
قال له "كرم" بلوعه:
-او عى تكون سبيتها تمشي .. عارفك يا "أيمن" هبل وطلعه راس ورجلين
-لا يا غتت مسبتهاش تمشي وقفتها وبدون ما اديها فرصة قولتله السي فى بتاعى وطلبت
رقم باباها والبنت اللي كانت معاها واللى عرفت انها قريبتها اتتهولى
ابتسم "عمر" قانلاً:
-قصة غريبة .. خبط لزق كدة خدت رقم باباها
-بصراحة يا "عمر" انا فضلت أكثر من ساعة ونص براقبها فى المطار وبجد معرفش حسيت
حاجه جوايا بتقولى هى دى
-وكلمت باباها
-ايوة كلمته وشرحتله ظروفى كلها مخبتش حاجة .. وأديني منتظر رد منهم
ربت "عمر" على صديقه قانلاً:
-ان شاء الله خير .. انت مفيش زيك يا "أيمن" ويا بختها اللي هتكون من نصيبها
انتبه "أيمن" لأول مرة للدبلة التى تحيط باصبع صديقه قانلاً:
-ايه ده انت خطبت ؟
قال "كرم" بسخريه :

-لا لابس الدبلة يتصور بيها
لكمه "أيمن" فى كتفه قائلاً:
-يا اخى بطل أم الغتاته بتاعتك دى
رد له "كرم" اللكمة قائلاً:
-ااه .. ايدك ثقيله يا بنى آدم
نظر اليهما "عمر":
-والله أنا حاسس انى أعد مع اتنين فى الكى جى
قال "أيمن" موجهاً حديثه لـ "كرم": "
-طيب ادى "عمر" خطب وأنا أهو شوية وهخطب أنا كمان .. سيادتك بأه مش ناوى تتأهل
انت كمان
"عمر" ضاحكاً:

-بصراحة انا معنديش استعداد اتدخله فى جوازه يعنى مقدرش أعمل كده فى بنات الناس
"كرم": "أيوة أيوة غنوا أدام بعض انتوا الاتنين .. بكرة تشوفوا عروستى دى هتكونى عاملة
ازاى .. هتكون ست البنات ان شاء الله

قال "أيمن" بجدية:
-اعملوا حسابكوا لو فى خطوبة ان شاء الله وقبلوا بيا .. انتوا الاتنين معزومين مفيهاش كلام
انتوا عارفين انى مقطوع من شجرة وانتوا اكثر من الاخوات بالنسبة لى
قال له "عمر": "
-طبعاً يا "أيمن" من غير ما تقول ..وان شاء الله تكون الخطوبة تكون قريب أوى

خيم الحزن على الجميع وانبعث من المسجل صوت الشيخ المنشاوى وهو يتلو "يَا أَيُّهَا النَّفْسُ
الْمُطْمَئِنَّةُ ارْجِعِي إِلَىٰ رَبِّكِ رَاضِيَةً مَرْضِيَّةً فَادْخُلِي فِي عِبَادِي وَادْخُلِي جَنَّاتِي "
جلست الفتاتان وقد ارتديتا السواد وأحاطت بهما العديد من النساء اللاتى أتين لتقديم العزاء ..
وفى تلك اللحظة دخلت "سماح" من الباب قائله :
-السلام عليكم

هبت "ياسمين" واقفة وجرت عليها وعبراتها تتساقط على خدها .. حضنتها "سماح" وهى لا
تستطيع كبح جماح عبراتها هى الأخرى .. هتفت "ياسمين" وهى تبكى فى حضن صديقتها:
-ماما ماتت يا "سماح" .. ماما ماتت

الفصل الثالث عشر

التفت العائلة حول احدى الطاولات الكبيرة فى حديقة الفيلا , استقبل "عمر" ووالده ووالدته عمه عمر وأبنائها "علاء" و "ايناس"
كانت عمه "عمر" السيدة "ثرثيا" فى العقد الخامس من العمر يبدو عليها علامات القوة والصرامة , سيدة نحيفة قصيرة القامة ترتدى السواد وحجاب أسود اللون .. يظن الناظر اليها أنها امرأة لم تعرف الإبتسامة طريقاً الى ثغرها .. توفى زوجها منذ زمن بعيد.. أما "علاء" فكان الابن الصغير لها فى الثلاثينات من عمره طبيباً بيطرياً يعمل فى احدى شركات الأدوية الكبرى فى مصر .. وسيم رياضى البنية كانت نظراته للحاضرين تتسم بالبرود ولا المبالاة , أما "ايناس" فهى الابنة الكبرى هيفاء مشوقة القوام صارخة الجمال فى التاسعة والعشرون من عمرها تعمل فى شركة "عمر" مديرة للعلاقات العامة .. لم تكن محجبه كوالدها بل كانت تقل عنها التزاماً باللباس المحتشم .. تحدثت الى "عمر" السيدة "ثرثيا":
-أمال فىن خطيبتك يا "عمر" ؟

رد "عمر" على عمته وهو يخرج هاتفه من جيبه:

-ثوانى ان شاء الله يا عمتو ويكونوا هنا

هم بأن يتصل بـ "نانسى" عندما وجد والدته ووالده يقفان ليرحبان بـ "نانسى" ووالدها ووالدتها .. شعر "عمر" بالغضب يتصاعد داخله عندما نظر الى ما كانت ترتديه خطيبته .. وقف وحاول السيطرة على غضبه أمامهم وسلم عليهم ومد يده ليسلم على خطيبته ببرود دون أن ينظر الى وجهها

..رحب الجميع ببعضهم البعض وتبادلوا عبارات المجاملة ثم جلس الجميع ينعمون بتجاذب أطراف الحديث وبالنظر الى روعة ما يحيط بهم من خضره .. شخص واحد فى الحاضرين كان يجلس متبرماً ألا وهو "عمر" كان يكتفى بالرد عليهم بابتسامه صغيرة يرسمها بصعوبة .. كانت تراقبه منذ البداية عينان عسليتان ..كانت تصوب اتجاهه نظرات حب ممزوجة بالحسرة والألم .. عينا "ايناس" .. ما لم تبج به "ايناس" لأحد إلا "عمر" .. هو حبها الشديد له منذ الصغر فلقد تربوا معاً , من صغرهم كانت مشاعر "عمر" تجاهها لا تتعدى مشاعر الأخ الكبير اتجاه أخته الصغيره أما هى فلقد تجاوزت مشاعرهما كل الحدود وكل القيود .. حملت سرها فى صدرها ولم تكشف النقاب عنه إلا لـ "عمر" ليلة خطبته صارحته بمشاعرها التى طالما عذبتها وأحرقت قلبها .. لكن رد "عمر" كان (انتى مش أكثر من أختى يا ايناس) حاولت استجدائه بكل الطرق لكنه لا يرى فيها إلا الأخت الصغيره .. حانت التفاتته من "نادين" الى "عمر" ولاحظت ما يبدو عليه من عبوس فالتفتت الى "نانسى" قائله:

" -عمر" ماله يا "نانسى"؟

-ماله يا مامي ؟

-من ساعة ما جينا وهو مركب الوش الخشب

-وأنا أعرف منين!

-طيب ما تتحركى وتشوفيه ماله!

قامت "نانسى" وقالت لـ "عمر": "

-مش هتفرجنى على الجنينة يا "عمر"

قام "عمر" معها وسارا معاً بعيداً عن الجميع غير منتبهين لعينا "ايناس" التى كانت ترمقهما فى حقد

بعدها ابتعدا عن أنظار الجميع أوقفته "نانسى" قائله:

-مالك يا "عمر" فى ايه ؟

التفتت اليها ينظر الى وجهها وهو يشير بإصبعه على ملابسها من فوق لتحت قائلاً:

-مش عارفه في ايه ؟ .. ايه الزفت اللي انتى لابساها ده
بدأت "نانسي" بالشعور بالغضب والعصبية هي الأخرى فتحكّماته كانت أكثر مما تستطيع
تحمله فتاة مدللّه مثلها لم تعتاد على تحكّمات الآخرين في تصرفاتها .. قالت له في عصبية:
-ايه ماله لبسي .. فستان برقبة طويله وتلت تربيع كم..
أكمل "عمر" قائلاً في غضب:
-وقصير فوق الركبة
-قولتلك 100 مرة انت عرفتنى كدة وحبتنى كدة وخطبتنى وأنا كده ليه بأه عاوز تتحكم فيا
بالشكل ده وعازينى اغير من نفسي ؟
ندمت لتسرّعها فيما قالت وتذكّرت تحذيرات أمها جيداً .. فحاولت امتصاص غضبه قائله:
-حبيبى أنا بس كنت حابه ان شكلى يكون حلو أدام أرايبك .. وبعدين ما فيش هنا حد غريب و
"علاء" ابن عمك يعني مش غريب
كان ينظر اليها في صمت لم تستطع استنتاج ما يفكر فيه اقتربت منه محاوله عناقه قائله:
-وبعدين انت مسلمتش عليا كويس ولا قولتلى كلمة حلوة من ساعة ما وصلت
أزاح عمر ذراعيها اللتان التفتا حول عنقه .. وقال بهدوء:
-يلا عشان متأخرش عليهم
عاد بها الى حيق يجلس الجميع , عندها تقدمت والدّة "عمر" داعيه الجميع الى الدخول لتناول
طعام الغداء

وجهت والدّة "سماح" حديثها الى "أيمن" قائله:
" -سماح" دى بنتى الوحيدة يا "أيمن" وأنا وباباها مكناش هنوافق نديها لك لو مكناش
متأكدين من أخلاقك وحسن سلوكك
قال "أيمن" فى خجل:
-متشكر جدا يا دكتورة
" -سماح" دى بنتنا الوحيدة يا "أيمن" أتمنى انك تحافظ عليها وتصون الأمانة
-حضرتك متقلقيش ولا عمى كمان يقلق "سماح" هتكون دايماً فى عنيا وان شاء الله مش
هتكون هي بنتكوا الوحيدة أنا كمان هكون ابنكوا .. أنا يتيم زى ما شرحت ظروفى لعمى وأنا
شايف فيكوا العيلة والجو الأسري اللي اتحرمت منه
قال والد "سماح":
-طبعاً يا ابني انت خلاص غلاوتك من غلاوة "سماح" بنتى
قالت والدّة "سماح" له:
-مفيش أى طريقة يا "أيمن" تنقل شغلك هنا القاهرة
-للأسف يا دكتورة المزرعة اللي هشتغل فيها ان شاء الله فى قرية جنب المنصورة وهناك
هتكون اقامتى ان شاء الله .. وكمان المزرعة دى بتاعة واحد صحبى وأنا حابب الشغل معاه
خاصة انه اتفق معيا ان شغلى مش هيكون بأجر .. هيكون بنسبه يعني أكنى بشتغل فى مكان
بتاعى مش بشتغل عند حد
-ربنا يوفقك يا ابني ويقدم اللى فيه الخير .. وزى ما اتفقنا ان شاء الله الخطوبة بعد اسبوع
قال وقد اتسعت ابتسامته:
-ان شاء الله

-بس وقعت واقف يا "عمر" .. "نانسي" زى القمر
قال "علاء" هذه الجملة وهو ينقل بصره من "نانسي" التى يرمقها بظفرات اعجاب جريئة
وبين "عمر" الذى يجلس أمامه مباشرة على طاولة الطعام .. وجه "عمر" حديثه الى
"علاء" بنبره محذرة:

"-علاء"

قال "علاء" على الفور:

-ايه أنا مش بعاكسها أنا بقول الحقيقة بس
اتسعت ابتسامه "نانسي" لهذا الإطراء فهى لطالما أحبت سماع تلك الكلمات من أفواه الرجال
.. التى تشعرها بالزهو .. تضايق "عمر" كثيرا من تلك الابتسامه التى ارتسمت على شفתי
"نانسي" .. ألفت عليها "ايناس" نظرة حاقدة قائله:

-بس "عمر" عرف بنات حلوة كتير .. يعنى مفيكيش حاجة مميزة عنهم
التقت أعين الفتاتان فى تحد صارخ .. كان "عمر" مدرك لدوافع "ايناس" ولمشاعرها لذلك
آثر الصمت وغير مجرى الحديث قائلاً:

-ها يا "علاء" أخبار شغلك ايه؟

قالت عمته:

-شغله كويس أما حياته الخاصة هى اللي مش كويسه أبداً

ضحك "علاء" قائلاً:

-ليه بس مش كويسه يا ماما

-عشان مش عايز تتجوز , رجاله فى سنك ومعاهم أطفال دلوقتي

قال "علاء" بخبث موجه نظراته الى "نانسي": "

-أنا מבحبش حد يقيد حرיתי .. ايه اللي يخلينى أقطف وردة واحدة فى حين ان أدامى جنيته
بحالها أستمتع بيها

تلاقت عين "علاء" بعين "عمر" فى تحد .. فما لا يعرفه البعض هو أن "علاء" و "عمر"
بينهما الكثير من المشاحنات التى سببها الأكبر هو شعور "علاء" منذ صغره بتفوق "عمر"
عليه وبالغيرة منه فقد كان "عمر" مميزاً فى العائله وهذا ما دفع "علاء" لأن يكن لابن خاله
حقد دفين

انتهى الجميع من تناول الطعام وتفرق الجميع حيث جلس والد "نانسي" ووالدتها مع عمه
"عمر" ووالده .. أما والده "عمر" فذهبت الى المطبخ لإعطاء الخدم بعض الأوامر .. وذهب
"عمر" الى مكتبه داخل الفيلا ليجري اتصالاً هاماً .. أما ايناس فكانت تتمشي بلا هدف فى
الحديقة

عندما خرجت "كريمة" والده "عمر" للبحث عن "علاء" وجدته واقفاً فى الحديقة مع
"نانسي" يتضحكان معا وتضرب بكفها على كفه ويبدو عليهما الاستمتاع .. اقتربت منهما
فانتبها لوجودها رسمت ابتسامه صغيرة على شفثيها وقالت لـ "علاء": "

-خالك بيدور عليك يا "علاء"

اعتذر "علاء" من "نانسي" ودلف لداخل الفيلا .. وهمت "نانسي" بأن تدخل هى الأخرى
عندما استوقفتها "كريمة" قائله:

"-نانسي" عايزاكى شويه

-ايوة

-بصى يا "نانسي" انتى خلاص شويه وهتكونى مرآة "عمر" ابني وعشان حياتكم يا بنتى
تمشي كويس مع بعض لازم تفهمى طبع "عمر" كويس

عقدت "نانسي" ذراعيها أمام صدرها وقد ارتسمت عليها علامات التبرم .. فأكملت "كريمة"

قائله:

"- عمر" طبعه حامى من صغره .. بيغير على أى حاجة يحبها أو أى حد يحبه .. كان بيغير عليا أنا من باباه .. كان بيغير على لعبه .. ممكن يخلى الأطفال يلعبوا معاه بلعبه لكن دايمًا كانت له لعبه مميزة جدا وبيحبها جدا وميحبش حد يلعب بيها غيره و دايمًا مهتم بيها وبيحافظ عليها .. عمر" كده مع الناس اللي يخصوه وانتى تخصيه يا "نانسى" وبعدين..

تجاهلت "كريمة" ضيق "نانسى" قائله:

-عشان متحصلش مشاكل بينك وبين "عمر" يا "نانسى" أفهمى طبعه ده انه بيغير عليكى لأنه بيحبك فمتحاوليش تضايقيه يا بنتى بتصرفاتك استشاطت "نانسى" غضباً قائله:

-مالها تصرفاتى .. كل ده عشان كنت واقفه بتكلم مع "علاء" .. انتوا بجد ناس غريبة أوى .. أكنكوا عايشين فى كوكب تانى قالت "كريمة" بهدوء لكن بحزم: -مفيش داعى للكلام ده يا بنتى انا بنبهك بس عشان مش عايزه مشكله تحصل بينك وبين "عمر"

-لا اطمنى مفيش مشاكل هتحصل بيني وبينه ريحي نفسك ولو سمحتى متدخليش تانى فى حاجة خاصة بيا خليكى بس فى اللي يخصك أنا مش صغيره ومش محتاجه نصايح من حد وفجأة سمعا صوتاً يهتف من خلفها فى غضب: " -نانسى"

أقبل "عمر" وهو يشتعل غضباً .. كانت أمه تفهمه جيداً ولم ترد حدوث مشكله بينهما فقالت له :

-خلاص يا "عمر" مفيش حاجة حصلت قال لها:

-لو سمحتى يا ماما ادخلى دلوقتى وسببيني مع "نانسى" شويه حاولت "كريمة" التحدث لكنه قاطعها قائلاً بحزم: -ماما لو سمحتى

دخلت "كريمة" الفيللا ووقف "عمر" ينظر الى "نانسى" التى تحاول التفكير فى طريقه لامتصاص غضبه قال "عمر" بحزم شديد:

-ماما فى حياتى خط أحمر لو اتعديتى حدودك معاها فأنا من سكه وانتى من سكه قفز قلب "نانسى" من مكانه وحاولت التحديث:

" -عمر" أنا مكنش قصى .. أنا بس... أوقفها وهو يرفع أصبعه محذراً قائلاً:

-ششششش .. اسمعيني كويس

نظر لها قائلاً بهدوء ممزوج بالغضب وهو يضغط على الحروف جيداً:

-ماما .. ما أسمحش لا ليكى ولا لأى واحدة غيرك مهما كانت هى مين بالنسبه لى انها تتكلم معاه بالشكل ده نهانى ..لو اكرر الموضوع ده يا "نانسى" يبقى انتى بتنهى علاقتنا بايدك حاولت "نانسى" السيطرة على الموقف واحتوائه قائله:

-انا بجد مكنش قصى دى مامتك زى مامى بالظبط .. أنا هروح دلوقتى واعتذرلها يا حبيبى .. ها

حاولت تقبيل وجنته لكنه أبعد وجهه عنها

فأسرعت الى الداخل تبحث عن "كريمة" لتعتذر عما بدر منها

تدثرت "ياسمين" بغطائها وأولت ظهرها الى أختها تاركة العبرات تنساب على وجنتيها فى صمت .. أخذت تحدث نفسها قائلة (أاااآه يا ماما .. وحشاني أوى ..وحشنى حزنك وحشتنى ريحتك .. مش عارفه ازاي هعيش من غيرك انتى كنتى الحزن الحنين اللى بيحمينى من الدنيا .. فى حزنك مكنتش بخاف وكنت بحس بأمان .. سبتينى فى اكثر وقت انا محتجاكى فيه .. وحشتينى اوى ..نفسى ارمى نفسى فى حزنك .. انا جوايا كتير يا ماما كتير اوى وتعبانه اوى ..) سمعت "ياسمين" شهقات صغيرة فالتفتت الى حيث تنام "ريهام" فوجدت جسدها ينتفض فى خفوت فمسحت دموعها وحاولت التماسك وتوجهت الى أختها قائلة:
" -ريهام" حبيبتي انتى كويسه ؟

جلست بجوار "ريهام" التى أولتها ظهرها .. فأدارتها "ياسمين" من كتفها لترى العبرات وقد تساقطت على وجنتيها فأخذت رأس أختها فى حننها وقالت لها:
-حبيبتي متعيطيش .. وادعيها بالرحمه والمغفرة
قالت "ريهام" من بين شهقاتها:

-انا مش متخيله ان ماما ماتت يا "ياسمين" .. مش قادرة أصدق انى خلاص مش هشوفها تانى .. هنعمل ايه من غيرها ؟ .. دى كانت كل حاجه لينا يا "ياسمين"
ثم ازدادت حدة بكائها قائلة:

-وشوية وانتى كمان هتسبيني وهبقى لوحدى
رفعت "ياسمين" وجه "ريهام" بيدها ونظرت اليها قائلة:
-انتى عبيطه يا "ريهام" مين قال انى هسبيك .. انتى عارفه ان "مصطفى" ببسافر 3 اسابيع وبيرجع اسبوع واحد .. ان شاء الله بعد ما نتجوز هستأذنه ان ال 3 اسابيع هقفل فيهم الشقة واجى اعد معاكى هنا انتى وبابا
نظرت اليها "ريهام" وقالت بلهفه :
-بجد يا "ياسمين" .. يعنى وهو "مصطفى" تفتكرى يوافق ؟
طمأنتها أختها قائلة:

-وايه هيخليه يرفض .. ان شاء الله هيوافق
اعتدلت "ريهام" جالسها وحضنت أختها قائلة:
-يا حبيبتي يا "ياسمين" ربنا ما يحرمنتيش منك .. انتى الحاجه الوحيدة اللى مهونه عليا فراق ماما الله يرحمها .. انا بحس انك أمى يا "ياسمين" مش بس أختى الكبيره
مسحت "ياسمين" على شعر أختها قائلة:
-وأنا بحبك اوى يا "ريهام" وفعلا بحس انى أمك وانك بنتى .. بحبك أوى وبخاف عليكى اوى
أكثر ما بخاف على نفسى ..ربنا ما يحرمنا من بعض أبداً

فى احد المطاعم الفاخرة جلس "عمر" مع "كريم" يتحدثان عن أمور العمل .. عندما قال "كريم":

-وانت ناوى على امتى ان شاء الله ؟

قال "عمر" بعدم فهم:

-مش فاهم ناوى على ايه ؟

-الجواز يا ابنى .. ناوى تتجوز امتى .. قولت شهرين بس مش شايفك يعنى بتاخذ خطوات فى الموضوع ده .. عشان كدة بسألك انت غيرت المعاد ولا ايه
شرد "عمر" قليلا ثم قال لصديقه:

-لا المعاد زى ما هو متغيرش
-مالك يا "عمر" فى حاجه حصلت .. شكلك فى عاجبنى .. انت متخانىق مع "نانسى"
-لا مش متخانىق ولا حاجه
-امال ايه .. على بابا يا "عمر" .. أنا عارفك كويس فى حاجه مضايقاك أو شغلاك
-تنهد "عمر" تنهيده صغيره ثم قال:
-لا متحطش فى بالك .. كله تمام
-خلاص برحتك مش هضغط عليك .. بس لما تحب تتكلم .. انت عارف انى موجود
-ابتسم "عمر" ابتسامه صغيره قائلاً:
-عارف يا "كرم"

أنهت "ياسمين" اعداد طعام الغداء وذهبت كى توظف زالدها من نومه .. عندما اقتربت من
الغرفه سمعته يبكى فى الداخل .. اغرورقت عيناها بالدموع ووقفت قليلاً ثم تركته وذهبت .. فى
الداخل كان والدها يمسك صورة صغيره بالأبيض والأسود تجمعها مع والده "ياسمين"
والعبرات تتساقط على وجنته .. ضم الصورة الى صدره .. ورفع رأسه الى السماء وقال:
-يارب ارحمها برحمتك .. أنا قلبى راضى عنها .. أنا قلبى راضى عنها يارب
رن جرس الهاتف فأسرع "عبد الحميد" بمسح عبراته جيداً وفتح الباب وخرج لكى يرد على
الهاتف:

-السلام عليكم

-وعليكم السلام ورحمة الله وبركاته ازيك يا عمى أنا "مصطفى"

-أهلا بيك يا "مصطفى" يا ابنى

-البقاء لله يا عمى

-البقاء لله يا يا بانى

-تنحج "مصطفى" قائلاً:

-أنا اسف يا عمى انى تأخرت فى الاتصال والتعذيه بس الشغل كان لخمنى جداً .. وكنت فى
مأموريه تبع الشغل .. معلش أنا أسف

-ولا يهملك يا ابنى ربنا يعينك ويوسع رزقك

-احم احم .. عمى أنا كنت حابب أتكلم معاك يعنى فى معاد الفرح .. حضرتك عارف اننا حزين
القاعه من شهرين ودخنا على ما لقينا المعاد ده .. يعنى أنا بس أقصد أقول ان لو المعاد اتلغى
صعب نلاقى معاد تانى دلوقتى .. وكمان كل حاجه جاهزة خلاص مفضلش حاجه ناقصه فى
الشقة .. انا حبيت أتكلم مع حضرتك قبل ما أعمل أى حاجه وأشوف رأي حضرتك ايه
صمت "عبد الحميد" قليلاً ثم قال:

-الفرح ان شاء الله فى معاده يا ابنى

شبهت "ياسمين" رغباً عنها والتي سمعت ما قاله والدها دون قصد .. كيف يفكر والدها هكذا
كيف يصر على عدم تأجيل معاد الفرح .. أى فرح هذا ووالدها لم يمضى على موتها الا اسبوع
واحد .. أخذت العبرات تنساب على وجنتها فى صمت
بعدها أنهى "عبد الحميد" المكالمه .. خرجت من المطبخ وواجته قائله:

-بابا ازاي تقول ان الفرح فى معاده .. بابا ازاي ده ماما الله يرحمها ما فتش على وفاتها الا

اسبوع واحد .. ازاي انا اتجوز يا بابا فى الظروف دى

اتسمت على ملامحه الجديه وقال بتماسك:

-زى ما سمعتى الفرح فى معاده بعد اسبوع مفيش داعى يتأجل والحق أبقى من الميت

بكت "ياسمين" بقوة:

-ازاي يا بابا ازاي ؟ .. ليه ما نأجلش الفرح .. لسه لازم أتجوز دلوقتى ؟؟ أنا مش مستعجله

قال لها فى غضب:

-اننى سمعتى اللى أنا قولته هى كلمة واحدة الفرح فى معاده مفيش داعى للتأجيل
وفجأه انهار تماسكه أمام حدة بكائها وجذبها الى حضنه قانلاً:

-يا بنتى أمك ماتت فجأه .. كانت نايمه جمبي على السرير وهى كويسه مفيهاش حاجه أبدا
وصحيت لقيتها ميته .. أنا مش ضامن عمرى .. خايف أموت من غير ما اسيب معاكوا راجل ..
انتوا بنتين .. انتى شايغه الزمن اللى احنا فيه يا بنتى .. أنا نفسى أظمن عليكوا قبل ما أموت ..
أنا لو أطول أجوز "ريهام" كمان كنت جوزتها .. عشان خاطرى يا بنتى متحرقيش قلبى أكثر
ما هو محروق .. عايز أسيبك فى الدنيا دى وأنا عارف ان معاكوا راجل يحافظ عليكوا .. انتى
واختك ملكوش حد بعد ربنا .. أنا خايف عليكوا يا بنتى

حاولت "ياسمين" تفهم مشاعر والدها .. التى دفعته فى البدايه للموافقه على الزواج السريع
من "مصطفى" وعدم الاتصات الى رغبتها فى اطالة فترة الخطوبة والآن يريد اتمام هذه
الزيجة خوفاً عليها .. رغم تفهمها لمشاعره ونيته الحسنه الا أنها لم تستطع تقبل الأمر .. لكنها
رضخت لما أرادها والدها فهذه هى المرة الأولى التى ترى والدها يبكى أمامها .. فشعرت أن
الأمر جلل خطير .. أرادت اراحته وازاحه هذا الحمل الثقيل عن صدره:

-خاص اللى تشوفه يا بابا

قبلها "عبد الحميد" فى جبينها وقال لها:

-ربنا يكملك بعقلك يا بنتى

تراجعت "ياسمين" قليلا لتنظر الى والدها جيداً وقالت فى جديه:

-بس بشرط يا بابا .. أنا مش عايزة فرح .. مش ممكن أعمل فرح وأمى لسه ميته .. وكمان
مش عايزة ألبس فستان فرح .. هلبس فستان عادى .. لكن مش فستان فرح
قال لها بتأثر:

-ليه يا بنتى عايزه تحرميني انى أشوفك عروسه

قالت وقد شعرت أن هذا الحديث أرهاقها كثيراً:

-أرجوك يا بابا أنا هنفذ رغبتك وأتجوز فى المعاد .. بس أنا لا عايزه فرح ولا عايزه فستان
فرح .. أرجوك يا بابا متضغطش عليا أكثر من كدة .. لانى بجد مش هقدر أتحمل أكثر
قالت ذلك وأسرعت الى غرفتها وألقت نفسها على سريرها وتركت لدموعها العنان

"سامح" عبر الهاتف : بكرة خطوبتى أنا عارفه ظروفك بس منتظراكى

"ياسمين": انتى أختى و ده يوم مش ممكن أفوته

"-ياسمين" لو بضغظ عليكى خلاص متجيش يا حبيبتى وأنا هعذرك

"-سامح" انتى ملكيش صحاب ولا اخوات بنات .. وأنا مش بس صحبتك أنا كمان أختك ازاي

مش عيازانى آجى وأقف معاكى فى اليوم ده

-يا حبيبتى يا "ياسمين" أنا عارفه انك بتيجي على نفسك أوى عشان ترضى اللى حواليكى ..

بجد أنا كنت خايغه أوى متجيش .. زى ما قولتى مليش غيرك وأنا حسه انى قلقانه ومتلخبطه

على الآخر .. كان نفسى أأجل الخطوبة عشان ظروفك بس لولا ان "أيمن" مضطر يسافر

عشان شغله وعايز نلبس الدبل والشبكة قبل ما يسافر لانه هينشغل أوى الفترة الجايه

قالت لها "ياسمين" فى حنان:

-متقلقيش يا حبيبتى هاجى من الصبح وهكون جمبك انتى وطنط

-بجد انتى ونعم الأخت ربنا يفرح قلبك دايماً زى ما بتفرحى اللى حواليكى

"أيمن" وهو يجلس مع صديقه فى مكتبه بالشركة
-بكرة الخطوبة ومستنيك عشان نروح سوا
"-عمر": طبعا يا أيمن ومبروك يا عريس
-والواد "كرم" أنا كلمته وعزمته هو كمان
-متقلقش يا عريس أنا و"كرم" هنكون هنا فى الشركة وهنخرج سوا نعدى عليك ونطلع على
بيت العروسة ان شاء الله
-ان شاء الله

قالت "ريهام" وهى تنظر لأختها التى ترتدى ملابسها:
-هتروحي الخطوبة
-أها .. متيجي انتى كمان على الأقل تغيري جو انتى حتى مبتروحيش الكليه يا "ريهام"
-لا مليش نفس
-ليه .. انتى عارفه ان "سماح" ملهاش حد وهتفرح أوى لما تلاقينا احنا الاتنين معاها
-بجد يا "ياسمين" مش حسه انى عايزه أخرج ولا أعمل أى حاجة
-براحتك يا حبيبتي بس لو غيرتى رأيك عرفيني وأنا أستناكى فى المترو
-خلاص ماشي
-بس انتى ليه رايحه بدرى كدة
-عشان أساعد طنط وكمان "سماح" حساها قلقانه أوى فحابه انى أكون معاها ونظبط كل
حاجة مع بعض
-ماشي
-مع السلامة .. ولو غيرتى رأيك كلميني
-ماشي .. مع السلامة

نظرت "سماح" اللى نفسها فى المرأة والتفتت الى صديقتها قائلة:
-ايه رأيك يا "ياسمين" شكلى حلو ؟
-زى القمر يا "سماح" ما شاء الله لا قوة الا بالله
-ولفة الحجاب حلوة
-أيوة حبيبتي منورة وشك أوى
-أنا حسه انى قلقانه
-القلق والتوتر ده عادى انتى فاكره أنا كنت فى خطوبتى عامله ازاي
-ده انتى كنتى فظيعة
ضحكت الاثنتان معا ورن هاتف "ياسمين" فردت قائلة:
-السلام عليكم يا "ريهام"
-وعليكم السلام
-خير يا حبيبتي فى حاجة
-آه يا "ياسمين" أنا حسه انى مخنوقه أوى ومش طايقه البيت .. لو أعدت فيه ثانيه واحده
كمان هموت

قالت لها "ياسمين" فى حنو:
-عشان كده قولتلك تيجي معايا
-ينفع اجي دلوقتى ؟
أخذت "سماح" الهاتف من "ياسمين" وقالت لـ "ريهام"
-ايوة يا "ريهام" أنا "سماح"
-ازيك يا "سماح" وألف مبروك
-الله يبارك فيكي يا قمر عقبالك .. أنا منتظراكى يلا تعالى بسرعه
-مش هسبلكوا ازعاج
-ده على أساس اننا هنشيلك ونقف بيكي فى وسط الصاله
ضحكت "ريهام" قائله:
-خلاص ماشي أنا هنزل حالا
-متأخرش
أخذت "ياسمين" الهاتف من صديقتها وقالت لأختها:
-أول ما تنزلى من المترو كلمينى وأنا أنزل أذكك
-خلاص اتفقتنا سلام
-سلام

جلس "عمر" و"كرم" فى السيارة منتظرين صديقهم الذى أتى يرتدى حلة رمادية اللون
وعلامات السرور والفرح ترتسم على محياه فتح باب السيارة الخلفية ودلف قائلاً:
-السلام عليكم يا شباب
-وعليكم السلام
-وعليكم السلام يا عريس
انطلق "عمر" بسيارته الى بيت "سماح" ..مروا أولاً على محل زهور وابتاع "أيمن" باقى
كبيرة حمراء وأحضر سلة من التشوكليت الفاخرة .. وصلوا الى حيث تقطن "سماح" وأهلها
.. وركن "عمر" سيارته واستعدوا للنزول عندما رن هاتف "عمر" فرد قائلاً:
-ألو
-أيوة يا باشمهندس أنا "حنان" مديرة مكتبك
-أيوة يا "حنان"
-الملف يا فندم بتاع انتاج اللحوم اللى هندخل بيها المناقصه
-آه ماله ؟
-مش موجود ومندوب اللجنة عندى ومنتظر الملف
قال "عمر" بغضب:
-ازاى يعني مش موجود
-حضرتك يا فندم خدته منى امبارح عشان تراجع له لآخر مرة ولأن الملف سري أكيد حضرتك
حطيته فى الخزنه بتاعة المكتب
ضرب عمر بيده على جيبته قائلاً:
-آخ .. فعلا الملف فى الخزنه
-طيب أقول ايه للمندوب ؟
-ما تقوايلوش حاجه .. قدميله حاجه لحد ما آجى أنا فى الطريق
أغلق "عمر" هاتفه والتفت الى صديقيه قائلاً:
-لازم أرجع المكتب دلوقتى .. بس مش هتأخر عليكموا هدي المندوب الملف واجى على طول

قال له "كرم" وهو يخرج من السيارة:
-طول عمرك فالح
-نبهه "أيمن" قائلاً:
-او عى تتأخر يا "عمر"
-لا متقلّش يا "أيمن" هروح وأجى بسرعة
-تمام

أدار "عمر" سيارته وانطلق فى طريقه

رن جرس الباب فقفز قلب "سماح" من مكانه .. فابتسمت "ياسمين" قائلة:
-ايه من أولها كده .. اجمدى
-أجمد ايه أنا حسه ان ركبي بتخبط فى بعضها
سمعت صوت "أيمن" وصوت آخر لم تتعرف عليه كان والدها ووالدتها يرحبان بهما , وبعد
قليل دخلت والدتها قائلة:
-بسم الله ما شاء الله زى القمر يا حبيبتي .. ربنا يتم عليكى بخير
والتفتت الى "ياسمين" قائلة:
-وانتى يا "سمسم" ربنا يباركلك يا حبيبتي مسبتيش "سماح" فى اليوم ده لوحدها هى كانت
متوتره جدا وانتى عارفه انها بتحبك جدا وملهاش صاحبه غيرك تثق فيها وتعتبرها زى اختها
-طبعا يا طنط وربنا عالم أنا بحب "سماح" أد ايه ومبفرقهاش عن "ريهام" أختى
-ربنا يخليكوا لبعض ويوفئك انتى وأختك أمال هى فى "ريهام" مجتش ليه
-هتيجي يا طنط .. شويه وهنزل أجيبها من المترو
فى هذه الأثناء دخل والد "سماح" قائلاً:
-يلا العريس بره
أقبل على ابنته وقبلها من جبينها قائلاً:
-مبروك يا حبيبة قلب بابا .. ربنا يسعدك يارب
قالت "سماح":
-خلاص يا جماعة بأه هتخلونى أعيط
فى هذه الأثناء رن هاتف "ياسمين" وكانت المتصله "ريهام" فالتفتت لـ "سماح" قائلة:
-أنا هنزل أجيب "ريهام"
-خلاص ماشي بس متتأخرش
نزلت "ياسمين" وأسرعت الخطى .. كانت سعيدة لسعادة "سماح" وتمنت لها الخير والتوفيق
.. وفكرت فى حالها وفى نفسها .. تمنّت أن تستطيع إدارة حياتها ومستقبلها كيفما تريد .. قالت
فى نفسها:
(يا ربي انت عالم بحالى .. قدرلى الخير .. أنا مش عارفه فىن الخير وفين الشر .. أنا قلبى
مش مرتاح .. ومش فى ايدي حاجه أعملها .. يارب أنا عارفه انك كريم أوى وعند حسن ظن
اللى يحسن الظن بيك .. يارب أنا بحسن الظن بيك وعارفه ان أى حاجه هتختارها لى هيكون
فىها الخير ليا حتى لو انا مش شايفاه .. يارب فوضت أمرى اليك.)

الفصل الرابع عشر

انطلق "عمر" بسيارته عائداً الى بيت "سماح" بعدما أنهى مهمته فى مكتبه .. رن هاتفه فأخرجه من جيب ونظر اليه فوجد "كرم" المتصل:

-أيوه يا "كرم"

-ايه يا "عمر" انت فين ؟

-خلاص أنا فى الطريق أهو

-طيب يلا بسرعة شهل شويه

-خلاص أنا أهو دقيقتين وأبقى أدام البيت سلام

-سلام

أغلق "عمر" هاتفه "وزاد من سرعة سيارته وفجأه....."

انطلق فى الشارع صوت فرامل السيارة وهى تكبح جماحها بشدة .. بعدما صدم شخصاً ما ظهر أمامه من العدم فلم يستطيع تفادى الإصطدام به .. سقط الشخص أمامه على الأرض بعدما دفعتة السيارة عنها بضعة خطوات أوقف سيارته ونزل بسرعة ليجد فتاتنا وقد ارتسم على ملامحها الألم الشديد .. لم تستطع "ياسمين" تحمل الألم الذى كانت تشعر به فى ساقها فسقطت مغشياً عليها .. اقترب منها "عمر" وجثا على ركبتيه قائلاً:

-يا آنسه .. يا آنسه

لكن "ياسمين" كانت فى عالم آخر

تجمع بعض الماره من الناس مرددين:

-لا حول ولا قوة الا بالله

-مش تفتح يا أخينا

-حد يسوق العربيه بالسرعه دى

وجه اليهم "عمر" حديثه وهو ينظر الى "ياسمين" قائلاً:

-هى اللى ظهرت أدامى فجأه

فقال له أحد الماره:

-يعني ايه ظهرت فجأه طلعت من تحت الأرض يعني .. أنا شايفك بعيني وانت سايق بسرعه

والبنت ملهائش ذنب انت الغلطان .. اتقى الله يا أخى هو عشان ما انتوا أغنيه هتيجوا على

الفقرا اللى زينا .. اه ما احنا ارواحنا فى البلد دى رخيصة ملهائش تمن

انفعل عليه "عمر" قائلاً:

-لزمته ايه الكلام ده دلوقتى .. المهم دلوقتى أوصل البنت دى المستشفى

-اه توصلها المستشفى .. !! رجلى على رجلك يا بيه .. معلىش بس ولاد الحرام كثير ..

ومنضمنش نسبيك توصل البنت دى لوحدك خاصة وانت خابطها والموضوع ده لازم يتبلغ عنه

ويكون فى محضر عشان حق المسكينة دى ميضعش

قال "عمر" فى غضب:

-اعمل اللى عمله أنا مش هخاف منك ..

حمل "عمر" جسد "ياسمين" بخفه ووضعها فى المقعد الخلفى لسيارته .. ووجد الرجل الذى

تشاجر معه يركب فى المقعد الأمامى وهو يخرج هاتفه ليتصل بالشرطة .. أدار "عمر"

السيارة وتوجه الى المستشفى.

تعالت الزغاريد فى بيت "سماح" بعدما ألبستها والدتها الشبكة .. كانت تعلق شفتيها ابتساماً

سعاده ممزوجه بالخجل .. قبل والدها رأسها قائلاً:
-مبروك يا حبيبة قلبي
وسلم على "أيمن" قائلاً:
-مبروك يا ابني عقبال الفرح ان شاء الله
وقف "أيمن" وحضنه قائلاً:
-الله يبارك فيك يا بابا .. واسمحلنى انى أقولك بابا
ابتسم الأب قائلاً:
-طبعاً يا ابنى انت خلاص بقيت ابنى .. ده انت واخذ حته من قلبي
وجهت "سماح" حديثها الى والدتها الجالسه بجوارها قائله:
-ماما فين "ياسمين"؟
-والله يا "سماح" ما أعرف .. هى قالت هتروح تجيب أختها من المترو بس اتاخرت أوى
-طيب معلش يا ماما اتصلى بيها
اتصلت الأم بـ "ياسمين" ثم قالت:
-ما بتردش
شعرت "سماح" بالقلق قائله:
-ربنا يستر
طمئننتها أمها قائله:
-متخفيش زمانها جايه ان شاء الله
وفى هذه الأثناء قال "أيمن" لـ "كرم": "
-فين سي "عمر" باشا؟
-والله يا ابنى ما أعرف قالى دقيقتين وهكون أدم البيت الكلام ده من ساعة الاربعة .. مش
عارف بيت مين اللي يقصده بالطبط !! .. شكله بيتكلم عن بيت "نانسى!!" "
-طيب اتصل بيه
اتصل "كرم" بـ "عمر" قائلاً:
-ايه يا ابنى انت فين .. كل ده الدقيقتين مخلصوش .. ولا انت بتمشى جوه الجزمة الأول
تنهت "عمر" قائلاً:
-أنا فى المستشفى يا "كرم" عملت حادثه بالعربيه
قام ليبتعد عن "أيمن" ثم قال:
-لا حول ولا قوة الا بالله .. انت كويس؟ طمنى عليك
-اه كويس بس خبطت بنت بالعربيه وكانت مغمى عليها معرفش جرالها ايه .. الممرضة
بتقولى انهم عملولها اشاعه وبيجبسولها رجلها
-لا حول ولا قوة الا بالله
-ودلوقتى فى ظابط عندها بياخد أقوالها
-ظابط؟؟ وايه اللي وصل الموضوع لكده
قال "عمر" فى ضيق:
-واحد من اللي كانوا ماشيين اتدخل فجأة وقعد بيرطم بالكلام ومرتحش الا أما بلغ البوليس
وجم وبيأخدوا أقوالها دلوقتى .. استنى أهو الظابط خارج من عندها
قال "كرم" بسرعة:
"-عمر" اوعى تتكلم مع الظابط أو تقول أى حاجه اتصل بسرعة بأستاذ شوقي المحامى بتاع
الشركة وما تتكلمش مع حد قبل ما يوصل
-هو ده اللي أنا عملته وأديني اعد مستنيه .. "كرم" اقل دلوقتى المحامى جه .. سلام
-سلام بس قولى الاول انت فى مستشفى ايه؟

-مستشفى....

-طيب أنا جايلك سلام

-أغلق "عمر" هاتفه وقال للمحامي الذي أقبل عليه:

-استاذ شوقى كويس انك جيت بسرعه

-خير يا "عمر" ان شاء الله اطمئن .. البنت حالتها ايه دلوقتي ؟

-سألت الممرضة قالتلى ان رجليها اتجبست وفي كدمات فى جسمها

-مين اللي بلغ .. أهلها ؟

-لا أهلها لسه مظهروش .. اللي بلغ واحد شاف الحادثه وشهد اني كنت سايق بسرعه

-و انت فعلا كنت سايق بسرعه ؟

-ارتبك "عمر" قائلاً:

-ايوة كنت سايق بسرعه

ثم أردف بسرعه:

-بس هي اللي ظهرت أدامى فجأه

-طيب اتكلمت مع حد .. حد خد أقوالك

-لا حاولت أتجنب الطابط عشان ميشوفنيش وانتظرتك تيجي عشان نشوف هنعمل ايه .. ايه

الحل دلوقتي أنا مش عايز قضية عايزها تخلص ودى

-ان شاء الله تخلص ودى .. هنديها مبلغ مقابل انها تتنازل عن القضية الموضوع بسيط

متقلقتش

-أخرج "عمر" دفتر شيكاته وقلمه الأنيق وقال:

-مفيش عندى أى مشكلة .. عشر تلاف كويس

-زودهم شويه يا "عمر" عشان تملى عينيها ومتديهاش فرصه للرفض

-تمام أدي شيك بعشرين ألف .. وكل مصاريف العلاج والمستشفى أنا همدفهم .. بس عايز

الموضوع يخلص دلوقتي

أعطى الشيك للمحامي الذي أخذه منه قائلاً:

-متخفش .. هي فى انهي اوضه

أشار له "عمر" على الغرفة المجاوره قائلاً:

-دخلوها هنا

طرق المحامي الباب وفتحت له الممرضة ثم دخل وأغلق الباب

جلس "عمر" قلقاً متوتراً

أتصلت "ريهام" بأبيها فرد قائلاً:

-ايوة يا "ريهام" وصلتى ؟

-لا يا "بابا" أنا لسه فى الطريق

-محدث كلمك تانى ؟

-لا يا بابا الممرضة متصلتش تانى .. أنا خلاص عشر دقائق وأكون فى المستشفى

-أنا كمان تقريبا أدامى عشر دقائق ربع ساعه .. جيب العواقب سليمه يارب

-متقلقتش يا بابا الممرضة طمنتنى ان شاء الله خير

أغلقت الهاتف فى المترو وهي تبكى فى صمت و تستغفر ربها وتدعوه أن يحفظ أختها

خرج المحامي من غرفة "ياسمين" فهب "عمر" واقفاً فوقف الرجل أمامه ومد يده له بالشيك

..نظر "عمر" الى الشيك فى يد المحامي فغضب وأخرج دفتر شيكاته مرة أخرى وقال بحد:

-مفيش مشكلة هزودلها المبلغ .. هي طالبه كام؟

-مش طالبه حاجة مفيش قضية أصلاً

قال "عمر" بدهشة:

-ازاى يعني مفيش قضية

ابتسم المحامى قائلاً:

-زى ما بقولك كده .. قالت فى أقوالها للظابط انها هى اللى غلطانه وانها كانت ماشيه مش

مركزه وانها مش عايزة تقدم بلاغ ولا تشتكيك

صمت "عمر" وهو مندهش .. فقال له المحامى:

-طيب بما ان مهمتى انتهت أستأذن أنا

-معلش تعبتك معايا يا أستاذ "شوقى"

-مفيش مشكلة يا "عمر" أشوفك فى الشركة .. مع السلامة

مع السلامة

ظل "عمر" واقفاً وهو يفكر فيما فعلته الفتاه .. فى تلك اللحظة خرجت الممرضة من غرفتها

فقال لها "عمر":

-هى عامله ايه دلوقتى؟

-كويسه .. عندها كسر فى رجلها والدكتور حطهاها فى الجبس وان شاء الله الجبس هيتفك

بعد اسبوعين .. وفى شوية كدمات بسيطه هتاخذ وقتها

-طيب متشكر أوى

انصرفت الممرضة فتوجه "عمر" الى الغرفة التى ترقد فيها "ياسمين" وطرق الباب بخفه ثم

فتحه ودخل.

رفعت "ياسمين" نظرها لتجد رجلاً غريباً أمامها كان يرتدى بدلة سوداء عليها معطف أسود

اللون .. رفعت يدها لتتأكد من ضبط حجابها .. قال لها بصوت رخيم:

-ازيك دلوقتى؟

قالت وقد شعرت بالخجل من نظراته المتفحصه فأطرقت بوجهها:

-الحمد لله

-أنا اطمنت عليكى انك ان شاء الله هتشيلي الجبس بعد اسبوعين

أومات برأسها وهى مازالت لا تدرى من هو وماذا يفعل فى غرفتها .. فسألته قائله:

-حضرتك ظابط ولا محامى؟

ابتسم "عمر" ابتسامه زادته وسامه وقال:

-لا أنا لا ظابط ولا محامى أنا مهندس

شعرت "ياسمين" بجاذبيه عينيه السوداويين وكأنهما مغناطيس .. فأبعدت عينيها بسرعه

واحمرت وجنتاها لهذا الوضع الذى تبدو فيه أمام هذا الزائر الغريب فلم تعتد أن يراها رجلاً

غريباً وهى ممدّه هكذا فى فراشها فشعرت بالارتباك وحاولت جذب الغطاء عليها أكثر ودت لو

طلبت منه الانصراف .. شعر "عمر" بتوترها فلم يزيده هذا الا تفحصاً فيها .. ثم استطرد

بجديه قائلاً:

-أنا أسف على اللى حصل .. بس بجد مشفتكيش انتى ظهرتى أدامى فجأه

نظرت اليه "ياسمين" بدهشة قائله:

-حضرتك اللى خبطنى؟

تنحج قائلاً:

-ايوة .. بس بجد مشفتكيش

أطرقت "ياسمين" برأسها وقالت:

-أصلاً أنا اللى كنت ماشيه ومش مركزة لو مكنتش سرحانه مكنتش ده حصل

-وأنا كمان كنت سايق بسرعه لو كنت بطننت شوية مكنتش خبطتك

-قدر الله وما شاء فعل .. نصيبي كده
-أنا متشكر أوى أنك ما اشتكيتيش عليا
-زى ما قولت لحضرتك وللظابط وللمحامى دى غلطتى أنا
أخرج الشيك من جيبه واقترب من فراشها ومد يده به قائلاً:
-طيب لو سمحتى اقبلى المبلغ الصغير ده
-رفعت "ياسمين" نظرها اليه قائله:
-قولت لحضرتك أنا اللي غلطانه وخلص حصل خير
-بس أنا حاسس بالذنب لاني فعلا كنت سايق بسرعه فلو سمحتى اقبليه
-احتدت "ياسمين" قائله:
-لا طبعا مش هقبله
-ليه
-لأنه مش من حقى .. وحتى لو كنت انت اللي غلطان أنا مش بقبل عوض
-طيب أنا أسف أنا مكنش قصدى أضايقك
-حاولت السيطرة على غضبها وقالت:
-حصل خير .. ولو سمحت ممكن بعد اذنك تتفضل لأن مفيش ممرضة معانا وميصحش كده
-اندهش "عمر" مما قالته فقال:
-انا اسف مرة تانية أنا بس كنت عايز أطمئن عليكى وأشكرك يا انسه....
-سكتت ولم تجيبه .. فحثها قائلاً:
-لحد دلوقتى معرفتش اسمك
-قالت بصوت خافت:
-أنا اسمى "ياسمين"
-وأنا اسمى "عمر" .. "وبشكرك مرة تانية .. ولو احتجتى حاجه أنا....
-قاطعته قائله دون أن تنظر اليه:
-شكراً
-هز "عمر" رأسه وتوجه الى الباب وفتحه وخرج .. وجد أمامه رجلا يرثى لحاله وبجواره فتاة
-باكيه , جرى ناحيته وقال له بلووعه:
-بنتي كويسه؟ .. "ياسمين" جرالها ايه ؟
-ربت "عمر" على كفته قائلاً:
-متقلقش حضرتك هي كويسه
-هي جوه فى الاوضة دى ؟
-ايوة جوه اتفضل
-دخل والدها وأغلق الباب .. وقف "عمر" قليلا ثم انصرف

خرج "عمر" من المستشفى ليجد "كرم" أمامه , توجه ناحيته قائلاً:
-خير يا "عمر" طمنى ايه اللي حصل ؟
-لا خير الحمد لله تعالى نعد فى أى مكان ونتكلم
-طيب هات عربيتك وتعالى نروح الكافيه بتاعنا
-طيب تمام
-توجه كل منهما الى سيارته وغادرا المستشفى

-كده يا "سسم" تخضينا عليكي
-معلش يا "ريهام" مكنش قصدى .. أنا أول ما فوقت قولت للمرضه تكلمك عشان عارفه انك
واقفه مستنيانى فى المترو
-ده أنا كنت هموت لما اتصلت بيا وقاتلتى ان عربيه خبطتك
قال لها والدها وهو يجلس بجوارها على الفراش:
-الحمد لله يا بنتى جت سليمه قدر ولطف
-الحمد لله يا بابا
-والجبس محدش قالك هيتفك امتى
-اه الدكتور قالى هيتفك كمان اسبوعين ان شاء الله
-ان شاء الله
سكت الأب قليلا ثم قال:
-مين الجدع اللي كان خارج من اوضتك ده
ارتبكت "ياسمين" قليلا ثم قالت:
-ده الراجل اللي خبطنى بالعربيه
انفعل الأب قائلا:
-وله عين كمان .. أنا لو أعرف كنت مسكت فى زمارة رقبتة
أسرعت "ياسمين" قائله:
-هو ملوش ذنب يا بابا أنا اللي مكنتش مركزه وكنت ماشيه سرحانه
-وليه يا بنتى كده مش تركزى يعني كنت هعمل ايه أنا دلوقتى لو كان حصلك حاجة
تدخلت "ريهام" قائله :
-خلاص يا بابا حصل خير
-أنا قايم أشوف حساب المستشفى .. شكلها مستشفى غالية أوى ربنا يستر
شعرت "ياسمين" بالذنب لما كبده لوالدها من مصاريف .. خرج الأب فجلست "ريهام"
بجوارها وأخرجت قلما وبدأت فى الكتابه على ساقها المتجبره .. ضحكت "ياسمين" قائله:
-بتعملى ايه يا بت انتى
-بكتبلك ذكرى على الجبس بتاعك
-على أساس انى هفضل متجبسه طول عمرى يعنى
-بس ايه الواد المز ده يا "ياسمين" يا خراشي ده يحل من على حبل المشنقة .. ده نضيف
نضافه .. بياكل ايه ده
ضحكت "ياسمين" قائله:
-يخربيت عقلك هو انتى كنتى فى ايه ولا فى ايه
-اه أنا صحيح كنت قلقانه عليكي ومفطوره من العياط بس ده ميمنعش انى أخذت بالى من
لهطة القشطة اللي كان عندك
ازدادت ضحكات "ياسمين" من اسلوب أختها قائله:
-اه لو ابوكى سمعك
-أبويا مين ده أنا مستعده أخسر أهلى كلهم .. ده ريحة البرفيوم بتاعه لسه معبأه الأوضة .. ايه
الناس دى
سمعا طرقا على الباب فقالت "ياسمين": "
-طيب اخرسى بأه أبوكى جه
دخل "عبد الحميد" وقد ارتسمت ابتسامه على محياه .. لاحظتها "ياسمين" فقالت له:
-خير يا بابا ؟
-والله جدع ابن حلال دفع مصاريف المستشفى واقامتك فيها اسبوع

قالت "ياسمين" بدهشة:
-اسبوع؟! .. بس الدكتور قالى انى ممكن أروح كمان يومين
أخذت "ياسمين" تفكر فى كرم هذا الرجل الغريب

أحضر النادل الطعام ووضعه أمام الصديقان, ثم انصرف .. قال "كرم":
-هاا وبعدين؟
-مفيش شكرتها ولما جيت أخرج قابلت باباها على الباب ومعاها بنت بتعيط وكان واضح انهم
قلقانيين عليها أوى
سكت قليلا ثم قال:
-الراجل كان شكله بسيط أوى .. اللي أنا مستغربله انها رفضت تماما انها تاخذ الفلوس رغم
ان واضح جدا انهم ناس على أد حالهم
-ما هي قالتك انها هي اللي غلطانه
-حتى لو هي اللي غلطانه فى حد فى الزمن ده يجيله فلوس كده لحد عنده ويرفضها .. ومش
بس كده ده أنا لما أصريت عليها حسيت انها هتقوم تضربني
ضحك "كرم" قائلاً:
-ياريتها كانت عملتها
قال "عمر" بجديه:
-بصراحة لما المحامى قالى انها مشتكتكش ضدى استغربت لأن أى حد مكانها كان اشتكى
عشان يساومنى على تعويض .. وكمان هي غريبه أوى تصور لقيتها بتطلب منى أخرج من
الأوضة عشان الممرضة مش موجوده ومفيش حد فى الاوضة الا أنا وهي
نظر اليه "كرم" وهو يبتسم
أكمل "عمر" قائلاً:
-ولا لما بيبصها كل ما عيني تيجي فى عينها الأقى وشها يحمر وتبعد عينيها
-شكلها خجوله أوى
ابتسم "عمر" قائلاً:
-هو لسه في بنات كده

-ألف سلامة عليكى
قال "مصطفى" هذه العبارة عبر الهاتف , فقالت "ياسمين":
-الله يسلمك
-أنا زعلت عشانك أوى وزعلت أكثر ان فرحنا هيتأجل اسبوع كمان يعني بدل ما كان أدامنا
اسبوع بأوا اسبوعين
أطرقت "ياسمين" فى خجل ولم تجب
-أنا نفسي الوقت يمر بسرعة عشان أهدك فى حضن...
قاطعته "ياسمين" بسرعة قائله:
-لو سمحت .. مينفعش حضرتك تكلمنى كده
احمرت وجنتاها بشده من الخجل ومن الغضب
أناها صوتها وهو يتحدث ببرود قائلاً:
-ليه مينفعش خلاص كلها اسبوعين وتكونى مراتى

-أما ابقى مراتك
-طيب براحتك سلام
-مع السلامه
أغلقت "ياسمين" وهى تشعر بغضب شديد من جرأته فى الكلام معها .. ومن قلة ذوقه عندما
أسرع بإنهاء المكالمه ..

أثناء جلوس "عبد الحميد" على المقهى وهو شارد يفكر فى حاله وحاله بناته أقبل عليه شاب
وقف أمامه ويبدو عليه علامات التردد .. نظر اليه "عبد الحميد" مستفهما فلم يتحدث الشاب
..فقال له "عبد الحميد":
-خير يا ابني فى حاجه ؟
عدل الشاب من وضع عويناته التى يرتديها وقال فى ارتباك:
-حضرتك أستاذ "عبد الحميد منصور"
-أبوة يا ابني أنا
-أنا .. يعني .. حضرتك .. أنا "وانل"
انتظره "عبد الحميد" ليكمل كلامه لكن الشاب صمت .. فقال له:
-أهلا بيك يا ابني .. اتفضل اعد
فجلس الشاب وقد ازداد ارتبائه قائلاً:
-أنا .. كنت عايز أتكلم مع حضرتك فى موضوع .. يعني .. أنا .. يعني .. بنتك .. "ريهام"
قال "عبد الحميد" بسرعة:
-مالها "ريهام" بنتى جرلها حاجة فى الكليه ؟
أسرع الشاب قائلاً:
-لأ لا هى كويسه أنا لسه شايفها من شويه
تصاعد غضب "عبد الحميد" قائلاً:
-يا ابني اتكلم مش فاهم منك حاجه
-احم احم .. يعني .. أنا كنت عايز .. أقول لحضرتك .. انى عايز "ريهام"
قال الأب فى غضب:
-اللهم طوئك يا روح يعني ايه عايز "ريهام" ؟
-قصدى يعني أنا عايز .. يعني أنا وهى نتجوز
هدأ "عبد الحميد" قليلاً وهو يرمق الشباب بنظرات غيظ .. فقال الشاب:
-بصراحة يا أستاذ "عبد الحميد" ماما قالتلى انى أجبى لحضرتك عشان أقول لحضرتك اننا
عايزين نزوركوا فى البيت
-طيب يا ابني .. يشرفنى ده طبعاً .. بس فرح بنتى الكبيره كمان أربع أيام فلما يخلص الفرحة
الأول وأطمئن عليها نبقى نشوف موضوع "ريهام"
-طيب يا أستاذ "عبد الحميد" ياريت تحدد معاد عشان أقول لماما عليه
نظر اليه "عبد الحميد" شزراً وقال له:
-قولها اسبوع كده وان شاء الله تشرفونا فى البيت
قام الشاب ومد يده وسلم عليه وقال بفرح:
-متشكر جدا لحضرتك .. ومبروك لبنتك الكبيرة .. السلام عليكم
-وعليكم السلام

الفصل الخامس عشر

"-عمر" انت ليه متغير معايا
قالت "نانسي" هذه العبارة أثناء جلوسها مع "عمر" فى أحد المطاعم .. رد "عمر" قائلاً:
-مش متغير ولا حاجه يا "نانسي" بس الفترة اللي فاتت كنت مشغول جدا وكمان كنت بسافر
المزرعة كتير عشان انتى عارفه ان أمورنا مش مظبطه هناك
-مش انت خلاص شغلت واحد صحبك فيها
-أيوه بس مش هظمن الا أما نخلص الرش ونشوف النتيجة ونعرف هنتقذ أد ايه بالظبط من
المحصول
-أنا يا "عمر" مغطاك بصراحه .. يعني ازاي تسيب ادارة مزرعه كبيرة كده لواحد أول مرة
يشتغل عندك
احتد "عمر" قائلاً:
-أولا "أيمن" ده صاحبي وأخويا مش واحد من الشارع .. ثانياً "أيمن" مش بيشتغل عندى
"أيمن" بيشتغل بنسبه يعني أكنه بيشتغل فى ملكه
احتدت "نانسي" هى الأخرى:
-وانت شايف ان ده صح .. "عمر" انت كده بتطمع الناس فيك
" -نانسي" لو سمحتى أفضلى على الموضوع أنا أدري بشغلى .. أنا مش عيل صغير .. لا اسألى
عنى فى السوق كويس وانتي تعرفى مين هو "عمر الألفى"
-طبعا يا حبيبي عارفه وواتقه فى قدرتك على ادارة شغلك
غير "عمر" الموضوع قائلاً:
-أنا خلاص يعتبر خلصت تعديلات الديكور فى الجناح بتاعنا فى الفيلا .. مفضلش غير اننا
ننزل نختار الأثاث سوا
قالت "نانسي" بتبرم:
-انت لسه مصر اننا نعيش عند أهلك فى الفيلا .. ليه يا "عمر" ميكنش لينا مكان خاص بينا
قال "عمر" وقد ضاق ذرعاً:
" -نانسي" احنا فتحنا الحوار ده مليون مره .. وكل مره بعيد نفس الكلام .. ماما وبابا ملهمش
غيري .. وبابا معظم الوقت فى الشغل أو مسافر .. وأمى لوحدها طول اليوم .. ايه اللي يخليني
أعيش فى مكان تانى وفيلتهم طويله عريضه هيكون لينا فيها مكان خاص بينا يعني اكنك
عائشه فى شقه مستقله خاصه بيكي بس الفرق ان الشقة دى هتكون جوه فيلتنا
رسمت ابتسامه صغيره على شفيتها قائله:
-خلاص يا حبيبي اللي تشوفه
صمت "عمر" قليلاً ثم نظر اليها قائلاً:
" -نانسي" انتى حسه اننا مناسبين لبعض
قالت بدهشة:
-مش فاهمه قصدك ايه
قال فى حيره:
-مش عارف ساعات بحس اننا مفيش حاجه متفقين عليها
" -عمر" انت معدتش بتحنى ؟
-لا بحبك وعيني مش شايفه غيرك .. بس حاسس ان عقلى مش ببطل تفكير
حاولت "نانسي" معرفة ما يدور فى عقله قائله:
-بتفكر فى ايه بالظبط
-لا متحطيش فى بالك ويلا عشان نطلب الأكل

-طيب قولى الأول انت مسافر المزرعة تانى امتى ؟
-مسافر بكرة ان شاء الله
-طيب انت مش وعدتني انك هتاخذنى معاك
-خلاص مفيش مشكلة لو عايزة تيجي تعالى بس شوفى ظروف مامتك وباباكي الأول
قالت "نانسي" بدهشة:
-مامي وبابي ليه ؟ هما هيجوا معانا ؟
نظر اليها "عمر" نظره طويله ثم قال:
-أمال هنعد أنا وانتى فى بيت المزرعة لوحدنا؟! هناك بلد أرياف مش زى هنا ..يعني أكيد
الناس هتتكلم عنى وعنك .. وكمان فرصه عشان أهلك يغيروا جو
-خلاص يا حبيبى اللى تشوفه

رن جرس الباب فأسرعت "ريهام" بفتح الباب وقالت مبتسمه:
-ازيك يا "سماح" منوره
دخلت "سماح" وقبلتها ثم قالت:
-ازيك انتى يا "ري ري" .. أمال فىن "ياسمين" ؟
ضحكت "ريهام" قائله:
-اهى جوه على السرير هتروح فىن يعنى برجليها المسلوخه دى
سمعتها "ياسمين" فصاحت:
-أنا رجلى ملسوخه .. ماشي يا أم لسان طويل
قلبتها "سماح" وقالت:
-أخبارك ايه النهارده .. ها هتفكى البتاع ده امتى
-خلاص هانت بكرة ان شاء الله هفكه
-طيب الحمد لله أحسن كان شكلك هيبقى وحش أوى فى الفرح
تجهم وجه "ياسمين" عندما تذكر أن فرحها بعد 3 أيام .. لاحظت "سماح" ذلك فقالت لـ
"ريهام":
-ايه معندكوش حاجه تتشرب ؟
-لا طبعا في .. حالا هعملك كوباية الشاى أبو لبن بتاعتك
-تسلميلى يا "ريهام"
خرجت "ريهام" من الغرفة ,واقتربت "سماح" وجلست بجوار "ياسمين" على السرير قائله
:
-مالك يا "ياسمين" شكلك مش عاجبنى خالص .. ده شكل عروسه فرحها كمان 3 أيام ؟
قالت "ياسمين" فى حزن:
-عروسه؟! .. لما بتقولوا الكلمه دى بحس انكوا بتقولوها لحد تانى .. أنا مش حسه أبدا انى
عروسه
-ليه يا حبيبتى بتقولى كده ؟ عشان والدتك الله يرحمها ؟ هى أكيد حاجه صعبه عليكى بس انتى
لازم تفكرى فى حياتك ومستقبلك يا "ياسمين" مش بقولك انسى والدتك بالعكس افكريها
وادعيها واعمليلها صدقة جاربه كمان بس متوقفيش حياتك انتى
تنهدت "ياسمين" قائله:
-مش بس موت ماما الله يرحمها هو اللى مضيع فرحتى يا "سماح"
-أمال فى ايه ؟
-أنا مش حسه انى عايزه أتجوز .. يعنى حسه انى معرفش الانسان ده .. أنا معرفش أى حاجه

عنه يا "سماح" لا أخلاقه ولا طباعه .. بالعكس فى حاجات كتير بتضايقتني منه .. مش عارفه ازاي المفروض يتقفل عليا باب واحد أنا وهو مش قادرة أتخيل ده أبداً .. حسه انى بموت يا "سماح" حسه انى مخنوقه أوى وجوايا ضيق رهيب .. حسه انى عايزة أصرخ وأصرخ لحد ما اتعب

-طيب متكلمى باباكي عشان.....

قاطعتها "ياسمين" قائله:

-بابا مصر على اللى فى دماغه .. أنا عذراه انه خايف عليا وعايز يسيبنى فى ظهر راجل هو ماشي بمبدأ ضل راجل ولا صل حيطه .. بس أنا تفكيري مش كده ... أنا عندى الحيطه أحسن مليون مرة من راجل مش عايزاه
-انتى مش عايزه "مصطفى"

احتدت "ياسمين" قائله:

-هو أنا أصلاً عارفه عشان أحس انى عايزاه ولا مش عايزاه.. تعرفى يا "سماح" لو "مصطفى" جه دلوقتى وفسخ الخطوبه أنا مش هزعل .. لاني مش حسه بأى حاجه نحيتة ولا شايقه ان فيه حاجه واحده تشجعنى على الارتباط بيه
صمنت قليلاً ثم قالت:

-أنا رميت حمولى على ربنا يا "سماح" وواثقة انه مش هيضيعني .. أنا عارفه ان ربنا هيفتارلى الخير .. وأنا راضيه بقصاهه أى ان كان .. حتى ولو كان ضد رغبتى

-ربنا يريح قلبك يا "ياسمين"

-عارفه يا "سماح" قصه السفينه اللى فى سورة الكهف ؟

-آه عرفاها

-سيدنا الخضر عليه السلام خرق السفين بتاعة ناس مساكين بيتشغلوا بيها وهى مصدر رزقهم ولما شافه سيدنا موسى عليه السلام بيعمل كده حزن ولامه عشان عمل كدة فى سفينه ناس غلابه .. بس ربنا كان له حكمه من كده ان كان فى ملك بياخد السفن غصب من الناس وبيصاردها ولما مرت السفينة على خدام الملك مرضوش ياخدوها لأنها كانت معيوبه بعد ما سيدنا الخضر خرقها .. لو مكنش سيدنا الخضر عليه السلام عمل كده كان زمان الناس المساكين دول خسروا سفينتهم والملك صادرها .. أنا كل ما بفتكر القصة دى يرتاح أوى .. وبطمئن ان ربنا أكيد رايدلى الخير "وعسى أن تكرهوا شيئاً وهو خير لكم"
-ونعم بالله .. وعشان انتى أحستنى الظن بالله أنا واثقه ان ربنا هيفتلك الخير يا "ياسمين"
ومش ممكن حد يضررك أبداً
-ان شاء الله

-لسه مصره انك متلبسبش فستان فرح

-أيوه يا "سماح" مش حبه ألبس فستان فرح هلبس فستان حلو أنا اشتريته وجبت عليه طرحه حلوة اوى هيعجبك

-ماشى يا حبيبتى المهم تكونى انتى مبسوطه

-عانقت "سماح" صديقتها وهى تدعو الله فى سرها أن يبديل حزنها فرحاً

جلست "نانسى" مع والدتها فى التراس قائله:

-حسه ان "عمر" كل مدى بيبعد عنى

قالت "نادين" باهتمام:

-ازاي ؟

-مش عارفه بس حسه بكده .. معدش ملهوف عليا زى الأول

صاحت أمها بغضب:

-فالحه يا "نانسي" فالحه
-أوووف يا مامي أنا مش بقولك كده عشان تقطميني
-أمال بتقوليلي ليه عشان تحرقى دمي
-لأ عشان أقولك اننا رايعين بكره مع "عمر" على المزرعة بتاعته اللي فى المنصورة دي
-لا أنا مليش فى الجوده
-قالت "نانسي" بتبرم:
-ولا أنا عايزاكي معايا بس الباشمهندس "عمر" أصر انك وبابا تيجوا معايا
-طيب خلاص مش مشكله الغى السفرية ومتسافریش
-قالت "نانسي" بإصرار:
-لأ لازم أسافر معاه
-ليه بأه
-عشان هناك هعرف ازاي أرجعه "عمر" اللي هيموت عليا
-والله انتى بتاعة كلام وبس
-قالت "نانسي" بزهو وتفأخر:
-بكرة تشوفى

-دخل "كرم" الى مكتب "عمر" بالشركة قائلاً:
-ها يا "عمر" ناوى على السفر امتى ؟
-النهاردة ان شاء الله
-طيب تمام أنا جاى معاك
-لا مفيش داعى خليك انت
-لا جاي معاك أهو أساعد فى أى حاجه انت شايل الحمل لوحدك
-مش لوحدى ولا حاجه "أيمن" موجود
-أهااا "أيمن" موجود .. يبقى "كرم" شكرا .. مش كده
-ضحك "عمر" قائلاً:
-تصدق أنا اللي غلطان .. عايز تيجي تعالى
-ثم استطرد قائلاً:
-على فكرة "نانسي" ومامتها وباباها جايبين هما كمان
-أهااا .. تمام .. طيب يعني أجي بعريتي ولا إيه
-لا مفيش داعى هاخذك انت و"نانسي" فى عربيتي وأهما هيجوا بعريتهم..
-متأكد ؟ .. مش عايز أبقى عزول وداخل بين البصلة وقشرتها وتدعى عليا طول الطريق
-ضحك "عمر" قائلاً:
-لا يا "كرم" متقلقش أنا أصلا بدعى عليك من غير حاجه
-نشكر يا ذووووع

فى الطريق الى المنصورة انطلقت سيارة "عمر" وبعواره "نانسي" وفى المقعد الخلفى
يجلس "كرم" وخلفهم سيارة والد "نانسي" ووالدتها .. التفتت "نانسي" قائلة لـ "كرم":
-كده برده متحضرش الخطوبة يا "كرم" .. ده انت أقرب صديق لـ "عمر"
قال "كرم" معتذراً:

-معلش يا "نانسي" يومها كان نفسي أحضر بجد .. بس كان فى سفريه مهمة يومها
ومينفعش يقوم بيها غير أنا أو "عمر" ..
ثم ضحك قائلاً:

-يعني لو كنت حضرت مكنش العريس هيعرف يحضر عشان كده ضحوا بالجنين عشان
الدكتور يعيش
أطلقت "نانسي" ضحكة عاليه قائله:

-انت مصييه بجد

توقف "عمر" بجوار احدى الكافيتريات على الطرق قائلاً:

-هجيب مايه .. عايزين حاجه أجيبهالكوا

"-نانسي": لا ميرسي

"-كرم": آه يا "عمر" الله يكرمك عايز شيتوس ولمبادا
التفت له "عمر" قائلاً:

-نعم يا أخويا .. شيتوس ولمبادا

-آه يا "عمر" بس لمبادا بالشكولاته مليش فى الفراولة

أطلقت "نانسي" ضحكة عاليه أخرى

-محسنى انى خلفتك ونسيتك يا ابنى .. انزل هات لنفسك

-ما انت نازل يا "عمر" هاتلى فى ايدك وانت جاي

قال وهو يخرج من سارته:

-حاضر اللهم طولك يا روح

التفتت "نانسي" الى "كرم" الجالس خلفها قائله:

-معرفة ان دمك خفيف كده يا "كرم"

-دى أقل حاجه عندى

ضحكت مرة أخرى قائله:

كان نفسي صحبك يطلع زيك كده

"-عمر"؟

-آه .. بحس انه جد أوى ومتنشن على طول

-بالعكس "عمر" دمه خفيف وتحبي تتكلمى معاه .. هو بس يمكن اليومين دول اللي شاده

شوية عشان ضغط الشغل

-طيب ما انت معاه فى الشغل ومع ذلك مش متنشن كده

صمتت قليلا صم قالت:

-الا قولى يا "كرم" انت بتشتغل ايه عند "عمر"؟

ابتسم بسخريه قائله:

-مين ضحك عليكى أصلا وقالك انى شغال عند "عمر"

قالت مستفهمه:

-أمال ايه؟

-أنا شغال مع "عمر" مش عند "عمر" .. أنا شريك فى مجموعة شركات الألفى بنسبة

30%

رفعت "مانسي" حاجبها فى دهشة .. ولمعت عيناها ببريق خبيث وقالت:

-تصور مكنتش أعرف .. يعني انت و"عمر" شركا

-أيوة شركا

فى تلك الأثناء عاد "عمر" وشعر بالضيق عندما وجد "نانسي" ملتفه تماما للخلف بهذه
الطريقة .. صعد الى سيارته فاعتدلت "نانسي" فى مقعدها وانطلق يكمل طريقه الى المزرعة

رأى شجرة فأسرع الخطى ومسح على جزعها بكفه وارتسمت على شفثيه ابتسامه كبيره قائلاً

-شايفه الشجرة دى زرعتها بنفسى من زمان .. كنت فى اعدادى وجدى ساعدنى وعرفنى
ازاى أزرعها

أقبل "رافت" عليهما فانفرجت أسارير "نانسى" لقدومه فلقد وجدت فيه فرصه للهروب من
حديث "عمر" الذى أشعرها بالضجر ..التفتت الى "عمر" قائله:

-هسيبكوا بأه تشوفوا شغلوكوا

ثم وجهت حديثها الى "أيمن" قائله:

-ازيك يا "أيمن"

هز رأسه مردداً:

-أهلا بحضرتك

انصرفت "نانسى" وتركت الصديقان بمفردهما .. قال "أيمن" معتذراً:

-معلش يا "عمر" جيت فى وقت مش مناسب ولا ايه .. أصل فى ورق محتاج امضتك عليه
ومخدتش بالى ان خطيبتك معاك الا لما قربت منكوا

ابتسم "عمر" لصديقه قائلاً:

-لا يا "أيمن" محصلش حاجه .. هات الورق

قرأ "عمر" الورق ثم أخرج قلمه وذيله بتوقيعه .. وقال لـ "أيمن":

-اعتقد كده ماشيين بمعدل كويس مفضلش الا الجهة الغربيه

-بالظبط كده .. وكلها يومين ونخلص الرش هناك ان شاء الله

-ربنا يستر ونلاقى نتيجة ومتكنش مصاريف على الفاضى

-لا ان شاء الله أنا مستبشر خير

سار الصديقان معاً .. فسأله "عمر":

-ها ايه أخبارك مع خطيبتك

ابتسم "أيمن" قائلاً:

-كله تمام الحمد لله

-الحمد لله .. ناوبين على امتى ان شاء الله

-بصراحة محددناش معاد محدد .. سايينها بظروفها .. يعنى لما نحس احنا الاتنين اننا مقتنعين

ببعض واننا مستعدين للخطوة دى

ربت "عمر" على كتف صديقه قائلاً:

-انت ابن حلال وتستاehl كل خير يا "أيمن"

-تسلم يا "عمر" .. وانت ايه أخبارك مع خطيبتك ؟

أزاح "عمر" يده من على كتف صديقه ونظر أمامه ولم ينطق بشئ .. فحثه "أيمن" قائلاً:

-ايه فى مشاكل بينكوا ؟ لما شوفتكوا من شوية كنتوا كويسين

قال "عمر" وهو شارداً:

-مش عارف يا "أيمن" ساعات بحس انى بحب "نانسى" أوى .. وساعات...

-وساعات ايه ؟

-ساعات بحس ان دماغنا مش راكمه على بعض

-ازاى يعنى ؟

تنهد "عمر" قائلاً:

-مش عارف حقيقي مش عارف .. حاسس انى متلخبط .. وعقلى مببطلش تفكير

وجدا جدولاً من الماء فجلسا على صخرة أمامه , سكت "أيمن" قليلاً ثم نظر الى صديقه وسأله

قائلاً:

-انت ايه اللي عجبك فى "نانسى" و خلاك تقول هى دى الانسانه اللي عايزها تبقى مراتى ؟

أخذ "عمر" يفكر وهو يلقي ببعض الحصى فى الماء . ثم قال:
-جميله , جذابه , مرحة , ذكية , من عيلة كبيرة
قال "أيمن" مستنكراً:
-بس كده ؟

سكت "عمر" وهو يشعر بالحيره .. ثم وجهه نفس السؤال الى صديقه قائلاً:
-طيب انت ايه اللي عجبك فى خطيبتك وخلاك تقول هي دى .. غير حكاية المصحف والمطار
-عجبني حاجات كتير ولما عرفتها وعرفت أهلها حبيبتها أكثر واقتنعت بيها أكثر ..عجبني
أخلاقها وأدبها وحياتها .. لما ببصلها بشوف فيها أم لولادى
صمت قليلاً ثم أكمل قائلاً:

-أنا مش بدور على واحدة تكون زوجة وبس يا "عمر" أو واحدة عشان أشبع رغباتى معاها
وشكرا .. لا أنا بدور على أم لولادى .. نربهم سوا ونكبرهم سوا ونعلمهم سوا يكونوا رجاله
بجد .. بدور على واحدة تكون سند ليا لما أتعب أو لما أكبر فى السن وأعجز ألقياها جمبى
ومعايا .. بدور على واحدة تكون سكن ليا وأكون سكن ليها واحده تفهمنى وأفهمها وأحس بيها
وتحس بيا وأحس معاها اننا بنكمل بعض وان أنا وهى شخص واحد مش شخصين
أعقب حديث أيمن صمت طويل لا يتخلله الا تغريد العصافير على الشجر .. وبعد فترة نظر
"أيمن" الى "عمر" قائلاً:
-انت حاسس بكده مع خطيبتك ؟

صمت "عمر" وعاود القاء الحصى فى الماء .. ثم التفت الى "أيمن" وابتسم قائلاً:
-لو انت حاسس بكده مع خطيبتك يبقى يا بختك بيها
ابتسم "أيمن" ولم يعقب بشئ

-صحى النوم يا عروسه
هتفت "سماح" بهذه العبارة وهى توظ "ياسمين" من نومها .. لكنها لم تدرى أن "ياسمين"
لم تذق غمضاً منذ يومين كانت تنام على سريرها مغمضة العين لكنها متيقظه ومنتبهه تفكر
وتفكر وتفكر .. تملمت "ياسمين" فى فراشها ونظرت الى صديقتها قائله:
-صباح الخير ايه اللي جايبك بدرى كده
-بدرى ايه يا بنتى الساعة 10 والنهارده فرحك قومى ورانا حاجات كتير
قامت "ياسمين" متكاسله وقالت:
-المأدون هيجى العشا هعمل ايه أنا من دلوقتى للعشا
هتفت "سماح" قائله:

-يا ربي وبتقولى هتعمل ايه .. قومى يا بنتى مفيش وقت يلا
نهضت "ياسمين" وتوجهت الى الحمام وأخذت دش ساخن لتريح أعصابها المشدودة

قام والد "عمر" من نومه ليجد زوجته جالسه على السرير وعلامات القلق بادي على محياها
.. فاعتدل جالسا وقال:
-صباح الخير يا "كريمة" صاحيه من بدرى ؟
تنهدت قائله:

-أنا منمتش أصلا من بعد الفجر
-ليه يا حبيبتي ايه اللي مصحكي
قالت بصوت باكى:
-شوفته تانى يا "نور"

- هو ايه اللي شوفتية
-الحلم اللي حلمته لـ "عمر" من فتره .. شوفته تانى النهارده بنفس الشكل ونفس التفاصيل ..
الحية بتجرى عليه وهو بيقع فى البير وبعد ما الحية بتهرب منه .. أنا خايفه أوى
أمسك يدها فى يده قائلاً:
-متخفيش ان شاء الله ربنا يحفظه
-يارب .. يارب احميه يارب واصرف عنه السوء

-مبروك يا عروسه طالعه زى القمر فى فستانك
قال "سماح" هذه العبارة وهى تحتضن صديقتها .. كانت "ياسمين" ترتدى فستانا بسيطاً لونه
سيمون وبوليرو وطرحة نفس اللون .. كانت رفيقه وبسيطة للغاية .. اقتربت منها "ريهام"
قائله:

-مش كنتى لبستى فستان فرح يا "ياسمين" فى عروسه ما بتلبسش فستان فرح؟
ابتسمت لها "ياسمين" قائله:

-أنا مرتاحه كده يا "ريهام"

-عانقتها "ريهام" عناقاً طويلاً لم تتحدث فيه وكان الكلام يعجز عن وصف شعورها فى هذه
اللحظة .. قالت "ياسمين" والدموع تتجمع فى عينينها:

-كان نفسي أوى ماما تكون معايا النهاردة

أسرعت والدة "سماح" قائله:

-وأنا روحت فىن يا بنتى .. مش أنا زى ماما برده

التفتت اليها "ياسمين" والدموع فى عينينها تهدد بالسقوط وابتسمت قائله:

-طبعاً يا طنط ربنا عالم أنا بحب حضرتك أد ايه

عانقتها والدة "سماح" وربتت على ظهرها قائله:

-وربنا يعلم انك عندى من غلاوة "سماح" بنتى .. انتى و"ريهام" ربنا يحميكوا بنتين زى
الفل ومتتخبروش عن بعض

قالت "سماح": "

-ايه يا جماعة هنقلبها نكد ولا ايه .. لا بقولكوا ايه النهارده فرح وضحك وز غارط وبس ..

مش عايزة أشوف دمعه واحدة فى عين حد فيكوا النهارده .. فاهمين

ابتسم ثلاثتهم .. وبدأوا فى الغناء والرقص واطلاق النكات والضحك محاوليين اسعاد

"ياسمين" ورسم البسمة على شفيتها

سألت "نانسي" "صفية" زوجة "عويس" الغير والتي كانت تقوم بتغيير شراشف الأسرة
فى حجرات بيت المزرعة قائله بصوت منخفض:

-هو فىن "عمر" ؟

قالت "صفية" على الفور:

-فى أوضته يا هاتم تؤمرى بحاجه ؟

قالت "نانسي" وهى توليها ظهرها وتنصرف:

-لا ميرسي

تابعتها "صفية" بعينها ولوت شفيتها قائلاً:

-لا ميرسي

ثم عادت لاكمال عملها ..

دخلت "نانسي" حجرة "عمر" وسمعت صوت الدش فى الحمام الملحق بغرفته فارتسمت ابتسامه خبيثة على شفيتها .. وبعد فترة توقف صوت الدش وخرج "عمر" يلف وسطه بمنشفه .. توقف فجأة عندما وقعت عيناه على "نانسي" الجالسه على فراشه نظر الى فستانها القصير المكشوف الذى لا يكاد يغطى شيئاً .. تسمر فى مكانه .. فابتسمت "نانسي" قائله فى دلال :

-كنت حسه انى جعانه عملت شوية سندويتشات ناكلهم مع بعض
أخذت ساندوتش من الصنية التى وضعتها على الكمودينو ووضعت ساقاً فوق ساق ثم نظرت
اليه قائله:

-ايه مش هتيجي تاكل ؟

تقدم "عمر" حتى أصبح فى مواجهتها لا يدري لما وفى هذه اللحظة بالذات تذكر تلك الفتاة التى صدمها بسيارته والتى كانت ترقص على السرير فى المستشفى لا يظهر منها الا وجهها وكفيها ومع ذلك كانت تخجل من نظراته وتتورد و جنتاها بحمره الخجل وتبعد عينها عن عينيه .. لم يشعر بنفسه الا وهو يقارن بينها وبين تلك الفتاه الجالسه أمامه بجرأة بلا أدنى شعور بالخجل .. شعر بشئ من التقزز وقال لها بصرامة شديدة :

-فى واحده محترمة تعمل كده ؟ .. تدخلى اوضة شاب أعذب وانتى لابسه لبس زى ده ؟
قالت وعلامات الدهشة مرسومه على محياها:

-ايه المشكلة احنا بنحب بعض و خلاص هنتجوز
ثم أضافت بدلع:

-ولا انت معدتش بتحبنى ؟

نظر اليها نظرات غاضبة وأطبق أصابع كفيه بشده وكأنه يريد أن يلکم أحداً وقال لها بصوت هادر:

-نانسي اطلعى بره أنا مش طايق أشوف وشك
قالت فى عدم تصديق:

-نعم ؟ بتقول ايه

صاح غاضباً:

-بقولك اطلعى بره يا "نانسي" .. حالاً يا إما بجد هتندمى

نهضت "نانسي" وهى تشعر بالمهانه وقبل ان تغادر الغرفة قال لها:

-جهزوا نفسكوا عشان هنرجع مصر حالا

خرجت من الغرفة وأغلقت الباب بقوة .. ذهبت الى والدتها وقالت بعصبيه:

-يلا .. "عمر" طردنا من هنا .. لازم نمشي

صاحت والدتها فى فزع:

-مش فاهمة يعنى ايه طردنا

صرخت "نانسي" فى وجهها قائله:

-بقولك طردنا يلا قومي

وما هى الا لحظات حتى جاء "عمر" حيث تتحدث المرأتان ووجه حديثه الى "نادين" قائلاً:

-معلش يا طنط جالى تليفون شغل مهم ولازم أنزل مصر حالا .. لو حضرتك عايزة تستنى انتى

وعمى و"نانسي" مفيش مشكلة بس أنا راجع مصر حالا

تصنعت نادين "الابتسامه" ثم قالت:

-لا يا حبيبى واحنا ايه اللي يقعدنا هنا .. احنا قضينا 3 أيام وحقيقي لازم نرجع مصر عشان

أشغالنا

-طيب تمام أنا منتظرلكوا تحت فى العربية عشان تمشوا ورايا بالعربية بتاعتكوا زى ما جينا
عشان متتوهوش فى الطريق

-ماشي يا حبيبي

خرج "عمر" فوجهت الى "نانسي" نظرات صارمة قائله:

-هنتكلم فى البيت

ركب "عمر" سيارته وانتظرهم ..كان يشعر وكأن بداخله بركان بغلى من الغضب .. كان هذا
الغضب موجه أكثر الى نفسه كيف كان أعمى الى هذه الدرجة كيف لم يستطع تمييز الغث من
السمين .. كيف لم يرى أن خطيبته لا تتناسب أبدا مع قيمه وأخلاقه .. كيف اهتم بالقشور ونسي
اللب .. كان يسأل نفسه هذه الأسئلة وهو لا يدري أيغضب من "نانسي" أم من نفسه .. رأى
ثلاثتهم وهم ينزلون الدرج ويركبون سيارتهم .. شغل محرك سيارته ولكنه انتبه الى صوت
محرك سيارتهم حيث أصدر صوتا عاليا ثم توقف تماما
فأخرج رأسه من الشباك ونظر الى الخلف قائلاً :

-مش عايزة تدور ؟

أخرج والد "نانسي" رأسه هو الآخر وقال:

-ايوة النور كان والع وشكل البطارية فضيت

-طيب سييوها وأنا أخلى حد من العمال يجيب ميكانيكي يوصلحها وحد من المزرعة يوصلهاانا

على القاهرة .. وتعالوا اركبوا معايا

نزل ثلاثتهم فى صمت .. همت "نانسي" أن تركب فى الخلف لكن "مادين" دفعها الى الباب

الأمامى .. فجلست متبرمة بجوار "عمر" .. وانطلق بسيارته قاصدا القاهرة وفى رأسه ألف

سؤال وسؤال

تعالت الزغاريد فى بيت "ياسمين" والتف الجميع حولها من أصدقاء وجيران مهنيين
ومباركين لهذا الزواج .. دخل "عبد الحميد" حجرة ابنته و العبرات تملأ عينيه وقبلها فى
جبينها وأمسك يدها وقبلها فأسرعت "ياسمين" بسحب يدها والعبرات تختنق فى عينيها , نظر
اليها والدها وأمسك رأسها بين كفيه قائلاً:

-الحمد لله ان ربنا أحيانى وشوفت اليوم ده .. بنتى أنا عروسه

تركت "ريهام" لعبراتها العنان كانت سعيدة لزواج أختها لكن فى حلقها غصه كيف ستحيا
بعيداً عنها .. كيف وهى الأم والأخت والصديقة وكل شئ بالنسبة لها ..وما هى الا لحظات حتى
تعالت الأصوات لتنبئ بوصول المأذون فتعالت الزغاريد مرة أخرى

كان "مصطفى" يقف سعيداً وسط الحضور عندما وقع نظره على آخر شخص أراد رؤيته فى
تلك اللحظة .. نعم انها "نهلة" كانت تقف أمام الباب ترمقه بنظرات غاضبة نارية ,أسرع
الخطى اتجاهها وجذبها من ذراعها وخرج من الشقة وقال لها بغضب:

-بتعملى ايه هنا ؟ ايه اللي جابك

قالت له ونظرات الاحتقار تملأ عينيها:

-متخفش أوى كده يا عريس أنا لو كنت عايزة أبوظلك الجوازه كنت جيت البيت ده من زمان

قال بحدده وهى ينظر حوله خوفاً من أن تنتبه "ياسمين" أو والدها:

-أمال ايه اللي جابك ؟

قالت بسخريه:

-جايه أشوفك وانت عريس

الفصل السادس عشر

دخلت "ياسمين" بيتها وهي تقدم رجلاً وتؤخر الأخرى .. كانت تراه لأول مرة بعدما انتهت
والدة "مصطفى" وأختها و "اسماح" من تنظيمه وترتيبه
دخلت ووقفت وسط الصالة وكأنها عابرة سبيل ضلت طريقها ولا تهتدي الى وجهتها .. أفاق
من شرودها على صوت باب الشقة الذي أغلقه "مصطفى" عليهما .. التفقت لتنظر اليه وقلبا
يكاد يصم أذنيها من علو صوت دقاته .. ثم .. ابتسم "مصطفى" واقترب منها بخطوات بطيئه
...

عندما مد يده وأمسك ذراعها وأراد ضمها اليه أوقفته بإشاره من يدها .. فقال متبرماً:

-ايه تانى مش خلاص .. اديكي بقيتي مراتي أهو ..
أطرقت "ياسمين" برأسها وقالت بخجل:

-مش هينفع

احتد "مصطفى" قائلاً:

-هو ايه ده اللي مش هينفع؟

"قالت" "ياسمين" وهي مازالت مطرقة برأيها:

-الحادثة هي السبب

-حادثة ايه؟

-العربية اللي خبطتني من اسبوعين .. هي السبب

ازدادت حدة "مصطفى" قائلاً بدهشة:

-ايه اللي جاب القالعه جمب البحر

ازداد احمرار وجنتاها وجاهدت لتخرج صوتها قائله:

-يعني أقصد أقول معاد الفرحة اتأجل اسبوع عشان رجلى كانت فى الجبس

-وايه علاقة ده بينا دلوقتي

ازداد ارتباكها قائله:

-يعني المعاد الجديد .. مكنش مناسب بالنسبه ليا .. يعني .. يعني .. مش هينفع

قال "مصطفى" وقد ثارت ثائرتة:

-وأما هو المعاد الجديد مكنش مناسب لجنايبك ما قولتيش كده ليه من الأول كنا غيرنا الزفت
المعاد

قالت وقد تساقطت عبراتها على وجنتيها:

-اتكسفت أقول لبابا

-وموضوع مش هينفع ده .. هيستمر أد ايه؟

6- أيام

-الله أكبر يعني الأجازة اضربت

تركها "مصطفى" وسط الصالة ودخل يبدل ملابسه وهو يغلى من الغضب ..

-يارب .. يارب .. احميه يارب .. يارب احميه يارب

تفوهت "كريمة" بتلك العبارة هي جالسه بجوار زوجها أمام غرفة العمليات بالمستشفى .. ثم
أكملت قائله:

-ليه ابني يحصله كده .. ليه يارب

قال زوجها الجالس بجوارها:

-انتي مؤمنة يا كريمة حرام اللي بتقوليه ده
قالت باكيه:

-عارفه بس غصب عنى قلبي محروق على ابني اوى
-طيب استغفرى ربنا وادعيه زى ما بدعيه بدل الكلام اللي يغضب ربنا ده
-استغفر الله .. استغفر الله .. يارب ده ابني الوحيد اللي مليش غيره .. يارب احميه يارب
ثم التفتت الى زوجها قائله:
" -نانسي" و "نادين" كويسين ؟
تنهد بحسره قائلاً:

-ايوة انا لسه كنت عندهم من شويه كلها خدوش بسيطه .. لكن اللي تاعبنى موت والدها الله
يرحمه

-الله يرحمه ويغفرله ويتجاوز عن سيناته ..طيب هما عاملين ايه دلوقتي ؟
سكت قليلاً ثم قال:

-ولا أى حاجه

-يعني ايه ولا أى حاجه

-مش عارف هما كده من الصدمة ولا ايه بالظبط .. بس مش باين عليهم أى تأثير

-غريبة ازاي يعني دى جوزها .. ودى أبوها

-مش عارفه .. أكيد لسه مفاقوش من الصدمة

-عاود "كريمة" قلقها على ابنها الذى يرقد داخل حجرة العمليات وأخذت تستغفر ربها وتناجيه

قام "مصطفى" بتغيير ملابسه وتوجه الى حجرة المعيشة يشاهد ويقلب فى قنوات التلفاز ..
دخلت "ياسمين" حجرة النوم بعدما خرج منها "مصطفى" جلست على طرف الفراش
والدموع تتساقط من عينيها .. تشعر وكأنها غريبه فى مكان غريب معزوله عن العالم ...
شعرت بالإشتياق لـ "ريهام" وللحديث معها ..وشعرت بالحنين الى والدها الذى رغم قسوته
عليها الا أنها تحبه بشده وتشعر بالأمان وهى فى بيته .. كم تمننت ترك هذا البيت والعودة الى
بيتها مرة أخرى .. تذكرت أمها وتمنت أن تلقى بنفسها فى حضنها ولو لمرة أخيره .. مسحت
عبراتها وقامت لتغير ملابسها .. ارتدت عباءة طويلة ذات أكمام طويلة واحتارت هل تترك
شعرها أم ترتدى حجابها .. فمازالت تشعر بأنها فى بيت غريب ومع رجل غريب .. جاهدت
نفسها لتترك حجابها ولا ترتديه مذكره نفسها بأن هذا الرجال الجالس فى الخارج حتى ولو
شعرت بأنه غريب إلا أنه الآن زوجها ويجب عليها حسن التبعل له والطاعة .. ولو رآها
بالحجاب لإزداد غضباً على غضب .. خرجت من غرفة النوم وتوجهت حيث يجلس "مصطفى"
وقفت على استحياء أمام الباب ,,ألقي عليها "مصطفى" نظرة ساخره على ما كانت ترتديه ثم
أعاد نظره الى التلفاز مرة أخرى .. وقفت قليلاً ثم قالت:

-تحب تتعشى

قال بحده :

-لا مش عايز زفت

تركته ودخلت غرفة النوم مرة أخرى وهى تشعر بأن هناك أيام بانسه تنتظرها فى بيت
"مصطفى"

خرج الطبيب من غرفة العمليات فنهضت "كريمة" وزوجها بسرعه وتوجهها اليه ,, قالت
"كريمة" بلهفه :

-خير يا دكتور الله يباركك طمنى على ابني

طمأنها الطبيب قائلاً:

-لا اطمنى هو كويس الحمد لله
قال والده:

-يعتي مفيش فيه أى مشكلة

-الحمد لله حاله أحسن من غيره كل المشكله ان أعصاب دراعه الشمال اتضررت بشكل جزئي
بالإضافة للكسور اللى فى دراعه .. يعنى هيجتاج فترة من العلاج الطبيعى والحجامة عشان
الأعصاب تنشط تانى .. بس اطمنوا ان شاء الله خير
قالت "كريمة" فى قلق:

-يعنى يا دكتور واثق انه هيكون كويس بالله عليك ما تخبي عليا
-أنا هنا طبيب يا حجه وبصراح أهالى المرضى بحالتهم بالتفصيل مينفعش أخبى عليهم حاجة
.. وزى ما قولت لحضرتك هو بس بعد الجبس ما يتفك هيجتاج فترة من العلاج الطبيعى عشان
ايدته ترجع زى ما كانت

-اد ايه هياخد الموضوع ده

-حسب حالته وحسب استجابته .. منقدرش نحدد دلوقتى الا لما يفك الجبس ان شاء الله

-وايدته هتفضل فى الجبس أد ايه يا دكتور

-مش أقل من شهرين .. عن اذنكوا

غادر الطبيب .. فالفقت "كريمة" لزوجها قائله:

-تفتكر الدكتور مخبي حاجه

-انتى عايزه تقلقى نفسك وخلص قالك انه لازم يكون صريح معنا وشرحنا حالته بالظبط

-الحمد لله اللهم لك الحمد

ثم استطردت قائله بقلق:

-بس أنا خايفه دراعه ميرجعش تانى زى الأول

-احنا فين وبقينا فين يا "كريمة" قدر ولف الحمد لله انها جت على أد كده

فى هذه الأثناء خرج من غرفة العمليات ترولى محمولاً عليه "عمر" فتوجهت اليه "كريمة"

مسرعه وربتت بكفها على رأسه قائله:

"-عمر" انت كويس .. رد عليا يا ابنى

قالت لها الممرضة:

-هو دلوقتى فى البينج .. ان شاء الله شويه ويفوق

..أدخلوه الغرفة المخصصه له وجلست "كريمة" بجواره تمسك مصحفها وتتلو آيات من كتاب

الله

نظرت "نانسي" الى الكدمات الى تعلو وجهها فى مرآة صغيره بيدها فى غرفتها بالمستشفى ..
وقالت بعصبيه:

-اتشوهدت .. وشى اتشوهد

نظرت لها "نادين" النائمة على الفراش قائله:

-انتى معندكيش دم ؟ ابوكى مات يا "نانسي"

نظرت لها "نانسي" قائله:

-يعنى عايزه تفهميني ان انتى زعلانه عليه ؟ ..بصراحه أنا مش حسه بأى حاجه .. عارفه ليه

.. لأنه عمره ما حسسنى ان ليا أب .. يخاف عليا ويأخذنى فى حضنه ويقولى كده صح وكده

غلط .. عمرى ما حسيت بوجوه فى حياتى .. كان طول الوقت اما مسافر واما فى الشغل .. ايه

اللى يخلينى أزعل انى فقدت حاجه أصلا مكنتش موجوده فى حياتى

-حتى لو كده .. برده خلى عندك دم شويه أهل خطيبك يقولوا ايه علينا
-قالت "نانسي" بسخرية:
-خطيبي ؟ .. هو بعد اللي أنا حكيتهولك و اللي حصل فى بيت المزرعة متوقعة ان "عمر"
هيفضل خطيبي
-قالت لها "نادين" بعصبية:
-ما انتى واحده غبيه .. لسه مفهمتيش "عمر" وعشان كده عماله تحطى نفسك فى مواقف
غبيه زيك
-اووووف .. خلاص مفيش داعى للكلام ده .. خلاص الموضوع انتهى
-نظرت لها "نادين" بغل قائله:
-مش بقولك غبيه .. موضوع ايه اللي انتهى .. الأمور هترجع بينك وبين "عمر" زى الأول
وأحسن
قال "نانسي" بسخرية:
-ازاى ان شاء الله
ابتسمت ابتسامه خبيثة وقالت:
-هقولك ازاى

دخل "مصطفى" الى غرفة النوم فأسرعت "ياسمين" الجالسه على طرف الفراش بالنهوض
والتفتت وأولته ظهرها وأخذت تمسح عبراتها التى تساقطت على وجنتيها .. دخل "مصطفى"
الفراش وتدثر بالغطاء وأغمض عينيه دون التفوه بكلمه
أخذت "ياسمين" وسادة صغيره وغطاء من الدولاب وتوجهت الى غرفة المعيشة .. نامت على
الاريكة وتدثرت بغطائها وأقد أخذت العبرات تتساقط على وجنتيها مرة أخرى
استيقظت فى اليوم التالى عندما شعرت بيد تهزها بقوة وبصوت "مصطفى" وهو يقول:
-انتى يا هانم .. قومى عايز أفطر
هبت "ياسمين" جالسه على الأريكة .. وأعدت خصلات شعرها الثائرة الى الخلف وأغمضت
عينيهما للحظات تحاول تذكر أين هى وماذا تفعل هنا
-يلا أنا جعان
عادت "ياسمين" الى الواقع مرة أخرى .. فنهضت من على الأريكة وقال:

-صباح الخير .. حاضر هحضره دلوقتى
لم يرد "مصطفى" فأخذت غطائها ووسادتها ودخلت غرفة النوم وأعدت ترتيب السرير ثم
توجهت الى الحمام وأخذت دش ساخن لعلها تشعر بالإرتياح .. أنهت حمامها ودخلت المطبخ
تحضر الفطور لأول مرة فى هذا البيت الغريب .. نظرت الى مقتنياتها وأدواتها المطبخية
وتذكرت كل قطعة فيه .. كان لكل قطعة بهجه خاصة .. تذكرت كيف كانت أمها ومنذ كانت
"ياسمين" صغيره تشتترى لها ولأختها أشياء لجهازهما .. كانت تفرح كلما اشترت لها أمها
شيئاً جديداً وتسعد وهى تضيفه الى ذلك الصندوق الكبير الذى احتوى جهازها والذي كانت
تضعه تحت فراشها .. تذكرت كم حلمت باستخدام تلك الأشياء عندما تتزوج ويصبح لها بيت
خاص بها وزوج محب .. وهنا اختف الإبتسامه من شفتيها .. نعم حصلت على البيت .. لكن أين
هو الزوج المحب ! .. لم ترد لليأس أن يسيطر عليها وينغص عليها عيشها .. كانت تكره الفشل
والاستسلام له .. عاهدت نفسها أن تبذل قصارى جهدها فى انجاح زواجها وبث الألفة والود
داخل جدران هذا البيت .. شرعت تحضر طعام الفطور فى مرح والابتسامه تملو شفتيها

تململ "عمر" فى فراشه فى غرفته بالمستشفى وفتح عينيه وأخذ يدور بهما فيما حوله ويحاول تذكر ما حدث له .. نظر بجواره ليجد "كرم" وهو يغطى فى النوم على كرسي مجاور لفراشه .. انتبه "عمر" ليده اليسرى والتي كانت موضوعه من الكف لبداية عظمة الكتف فى الجبيره .. نادى صديقه قائلاً:

"كرم" .. "كرم"

استيقظ "كرم" ونهض ليتفحص صديقه بعينه قائلاً:

"عمر" حمدالله على السلامه .. انت كويس

قال "عمر" وهو حائراً:

-أنا فين وايه اللي حصل ؟

-انت مش فاكرة حادثة امبارح

قال "عمر" بإندهاش:

-حادثة ايه ؟

صمت قليلاً ثم قال:

-اه .. أنا آخر حاجة فاكرها ان كان فى عربية جايه مخالف ومش فاكرا أى حاجه بعد كده

تنهد صديقه قائلاً:

-ايوة كان فى تريبلا جت مخالف وللاسف العربيتين خبطوا فى بعض

قال "عمر" بسرعة:

-و "نانسي" وأبوها و مدام "نادين"

قال "كرم" فى شئ من الأسى:

"-نانسي" و مدام "نادين" بخير .. حصلهم كدمات بس لأن العربيه اتقلب على الجبهه اللي

كنت انت وأبو "نانسي" أعدين فيها

-طيب ووالد "نانسي" حصله حاجه

-البقاء لله يا "عمر" .. توفى

هتف "عمر" قائلاً:

-لا حول ولا قوة الا بالله .. لا حول ولا قوة الا بالله

وفجأة انفتح الباب لتدخل "كريمة" التى انفرجت أساريها لرؤية "عمر" مستيقظاً وأقبلت

نحوه فى سرعة وعانقته قائله:

"عمر" حبيبتي حمدالله على سلامتكم يا ابني .. حمدالله على سلامتكم

وأخذت تبكى بشده ..طوقها "عمر" بديه اليمينى وهدعها قائلاً:

-انا الحمد لله يا أمى ..بخير زى ما انتى شايقه .. الحمد لله

وضعت رأسه بين كفيها تملئ عينيه برويته قائله:

-الحمد لله .. الحمد لله كنت هموت لو كان جراك حاجه

جذب "عمر" رأسها يقبله قائلاً:

-بعد الشر عليكى يا حبيبتي .. أنا بخير أهو والحمد لله

أقبل والده يحتضنه ويقبل رأسه مررددا:

-الحمد لله انك رجعتلنا بالسلامه يا ابني

قال "عمر" لوالده بقلق:

-ازى "نانسي" و مدام "نادين" دلوقتي

-كنا من شوية فى الدفنه و سبنا "كرم" معاك هنا عشان لو فوقت

شعر "عمر" بالأسى الشديد لفقدان "نانسي" والدها فقال:

-لا حول ولا قوة الا بالله أكيد اللي حصل صعب أوى عليهم

هتفت "كريمة" قائله بعصبيه:

"عمر" دى أحر مرة تسوق فيها العربيه بنفسك .. عندك سواق مبتخليهوش يسوقها ليه

-يا ماما الحادثة مكنتش غلطتى التريلا هي اللي جايه مخالف

-ولو ..مفيش سواقه عربية تاني

فلم يرد "عمر" مجادلة والدته التي يعلم جيداً ما تشعر به في هذه اللحظة فردد قائلاً:

-حاضر يا ماما

في تلك اللحظة سمعوا طرقات على الباب ثم انفتح الباب ليدخل الطبيب .. كشف على "عمر"

وأخبره بنفس ما أخبر به والده ووالدته يوم أمس .. شعر "عمر" بالقلق وقال:

-يعني يا دكتور ان شاء الله ايدي هتبقى كويسة مش كده

-ايوة ان شاء الله بس الموضوع محتاج شوية وقت وزى ما قولت لوالدك امبارح منقدرش

نحدد الوقت ده الا لما نفك الجبس ونشوف مدى استجابتك للعلاج الطبيعي ..بس متقلقش

الضرر مكنش كبير اوى وان شاء الله في وقت قصير ايدك ترجع تتحرك طبيعي تاني

قال له "عمر" ياامتنان:

-شكرا يا دكتور

فتح الطبيب باب الحجرة ليغادر فوجد "نانسي" التي وقفت على باب الغرفة لمحتها "كريمة"

فنادتها قائله:

-تعالى يا بنتي

دخلت "نانسي" الغرفة بعينيها المتورمتين وبعض الكدمات التي تظهر على وجهها .. رآها

"عمر" في هذه الحالة فشعر بالأسى عليها ..نظر والد "عمر" الى زوجته و "كرم" نظره

ذات معنى .. فغادر ثلاثتهم الغرفة .. اقتربت "نانسي" من فراشه وانسابت العبرات على

وجنتيها قائله:

"-عمر" انت عامل ايه دلوقتي

قال بأسى:

-الحمد لله ..المهم انتى عامله ايه .. البقاء لله يا "نانسي"

انفجرت "نانسي" باكية وجلست بجواره وألقت بنفسها على صدره وقالت:

-بابي مات يا "عمر" .. مش عارفه هعمل ايه من غيره .. كان كل حاجه في حياتي .. مش

قادره أتحمّل ده .. أنا تعبانه اوى يا "عمر"

ربت "عمر" على ظهرها قائلاً بأسى:

-قدر الله وما شاء فعل .. ربنا يرحمه ويغفرله

أبعدها عن صدره ليرى وجهها ومسح بكفه عبراتها وقال:

-اهدى يا "نانسي" وبطلى عياط وادعيه ..اللى هيفيده دلوقتي هو الدعاء

نظرت له بعتاب قائله:

-بابي سابنى .. وانت كمان هتسبني يا "عمر" خلاص معدش ليا حد في الدنيا دي

-انتى ليه بتقولى كده

انفجرت في البكاء مرة أخرى وقالت:

-لأن دي الحقيقة انت هتتخلي عنى وتسبيني

ألقت نفسها على صدره مرة أخرى وقالت:

-أرجوك يا "عمر" ما تسبنيش أنا محتجالك اوى .. أنا مليش غيرك دلوقتي .. لو سبنتى

هموت نفسي

شعر "عمر" بمزيد من الأسى قائلاً:

"-نانسي" استغفري ربنا ..ايه اللي بتقوليه ده..

نظرت اليه قائله بحزم:

-بقول اللي هعمله لو انت سبنتى يا "عمر" .. لو سبنتى هموت نفسي

قال "عمر" بقلق:

-طيب ممكن تهدى وتبطلى الكلام اللي بتقوليه ده ..

صمت قليلا ثم قال:
-وبعدين مين قالك انى هسيبك .. أنا مش هسيبك متخفيش
نظرت اليه بلهفه وابتسمت وسط دموعها قائله:
-بجد يا "عمر" مش هتسبني
نظر لها وابتسم فى حنان قائلا:
-أيوة مش هسيبك ..بس يا خوفى انتى اللى تسيبيني
قالت بسرعة:
-مستحيل اسيبك أبدا .. أنا أموت من غيرك
نظر "عمر" اليها بشئ من الشك ثم شرح له وضعه ذراعه الصحى كما وصفه الطبيب ..
فقالت:

-طيب يعنى الدكتور قالك انك هتخف
-الله أعلم .. ده لسه ميقدرش يحدده دلوقتى .. ده على حسب استجابتى للعلاج الطبيعى وعلى
حسب الضرر اللى حصل فى دراعى
أسرعت قائله:
-حتى لو مرجعتش ايدك طبيعیه تانى انا مش ممكن اسيبك ابدا
نظر لها "عمر" نظره طويله يحاول الغوص داخلها ليتبين صدقها ثم قال:
-واثقه ؟
قالت بحزم:
-ايوة واثقه
ابتسم لها "عمر" ثم طوقها بذراعه مرة أخرى

خرجت "نانسى" من حجرة "عمر" لتجد "كرم" فى الردهة يتحدث مع الطبيب .. انتظرت أن
أنهى حديث ثم توجهت نحوه قائله:
" -كرم" خلى بالك من "عمر" أنا هروح أستريح فى البيت شويه
-متقلقيش عليه يا "نانسى" كلنا هنا معاه
قالت له فى براءه مصطنعه:
-أنا مش عارفه هروح البيت ازاي .. ومش هقدر استنى الشفير لحد ما يجيلنى بالعربيه ..
حسه انى تعبانه أوى
أسرع "كرم" قائلاً:
-طيب مفيش مشكلة أوصلك أنا
-بجد .. ميرسى يا "كرم"
-ثوانى بس هدخل أظمن على "عمر" وأقوله انى ماشي
انتظرتة "نانسى" حتى جاء وانطلقا معا الى بيتها .. أوصلها ثم تركها وعاد الى المستشفى
مرة أخرى

-مش كنتى تعملى حسابك بدل ما تعككنى على الواد يوم فرحه
أقلت أم "مصطفى" بهذه العبارة عندما دخلت على "ياسمين" المطبخ وهى تعد العصير ..
ارتبكت "ياسمين" وشعرت بالخجل الشديد ولم تتفوه ببنت شفه .. شعرت بالضيق والغضب
فما بينها وبين زوجها لا يحق لأحد غيرهما معرفته بل والسؤال عنه أيضاً.
قالت لها والدته بعده:
-أهلك علموكى لما حد كبير يكلمك مترديش عليه ؟
ارتبكت "ياسمين" وتمتمت:

وشغل الرجيم والتننفة فى الأكل .. أنا عايزك تملى شويه
قالت دون أن تنظر اليه:

-أنا مش بعمل رجيم ولا حاجه .. أنا أكلى كده .. مش بعرف أكل كثير
-لا تتعودى ... الست لازم تسمع كلام جوزها .. أما أقولك عايزك تتخنى يبقى لازم تتخنى يا
اما هيص بره
وقعت كلماته كالصاعقة على رأسها .. ألا يكفيها ما تلاقيه منه منذ أول يوم .. لم تتخيل أبدا أنها
ستسمع زوجها بعد ثلاثة أيام من زواجها يهددها بالنظر الى غيرها .. قد شعرت بشي من
المهانه لكنها تماسكت قائله :

-أصلا اللى انت بتقوله ده يغضب ربنا قبل ما يزعلى
-وحياة أبوكى بلاش فزلكه
-قول لا اله الا الله
-ليه بأه ؟

-عشان حلفت بغير ربنا
قال "مصطفى" بسخرية:
-شكلى اتجوزت شيخه و أنا معرفش
قالت بهدوء:

-لا شيخه ولا حاجه بس دى حاجه معروفة
قال "مصطفى" بغضب:
-يعنى أنا جاهل و مبفهمش
ارتبكت قائله:

-أنا ما قولتش كده
هب واقفاً وصاح قائلاً:
-ولا تقدرى أصلا تفكرى تقولى كده .. شكلها هتبقى جوازه هم من أولها ..مش واكل اطفحى
لوحذك

تركها وانصرف .. لم تشعر "ياسمين" الا والعبرات تتساقط على وجنتيها فى صمت

فى المساء أعدت كوب من الشاي .. رصت فى طبق صغير كيك ويسكويت أعدته بيدها ..
وأقبلت على غرفة المعيشة تحتسب فى سرها أجر ارضاء زوجها وحسن التبعل له ..وضعت
على المنضده بجوار الصنيه الصغيره .. فالتفت اليها قائلاً:
-تسلم ايدك

ابتسمت "ياسمين" واعتبرتها بداية مبشرة .. عاود النظر الى اللاب توب أمامه .. حاولت
"ياسمين" فتح حوار معه قائله:
-بتعمل ايه ؟

قال دون أن ينظر اليها:

-عادى .. بكلم واحد صحبى
-مش هتدوق الكيك أنا اللى عملاه
التفت وأخذ قطعه قطم منها ثم قال:
-حلوة أوى تسلم ايدك
ابتسمت قائله:

-بالهنا والشفا

ران الصمت عليها .. نظرت اليه وسألته فجأة:

" -مصطفى" انت ليه اتجوزتنى ؟
التفت اليها وقال فى دهشة:

-يعني ايه ليه اتجوزتك
-يعني ليه اتجوزتني .. الجواز بالنسبة لك بيمثل ايه ؟
أخذت رشقه من كوب الشاي الموضوع بجواره ثم قال:
-الجواز يعني يبقى عندي بيت وزوجة وولاد
نظرت اليه قائله:

-بس كده ؟

ضحك قائلاً:

-وهو في ايه غير كده

تسلل الحزن الى قلب "ياسمين" تمننت لو سمعت منه كلاماً آخر يعطيها دفعه أمل وحماسه لبذل نفسها من أجل انجاح زواجها .. الزواج بالنسبة لـ "ياسمين" لا يمثل مجرد بيت وزوج وأولاد فقط .. بل يمثل كيان يضيف للمجتمع ويخدمه .. أرادت زوجاً يأخذ بيدها ويعينها على التقرب من ربها .. أرادت زوجاً يكن سنداً لها ودعامة ترتكز عليها .. أرادت زوجاً يعرف واجباته قبل حقوقه .. أرادت زوجاً يعمل بوصية النبي صلى الله عليه وسلم "رفقاً بالفوارير" .. أرادت زوجاً يحثها على ألا تترك وردها .. أرادت زوجاً تشاركه اهتماماته ويشاركها اهتماماتها .. أرادت زوجاً يكن الحضان الدافئ لها في ليالي الشتاء الباردة .. أرادت زوجاً تترك عبراتها تنساب أمامه ليمسحها بكفه بحب وحنان .. أرادت زوجاً تبثه مشاعرهما وعواطفها التي أغلقت عليها ولم تتركها مهانه ومتاحه لأي رجل غيره .. أرادت زوجاً ليس جافاً في اسلوبه او حديثه وانما الفاظ الحب والمودة تعرف طريق لسانه .. أرادت زوجاً تشاركه بناء مستقبل أبنائهما واعداد رجال يضيفون للمجتمع .. أرادت زوجاً تشعر معه بالسكينه والموده والرحمه وان تكون قرّة عينه ويكون قرّة عينها .. أفاقته من شرودها على صوت هاتفها المحمول فنهضت لترد عليه انسابت عبراتها في صمت وهي تتحدث الى أختها التي اشتاقت اليها بشده

كانت "نانسي" جالسه برفقه "عمر" بالمستشفى فلم تتركه طيلة الأيام الماضية .. تهتم به وتعمل على اراحته .. كان "عمر" مسروراً بهذا التغيير الذي طرأ عليها .. لكنه كان محتاراً هل موت والدها هو السبب في هذا التغيير ؟ هل تهتم لأمره فعلاً ؟ هل تغيرت وتخلت عن استهتارها وعدم تحملها للمسئوليه .. هو يرى تصرفاتها وكلامها وكأنه يتحدث الى "نانسي" أخرى وكان سعيداً بهذا التغيير الا أنه كان يشعر بالريبة وعدم الطمأنينة .. في اليوم الخامس بدأ "عمر" يشعر بالضجر من بقاءه حبيساً داخل هذه الجدران الأربعة فلم يعتاد المكوث هكذا بلا حراك وبلا شئ يفعل .. تحدث مع الطبيب الذي سمح له بالإنصراف مع اعطاءه تعليمات مشدده بالراحة والالتزام بالدواء في مواعده .. وصل الى الفيلا بصحبة والده ووالدته و "كرم" ونانسي و "أيمن" الذي حضر للإطمئنان على صحة صديقه .. تركهم "عمر" يتحدثون معا وطلب من "نانسي" اللحاق به في مكتبه بالفيلا .. دخلت "نانسي" وهي تشعر بالقلق .. أغلق الباب ووقف أمامها ينظر اليها في صمت .. قالت "نانسي":
-خير يا "عمر" في حاجه حصلت

-ايوة

-في ايه طمني

صمت قليلا وهو يراقب تعبيرات وجهها ثم قال بصوت هادئ:

-الدكتور قالى ان مستحيل دراعى يرجع طبيعي تانى وانى هعانى من شلل دائم

اتسعت عينا "نانسي" وحاولت التماسك قائله:

-بس انت قولتلى ان الدكتور قال غير كده

-ايوة قالى انه اضطر يقول كده لاني كنت لسه خارج من العمليات ومحبش يصدمنى وخاف ده

يأثر عليا فستني لحد ما أفوق من صدمة الحادثه
ابتلعت ريقها قائله:

-وبعدين هتعمل ايه ؟

-مش هعمل حاجه .. ده قضاء ربنا وأنا راضى بيه واساسا مفيش فى ايدى حاجه اعملها
ثم أطرق برأسه وتنهد قائلاً:

-بس مش دى الحاجه الوحيدة اللي تعبانى

-أمال فى ايه اكتر من كده ؟

-المزرعة .. انتى عارفه المشاكل اللي كانت فيها للأسف يا "نانسي" الشركة اللي كنا

متعاقدين معاها عرفت بمشكلة المحصول وطالبونا بفلوسهم وبالشرط الجزائي وخسرت خسارة
كبيرة أوى

قالت بتوتر:

-خسرت أد ايه يعني ؟

-نسبة كبيرة من الأسهم بتاعتي فى الشركة اضطريت أبيعها لـ "كرم" عشان ألقى سيوله
أدفعها للناس

-طيب و"كرم" مش المفروض انه معاك فى الخسارة دى

-لأ .. المزرعة بتاعتي مش بتاعة الشركة يعني ادارتها وأرباحها خاصيين بيا أنا .. "كرم"
ملوش علاقة بيها وعشان كدة الخسارة عليا لوحدى

شعرت "نانسي" بالضيق الشديد لكنها انتبهت لنظرات "عمر" التى تتفرس فيها فرسمت
ابتسامه بصعوبة على شفيتها قائله:

-ولا يهيك يا حبيبي بكرة كل حاجه تتعوص .. وأهم حاجه اننا مع بعض
نظر لها بشك قائلاً:

-يعني مش هتسبيني رغم كل اللي قولتهولك .. خسارتى و اصابة ايدي
-لأ طبعا يا "عمر" مش هسيبك

اتسعت ابتسامه "عمر" قائلاً:

-طمنتيتى كنت خايف أوى

-انا تقولت لوالدك ووالدتك على اللي حصل

-لأ لسه ما قولتلهمش .. اللي يعرف بس "أيمن" و "كرم"

-طيب يا حبيبي يلا نخرج عشان زمانهم منتظرينا بره

خرجا الاثنان وفى داخل "نانسي" غضب هادر .. النف الجميع حول طاولة الطعام ..كانت
"نانسي" شارده واجمة لكنها حاولت التظاهر بالاندماج معهم فى الحديث ..بعد العشاء وجدت

"أيمن" يقف خارج الفيلا يتحدث فى هاتفه وبعدما انهى حديثه التفت ليعود الى الداخل لكنه
وجد "نانسي" خلفه تبتمس اليه قائله:

-ازى خطيبتك أخبارها ايه

-كويسة الحمد لله

-مش ناوى تعرفنا بيها ولا ايه

-اكيد طبعا فى اقرب وقت ان شاء الله

صمتت قليلا ثم قالت:

-زمانك أكيد مضايق دلوقتى من اللي حصل

فسألها "أيمن" مستفهماً:

-ايه اللي حصل ؟

نظرت اليه "نانسي" تراقب ردود أفعاله قائله:

-المزرعة .. بتاعة "عمر"

كان لديها شك بأن "عمر" يكذب عليها وأرادت التأكد ..سادت لحظة صمت .. تنهد أيمن "

بحسره ثم أطرق برأسه قائله:
-قدر الله وما شاء فعل .. "عمر" ميستهلش الخسارة ... بس أكيد ربنا بيحبه وبيعوضه باللى
أحسن منها
قالت بإندهاش:
-بيحبه ليه عشان خسر خساره كبيره
نظر اليها "أيمن" فى صمت .. ثم قطعه قانلا:
-بكرة تعرفى ربنا بيحبه ليه
ثم تركها مندهشه تفكر فيها قال ودلف داخل الفيلا

أعدت "ياسمين" حقيبة "مصطفى" بعناية فائقة .. أرادت أن يشعر بالإختلاف بعدما دخلت
حياته .. أغلقت الحقيبة ووضعتها بجوار الباب .. أنتهى من ارتداء ملابسه وشفف شعره ..
ابتسمت له قائله:
-تروح وترجع بالسلامة
-ان شاء الله .. انا هغير معاد اجازتى الجاى يعنى بدل ما هغيب 3 اسابيع هغيب شهر .. تمام
كده المعاد مناسب ؟
شعرت "ياسمين" بالخجل وأطرقت رأسها .. توجه الى الباب وحمل حقيبته وقال:
-متفحيش لحد متعرفيهوش .. وخلي بالك من الغاز اقليله كويس قبل ما تنامى
-حاضر .. بس كنت عايزه أطلب منك يا "مصطفى"
-خير
-بما انك يعنى هتغيب شهر وأنا هنا اعدده لوحدى فلو سمحت ممكن أروح أعد عند بابا
التفت اليها قائله بحدده:
-ليه تعدى عند أبوكى ملكيش بيت ؟
-لأ ليا .. بس انت هتغيب شهر
-ولو .. حتى لو هغيب سنه تفضلى اعدده فى البيت ..
-بس انا هستفاد ايه لما اعد فى البيت لوحدى ..
-تستفادى انى عايز كده انا مسمحش مراتى تنتلط فى كل بيت شوية .. اركزى فى بيتك .. يا
اما تروحي تعدى عند امى
قالت "ياسمين" وهى تشعر بالضيق:
-انا مش هرتاح عند طنط .. مش هبقى واخده ارحتى هناك عشان باباك
-خلاص يبقى تعدى فى بيتك واختك وابوكى عايزين ييجى يزوروكى اهل وسهلا لكن انتى
تروحي هناك وانا مسافر لأ
نظر اليها ثم قال:
-سمعتى
شعرت بالغضب لكنها كبحت جماح نفسها وقالت:
-سمعت
-يلا سلام
-مع السلامة
أغلقت الباب وأغمضت عينيها وتنهدت بحسرة ...

مر الشهر عليها ببطء شديد كانت "ريهام" تأتيها يوميا بعدما تنهى كليتها تجلس معها ساعة
أو اثنتين ثم تنصرف لتتركها وحيدة حزينة حبيسه تلك الجدران التى مازالت تراها غريبه عنها

ولا تستطيع أن تألفها وتعتادها .. لا يسليها الا زيارات "سماح" و "ريهام" والتحدث معهما على الهاتف .. في يوم وصول "مصطفى" من السفر اتصل ليخبرها بأنه سيصل في المساء .. فرحت كثيراً لعودته فعلى الأقل ستجد من يونس وحدثها .. أرادت أن تبدأ حياتها كزوجة وأن تستمر في محاولة كسب قلب زوجها كانت تشعر بالكثير من الحماس والتفائل فهي تعلم جيداً أن الزوجة الذكية تستطيع تحويل بيتها الى جنة وتستطيع أن تحصل على كل ما تريد اذا استخدمت ذكائها ووجته بطريقة صحيحة .. كانت والدتها تنصحها دائماً بكيفية العناية بنفسها وبيتها و كيف تكون زوجة ناجحة مطيعة لزوجها وفائزة برضا ربها .. في هذا اليوم استيقظت مبكراً وأعدت ما يحبه "مصطفى" من طعام رتب البيت ونظّمته .. فتحت دولا بها لتختار فسان أحمر من الستان الرقيق وضعته على الفراش وهي تنظر اليه في سرور .. كانت قد أنهت الكثير من الأعمال عندما رن جرس هاتفها في منتصف النهار وجدت رقماً غريباً فردت قائلة:

-السلام عليكم

أتاها صوت أنثوى قائلاً:

-و عليكم السلام

-أيوة .. مين حضرتك

-انا واحدة متعرفيهاش

شعرت "ياسمين" بالدهشة و قالت:

-طيب اسمك ايه ياللى معرفكيش

اتاها الصوت الأنثوى بعد لحظة صمت:

-اسمي "نهلة"

كان "كرم" يشاهد احدى المباريات في منزله عندما رد جرس هاتفه فرد قائلاً:

-ألو

-ألو .. أيوة يا "كرم" ازيك

-مين معايا ؟

-ايه مش عارف صوتي

-لا مش واخد بالي

-أنا "نانسي"

اعتدل "كرم" في جلسته قائلاً :

-أه "نانسي" ازيك

-تمام ازيك انت

-بخير الحمد لله .. خير "عمر" كويس

-معرفش .. أنا مش بكلمك بخصوص "عمر"

-أمال خير في ايه

-بصراحة يا "كرم" أنا عايزة أكمل معاك شوية بس ... مينفعش في التليفون .. لازم أشوفك

صمت "كرم" قليلاً ثم قال:

-أنا في البيت دلوقتي ومش هعرف أنزل .. تحبي تيجي نتكلم براحتنا

-اوك .. اديني العنوان

أعطاه "كرم" العنوان ثم قال:

-أدامك أد ايه ؟

-مش هتأخر ساعة بالكثير

-خلاص مستيكي

-سلام

-سلام

بعد مرور ساعة ونصف طرقت "نانسي" الباب .. ففتح "كرم" ابتسمت له وقالت:

-او عى أكون اضايقت من زيارتى

بادلها "كرم" الابتسامه قالى:

-لا طبعا ده انت نورتييني .. اتفضلى

دخلت "نانسي" وهى تنظر لما حولها قائله:

-بيتك يجنن يا "كرم"

-من ذوقك يا "نانسي" .. تشربي ايه

نظرت الى عينيه وابتسمت قائله:

-اختارلى انت

أحضر "كرم" كوبا من العصير وعاد ليجدها واقفة فى منتصف الردهة تنظر الى احدى

اللوحات قدم لها العصير قائلا:

-اتفضلى

-أخذت الكوب ووضعته على منضده صغير ثم قالت:

"-كرم" أنا فى حاجه عايزة أقولها لك ومش عارفه أبدأ منين

-خير يا "نانسي" قلقتيني

-لا مش حاجه مقلقة

-أمال ايه

اقتربت منه وارتسمت ملامح الحزن على وجهها قائله:

-خايفة تفهمنى غلط

-لا قولى وأنا مش هفهمك غلط

"-كرم" أنا حسه انى مشاعرى اتغيرت ناحيه "عمر" .. حسه انى أصلا عمرى ما حبيته ..

وعمرى ما عرفت أحبه .. لأنه مش الإنسان اللى اتمنيته طول عمرى .. أنا اتمنيت واحد تانى

خالص .. من يوم ما شوفته وأنا عرفت ان هو ده الانسان اللى بتمنى ارتبط بيه

صمتت قليلا ثم اقتربت منه قائله:

-أنا بحبك انت يا "كرم"

ظهرت علامات الدهشة على وجه "كرم" ثم قال:

"-نانسي" انتى مدركه للى بتقوليه

-ايوة يا "كرم" أنا مقدرتش أخبي مشاعرى أكثر من كده ..أنا مبحبش "عمر" .. وبحبك انت

.. وحسه ان انت كمان معجب بيا نظراتك بتقول كده

صمتت قليلا ثم قال:

-منكرش اللى قولتيه بس "عمر" هنعمل معاه ايه

قالت بسرعه:

-مش لازم يعرف بعلاقتنا دلوقتى .. أنا هخترع اى حجه وافسخ خطوبتى .. وبكره "عمر"

ينساني .. وساعتها ترتبط احنا الاتنين

نظرت له قاله بنعومه:

-قولت ايه يا "كرم" .. عايزنى ولا لا ... ؟

الفصل السابع عشر

كانت قد انتهت الكثير من الأعمال عندما رن جرس هاتفها فى منتصف النهار وجدت رقماً غريباً فردت قائله:

-السلام عليكم

أتاها صوت أنثوى قائلا:

-وعليكم السلام

-أيوه .. مين حضرتك

-انا واحدة متعرفيهاش

شعرت "ياسمين" بالدهشة و قالت:

-طيب اسمك ايه يالى معرفكيش

اتاها الصوت الأنثوى بعد لحظة صمت:

-اسمي "نهلة"

ثم ساد الصمت مرة أخرى .. فقطعته "ياسمين" قائله:

-حضرتك تعرفينى ؟ وجبتى رقمى منين ؟

-لا معرفكيش معرفة شخصية .. أما جبت رقمك منين فأنا جبتة من موبايل جوزك

قالت "ياسمين" بدهشة:

"-مصطفى" ؟

-ايوه "مصطفى"

قالت "ياسمين" بنفاذ صبر:

-لو حضرتك ما قولتيش عايزة ايه أنا هقفل

-اللى عايزاه هو انك تعرفى جوزك على حقيقته .. لو قولتلك ان جوزك خانك وبيخونك

تصدقينى ؟

قالت "ياسمين" ببرود وقد شعرت بالخوف يدب فى أوصالها:

-لا طبعاً مش هصدقك .. مع السلام ومنتصليش بيا تانى

انتهت "ياسمين" المكالمة وهى تفكر من هذه الفتاه . وما مصلحتها فى الإيقاع بينها وبين زوجها .. وما هى إلا لحظات حتى رن الهاتف مرة أخرى لكن هذه المرة صوت نغمة الرسائل ..

وجدت رسالة من نفس الرقم فتحتها وهى تشعر بالتوتر وقرأتها:

(كنت متوقعة انك مش هتصدقينى ده ايميل وباسوورد بتاع أكاونت جوزك على الفيس بوك

الدخلى واقرأى رسايل بينه وبين (nona star

ازدادت خفقات قلبها وحاولت تجاهل الرسالة وطرد هذه المحادثة من رأسها .. أكملت عملها

بنصف عقل ..ماذا لو كانت الفتاة صادقة ؟ .. لماذا لا تلقى نظرة لتتأكد مما قالت ؟ بالتأكد هذه

دعابة سخيفة أو شخص حقوقه أراد الوقيعه بينها وبين زوجها ... لا يمكن أن يكون

"مصطفى" بهذه الصورة البشعة ؟ لا يمكن أن تكون هذه هى أخلاق زوجها .. لن تسمح للشك

بأن يدخل قلبها .. حاولت اقناع نفسها بكل ذلك لكن الفضول كان قد تملك منها فتركت المطبخ

مسرعة وتوجهت الى الحاسوب القابع فى أحد أركان غرفة المعيشة ..فتحت المتصفح وأدخلت

الايمل والباسوورد وأغمضت عينيها وهى تقول لنفسها (دى أكيد واحدة كدابة .. أكيد كدابة)

..فتحت عينيها لتصطدم بصورة زوجها مصغرة .. ضغطت على اسمه لتجدها فعلا صورته ..

ارتجف قلبها بشدة تطلعت الى بياناته .. نعم هى بيانات زوجها .. أسرع بالدخول الى الرسائل

والبحت عن الإسم الموجود فى الرسالة بأصابع مرتجفة .. جحظت عيناها من هول ما رأت ..

وضعت كفها على فمها وكأنها تكتم صرخة كادت أن تخرج من أعماق قلبها المطعون ..جالت

بعينيها فى الحوار الذى أقل ما يوصف به هو البذاءه .. كانت تنظر الى الحوار ثم تلقى بنظرها

الى التاريخ .. أدركت أن هذه الفتاة ليست مجرد ماضى فى حياة زوجها بل موجودة فى حاضره أيضاً فتاريخ آخر محادثة بينهما قبل يومين فقط .. يتواعدان باللقاء فى مكانهما المعتاد .. !!لم تشعر إلا بالدموع وهى تنساب ساخنة على وجنتيها فى صمت .. شعرت بالغثيان فأغلقت الشاشة بسرعة فلم تعتاد مثل هذه البذاءات .. دخلت الحمام مسرعة لتريح معدتها التى تقلبت عليها بشدة .. نظرت الى وجهها فى مرآة الحمام فترة طويلة مصدومة مطعونة مجروحة .. غسلت وجهها وأسرعت الى غرفة النوم ارتدت ملابسها وأخذت حقيبتها وهاتفها وأسرعت بمغادرة البيت.

((فلاش باك قبل ساعتين من الآن))

"-نانسي" انتى مدركة للى بتقوليه
-ايوة يا "كرم" أنا مقدرتش أخبي مشاعرى أكثر من كده .. أنا מבحبش "عمر" .. وبحبك انت
.. وحسه ان انت كمان معجب بيا نظراتك بتقول كده
صممت قليلا ثم قال:
-منكرش اللى قولتية بس "عمر" هنعمل معاه ايه
قالت بسرعه:
-مش لازم يعرف بعلاقتنا دلوقتى .. أنا هخترع اى حجه وافسخ خطوبتى .. وبكره "عمر"
ينساني .. وساعتها نرتبط احنا الاتنين
نظرت له قاله بنعومه:
-قولت ايه يا "كرم" .. عايزنى ولا لأ ؟

صمت "كرم" وصممت "نانسي" منتظره جوابه ... عندها جحظت عيناها بشدة وهى تنظر الى نقطة ما خلف "كرم" التفت "كرم" ليلقى نظره على صديقه ثم ينظر الى "نانسي" مرة أخرى قائلاً بصراحة:
-متخلقتش البنث اللى تخلىنى أخون أخويا وصاحبى عشانها .. ده ردى يا "نانسي"

قال ذلك ثم حمل معطفه وفتح باب البيت وخرج ...ران الصمت طويلا .. كانت "نانسي" فى موقف لا تحسد عليه حاولت تشغيل عقلها لتبحث عن مخرج لهذا المأذق ..تقدم "عمر" منها ووقف أمامها وترك مسافة بينهما ونظر اليها قائلاً:
-على فكرة أنا ايدى ان شاء الله هترجع طبيعیه تانى .. مش هتشل زى ما قولتلك
نظرت اليه بدهشة فأكمل قائلاً:
-والمزرعة الحمد لله بفضل الله ثم "أيمن" قدرنا ننقذ جزء كبير جدا من المحصول والطلبية هتتسلم فى معادها وبالجودة اللى اتفقنا عليها كمان
ازدادت دهشتها فعقد لسانها ولم تستطيع التفوه ببنت شفه .. فأكمل "عمر" بشراسه هو يرمقها بنظرات نارية:

-ده كله كان اختبار ليكي .. ومش بس فشلتى فى الاختبار .. انتى فشلتى وبجداره انك تكونى انسانه محترمة .. أقصى حاجه توقعتها هو انك تسبيني و تفسخى الخطوبة أو تماطلى فى الجواز أو تقبلى وانتي غاصبه على نفسك ومضطره .. لكن مكنتش متخيل أبداً انك بالقذاره دى .. بس دى مش غلطتك دى غلطتى أنا لأنى كنت أعمى البصر والبصيرة لما اخترت واحدة زيك .. انتى كبيرك أوى يا "نانسي" تتصاحبى أو يتخرج معاكى أو تتحبيلك يومين لكن جواز لأ ملكيش فيه .. لو أطول أرجع الفترة اللى فاتت وأشيل صورتك واسمك من حياتى كنت عملت

كدة ..بس للأسف مش هقدر ومضطر انى أتحمل انك تكونى ذكريات سيئة فى حياتى ..انا
عرفت بديون والدك وعرفت واتأكدت ان كل اللي جذبك ليا هو انى غني وهنقدك انتى وعيلتك
المحترمة من اللى انتوا فيه .. يعنى كنتى مستعدة تتجوزى واحد لا بتحبيه ولا عايزاه .. بس
عشان فلوسه .. عارفه بنات الليل اللى بيبعوا نفسهم عشان الفلوس انتى فى نظرى زيهم
بالظبط متفرقيش حاجه عنهم .. او عى تكونى فاكرة انى حبيتك .. لأ .. أنا حبيت صورة نضيفه
فى خيالى فضلت معايا طول عمرى للبنات اللى أحب أرتبط بيها وحاولت انى أخليكي زيه بس
كان لازم أفهم من الأول انى هفشل .. لأن مستحيل الوردة اللى مرميه على الأرض واللى
بيدوس عليها الناس برجليهم أقدر أنصفها وأخليها ترجع تانى ورده جميلة الناس تحب
تشتريها ..

خلع دبلته وألقى بها على الأرض أمام قدميه ثم قال:
-ده مقامك .. يلا اتفضلى ومش عايز أشوف وشك تانى فى أى مكان .. ولو حاولتى تتصلى بيا
أو تتكلمى معايا هخليكي بجد تندمى على اليوم اللى عرفتيني فيه.

كانت "نانسى" تشعر بذل ومهانته لم تعتدهما من قبل .. أطرقت برأسها وتوجهت الى الباب
فتحه ثم خرجت ..مرت على "كرم" الذى كان ينتظر فى الردهة أمام باب الشقة فنظر اليها
نظرة احتقار ثم تركها ودخل الى بيته .. أقبل على صديقه وربت على كتفه قانلا:
-انت كويس يا "عمر"

نظر اليه "عمر" وقال بهدوء:

-ايوة كويس ما تقلقش

-دى واحدة بنت تيبيبيبيبيبىيت او عى تزعل عليها

-لأ أنا مش زعلان عليها أنا زعلان انى كنت غبي للدرجة دى

-هون على نفسك محدش بيتعلم ببلاش .. المهم انك خلصت منها قبل ما تتجوزوا والفاش تقع
فى الراس

-حتى لو كنت اتجوزتها واكتشفت حقيقتها كنت هطلقها فوراً .. أنا مستحيل أعيش مع واحدة
زى دى

-خلاص انسى ومش عايزين نتكلم عنها تانى .. متستهلش أصلاً اننا نجيب فى سيرتها .. ويلا
عشان عازمك على أحلى أكلة سمك وجمبرى ولو قولتلى ملكش نفس هاخذك معايا غصب عنك
ابتسم له "عمر" قانلا:

-بتهرج .. سمك وجمبرى وأقولك مليش نفس .. ليه هوأنا عبيط

ابتسم "كرم" وجذب صديقه من ذراعه وتوجه الى الباب قانلا:

-قولتلك من الأول بلا جواز بلا قرف مصدقتيش .. أهو هما الستات كدة مبيجيش من وراهم
غير وجع الدماغ

فتحت "ياسمين" باب بيت والدها بمفتاحها ودلفت الى الداخل هب والدها و"ريهام" واقفان
وينظران اليها فى لوعه .. قال والدها:

-خير يا بنتى مالك فى ايه

جلست "ياسمين" على أول مقعد وجدته وانخرطت فى بكاء هستيري .. أسرعت "ريهام"
باحضار كوب من الماء لها وقالت لها:

-حبيبتي اهدى اشربي ده واهدى

أمسكت "ياسمين" الكوب بأصابع مرتجفة ورشفت منه رشفه واحدة وأبعدته عنها ..وقف
والدها أمامها ووضع يده على رأسها يقرأ آيات من كتاب الله ..بعدها هدأت حدة بكانها قال بقلق

:
-خير يا بنتى ايه اللي حصل احكيلى
قصت عليه "ياسمين" كل ما حدث .. ران صمت طويل ثم قال:
-لا حول ولا قوة الا بالله
رفعت " ياسمين " نظرها الى والدها وقالت بصوت مرتجف:
-بابا أنا عايزة أطلق
نظر اليها " عبد الحميد " ثم هتف قائلاً:
-معندناش حاجة اسمها طلاق انتى عايزه تفضحيننا
وقفت "ياسمين" فى مواجهته وهتفت باكية:
-أنا مستحيل أقدر أعيش مع واحد زانى زى ده .. دى مش بس علاقة قديمة لأ ده خنى يا بابا
وأنا لسه عروسة
-مينفعش اللي بتقوليه ده الناس تقول ايه لما يلاقوكى اطلقتى وانتى مكملتيش شهر جواز
هتفت فى غضب:
-يقولوا اللي يقولوه أنا مش هسامح حد يتكلم عنى ربع كلمة وهقتص منهم يوم القيامة .. لكن
أنا مستحيل أعيش مع راجل حقير زى ده بس عشان خايفة من الناس
هتف " عبد الحميد " فى غضب:
-قولتلك مفيش حاجة اسمها طلاق .. الموضوع هيتحل ان شاء الله
-هيتحل ازاي يا بابا بقولك جوز بنتك زانى وخاين ومبيراعيش حرمان ربنا ازاي أمن على
نفسى معاه
-هتصل بيه واجيبه هنا وأخليه يوعدى ان اللي حصل ميتكرررش تانى
استجدته قائله وهى تبكى:
-بابا ارجوك أنا مش عايزة أرجعله تانى .. أرجوك يا بابا متعملش فيا كدة .. مش هقدر أعيش
معاه أبدا
صاح فى غضب:
-قولتلك انسى موضوع الطلاق
ذهب الى غرفته وأحضر هاتفه واتصل على "مصطفى":
-ألو ازيك يا عمى
-أيوة يا مصطفى منتظرك فى البيت تعالالى
-خير يا عمى فى حاجه" .. ياسمين " كويسة
-أما تيجي هتعرف ..أدامك أد ايه
-نص ساعة وأوصل القاهرة
-خلاص مستنيك
-سلام
جلست "ريهام" بجوار أختها وأخذتها فى حضنها .. دخل والدها الى غرفته وتركها .. هبت
واقفة فجأة وأحضرت هاتفها واتصلت ..سألتها أختها:
-هتكلمى مين .. "مصطفى" ؟
دخلت "ياسمين" الى حجرتها القديمة وأغلقت الباب ..رد الطرف الآخر:
-ألو
-السلام عليكم ازيك يا ماما
-وعليكم السلام
قصت "ياسمين" على والدة "مصطفى" ما حدث بالتفصيل ثم قالت:
-يرضيكى يا ماما اللي حصل من "مصطفى" ده
قالت أمه فى غضب:

-ايه اللي انتى بتقوليه ده .. أنا ابنى "مصطفى" متربى أحسن تربيته
-بقول لحضرتك شوفت كلامهم مع بعض بعيني كل حاجة كانت واضحة أنهم اتقابلوا من يومين
وكلامهم مع بعض كان بطريقة بشعه جدا مش طريقة واحد محترم أبدا
صاحت أمه قائله:

-لا بقولك ايه .. احترمي نفسك والزمى حدودك ابنى متربي ومحترم غصب عنك وعن أهلك ..
وحتى لو كان عمل كدة فيها ايه راجل وغلط ومحدث معصوم من الغلط .. وبعدين ما انتى
السبب .. لو كنتى بنت عدله زى بقيت البنات مكنتيش خليتى جوزك يبص لبره .. انتى اللي
معرفتيش تملى عين ابنى ..امشي ارجعى بيتك قبل ما جوزك يوصل .. وحسك عينك تخرجى
من البيت بعد كدة الا بإذنه انتى فاهمة ولا لأ
كظمت "ياسمين" غيظها لأنها مهما كانت فهى سيدة كبيرة فى السن وقالت:
-مع السلامة يا ماما مضطرة أقفل دلوقتى
أنهت المكالمة وبكت فى أسى

جلس الصديقان فى انتظار احضار الطعام عندما رن هاتف "عمر" فرد قائلاً:
-ألو .. حماتك بتحبك
ضحك "أيمن" قائلاً:
-عارف .. بس ليه
-عشان احنا دلوقتى أعدين منتظرين أكلة سمك وجمبرى انما ايه فى الجوون
-من غيري يا أندال
-أما تيجي القاهرة نبقي نطلع تانى سوا
-أنا فى القاهرة .. قولى انتوا فين .. ولو حد مد ايده على الأكل قبل ما أجي هحط السيخ
المحمى فى صرصور ودنه
ضحك "عمر" قائلاً:
-طيب هنستناك

بعد ساعة ونصف حضر "مصطفى" الى بيت والدها تركتهم "ياسمين" يتحدثون معا ودخلت
هى و "ريهام" غرفتهما .. ووقت "ياسمين" خلف الباب تستمع الى الحوار ..دار الحوار فى
اتجاه لم ترضاه أبداً .. عاهد "مصطفى" والدها بأنها غلطة ولن تتكرر أبداً وطلب منه أن
يسامحه على ما بدر من فى حق ابنته .. أغلظ عليه والدها فى القول ثم لان بعد ذلك لكى يتم حل
الموضوع واحتواء المشكلة ..قام "عبد الحميد" ودخل الحجرة وطلب من "ياسمين" أن تعود
مع زوجها الى بيته .. قبلت "ياسمين" يده وقالت له باكيه:
-أرجوك يا بابا مش عايزاه مش عايزه أرجع معاه البيت
-انتى تسمعى اللي أقولك عليه .. خلاص هو اعتذر ومش هيحصل منه حاجة تضايقك تانى هو
وعدى

-بس أنا مش ممكن أسامحه ..أنا بحتقره أوى ..أوى
-هى كلمة واحدة اخرجى يلا عشان تروحي مع جوزك
امتثلت "ياسمين" مرغمة لكلام والدها .. وقال لها أمام "مصطفى": "

قالت "ياسمين" وسط بكائها:

-حسبي الله ونعم الوكيل فيك .. ربنا ينتقم منك .. انت فاهم الرجولة غلط .. ربنا ينتقم منك
توقف عن ضربها وجذبها اليه قائلا:

-طيب تعالى بأه أفهمك الرجولة صح

نظرت اليه "ياسمين" برعب وكادت أن تسقط مغشياً عليها .. اغمضت عينيها بشدة وناجت
ربها بدعاء سيدنا يونس عليه السلام وهو فى بطن الحوت والذى ما دعا به مكروب قط إلا
فرج الله كربته) .. لا إله إلا أنت سبحانك إني كنت من الظالمين ()
أخذت ترددها بلسانها وقلبيها وعقلها وبكل جوارها ... وفجأة رن جرس الباب وسمعا طرقات
عالية على الباب حتى كاد أن يتهشم .. سب "مصطفى" ثم توجه الى الباب ففتحه ليجد رجل
فى وجهه فقال ليه بحده :

-ايوة أفندم

-أنا جارك اللى ساكن أدامك سمعنا صوت صريخ جاى من عندكوا
انفعل "مصطفى" قائلا:

-وانت مالك انت .. مفيش حاجه اتفضل

عندها هبت "ياسمين" واقفة متحملة الألم الذى ينغز فى كل أنحاء جسدها الرقيق ارتدت
عباءه تستر بها نفسها وارتدت حجابها بسرعة وخرجت الى الصالة وبمجرد أن وقعت عينا
الرجل على وجهها الدامى وعيونها الباكية حتى هتف قائلا:

-لا حول ولا قوة الا بالله انت عملت فيها ايه

هتف "مصطفى" فى غضب:

-وانت مال أهلك انت .. مراتى وأنا حر فيها .. يلا امشي من هنا

قالت "ياسمين" للرجل باكيه:

-أرجوك مشيني من هنا .. أنا عايزة أروح لأهلى .. لو فضلت هنا هيموتنى

صرخ "مصطفى" فيها قائلا:

-امشي ادخلي جوه

نظرت الى الرجل مستجديه اياه ودموعها تختلط بالدماء على وجهها:

-أرجوك امسكه لحد ما أمشي .. أنا عايزه أروح لأهلى

اشتعل غضب الرجل وأمسك "مصطفى" وطوقه بذراعيه قائلا لـ "ياسمين": "

-امشي بسرعة .. وروحي على أى مستشفى اعلمي تقرير طبي باللى حصلك

التفت اليه "مصطفى" ليتعارك معه لكن الرجل كان قوى البنية فلم يستطع تخلص نفسه من

قبضة ذراعيه .. أسرعت "ياسمين" بهبوط الدرج متحملة ما بها من الألم ..سمعت الرجلين

يتعاركان معا فأسرعت الخطى ووجدت سيارة أجرة أمام البيت ..يهم بالانصراف فنادته وركبت

بسرعة وهى ترتجف .. نظر الرجل اليها فى لوعه قائلا:

-لا حول ولا قوة الا بالله ايه اللى عمل فيكي كدة يا بنتى

قالت بصوت مبجوح من شدة الصراخ و البكاء:

-لو سمحت وديني على أى مستشفى

انطلق الرجل فى طريقه وهو يرمقها فى المرأة بنظرات التعاطف والأسى ..وصلت "ياسمين"

الى المستشفى ونزلت من السيارة بصعوبة شديدة .. بعد الفحص أخذت تقريراً مفصلاً

بالإصابات التى لحقت بها .. وأسرعت بإيقاف سيارة أجرة وتوجهت من فورها الى قسم

الشرطة لكى تثبت واقعة الاعتداء بالضرب .. نظر الضابط الى وجهها والإصابات التى لحقت به

وطلب منها الجلوس ..جلست وعلامات الألم مرسومة على وجهها وقالت بصوت مبجوح:

:

-لو سمحت عايزة أقدم شكوى

-فى مين ؟

-جوزى
-هو اللى ضربك كده
بكت فى صمت وأطرقت برأسها قائله:
-أيوة

وأخرجت التقرير الطبي وأعطته له ..استمع الضابط لشكواها وكتب محضراً بالواقعة وأعطها رقم المحضر ونصحها بالبحث عن محامى جيد فى حال ما اذا أرادت رفع قضية بالخلع .. وكان هذا هو ما تنويه "ياسمين" بالفعل .. لن تعود الى هذا الكائن المنعدم الرجوله مرة أخرى .. خرجت من قسم الشرطة لا تدري أين تذهب .. أتذهب الى والدها ؟ .. فكرت كثيرا وخافت أن يجبرها والدها على العودة الى زوجها مرة أخرى .. فتجهت الى أقرب صديقه اليها .. "سماح"

شعرت "سماح" بالصدمة عندما فتحت الباب ورأت صديقتها بهذا الشكل وهتفت قائله:
" -ياسمين" مالك فى ايه .. مين عمل فيكي كده ؟
كانت "ياسمين" لا تجد فى نفسها القدرة على الحديث ولا على الوقوف .. ساعدتها "سماح" وأخذتها الى غرفتها .. أقبلت والدة سماح وتفحصت جروحها وندوبها وكدماتها وجلست تستمعان لما ترويه عليهما وملاحح الأسى والألم تعلقو وجهيهما .. ذهت والدة "سماح" لتعد شئ ساخن ليهدئ أعصابها وأعطته لها بعدما دخلت فى الفراش ودثرتها "سماح" بالغطاء وجلست بجوارها ترمقها بنظرات التعاطف والشفقة وعينيها تمتلان بالدموع .. تركت "ياسمين" الكوب من يدها على الكودينوا وقالت ل "سماح":
-أنا عايزة أتوضا يا "سماح" عايزة أصلى
-العشا ؟

-لأ صليت العشا .. بس حسه انى عايزة أصلى
-طيب يا حبيبتي ارتاحى دلوقتى
قالت وهى على وشك البكاء :
-لأ عايزة أصلى .. حسه انى مخنوقة ومش قادرة آخذ نفسى .. الصلاة هتريحنى ساعدتها لتنهض وتتوضأ ثم عادت وجلست على الفراش فلن تتمكن أبداً من الصلاة واقفة تركتها "سماح" وخرجت وأغلقت الباب .. كانت تاتى بوضع السجود الصحيح فتضع جبهتها على الأرض وتتضرع الى الله باكياً أن يفرج كربها ويخرجها مما هى فيه .. دخلت عليها "سماح" بعد فترة لتجدها جالسه فى وسط الفراش ومدثره بالغطاء اقتربت منها وجلست بجوارها وقالت:

-مش هتظمنى باباكي عليكى يا "ياسمين" .. زمانه قلقان دلوقتى .. و "ريهام" كمان
-كلميهم انتى يا "سماح" أنا مش قادرة أتكلم مع حد
مسحت "سماح" بكفها على كف "ياسمين" وقالت:
-ماشى يا حبيبتي هكلمهم أنا وأظمنهم عليكى
قالت "ياسمين" فى أسف:
-أنا اسفه يا "سماح" بس ملقتش مكان تانى أروحه .. وخفت أرجع البيت بابا يصرا انه يرجعنى له تانى
-انتى بتقولى ايه .. بطلى كلام عبيط .. انتى عارفه اننا اكثر من الاخوات
-ربنا يخليكى يا "سماح" .. وعشان كدة هطلب منك طلب .. أنا عايزاكى تشوفيلى رقم محامى
كويس
-انتى ناويه ترفعى قضيه ؟

-أيوة مش ممكن أعيش معاه لحظة واحدة بعد كدة .. وأنا واثقه انه مش هيرضى يطلقنى
-طيب يا حبيبتي حاضر .. لو كان بابا هنا كنت سألته بس هو مسافر بره وزمانه نايم دلوقتى
عشان فرق التوقيت هكلمه بكرة ان شاء الله وكمان هخلى ماما تكلم "أيمن" وتسأله على
محامى كويس
نظرت اليها "ياسمين" برجاء:
" -سماح" أرجوكى خليها تكلمه دلوقتى أنا عايزة رقم المحامى دلوقتى ..أنا خايفه أوى .. أنا
عايزة أبتدى القضية فى اقرب وقت
امتثلت "سماح" لطلب صديقتها التي كانت فى حاله يرثى لها .. قالت لها:
-طيب يا حبيبتي متقلقيش هخلى ماما تكلمه دلوقتى
-تسلمي يا "سماح"

رن جرس هاتف "أيمن" فنهض واستأذن من صديقيه قائلاً:
-ثوانى وراجع
وقف خارج المطعم يتحدث مع والدته "سماح" .. وبعد فترة رجع الى صديقيه وسألها قائلاً:
-متعرفوش محامى كويس ؟ .. كان فى محامى كويس فى الشركة عندكوا اسمه ايه ؟
رد "عمر" قائلاً:
-أستاذ شوقى ؟
-آه أستاذ شوقى .. ياريت تديني رقمه يا "عمر"
-خير يا "أيمن" لو فى مشكله قولى وأنا أحاول أحلها
-لأدى مش مشكلتى أنا دى مشكلة "ياسمين"
قال "عمر" باستغراب:
" -ياسمين" مين ؟
تنهد "أيمن" قائلاً:
-دى أقرب صديقه لـ "سماح" .. تصور جوزها الحيوان خانها بعد شهر واحد جواز ومش
بس كده ضربها وبهدلها
قال "كرم":
-لا حول ولا قوة الا بالله .. ده ايه البنى آدم الزباله ده
قطب "عمر" جبينه قائلاً:
-وهى عايزه المحامى ليه ؟
-هترفع قضيه خلع
-هو مش عايز يطلقها ؟
-معرفش بس أكيد مش راضى وعشان كده هترفع القضية
أسرع "عمر" بإخراج هاتفه وأعطى صديقه رقم المحامى قائلاً:
-خليها تظمن أستاذ "شوقى" محامى ممتاز لو مكنتش كدة مكناش عيناه فى الشركة عندنا هو
اللى ماسك كل المسائل القانونية فى الشركة
أطرق قليلاً ثم استطرده قائلاً:
-ان شاء الله تخلص منه بسرعة
قال "أيمن" وهو يرسل رسالة بالرقم:
-يارب

اتصلت "سماح" بـ "ريهام" وقصت عليها ما حدث لأختها فأسرعت بالذهاب الى بيت
"سماح" مع أبيها ويمجرد أن خرجت لوالدها بهذا الشكل انفجر باكيتها وضمها الى صدره قائلاً

:
-سامحيني يا بنتى .. سا محيني أنا اللي جنيت عليكى
قالت "ياسمين" والدموع تغرق وجهها:
-مش عايزه ارجعله تانى يا بابا .. ارجوك .. مترجعنيش ليه تانى
نظر اليها والدها قانلا بحزم شديد :
-متخافيش مش هيطول ضفرك بعد كده
ثم عانقها مرة أخرى وأخذ يقبل رأسها وهو يشعر بمزيج من الألم والندم.

الفصل الثامن عشر

اجتمعت "ياسمين" ووالدها مع المحامي الأستاذ "شوقي" فى مكتبه لبحث تفاصيل القضية ..
فقال المحامى مطمئناً اياها:
-متقلقيش يا مدام "ياسمين" .. أحسن حاجة عملتها هو التقرير الطبي والمحضر الللى اتعمل
فى نفس اليوم الللى حصلت فيه واقعة الضرب
قالت "ياسمين" والأمل يدب فى أوصالها:
-يعني يا أستاذ "شوقي" القاضى هيحكملى بالخلع؟
-أبوة ان شاء الله أنا متفائل ده طلاق للضرر ولإستحالة العشرة بينهم

قال والد "ياسمين" يشكره:
-ربنا يباركلك ويجزيك عنا خير
ثم أردف المحامى قالاً:
-لازم تعرفى يا مدام "ياسمين" انك هتتنازلى عن جميع حقوقك المالية والشرعية وهي مؤخر
الصداق ونفقة العدة ونفقة المتعة إضافة إلى رذك مقدم الصداق الللى أخذتیه من الزوج
أسرعت "ياسمين" قائله:
-مفيش أى مشكلة هتنازله على كل حاجة المهم أطلق منه
-تمام كده يبقى على بركة الله هنبندى فى اجراءات القضية من النهاردة ان شاء الله
-ان شاء الله .. بس ممكن أعرف هو الموضوع ده هياخد وقت أد ايه ؟
-على حسب القاضى الللى هيحكم وعلى حسب القضية نفسها بس متخفيش ان شاء الله تخلص
من أول جلسه
-يارب ان شاء الله

خرجت "باسمين" بعدما طمأنها المحامى بأن القانون والشرع فى صفها ان شاء الله

-ماما , بابا .. أنا عايز أعرفكوا ان الفترة الجايه أنا حابب أكون فى المزرعة
نطق "عمر" بهذه العبارة ووجها لوالديه وهم يجلسون معاً فى حديقة الفيلا يحتسون أقداحاً
من الشاي .. قالت والدته:
-خير حصل حاجة تانى يا "عمر" .. مش خلاص مشكلة المحصول انتهت
-أبوة انتهت الحمد لله .. بس بصراحه حابب أغير جو حاسس انى مخنوق شوية .. ومحتاج
فترة نقاهه
نظرت "كريمة" الى ابنها بأسى قائله:
-موضوع "نانسى" برده
-لا يا ماما أنا خلاص شلتها من تفكيرى تماما .. بس محتاج فعلا أعد فترة فى المزرعة .. انتى
عارفه انى برتاح جدا هناك .. ده أكثر مكان بحس فيه انى مرتاح ومفصول عن الدنيا ومشاكلها
سأله والده قائلاً:
-وشغلك الللى هنا
-البركة فى حضرتك وفى "كرم" وباقى أعضاء مجلس الادارة وكمان أنا هتابع الشركة من
هناك باستمرار
-خلاص الللى تشوفه يا ابنى
قالت "كريمة" بقلق:

-طيب ودراعك

رفع "عمر" ذراعه الموضوع فى الجبيره قانلا:

-ماله دراعي لسه معاد فك الجبس مجاش وعامة فى دكاترة هناك كويسين جدا

-خلاص ماشي بس ابقى طمنا عليك باستمرار

ابتسم قانلا:

-أكد طبعاً .. وانتوا لو حبيتوا تغيروا جو أنا مستنيكوا

قالت "كريمة" بمرح:

-أكد طبعاً يا باشمهندس هو انت فاكرنى هقدر أبعد عنك وأسيبك هناك لوحدهك ولا ايه .. شوية

كدة وهتلاقيني طابه عليك

-خلاص وأنا فى انتظارك

-هكلمك "عويس" يخلى "صفية" تنصف البيت عشان متروحش تلاقيه مترب زى المرة

اللى فاتت

رن جرس هاتف "عمر" فرد قانلاً:

-ألو .. ازيك يا "أيمن"

-تمام الحمد لله ازيك انت يا "عمر"

-بخير الحمد لله

-بص بأه أنا بتصل بيبك عشان أعزمك على فرحي لاننا خلاص حددنا المعاد

ضحك "عمر" قانلاً:

-بتهرج .. أخيراً

-محسنى انى كنت قاعد على قلبك

-لا مش قصدى .. أنا أقصد ان واحد من شلتنا المنحوسه دى اتفك نحسه وخلاص هيتجوز

-آه يا سيدى عقابلك انت و المنحوس التانى "كرم" ان شاء الله

-يدينا ويديك طولة العمر يا "أيمن"

-ليه ناوى تتجوز فى الخمسين ولا ايه

-لا أبوس ايدك متكلمنيش دلوقتى فى الجواز أنا مقفول منه أفله طين

-بكرة أفرح فيك وانت واقع لشوشتك انت و "كرم"

ابتسم "عمر" قانلاً:

-لا أنا مش متفانل زيك .. بس سيبك منى قولى امتى الفرحة

-حجزنا خلاص القاعة وان شاء الله الفرحة بعد عشر أيام

-بجد ألف ألف مبروك فرحتيني جدا .. وأنا اللى كنت ناوى أجيلك على المزرعة من بكرة ..

خلاص هأجلها ان شاء الله

-آه أبوس ايدك أنا لوحدى وملبوخ آخر لبخة..

-شقتك فى المنصورة مش كدة

-ايوة وخلاص ظبطت الدنيا هناك باقى بس وضوح الفرحة اللى مش عارف فيه راسي من

رجلى

-لا تقلقش أنا و "كرم" معاك ان شاء الله

-تسلم يا "عمر" وده برده العشم .. آه على فكرة كتب الكتاب هيكون كمان 3 أيام ان شاء الله

-مش هتكتبوه يوم الفرحة

-لا هنكتبه بعد 3 أيام يعني قبل الفرحة بأسبوع

-طيب تمام على خيرة الله .. شوف هتيجي القاهرة امتى عشان ننزل نظبطلك البادله وموضوع

المأدون

-ان شاء الله بكرة هكون فى القاهرة

-خلاص فى انتظارك ان شاء الله

-سلام

-سلام

ابتسمت والدة "عمر" قائله:

"-أيمن" خلاص هيتجوز

-أيوة كتب كتابه بعد 3 أيام وفرحه كمان 10 أيام ان شاء الله

-ربنا يتمله على خير الواد ده ابن حلال ويستاهل كل خير

ثم نظرت لـ "عمر" نظره ذات معنى قائله:

-عقبال اللي في بالي

تجاهل "عمر" ما قالت واشاح بوجهه وشرد قليلا .. أخذ يفكر هل من الممكن أن يثق في فتاة

مرة أخرى ؟ هل من الممكن أن يسمح لنفسه بأن يقع فريسة لعواطفه مرة أخرى ؟ هل من

الممكن أن يجد الفتاة التي تراوده في أحلامه ؟ .. لكن ظلت هذه الأسئلة في رأسه بلا اجابه

كانت "ياسمين" جالسه في مكتب المحامى مع والدها عندما هتفت قائله:

-ازاى يعني ؟

قال المحامى:

-زى ما بقول لحضرتك .. "مصطفى" طلبك في بيت الطاعة وطلب من المحكمة انذار للطاعة

واتهمك بالنشوز

وقع قلب "ياسمين" في قدمها .. وابتلعت ريقها بصعوبة قائله:

-طيب ودلوقتي ايه اللي هيحصل .. هيرجعونى له غضب عنى

ابتسم المحامى قائلاً:

-لا متقلقيش .. الحمد لله انك كنتى أسرع منه بخطوة

-يعني ايه

-يعني طلب الخلع والطلاق للضرر اللي قدمتيه .. أوقف طلبه ليكي في بيت الطاعة لأنك بتدعى

استحالة العشرة بينكوا فالقاضى وقف القضية التانيه واللى رفعها زوجك لحين البت في قضيتك

انتى .. فهمتيني يا مدام "ياسمين"

تنهدت "ياسمين" فى ارتياح قائله:

-أيوة فهمت حضرتك .. يعني ميقدرش يقدم الطلب ده الا بعد ما القضية اللي أنا رفعهاا يتحكم

فيها

ابتسم قائلاً:

-بالظبط كده

-الحمد لله .. طيب وهنعمل ايه دلوقتي

-عايزك تكونى مستعدة للمثول أمام القاضى وتقديم شكاوى .. وخلي بالك ان ممكن

"مصطفى" يتبلى عليكى ويتكلم أى كلام أدام القاضى عشان ينفى اساءته ليكي فعائزك تكونى

مستعدة لأى كلام هتسمعيه وتكونى قوية فى الرد على كل اتهاماته

-اتهامات زى ايه مثلا ؟

-للأسف كثير من الأزواج معدومى الضمير بيلجأوا للكذب عشان القاضى ميحكمش بالخلع

ممكن مثلا يتهمك فى عرضك مثلا .. أو انك تعرفى حد تانى وده سبب طلبك للطلاق .. أو..

قاطعته "ياسمين" بسرعه:

-لا ميقدرش

سألها مستفهما:

-ليه ميقدرش

أطرقت "ياسمين" برأسها فى خجل قائله:

-عشان أنا فى حكم المكتوب كتابها

صمت لحظات ثم استوعب ما قالت واتسعت ابتسامته قائلا:

-كويس أوى كده يبقى مفيش أدامه أى فرصة للكذب أو الادعاء عليكى بإدعاءات باطله

-الحمد لله .. بجد طمنتنى يا أستاذ "شوقى"

-أيوة أنا عايزك كدة مطمئة وواقفه من نفسك خاصة وانتى بتتكلّمى أدام القاضى .. وكمان

عشان أظمنك زيادة جاركوا اللى شاف اللى حصل واللى أنقذك من زوجك

قالت بلهفه:

-ماله ؟

-ان شاء الله وعدنى انه هيشهد معانا فى القضية يعني مفيش فرصة أبدا أدام "مصطفى"

للكذب أو انه يقول انك وقعتى على السلم مثلا وده اللى سبب اصابتك .. لأن معانا شاهد فى

القضية

تنفست "ياسمين" الصعداء مرده:

-الحمد لله .. اللهم لك الحمد

خرجت هذه المرة من مكتب المحامى وقلبا يقفز فرحاً .. أخيراً ستتخلص من ذلك المدعو

زوجها .. نظرت الى يدها واللى احتوت دبلة زواجها وأخرجتها وظلت تنظر الى يدها الفارغة

والابتسامه تعلق شفتيها ثم وضعت الدبلة فى جيبها وانطلقت عائدة الى بيت والدها .. بيتها..

جلست "ياسمين" مع "سماح" فى غرفة هذه الأخيره .. وقالت "ياسمين": "

-شوفتى يا "سماح" كان عايز يطلبنى فى بيت الطاعة .. يعنى مش مكفيه اللى عمله فى .. لأ

وكمان عايزنى أعيش معاه غصب عنه

قالت "سماح" بقرف:

-أعوذ بالله .. هو فى رجاله كده .. عايزك ازاي تعيشي معاه غصب عنك ازاي هيكون بينكوا

حياة طبيعية وانتي مش طيقاه

-هو مش همه ان يكون فى حياة طبيعية بينا .. هو همه بس انه يذلى ويجيب مناخيري

الأرض

ثم قالت بأسى:

-أنا مش عارفه أنا عملت فيه ايه عشان يعمل فى كده .. مشفش منى حاجه وحشه

عانقتها صديقتها قائله:

-بكرة تخلصى منه خالص وتنسى انه دخل حياتك أصلا

ثم نظرت اليها قائله وهى تبتسم:

-بس أهم حاجه انك لسه زى ما انتى شكل ده اللى مجننه

ضحكت "ياسمين" قائله:

-وده اللى مصبرنى ومخلينى لسه محتفظه بشوية عقل فى راسى والا كان زمانى اتجننت

صمتت قليلا ثم قالت:

-فعلا وعسى أن تكرر هوا شينا وهو خير لكم .. تعرفى ان حادثة العربية هى السبب

قالت "سماح" بإستغراب:

-الحادثة اللى حصلتلك قبل فرحك

-أيوة .. لولا الحادثة كان الفرح تم فى معاده .. عارفه أنا دلوقتى مستشعره قول النبي صلى

الله عليه وسلم (عجبا لأمر المؤمن إن أمره كله خير وليس ذاك لأحد إلا للمؤمن ، إن أصابته

سراء شكر فكان خيرا له وإن أصابته ضراء صبر فكان خيرا له)

-فعلا سبحان الله
-وعشان كده أنا حسه انى مطمئنه ومش قلقانه وعارفه ان آخره المشاكل دى كلها أكيد ربنا هيعوضنى .. مش ربنا بيقول "وَبَشِّرِ الصَّابِرِينَ" أنا مستبشره خير ابتمت لها "سماح" قائله:
-وأنا كمان مستبشره خير ان شاء الله ..
قالت "سماح" بجديه:
-اسمعى بأه مش عايزين نجيب سيرة اللى اسمه "مصطفى" ده تانى أنا لما بسمع اسمه بيركبنى مليون عفريت
قال لها "ياسمين" بخبث:
-طيب واسم "أيمن"
ابتسمت قائله:
" -أيمن" .. هو فى زى "أيمن" وطيبة "أيمن" وحنية "أيمن" وخفة دم "أيمن" ضحكت "ياسمين" قائله:
-حيلك حيلك نحن هنا
-بجد يا "ياسمين" أنا حسه ان هو ده الإنسان اللى فعلا أتمنى ان يكون زوج ليا حسه اننا شبه بعض فى حاجات كتير
-انتى بنت حلال يا "سماح" وتستاھلى كل خير
ثم أضافت فى حزن:
-بس أكثر حاجة تعبانى انك هتبعدى عنى مش متخيله انى مش هعرف أشوفك وقت ما أنا عايزه
-ودى فعلا الحاجة الوحيدة اللى مضايقتانى فى سفرى انى هبعد عنك انتى وماما وبابا مش عارفه ازاي هعيش فى بلد غريبة لوحدى
هونت عليها "ياسمين" قائله:
-مش لوحدهك يا بنتى "أيمن" معاكى وانتوا الحمد لله متفاهميش وكمان أكيد هتجى زيارات
-أكيد طبعاً ان شاء الله
-ها قوليلى جهزتى لبسك وكل حاجتك
-أبوة كله تمام بابا جابلى فستان جميل أوى معاه وهو جاي استنى أوريهولك
قفزت "سماح" تخرج الفستان من خزانته لتريه لصديقتها فى مرح .. كانت "ياسمين" سعيدة للغاية لرؤية "سماح" سعيدة وفرحه بهذا الشكل ودعت ربها أن يديم عليها فرحها وهناءها

جاء موعد الزيارة التى تأجلت كثيراً .. نعم زيارة "وانل" ووالده ووالدته لبيت "ريهام" وطلب يدها .. صدمت "ريهام" عندما رأت "وانل" وتذكرت ملاحظته لها فى الكلية .. كانت جالسه فى صمت تستمع لما يدور حولها من أحاديث وتركز أكثر كلما تحدث "وانل" تحاول استكشاف شخصيته .. ثم تركوها معه بمفردها وجلسوا فى مكان آخر لا يبعد كثيراً عنهما مثلما فعلوا مع "ياسمين" و"مصطفى" .. ران صمت طويل لم تقطعه هى وانتظرت أن يبدأ بالكلام لكن يبدو أن انتظارها سيطول حانت منها اتفاته اليه لتجده يتصبب عرقاً ومرتبك ربما أكثر منها قالت فى نفسها (يا حلاوة ده مكسوف أكثر منى) ..قطعت هذا الصمت قائله :
-ممكن أسأل حضرتك سؤال
ازداد ارتباكك قائله:
-اتفضلنى

-ليه يا بنتى ده الجدع طيب وابن حلال وظروفه كويسه وكمان شغله مضمون فى شركة أبوه
وشقته موجودة
قاطعته قائله:
-مش ده كل حاجه يا بابا فى حاجات كتير أهم من ان العريس يكون جاهز وعنده شقة ويبقبض
مرتب كويس .. والحاجات دى أنا ملقتهاش فيه اطلاقاً
قال والدها بشئ من الحزم:
-بس الولد شريكي يا بنتى وكمان...
قاطعته قائله:
-بابا انت عايز تعمل معايا زى ما عملت مع "ياسمين" ؟
بهت الأب وصمت فأكملت قائله:
-غصبتها انها تتجوز واحد هى مش مرتحاله بس لمجرد انه جاهز وعريس مناسب من وجهة
نظر حضرتك
أطرق الأب وقد دمعت عيناه وظهر على ملامحه الأسى:
-معاكى حق يا بنتى .. أنا اللي جنيت على بنتى
اقتربت منه "ريهام" وقد ندمت على ما تفوهت به:
-أنا اسفه يا بابا مكنش قصدى والله .. حقك عليا
نظر اليها والدها قائلًا:
-اسمعى يا "ريهام" أنا مش ممكن أغلط نفس الغلطة مرتين لو مش مرتحاله يا بنتى خلاص
يغور فى داهية
-ايوة يا بابا مش مرتحاله
-خلاص يا حبيبتي متشليش هم
عانقته "ريهام" قائله:
-ربنا يخليك ليا يا بابا ..ومتقلقش ان شاء الله "ياسمين" هتخلص من اللي اسمه "مصطفى"
فى اقرب وقت
-على الله يا بنتى .. على الله

تحدد ميعاد استماع القاضى لشكوى "ياسمين" وبالطبع سيتواجد "مصطفى" للرد على ما
تقدمت "ياسمين" فى حقه ..حزنت عندما علمت أنه فى نفس يوم كتب كتاب "سماح" لكن
المحامى طمئننها بأنه اجراء روتيني ولن يأخذ وقتاً .. كانت تثق فى المحامى الى حد كبير وكان
يبث فيها دائماً روح التفاؤل والأمل .. وفى الموعد المحدد شعرت بالكثير من الارتباك والتوتر
وهى تعبر أروقة المحكمة مع المحامى .. فهذه هى المرة الأولى التي سترى فيها "مصطفى"
من بعد تلك الليلة التي اعتدى عليها فيها بوحشية ..ظلت تستغفر ربها وترجوه أن يهون عليها
ما هى فيه .. ثم رآته أمامها قادم فى اتجاهها مع محاميه خفق قلبها بشدة وودت الهرب من
أمامه .. كان يوجه اليها نظرات شرسة والحقد يملء عينيه .. أشاحت بوجهها عنه فهى لا
تريده أن ينجح فى توتر أعصابها ..حان الموعد ودخلت مع محاميه ومع "مصطفى"
ومحاميه ووقفوا جميعاً أمام القاضى .. طلب منها القاضى شرح ما تقدمت به فى شكاوها قصت
عليه كل ما حدث منذ أن علمت بخيانتة وحتى ضربه لها .. تعمدت ألا تنظر الى "مصطفى"
ولذلك كانت تتحدث بقوه وثقه .. بعدما أنهت حديثها شعرت بصدرها يعلو ويهبط بسرعة
وكانها انتهت من سباق للعدو .. وجه القاضى سؤاله الى "مصطفى" قائلًا:
-سمعت يا " مصطفى" شكوى زوجتك ضدك .. ايه ردك على كلامها ؟
حانت من "مصطفى" التفاته الى "ياسمين" قبل أن يتحدث فالتقت نظراتها الواثقه بنظراته

المتحدية ونظر الى القاضى قائلا:
-أنا بنفى كل اللى هى قالتة يا حضرة القاضى
شعرت "ياسمين" بالتوتر لكنها تذكرت كلام المحامى بأنه من المتوقع أن يلجأ زوجها للكذب
قاله له القاضى:

-يعني انت مضربتهاش ؟

قال "مصطفى": "

-لأ ضربتها بس مش للسبب اللى ذكرته

-أمال ضربتها ليه ؟

-عشان لما كنت مسافر عرفت انها كانت على علاقة بواحد تانى طول فترة سفرى
شعرت "ياسمين" وكأن صاعقة ضربت برأسها .. التفتت الى "مصطفى" فى حده قائله:
-كذاب

نظر اليها بسخرية ثم وجه حديثه الى القاضى قائلا:

-ده اللى وصلنى عنها وأنا مسافر كانت بتستغل سفرى عشان تقابل حبيبها فى بيتي .. ولما
عرفت اتجننت طبعاً وضربتها بدون ما أحس بنفسى

تساقطت العبرات على وجنتيها وهى تشعر بالقهر والظلم ووجهت كلامها اليه قائله:

-اتفق ربنا .. ده قذف محصنات .. مش خايف من عقاب ربنا ؟

-بلاش دموع وتمثيل انتى عارفه كويس انى مش كذاب والقاضى هيجبلى حقى منك

لم يكن هدف "مصطفى" من هذا الادعاء هو الاطاله والمماطلة فى هذه القضية .. وهنا تدخل
محامى "ياسمين" قائلاً:

-حضرة القاضى احنا بنرفض الادعاء اللى وجهه زوج موكلتى وبطالب باجراء كشف عذريه
وكممان هنرفع دعوة سب وقذف وتشهير بسبب الكلام اللى وجهه ليها دلوقتى

وجه القاضى حديثه الى "مصطفى" قائلاً:

-عندك شهود بكلامك ده؟

-أبوة عندى طبعاً .. أمى ربنا يخليهاالى

ابتسمت "ياسمين" بسخرية وهى تقول فى نفسها (حسبى الله ونعم الوكيل فيكوا انتوا الاتنين)
انتهت المقابلة بعد تحديد معاد أول جلسه والسماع الى الشهود من الطرفين

خرجت "ياسمين" من المحكمة وأسرعت بإيقاف سيارة أجرة وذهبت الى منزل "سماح" التى
وعدتها بأن تساعدنا فى هذا اليوم .. كانت تتحرك بأليه وهى غير مدركة لكل ما يدور حولها ..

كانت تشعر بالقهر والظلم ..لم تكن تدرى كيف يستطيع شخص مثل "مصطفى" أن يدعى ما
ادعاه دون أن يخاف الله ..كيف يأمن مكر الله ..يكف ينام ملء جفونه وهو ظالم لعبد من عباد

الله .. كيف لا يخشى ما أعده الله من العذاب لقاذف المحصنات .. أى رجل هذا الذى تزوجته ..
بل أى ذكر هذا .. فكل رجل ذكر وليس كل ذكر رجل ..حاولت نفض كل ذلك من رأسها وحاولت

الإندماج مع ما يحيط بها من جو مبهج

كانت "سماح" تبدو كأميرة صغيرة ووجهها يشع نوراً وأضافت ضحكاتها الصافية على
وجهها المزيد من التألق .. حان موعد كتب الكتاب .. كانت "ياسمين" فى المطبخ تعد صوانى
التقديم وترص ما بها من أطباق .. صممت طوال اليوم أن تهتم هى بأمر المطبخ وبنجاز ما
يحتاجونه من أعمال لتصرف ذهنها عن التفكير فى "مصطفى" وقضيتها .. سمعت فى الخارج
الزغاريد بعدما حضر المأذون .. ابتسمت لا شعورياً وهى تتخيل فرحة صديقتها الآن .. دخلت
"ريهام" الى المطبخ وسحبته من ذراعها قائله:

-سبيك من اللى بتعمليه ده دلوقتى وتعالى هيكتبوا الكتاب

خرجت "ريهام" مسرعة وهى تسحب "ياسمين" خلفها .. أزاحتا طرف الستارة التى كانت

تفصل بين الردهة وبين الصالون .. ابتسمت الفتاتان ونظرتا الى بعضهما البعض .. كانت "سماح" ترسم على وجهها ابتسامة صغيرة تشي بما يعتمل داخل قلبها من فرحة .. حانت التفاتة من "سماح" فتلاقت نظراتها مع نظرات "ياسمين" واتسعت ابتسامتها حركت "ياسمين" شفيتها بدون صوت قائله:

-مبروك

فهمت "سماح" ما قالت فحركت شفيتها هي الأخرى قائله:

-عقبالك

بدأ المأذون في بدء مراسم العقد .. كان الحاضرون نفر معدودون على الأصابع .. والد "سماح" ووالدتها وعمها واثنان من خالاتها وبالطبع "ريهام" و "ياسمين" أما من طرف العريس صديق والد "أيمن" منذ الصغر و "كرم" و..... وبالطبع "عمر" .. كانت نظرات "ياسمين" مصوبه على "سماح" .. الابتسامه تملو شفيتها بدأت المراسم وانتهت بجملة (قبلت زواجها)

تذكرت "ياسمين" تلك الجملة وهي تسمعها من فم "مصطفى" يوم عرسها فأعدت تلك الذكرى المزيد من الشجون اليها فالتفتت لتهرب الى المطبخ لتخفي دمعها كادت أن تسقط من عينها ... كان شهود العقد هما "عمر" و عم "سماح" .. تعالت الزغاريد مرة أخرى .. دخلت والدة "سماح" المطبخ وقالت ل "ياسمين": " -سمسم" كفاية انتى تعبتى أوى النهاردة أنا و"ريهام" هنقدم الحاجة اعدى انتى ارتاحى ابتسمت "ياسمين" اليها قائله:

-متقوليش كدة يا طنط والله أنا فرحانه جدال "سماح" ومن فرحتى مش عارفه اعمل ايه ولا ايه

ربت والدة "سماح" على ظهرها قائله:

-يا حبيبتي .. ربنا يخليكوا لبعض ويرزقك بابن الحلال اللى يعوضك

اختفت ابتسامه "ياسمين" وحاولت تغيير الموضوع قائله:

-حضرتك خدى الصنية بتاعة الرجالة قديمها وأنا هقدم الصنية الثانية للسنتات

-طيب يا حبيبتي هاتيها تسلم ايدك

تناولت أم "سماح" الصنية من "ياسمين" وخرجت لتقديمها الى الضيوف .. رأى "عمر"

والدة "سماح" وهي تهم بتقديمها فأسرع يأخذها منها وابتسم قائلا:

-عنك يا طنط

ابتسمت له والدة "سماح" قائلا:

-تسلم .. انت صاحب "أيمن" مش كدة

-أيوة تقدرى تقولى احنا اكثر من الاخوات

-ربنا يخليكوا لبعض نخدمك يوم فرحك ان شاء الله

-متشكر

قام "عمر" بتقديم الجاتوه والمشروب الى الرجال

..خرجت "ياسمين" ورائها واتجهت حيث تجلس النساء وقدمت اليهن ما تحمله .. وعندما

اقتربت من "سماح" ابتسمت كلتاها للأخرى .. أشارت لها "سماح" بالاقتراب فاقتربت منها

"ياسمين" فقالت لها:

-باركيلي بقيت مودام

ضحكت "ياسمين" قائله:

-مبروك يا مودام .. عقبال ما أشوفك فى الفستان الأبيض ان شاء الله

انتهى "عمر" من مهمة التقديم فالتفت ليضع الصنية فى مكان ما أو يعطيها لشخص ما .. رأى

فتاة تحمل صنية التقديم الفارغة وتتوجه الى المطبخ فأوقفها ومد يده بالصنيه التى يحملها

قائلا:

-لو سمحتى خدى دى معاكى مش عارف أحطها فين
التفتت "ياسمين" تجاهه دون أن تنظر اليه .. عقد "عمر" ما بين حاجبيه وهو ينظر اليها
متذكراً أياها .. نعم انها هي .. الفتاة التى صدمها بسيارته منذ فترة .. تفرس فيها ليتأكد من
أنها هي نفسها .. أيقن أنه لم يخطئ هي نفسها تلك الفتاة التى صدمها وتسبب فى كسر ساقها
..أخذت "ياسمين" منه الصنية دون أن تنظر اليه

أعدت كلتاها الى المطبخ ثم خرجت مرة أخرى لتجلس على أحد المقاعد فى هدوء ..استعدت
ذكريات المحكمة مرة أخرى .. كانت تهرب من تلك الذكرى طوال اليوم لكنها عادت اليها لتعكر
صفو مزاجها .. كانت ترى الجميع من حولها مبتسما سعيدا ضاحكا .. لكنها كانت فى عالم آخر
ودنيا أخرى .. ترى هل ستستطيع الحصول على الطلاق ؟ ..ترى ماذا سيكون رد فعل مصطفى
؟ .. هل ستركها لتنعم بحياتها ؟ .. أم يبقى شبحا يطاردها ويعكر صفو حياتها .. ماذا ان
خسرت القضية هل سيجبرها على العيش معه ؟ .. كيف ستتحمل ذلك ؟ .. هي لا تطيق مجرد
ذكر اسمه .. اسمه بين شفاهها كالسباب بالنسبة لها .. تنهدت فى حسرة ولفت ذراعها حول
جسدها وأسندت خدها بقبضة يدها .. كانت تنظر الى الأرض أمامها غير واعية لما يدور حولها
من أحاديث .. حانت من "عمر" التفاته اليها .. ربط على الفور بين اسمها والاسم الذى ذكره
"أيمن" وقال انها أقرب صديقات خطيبته وتذكر مشكلتها مع زوجها الذى خانها بعد شهر من
الزواج .. دقق فى ملامحها وتبين تلك الكدمات التى تقع على جبينها والجرح بجانب شفيتها
العليا .. تنهد فى أسى كيف يستطيع رجل ضرب زوجته وترك تلك الكدمات على جسدها .. بل
كيف يكون وضيعا لدرجة أن يخونها وفى بداية زواجهما ..وجدها حزينة هادئة كزهرة الحائط
التي تزينه فى صمت .. تسائل فى نفسه .. الى أى مدى وصلت فى قضيتها .. هل تحدثت الى
الأستاذ "شوقى" .. هل طلبت الخلع بالفعل أم عادت الى زوجها مرة أخرى .. حانت منه اتفاته
الى يدها فوجدها خاليه من أى دبله تطوق أصابعها .. أعاد النظر الى وجهها ليجد عينيها تلمع
بعبره تهدد بالسقوط .. شعر بالأسى لحالها ..عندها تقدمت نحوها الفتاة التى رآها فى
المستشفى والتي كانت تبحث عنها باكية .. قالت "ريهام ل "ياسمين: "

"-ياسمين" انتى كويسة

رفعت "ياسمين" نظرها الى أختها وقالت بصوت مختنق:

-أنا عايزة أمشى يا "ريهام" حسه انى مخنوقة أوى

-طيب يا حبيبتي و "سامح"

التفتت الى صديقتها لتجدها تتحدث مع زوجها والابتسامة تملو شفيتها فالتفتت الى أختها قائلة

:

-ان شاء الله مش هتلاحظ غيابى استنى بس هقول لطنط انى ماشية

وجدها "عمر" تنهض وتتحدث قليلا مع والدة "سامح" .. ثم عانقتها والدة "سامح"

وغادرت مع الفتاة التى خمن أنها أختها .. تابعها "عمر" حتى فتحت باب البيت وغادرت فى

صمت

عادت الأختان الى البيت وقبل صعودهما قالت "ياسمين: "

-هو فى عشا فوق

-مش عارفه أعتقد لأ

-طيب اطلعى انتى اسبقيني هروح أجيب حاجه من السوبر ماركت

-أجى معاكى ؟

-لا مفيش داعى مش هتأخر

ذهبت "ياسمين" الى السوبر ماركت أمام البيت وابتاعت منه طعام للعشاء وأثناء عودتها وبمجرد أن خطت أول خطوة لصعود الدرج وجدت يد تلتف بقوة على ذراعها التفتت وكادت أن تشهق بقوة وهي ترى "مصطفى" أمامها فأسرع "مصطفى" ليغطي فمها بيده وألصق ظهرها على الحائط ونظر اليها بشراسه قائلاً:

-بتتحديني يا "ياسمين" .. أنا هعرفك.. حتى لو القاضى طلقك منى مش هسيبك فى حالك يا "ياسمين"

حاولت الصراخ لكنه زاد من ضغط يده على فمها واقترب منها بشدة وتفرس فى وجهها قائلاً:
-راحه تفضحيني وترفعى عليا قضية خلع ومكملناش شهر جواز .. فضحتيني وسط الناس
مبقتش عارف ارفع عيني فيهم .. وكمان راحة تقولى انك لسه بنت
صرخ فيها بغضب هادر قائلاً:

-اتنازلى عن القضية وارجعى البيت والا يا "ياسمين" وعزة جلال الله لتشوفى منى اللى
عمرك ما شوفتيه فى حياتك

تساقطت العبرات على وجنتيها وتصاعدت شهقات بكائها كادت أن تموت من الرعب .. وفجأة
سما صوتاً لشخص ينزل من الأعلى فأسرع "مصطفى" وغادر البناية .. وقفت وجسدها
يرتعش بشدة ودموعها تنزل كالشلال .. وجدت احدى جاراتها تنزل فقالت لها بلووعه:
-ايه ده مالك يا "ياسمين" فى ايه يا بنتى ؟
لم تجيبها "ياسمين" بل أسرعت تجرى على الدرج وفتحت باب الشقة وأغلقته بسرعة ووقفت
خلفه تبكى وهي ترتجف بشدة

مر الأسبوع سريعاً .. وحين موعد زفاف "سماح" .. اعتذرت "ياسمين" عن حضور الفرح
فمنذ تلك الليلة التي هاجمها فيها "مصطفى" لم ترى الشارع ولو لمرة بل أنها كانت تخشى أن
تفتح شباك حجرتها لنلا تراه واقفاً فى الشارع أمامها .. بالطبع تفهمت "سماح" موقف
صديقتها حزنت كثيراً من أجلها ودعت لها أن يخلصها الله منه فى أقرب وقت .. مر اليوم على
خير وزفت "سماح" الى عريسها وانطلقت معه الى عش الزوجية فى المنصورة

بعد مرور اسبوع على الفرح وفى ذات يوم كان "عمر" جالساً على اريكة فى بيت المزرعة
واضعا أمامه منضدة عليها اوراق وملفات يراجعها عندما سمع صوت طرقات الباب فقال:
-اتفضل

دخلت "صفية" حاملة صنية صغيرة موضوع عليها شاي وطبق من الكعك المحلى .. وقفت
أمامه قائله بغنج:

-عملتك شاي يا سي "عمر"

قال دون أن يرفع عينيه عن الأوراق التي فى يده:

-متشكر يا "صفية" بس أنا مطلبتش شاي

ابتسمت له قائله بدلع:

-عارفه .. بس لقيتك مكلتش كويس فى الغدا قولت أجيبك شاي وشوية كحك على ما أحضرلك
العشا

قال وهو مازال ينظر الى الأوراق:

-طيب متشكر حطيه عندك

أنتت قامتها لتضع الشأى أمامه وعيناها تراقبان عينيه ..تعمدت أن تبطنى من حركتها .. فرفع "عمر" نظره ليصطدم بفتحه جلبابها والتي كانت أكبر من اللازم .. أكمل صعودا بعينيه ونظر الى عينيهما بعده ثم أعاد النظر الى الورق أمامه .. ابتسمت "صفية" بعدما حققت هدفها وأخذت تتهادى فى مشيتها وهى تغادر الغرفة وتغلق الباب خلفها.. لمحها "عويس" وهى تخرج من بيت المزرعة فهب واقفاً يعترض طريقها قبل أن تدخل غرفتها قائلاً:

-كنتى فىن السعادى

-يوه .. كنت فى بيت المزرعه ما انت شايفنى وانا نازلة من هناك

-فى الوقت ده بتهدبى ايه هناك

قالت بنفاد صبر:

-هكون بعمل ايه يعنى بحضر العشا لسي "عمر" وبوضبله فرشته

-طيب .. بس ابقى خلصى شغلك بدرى مفيش داعى تتأخرى لحد السعادى

ازاحتها بيدها ودخلت الى غرفتهما .. ظل "عويس" يتقلب فى فراشه وكأنه نانم على جمر ..كان يشك كثيرا فى تصرفات زوجته .. لكنه لم يستطع أن يمسك عليها شيئا .. لكن الشك كاد أن يدمر عقله .. فعزم على مراقبتها .. وبعد ليلتين شعر بها وهى تغادر الفراش فتظاهر بالنوم .. وجدها تفتح باب الغرفة بهدوء وتغلقه خلفها قام مسرعا ولبس جلبابه .. وفتح الباب قليلا وجدها تفتح البوابة وتخرج منها وتضع حجرا صغيرا حتى لا تغلق البوابة باحكام ..أسرع بمغادرة غرفته ولحق بها .. ترك بينها وبينه مسافة حتى لا تشعر به .. كان الشك قد تملك منه وأصبح يقيناً .. شعر بالدماء تتصاعد بسرعة الى رأسه حتى كاد أن ينفجر .. وجدها تدلف الى بيت قديم مكون من طابق واحد لا يبعد كثيرا عن المزرعة .. دخلت واغلقت الباب الخشب ورائها .. أخذ يلف ويدور حول البيت عله يجد فتحه ما .. وأخيرا وجدها فتحه صغيره فى الجدار .. صوب عينيه اتجاهها وهاله ما رأى .. زوجته "صفية" تقف معانقة رجلاً يوليه ظهره تفرس فى وجهها وهى تبتسم لذلك الذى تقفأمامه ويتحدثان معا .. سمع صوت ضحكاتهما العالية فإزداد افراز الأدرينالين فى دمه .. وفى اللحظة التالية وجد الرجل وهو يحاول فتح أزرار جلبابها فاستشاط غضبا وظل يدور حول نفسه كالطير المذبوح .. التفت حوله فوجد أمامه جيركن كبير فأسرع نحوه وفتح غطاءه وشم الرائحة النفاذة المتصاعده منه فلمعت عيناه وهب واقفا وأخذ يدور حول البيت ويفرغ محتويات الجيركن على جدرانه من الخارج وبعدما انتهى أخرج علبة ثقاب من جيبه وأشعل عودا ونظر اليه ثم نظر الى البيت وبصق عليه ثم .. فى لحظة اشتعلت النيران فى البيت ووقف رافعا رأسه منتشيا بفعلته فهى زوجته الخائنة تكتوى بنيران الخطيئة .. أسرع يعدو مبتعدا غير عابئا بأصوات الصراخ التى تصاعدت من خلفه....

الفصل التاسع عشر

بعد مرور "شهر" على زفاف "أيمن" و "سماح" .. عاد "أيمن" الى عمله فى المزرعة بعد انقطاع ..أقبل على "عمر" الذى كان يقف أمام احدى الأشجار يتفحص جودة ثمارها:..

-ايه الهمة والنشاط دول كلهم يا باشمهندس

انفجرت أسارير "عمر" عندما رأى صديقه "أيمن" فترك ما بيده وأقبل عليه معانقاً اياه قائلاً :

-اهلا بالعريس اللى مصدق يتجوز عشان يهرب مننا
ضحك "أيمن" قائلاً:

-أهو العريس رجعلكوا تانى وهيرجع يتفرم تانى فى شغل المزرعة
-طيب يلا عشان فى شغل كثير مستنيك

-طيب سبنى آخذ نفسى الأول

سار الصديقان معاً يتحدثان فى أمور المزرعة .. وفجأة سأله "عمر": "

-صحيح يا "أيمن" بقالى فترة عايز أسألك على حاجه بس اتلبخنا بموضوع فرحك
-خير يا "عمر"

-صاحبة مراتك عملت ايه فى مشكلتها

قال "أمين" باستغراب:

-صاحبة مراتى مين

"-ياسمين" اللى خدت منى رقم الأستاذ "شوقى" عشانها
-آآه

-عملت ايه كلمته ؟ رفعت القضية فعلا ولا رجعت لجوزها ؟

-ترجع ايه هو ده راجل أصل ده انسان مريض يارب تخلص منه على خير
سأله "عمر" مستفهماً:

-رفعت القضية يعنى

-أيوة رفعتها ومستنيه الحكم فى القضية

أطرق "عمر" برأسه ثم صمت .. حنت من "أيمن" التفاته الى الجبيرة التى تحيط بذراع
"عمر" اليسرى فأشار اليها قائلاً:

-هتفك الجبس امتى ؟

-المفروض خلاص كام يوم وأفكه وأبدأ العلاج الطبيعى ان شاء الله

-متقلقش ان شاء الله هتبقى زى الفل

انتبه "أيمن" لكف "عمر" الأيمن فأشار اليه وهتف قائلاً بدهشه:

-ايه الحرق اللى فى ايدك ده يا "عمر" ؟

توتر "عمر" وتغيرت تعبيرات وجهه صمت قليلا ثم قال:

-موضوع مش حابب أفنكره .. هبقى أحكيك بعدين

سأله "أيمن" بشك:

-موضوع ايه ده يا "عمر" .. خير ايه اللى حصل

قال "عمر" بنفاذ صبر:

"-أيمن" قفل على الموضوع ده دلوقتى

استسلم "أيمن" قائلاً:

-خلاص برحتك

دخلت والدة "مصطفى" غرفته لتجده مستلقيا على السرير وهو شارد .. فقالت له:
-اه خليك قاعد كده ومراتك دايره على حل شعرها
هب جالسا على السرير وصاح قائلا:
-مش هنخلص فى يومنا ده
-الناس كلت وشنا .. أنا مش عارفه أقولهم ايه .. مراتك فضحتنا وجرستنا وسط الناس
صاح "مصطفى" غاضبا:
-يعني عايزانى اعمل ايه دلوقتى
-أنا لو منك كنت جبتها من شعرها وحبستها فى البيت ومخلتهاش تشوف الشارع طول عمرها
.. وتبقى عاملة زى البيت الوقف و مذلوله كده لا هى طايله جواز ولا طلاق
-حاولت كتير ارجعها ومش راضيه
صاحت أمه فى غل:
-لازم ترجعها ..حتى لو غصب عنها .. عايز الناس تقول ايه معرفش يمشى كلمته على مراته
.. مش كفايه القضية اللي رفعتها عليك وكلامها انها لسه بنت .. فضيحتك بأت على كل لسان
غادر الغرفة وهو يصيح فى غضب:
-سببني فى حالى بأه أنا مش ناقصك انتى كمان

كانت "ياسمين" جالسه على فراشها تقرأ وردها عندما دق جرس الباب .. كانت فى ذلك اليوم
بمفردها فى لمنزل .. "ريهام" فى الجامعة .. ووالدها كالعادة يجلس مع أصدقائه على المقهى
الذى لا يبعد كثيراً عن البيت .. تركت مصحفها ونهضت لتتنظر من القادم .. بمجرد أن وصلت
الى الباب وجدت ورقة مطوية موضوعة أسفله يظهر نصفها .. اقتربت من الباب بخفه ونظرت
فى العين السحرية لكنها لم تجد أحد .. انحنت لتلتقط الورقة وفتحتها بقلق وقرأت ما بداخلها
(إذا كنتى فكرة انى هسيبك فى حالك تبقى غلطانه .. أنا ممكن أعمل حاجات متخطرش ببالك ..
اسمعى الكلام بالدوق أحسن .. مستنيكي)
قفز قلبها داخل صدرها .. أى رجل هذا .. ألن يتركها وشأنها أبداً .. أسرعت الى غرفتها
وأحضرتك هاتفها واتصلت بالمحامى .. بعد فترة من الرنين رد المحامى قائلا:

-ألو
-السلام عليكم يا أستاذ "شوقى"
-وعليكم السلام أهلا يا مدام "ياسمين"
قالت بصوت متهدج:
-أهلا بحضرتك .. أنا دلوقتى لقيت ورقة من "مصطفى" سابها تحت الباب
-الورقة معاكى
-ايوة معايا
-طيب تمام احتفظى بيها وعديها عليا فى المكتب عشان نطلب ضمها لملف القضية
قالت بصوت أوشك على البكاء:
-حاضر بابا يبجي وأنزل أنا وهو ونعديها على حضرتك .. بس هو أنا مش هخلص منه بأه ..
أنا تعبت أوى وعلى طول خايفه ومرعوبة
-متقلقيش ان شاء الله القضية هتخلص قريب وساعتها هترتاحى منه ان شاء الله .. هو اللي
مخليه بيتصرف بجرأه كده انك لسه على ذمته
-يارب أخلص منه وأرتاح بأه
-ان شاء الله .. بس الصبر

-لقبته النهاردة سايبلى ورقة تحت باب الشقة بيهددنى فيها عشان أرجعه
-حسبي الله ونعم الوكيل فيه .. راجل معدوش دم
-مش هيرتاح الا لما يكسرنى أنا عارفه
-قولى للمحامى يا "ياسمين"
-قولتله ومنتظر منى الورقة النهاردة عشان هيحطها مع ملف القضية .. كنت ناوية أنزل مع
بأبا لكنه رجع من بره ضغطه على ومش قادر يقف على رجله .. اتخاق مع أبو "مصطفى"
على القهوة .. بأبا بيقول انه قال كلام وحش أوى عنه
قالت "سماح" بحنق:
-هى العيلة دى مفياش حد بيخاف ربنا .. أمه تشهد زور .. وأبوه يتبلى عليكى .. ربنا
يخلصك من العيلة دى على خير
قالت بصوت متعب:
-يارب يا "سماح" ادعيلى بالله عليكى .. محتاجه دعائك أوى
قالت "سماح" فى حنو:
-حاضر يا حبيبتى .. والله بدعيلك دايماً .. خلى بالك من نفسك
-وانتى كمان .. ومعلش بعكنن عليكى بمشاكلى وانتى لسه عروسة بس حسيت انى هتخفق لو
متكلمتش مع حد
-عيب عليكى اللى بتقوليه ده احنا اخوات .. وربنا عالم انك شاغله بالى على طول .. معلش يا
"ياسمين" هانت بكره تخلصى منه وتنسى كل اللى فات
قالت "ياسمين" بمراره:
-أنسى .. مظنن انى ممكن أبداً أنسى .. بس الحمد لله على كل حال .. يلا اسيبك تشوفى اللى
وراكى
-ماشى حبيبتى وأنا هتصل بالليل أطمئن عليكى
-ماشى يا "سماح" .. مع السلامة
-مع السلامة
أغلقت "سماح" الهاتف وتنهدت فى حسرة .. قال لها "أيمن" الجالس بجوارها على الأريكة:
-خير يا حبيبتى .. حصل حاجه جديدة
نظرت الى زوجها قائله:
" -مصطفى" مش راضى يسيب "ياسمين" فى حالها
-ليه ايه اللى حصل تانى ؟
قصت عليه "سماح" ما حدث .. ثم قالت بقلق:
-أنا خايفه على "ياسمين" أوى .. من الواضح انهم ناس ميعرفوش ربنا .. يعنى تتوقع منهم
أى حاجه
طمئنها "أيمن" قائلاً:
-متقلقيش يا حبيبتى .. هشوفلها حل

انتظرت "ياسمين" عودة أختها من الجامعة وأخبرتها بما حدث من "مصطفى" وما حدث
لوالدهما .. طلبت منها "ياسمين" أن تبقى مع والده لحين أن تذهب الى المحامى فى مكتبه
لتعطيه الورقة التى وجدتها .. قالت لها "ريهام" بقلق:
-طيب خدى بأبا معاكى
-ازاى يعنى يا "ريهام" انتى مشوفتيش كان عامل ازى .. مكنتش قادر يقف على رجله .. لو

عرف بموضوع الورقة هيتعب أكثر

-طيب أجى أنا معاكى

-ونسيب بابا لوحده ؟ .. افرضى تعب ولا احتاج حاجه .. خليكي انتى جمبه وأنا مش هتأخر

-طيب يا حبيبتى خلى بالك من نفسك

-ماشى وانتى خلى بالك من نفسك ومن بابا ومتفتحيش لأى حد وأنا أما أجى هفتح بالفتح

-ماشى

خرجت "ياسمين" توجهت الى مكتب المحامى والذى كان يقع فى منطقة هادئة بالمعادي

.. أعطته الورقة وقرأها وطمئنها قائلاً:

-التهديد ده هيعزز موقفك فى القضية ان شاء الله .. وأنا متفائل جدا ان الحكم يكون من أول

جلسه

قالت تفائل:

-يارب

-لا متقلقيش ان شاء الله خير

انصرفت "ياسمين" وهى تشعر بالأمل الذى بثه اياها المحامى .. كانت الشمس قد قربت على

المغيب .. وأوشك الليل أن يسدل أستاره على تلك البقعة الهادئة .. عندما شعرت "ياسمين"

بخطوات خلفها .. شعرت بالخوف .. أسرعت الخطى .. فإزدادت سرعة الخطوات خلفها ..

التفتت فجأة لتصطدم بوجه "مصطفى" أطلقت صرخه عاليه وحاولت الجرى .. لكنه لحق بها

وكمم فهمها وقال بعنف:

-تعالى معايا من سكات يا مدام.. متفضحيناش أكثر ما انتى فضحانا

حاولت أن تفلت منه لكنها كانت أرق من أن تستطيع مجابهة "مصطفى" جرها جراً وهو مازال

مطبق على فمها .. حاولت الصراخ فلم يخرج صوتها .. حاولت الافلات فلم تستطيع .. فتح

"مصطفى" باب سيارته وحاول ادخالها بالقوة .. عضت كفه التى تطبق على فمها فأبعد كفه

متلماً أخذت تصرخ وتصرخ .. لكنه أطبق على فمها مرة أخرى .. وصاح بها:

-ادخلى العربية من سكات لهموتك وانتى واقفة مكانك

من حسن حظها .. أن سخر الله لها شابين كانا يسيران فى هذا الشارع فى ذلك الوقت رأتهم

"ياسمين" حاولت الافتلات من "مصطفى" .. وهو مازال يحاول اجبارها على الدخول الى

السيارة أفنتت فمها مرة أخرى ونادت الرجلين قائله:

-أرجوكوا الحقونى عايز يخطفنى

أسرع الشابين باتجاههما وقال أحدهم لـ "مصطفى":

-انت يا أخينا بتعمل ايه

صاح "مصطفى" بغضب:

-وانت مالك انت .. دى مراتى

نظرا اليه الرجلين بشك فصاحت "ياسمين" -باعتبار ما سيكون: -

-لأ أنا مش مراته .. ده عايز يخطفنى أرجوكوا خلوه يسببنى

نظر الشابين الى بعضهما البعض وقال الآخر لـ "مصطفى" بشك:

-بتقول انها مش مراتك

صاح "مصطفى" بغضب:

-لأ مراتى .. بس فى مشكلة بينا وهتتحل

صاحت "ياسمين" باكياً:

-لو سيبتهو ياخذنى ذنبى فى رقبتكوا انتوا

التفت اليها "مصطفى" ليصفعها على وجهها قائلاً:

-اخرسى بأه فضحتينا

صاح الشابين فى "مصطفى" وأقبلوا عليه ليخلصوا "ياسمين":
-مراتك ولا مش مراتك اللى يتعامل كدة مع واحده ست يبقى حيوان . ومش هنسيبك تاخدها
غصب عنها
سألها أحدهم قائلاً:
-عايزه تروحي معاه يا آنسه
قالت باكيه:
-لأ .. والله ده عايز يخطفنى
أمسك أحدهما بـ "مصطفى" وتعاركا معاً .. أما الشاب الآخر فتوجه بـ "ياسمين" مسرعاً
وأوقف سيارة أجرة وانتظر حتى رحلت السيارة ثم عاد الى صديقه وقال لـ "مصطفى":
-بتتشطر على واحدة ست
ثم أمسك الاثنان بـ "مصطفى" وأخذوا يكيلون له اللكمات والضربات حتى لقنوه درساً لن
ينساه

عادت "ياسمين" الى بيتها وهى فى حالة يرثى لها .. أخذتها "ريهام" الى غرفتهما وأغلقت
الباب قائله:
-مالك يا "ياسمين" ايه اللى حصل .. فى ايه ؟
هتفت "ياسمين" باكية:
-الحيوان "مصطفى" كان عيز يخطفنى
-يخطفك .. ازاي يعنى
قالت من بين شهقاتها:
-كنت واثقه انه مش هيسبنى فى حالى .. هو فاكر انه لما يرجعنى البيت غصب عنى كده يبقى
راجل وعرف يسيطر عليا .. بجد أنا بحتقره أوى أوى أوى ..وعندى الموت أهون مليون مرة
من انى أعيش معاه
أخذتها "ريهام" فى حضنها قائله:
-ربنا ينتقم منه .. معلىش يا "ياسمين" ربنا يخلصك منه
-او عى تقولى لبابا يا "ريهام" مش عايزاه يتعب أكثر
-متقلقيش مش هجيبه سيره
باتت "ياسمين" ليلتها ولم يغمض لها جفن من الخوف والقلق .. أخذت تفكر فى حالها ..
وتشعر بالقلق مما سيحدث غداً .. تمنى أن تنتهى القضية فى أقرب وقت لتعود حره مرة أخرى.

-صاحبة "سماح" اللى سألتنى عنها امبارح
تفوه "أيمن" هذه العبارة وهو جالس مع "عمر" فى مكتبه بالمزرعة .. فقال "عمر":
-أيوه "ياسمين" مالها ؟
-الحيوان جوزها مش سايبها فى حالها وكل شوية قارفها رسايل تهديد وحاجه قرف
عقد "عمر" ما بين حاجبيه قائلاً:
-بيهددها بابيه
-عايزها ترجعه وتتنازل عن القضية

قال "عمر" بدهشة:

-ازای يعني عايزها تعيش معاه غصب عنها ؟

-واحد مخه تعبان تقول ايه بأه

التفت اليه "أيمن" قائلاً باهتمام:

-بص يا "عمر" البنت دي زى ما قولتلك هي زميلة "سماح" من أيام الجامعة وأقرب صاحبه

ليها والأتنين زى الاخوات بالظبط .. و"سماح" فعلا مضايقه عشانها أوى .. وبصراحة هي

كمان صعبانه عليا .. هي بنت بسيطة ومن أسرة على أد حالها .. وملهاش غير أبوها وأختها ..

يعني مقطوعين من شجره وملهاش حد يحميها أو يدافع عنها

أوماً "عمر" برأسه وهو يتذكر الرجل والفتاة اللذان رأهما فى المستشفى .. فأكمل "أيمن"

قائلاً:

-أنا بصراحة فكرت فى حل .. وقولت أعرضه عليك وأشوف رأيك

قال "عمر" باهتمام:

-قول

-ايه رأيك لو البنت دي تيجي تشتغل هنا فى المزرعة .. ان شاله لحد ما قضيتها تخلص وتطلق

من جوزها .. بس على الأقل هتبقى بعيد عنه الفترة دي ومش هيقدر يعرف طريقها

قال "عمر" بسرعة:

-مفيش مشكلة بالنسبة لى .. تعد الفترة اللي هي عايزاها .. قولى هي خريجة ايه

-ايه يا "عمر" مترکز بقولك زميلة "سماح" .. يعني دكتورة بيطرية

رفع "عمر" حاجبيه قائلاً:

-كويس أوى .. كدة هتلاقى أكثر من شغلانه فى المزرعة .. تشوف ايه اللي يناسبها وأنا

معنديش أى مشكلة

ابتسم له "أيمن" قائلاً:

-وأنا كنت متوقع ردك ده .. بس فى نقطة ثانية

-خير يا "أيمن"

-بالنسبة للسكن بتاع البنت مش معقول هتروح المنصورة كل يوم وترجع وانت عارف ان بين

المنصورة والمزرعة ربع ساعة وكمان هي غريبة فى البلد دي ومتعرفهاش كويس

أسرع "عمر" قائلاً:

-ودى كمان محلولة انت عارف ان عندنا مبنى كامل لسكن العمال اللي بيبجوا من المحافظات

والقرى الثانية وقت الحصاد .. تقدر تقعد فى اوضة منهم مفيش مشكلة

اتسعت ابتسامة صديقة قائلاً:

-تمام كده الحمد لله

ثم وقف وتوجه الى الباب قائلاً:

-هكلم بأه "سماح" أقولها البشرى دي

رن جرس هاتف "ياسمين" قامت من فراشها متثاقله لتحضره وردت بصوت مبجوح قائله:

-السلام عليكم

-وعليكم السلام .. اوعى أكون صحيتك

قالت "ياسمين" وهي تجاهد لتتماسك:

-لا .. كنت صاحيه

قالت "سماح" بقلق:

-مال صوتك حصل حاجه ؟
تساقطت العبرات من عينيها قائله:
-لأ مفيش .. مش عايزة أشغلك بهمومي اللي ما بتخلصش .. انتى أخبارك ايه
قالت "سماح" بحدده:
-سبيك منى دلوقتي وقوليلى اللي حصل يا إما لا أنا صحبتك ولا أعرفك
تنهدت "ياسمين" بحسرة وقصت على صديقتها محاولة اختطاف "مصطفى" لها .. صاحت
"سماح" قائله:
-معقوله توصل للدرجة دى
قالت "ياسمين" بأسى:
-وأكثر من كده كمان .. ده واحد انتهك حرمان ربنا وارتكب جريمة بشعة زى الزنا بدون ذرة
ندم وبدون ما ضميره يوجعه .. يبقى توقعى منه أى حاجه
-طيب بصى .. عندى ليكي حل هيخلصك من الأرف اللي انتى فيه ده لحد ما تطلقى منه
-حل ايه ؟
-بصى انتى عارفه ان "أيمن" شغال فى مزرعة واحد صحبه .. هو كلمه عن ظروفك وصاحبه
ده وافق انك تيجي تشتغلى فى المزرعه .. أهو تبعدى عن القاهرة وتسببها لـ "مصطفى"
مخضرة .. وميقدرش يعرف طريقك
قالت "ياسمين" بشك:
-أسيب القاهرة ازاي يعنى
-ركزى يا "ياسمين" .. المزرعة اللي بيشتغل فيها "أيمن" فى بلد جمب المنصورة .. شغلك
واقامتك هتكون فى المزرعة
قالت "ياسمين" بدهشة:
-انتى عايزانى أسافر بلد معرفهاش وأشتغل عند ناس معرفهمش وكمان أقيم فى البلد دى ..
انتى بتهرجى يا "سماح"
قالت "سماح" محاولة اقناع صديقتها:
-لأ مش بهرج .. ده حل عملى .. وبعدين بالنسبة ان البلد متعرفهاش انا هيكون بيني وبينك
ربع ساعة يعنى هجيلك وتجيلى مش هسبيك لوحدهك .. وبالنسبة للناس اللي هشتغلى معاهم ..
ده "أيمن" جوزى وصاحبه وهو وصاحبه ده زى أنا وانتى كده
-ولو يا "سماح" .. اذا كنت وأنا أعده فى بيتي مش بسلم من كلام الناس وانتى عارفه
"مصطفى" وأهله بيقولوا ايه عليا .. ما بالك بأه لو روحت عشت لوحدى فى بلد غريبة
هيقولوا عليا ايه
-يا بنتى محدش هيعرف مكانك .. ما احنا عاملين كل ده عشان محدش يعرف مكانك ولا يعرف
انتى فين ولا مع مين
قالت "ياسمين" بحزم:
-مينفعش يا "سماح" مش هدى فرصة لحد انه يتكلم عليا أو يسئ الظن بيا .. مستحيل أسافر
قالت "سماح" بحزن:
-وأنا اللي أول ما "أيمن" كلمنى كنت طايرة من الفرحة وقولت أتصل بكى أفرحك
قالت "ياسمين" بأسف:
-معلش يا سماح أنا اسفه .. بس مش هقدر أسافر
-طيب يا حبيبتي ربنا يحلها من عنده
-يارب
-لو احتجتى حاجه كلميني .. ومتخرجيش من البيت الفترة دى
قالت بمراره:
-هخرج أروح فين .. اديني محبوسه أهو .. خايفة حتى أبص من الشباك لأقيه أدامى

-ربنا يخلصك منه على خير .. يلا سلام هكلمك تانى اظمن عليكي
-متحرمش منك بجد يا "سماح .." مع السلامة

اتصل "أيمن" بصديقه ليخبره برفض "ياسمين" العمل في مزرعته .. صمت "عمر" قليلا ثم قال:

-طيب هي رفضت ليه ؟

-قالت لـ "سماح" انها مش عايزه مشاكل تجلها بسبب شغلها في المزرعة .. لأن جوزها وأهله مطلعين عليها كلام مش كويس عشان يخسروها القضية فمش عايزة تديهم فرصة انهم يمسكوا عليها غلطه

سكت "أيمن" قليلا ثم قال:

-تصور الحيوان حاول يخطفها امبارح وهي نازله من مكتب المحامى
صاح "عمر" بدهشه:

-يخطفها !! ازاي يعني

-اه والله كان عايز يركبها العربية غصب عنها لولا كان فى شباب ماشيين فى الشارع ضربوه وأنقذوها

قال "عمر" فى أسى:

-لا حول ولا قوة الا بالله .. ايه الاصرار العجيب ده على انه يرجعها

-قولتك واحد مخه تعبان .. أنا بس حبيت أقولك على ردها .. وعلى العموم تسلم يا "عمر" ..
يلا أشوفك بكرة

صمت "عمر" يفكر ولم يجب .. فقال "أيمن": "

"-عمر" معايا ؟

"-أيمن" قولها تيجي هي وأهلها

صمت "أيمن" قليلا ثم قال فى دهشة:

-ازاي يعني هي وأهلها ؟

-أبوها وأختها .. مش هي كل مشكلتها انها مش عايزة تيجي لوحدها عشان محدش يتكلم

عليها .. خلاص تيجي معاهم وبكده محدش يقدر يفتح بقة

-اه يا "عمر" بس أهلها هيجوا يعملوا ايه يعني

-هي اختها خريجة ايه

-مش عارف بصراحة

-طيب بالنسبة لأختها لو حبه تشتغل فى المزرعة مفيش مشكلة انت عارف ان المزرعة كبيرة

جدا وبنحتاج فيها تخصصات كتير اوى يعني اكيد هنلاقى حاجة مناسبة ليها .. وكمان والدها لو

عايز يشتغل مفيش مشكله نشوفله حاجة مناسبة ..

قال "أيمن" بشك:

-أنا مش فاهم .. انت ليه مهتم بالموضوع اوى كده .. يعني مستغرب بصراحة من كلامك ..

هتجيبها هي وأهلها يشتغلوا فى المزرعة!

-انا كمان مستفيد من الموضوع ده مش خسران حاجة .. هيشغلوا ويكون ليهم مرتبهم وانا

ليا الانتاج والفايده اللى هاخده من ورا شغلهم .. يعنى تقدر تقول منفعه متبادل

-بس كده ؟

تنهد "عمر" قائلا:

-لأ مش بس كده .. بصراحة صعبانه عليا وحابب أساعدها .. و طالما فى امكانى انى أساعدها

فعلاً ليه لآ

ابتسم "أيمن" قانلا:

-انت حد طيب أوى يا "عمر"

-سبيك بس من الكلام ده .. وخلي مراتك تعرض عليها الموضوع وابقى عرفنى ردها

-خلاص تمام هخليها تكلمها وارد عليك

-خلاص اتفقنا وأنا منتظر ردها

أغلق "عمر" الهاتف وأخذ يفكر فى "ياسمين" وما يحدث لها

لم تستطع "سماح" الانتظار الى الصباح وقامت من فورها لتتحدث الى صديقتها .. قالت "ياسمين" بشك:

-وهو صاحب جوزك ايه مصلحته فى كده

-ايه اللى ايه مصلحته .. مصلحته انك هتشتغلى بمقابل ولو عايزة عمو و "ريهام" كمان يشتغلوا مفيش مشكلة

-طيب يعني هو ليه يعمل كده .. هو ميعرفناش عشان يساعدنا كده

-أقول طور تقول احبوه .. بقولك صاحب "أيمن" جدا و "أيمن" قاله انك صحبتى جدا

-يعنى بيعمل كده عشان يجامل صاحبه

-لآ هو قاله انه فعلا عايز يساعدك .. هتعدى هناك انتى وأهلك فى المزرعة لحد ما تخلصى من

الزفت "مصطفى" ده خالص ويتحكمك بالطلاق

صمنت "ياسمين" ولم تجب فحنتها "سماح" قائله:

-ساكته ليه انطقى

-بصراحة مش عارفه يا "سماح" خايفة يكون اتخرج من صاحبه فاضطر يعمل كده عشان

ميزعلوش

-يا بنتى ده رجل أعمال يعني ميعرفش المجاملات يعرف الشغل وبس .. وهو أصلا مش

خسران حاجة .. بالعكس كسبان ناس تشتغل فى المزرعة .. يلا بأه متعديهاش

-القرار مش ليا لوحدى يا "سماح" ده قرار "ريهام" وبابا كمان .. وبعدين انتى ناسية كلية

"ريهام"

-لآ مش ناسية وبسيطة الترم ده اخر ترم ليها وممكن تروح ع الامتحان على طول و "ريهام"

انتى عارفه كليتها مبيهتموش بالحضور أوى زى كليتنا

-مش عارفه .. هعرض الموضوع عليهم وأشوف هيقولوا ايه

-خلاص وأنا هستنى ردك

أغلقت "ياسمين" مع صديقتها وظلت تفكر .. فى كرم ذلك الرجل .. لماذا يفتح لها مزرعته هى

وأهلها .. أمجامله لصديقه ؟ أم بالفعل شعر بالأسى لحالها وأراد مساعدتها ؟ .. استخارت ربها

أولا .. ثم عرضت الامر على والدها و "ريهام" .. كان رد فعل "ريهام" هو الموافقة على

الفور فهى تعلم المشاكل والخطر المحيط بأختها .. أما "عبد الحميد" فقد تردد قليلا .. ثم ما

لبث ان وافق من أجل حماية ابنته حتى موعد النطق بالحكم ... تحدد ميعاد السفر بعد اسبوع ..

رحل ثلاثتهم بعد الفجر لنلا يراهم أحد .. وركبوا منطلقين الى تلك المزرعة

الفصل العشرون

انطلقت السيارة بالمسافرين فى طريقهم الى المنصورة .. جلست "ياسمين" بجوار النافذة فى المقعد الخلفى وبجوارها "ريهام" ووالدهما .. كانت "ياسمين" شارده طوال الطريق .. أسندت رأسها بقبضة يدها وأخذت تسترجع ذكرياتها .. أول يوم لها فى الجامعة والفرحة التى كانت تشعر بها .. يوم تخرجها وفخر والدها ووالدتها بها ... والدتها لكم اشتاقت اليها تجمعت فى عينيها عبره حائره .. لماذا تسقط ؟ .. أتسقط لأنها فقدت حزن والدتها الحاني ؟ أم تسقط على حالها وما يحدث لها ؟ .. تذكرت يوم جاء "مصطفى" الى بيتهم لطلب يدها .. أه لو كانت تعلم لكانت طردته يومها شر طرده .. لكنها لم تكن تعلم الغيب .. ومازالت لا تعلم الغيب .. فلعل طريق الأشواك الذى تسير فيه ينتهى نهايه جميله .. لعل الله يخبئ لها خيراً لا تعلمه ..

ظلت تفكر فى الضربات التى تعرضت لها .. كانت "ياسمين" تملك قدراً كبيراً من العزيمة والإصرار .. ليست ممن يستسلمون لآلامهم وأحزانهم وينكبون عليها .. صممت ألا تدع شيئاً أو أحداً يحطمها .. الضربة التى تأخذها ستقويها ولن تكسرها .. ستظل عزيزة النفس أبيه .. لن تسمح لأحد بإهانتها أو اذلالها .. وقريباً ستتخلص من "مصطفى" وتصبح حرة نفسها .. لن تسمح لأحد أن يجبرها مرة أخرى على شئ ترفضه خاصة لو الأمر متعلق بحياتها هى .. ستتعلم من كل ما مر بها .. ولن تقع فى الخطأ مرتين .. عزمتم على بدء حياة جديدة لا وجود فيها لليأس .. هى تثق بالله عز وجل .. وتثق بأنه لن يضيعها مادامت قريبه منه .. حانت من "ريهام" التفاته الى أختها .. شعرت بغصه عندما رأت الدمعه التى تلمع فى عينيها .. أرادت أن تخفف عنها فمالت عليها قائله بصوت منخفض:

- هو احنا ليه حظنا فقر مع الرجالة ؟

ابتسمت "ياسمين" رغماً عنها والتفتت تنظر الى "ريهام" التى أكملت قائله:

"- معزز" و "مصطفى" وآخرهم ابن أمه "وائل" .. رجاله عر

لم تتمالك "ياسمين" نفسها ووجدت نفسها تضحك بشدة .. حاولت كتم ضحكاتهما حتى لا يسمعها أحد الركاب .. نظرت لها "ريهام" قائله:

- أنا قلبي حاسس ان القاهرة دي كانت نحس و ان شاء الله بدون مقاطعة المنصورة دي هيكون وشها حلو علينا ..

ابتسمت لها "ياسمين" قائله:

- هو انتى ناوية على ايه بالظبط ؟

-يختى مش ناوية على حاجة غير الدعاء .. ايه مدعيش .. ربنا كبير وان شاء الله نطلع من

البلد دي بفردتين لوز واحد ليا وواحد ليكي

-فردتين؟! .. لا شكرا كفاية فرده واحده ليكي

-لا .. وان شاء الله فردتين متقاطعين انتى بس .. ده أنا متفانله من ساعة مطلعنا على الطريق

وأنا حسه ان النحس ابتدى يتفك .. بكرة تشوفى

ابتسمت لها "ياسمين" وعادت لتتنظر من النافذة تراقب الأشجار على الطريق

فى المزرعة كان "عمر" فى مكتبة يدقق فى الملفات أمامه عندما طرق "أيمن" الباب ودخل .. ابتسم له قائلاً:

-صباح الخير يا "عمر"

بادله "عمر" الابتسامه قائلاً:

-صباح الخير يا "أيمن"

ثم استطردت قائلاً:

-الجماعه اتحركوا

-مش عارف بصراحه بس أكيد أيوة
قال بجديه:

-مش تكلمهم يا ابني عشان تعرف ركبوا ولا لسه وعشان تتابعهم وهما على الطريق دى أول
مرة ييجوا هنا

-طيب حاضر .. هجيب رقم "ياسمين" من "سماح"
اتصل "أيمن" بـ "سماح" وطلب منها رقم "ياسمين" ليتابعهم على الطريق .. أخبرته أنهم
ركبوا بالفعل وأعطته الرقم فدونه "أيمن" ثم انتهى المكالمة معها واتصل بـ "ياسمين"

نظرت "ياسمين" الى هاتفها وهى تشعر بالتردد فسألتها "ريهام":

-مين اللى بيتصل

-مش عارفه رقم غريب

-طيب ردى

قالت "ياسمين" بخوف:

-لا خايفه يكون "مصطفى"

صمتت قليلا ثم أكملت قائله:

-ممكن يحس من الصوت انى فى المواصلات ويشك اننا مش فى البيت .. بلاش أرد أحسن
-طيب ممكن يكون حد من المزرعة .. افتحى ولو سمعتى صوت "مصطفى" اقلنى على طول
-خلاص فصل

عاود الهاتف الرنين مرة أخرى .. فحثتها "ريهام" قائله:

-ردى

فتحت "ياسمين" الخط وانتظرت أن يتحدث المتصل .. فأتاها صوت لا تعرفه:

-ألو السلام عليكم

ردت بحذر:

-وعليكم السلام .. مين حضرتك

-أنا "أيمن" جوز "سماح" .. كنت عايز أعرف انتوا فين بالظبط وأدامكوا أد ايه

-طيب لحظة واحدة لو سمحت

نظرت الى والدها وقالت له:

-بابا جوز "سماح" .. كلمه انت عايز يعرف أدامنا أد ايه

تكلم مع والدها وعرف أن أمامهم ما يقرب من ساعة .. أنهى المكالمة وقال له "عمر":

-أدامهم ساعة تقريبا ويوصلوا

-طيب تمام

صمت "عمر" قليلا ثم قال:

-هى مكنتش راضية تكلمك؟

-أعتقد كانت خايفه ترد حسيت بصوتها فى البدايه بتتكلم بحذر أوى .. شكل جوزها ده مربيلها

الرعب

-لا مش قصدى .. قصدى لما قولتلها ان انت جوز "سماح"

-قالتلى لحظة واحدة وبعدين لقيت باباها بيكلمنى

أوما "عمر" برأسه ولم يعقب

-طيب هقوم أشوف شغلى .. أشوفك بعدين .. أما يوصلوا هعرفك

رد "عمر" قائلا:

-تمام

خرج "أيمن" وترك "عمر" يفكر فى تصرفات تلك الفتاة الغربية

اقتربت السيارة من المزرعة فأعطت "سماح" الهاتف لوالدها ليتصل بـ "أيمن" .. وصلوا أخيراً الى المزرعة بعد عناء ثلاث ساعات على الطريق .. كانت الشمس فى كبد السماء .. استقبلهم "أيمن" على بوابة المزرعة ورحب بهم .. أدخلهم الى الداخل .. وقعت "ياسمين" فى حب المزرعة من أول وهله .. كانت بطبيعتها تحب الهدوء والخضرة والطبيعة الساحرة .. وكانت المزرعة فعلاً ساحرة .. خطفت لُبها من أول نظرة .. بمجرد أن عبرت البوابة شعرت بمزيج من الهدوء والسلام والطمأنينة .. تغريد العصافير على الشجر كان يبعث فى نفسها التفاؤل والأمل .. وجدت نفسها تبتسم وهى تتأمل الطبيعة الساحرة حولها ... كان يبدو أن مالك المزرعة ذو ذوق خاص .. لم يبخل على مزرعته بشئ .. فكانت من أجمل ما يكون .. كان "أيمن" يسير مع والد "ياسمين" فى المقدمة و"ياسمين" و"ريهام" خلفهما .. التفت "أيمن" الى الفتاتان قائلاً :

-عجبتكوا المزرعة

قالت "ياسمين" بحماسة:

-جداً .. شكل صاحبها مهتم بيها أوى

-فعلاً "عمر" على طول مهتم بيها

إذن فإسم صاحب المزرعة "عمر" .. تساءلت فى نفسها .. ترى هل هو شخص طيب ومحترم مثل "أيمن" .. أم أنها ستجد مشاكل فى العمل معه .. كانت "ريهام" تسير بجوار أختها تتأمل المزرعة بدورها عندما حانت التفاتته منها لترى رجلين يتحدثان معاً أمام احدى الشجيرات .. دقت النظر وفجأة فتحت فهمها دهشة عندما تعرفت على أحد هذين الرجلين .. أدخلهم "أيمن" الى مكتب "عمر" والذي كان فارغاً .. ثم طلب لهم مشروب واستأذنهم فى الذهاب للبحث عن "عمر"

بعدما رحل "أيمن" .. انحنى "ريهام" على أذن "ياسمين" هامسه:

"-ياسمين" عارفه شوفت مين بره ؟ .. الراجل الجامد اللى كان عندك فى المستشفى

قالت "ياسمين" باستغراب:

-راجل مين ؟

-ايه يا "ياسمين" دماغك ساحت من الشمس ولا ايه .. الراجل اللى خبطك بالعربية

-ماله ؟

-لسه شايفاه واقف بره

قالت "ياسمين" لأختها بعدم تصديق:

-وده ايه اللى هيجيبه هنا يا "ريهام" .. شكل دماغك انتى اللى ساحت من الشمس

أصرت "ريهام" قائلة:

-والله هو أنا واثقه مش هتوه عنه .. أبو برفيوم يجيب لآخر الشارع ده

ضحكت "ياسمين" ضحكه خافته .. والتفتت الى حقيبته فتحتها لتخرج منها الهاتف .. سألتها

"ريهام": "

-هتكلمى "سماح"

-أيوة هطمنا اننا وصلنا

فى هذه الأثناء ذهب "أيمن" للبحث عن "عمر" فوجده قادماً نحوه .. فقال "أيمن": "

-الجماعة وصلوا وفى مكتبك

-طيب كويس

سارا الاثنان معاً فى اتجاه المبنى الذى يحوى مكتبه ومكاتب الموظفين العاملين فى المزرعة ..

خطر لـ "عمر" سؤال .. ترى ماذا سيكون رد فعلها عندما تراه .. فهي حتى الآن لا تعلم أنه هو نفسه من صدمها بسيارته منذ فترة .. بالتأكيد ستصدم لرؤيته .. ابتسم لنفسه وهو يتوقع الصدمة التي ستشعر بها .. طرق "أيمن" الباب ودخل أولاً ثم لحقه "عمر" وأغلق الباب كانت "ياسمين" جالسه بجوار أختها .. و"عبد الحميد" يجلس على أريكة أمامهما .. تقدم الرجلان تجاه "عبد الحميد" .. فرفعت "ياسمين" رأسها لترتطم نظراتها بنظرات "عمر" .. خفق قلبها بشدة .. نظرت الى "ريهام" لتتنظر لها تلك الأخيرة بنظرة معناها (مش قولتلك ..) حاولت "ياسمين" ربط الخيوط ببعضها .. ما علاقة ذلك الرجل بـ "أيمن" هل هو صديقه صاحب المزرعة .. وهو نفسه من صدمها .. هل يعلم بأنها هي .. أم أنه صدم مثلها .. تابعته بعينها وهو يسلم على والدها .. كلا لا يبدو عليه أنه صدم أو دهش .. اذن فقد كان يعلم بأنها هي صديقة "سماح" .. لماذا اذن عرض عليها العمل في المزرعة .. أمجامله لصديقه ؟ .. أم محاوله منه لتخفيف شعوره بالذنب بسبب تلك الحادته ؟ ..

قدم "أيمن" الرجلين لبعضهما البعض قائلاً:

-أستاذ "عبد الحميد" والد مدام "ياسمين" .. الباشمهندس "عمر" صاحب المزرعة

مد "عمر" يده لوالد "ياسمين" فسلم عليه والدها ونظر اليه قليلاً وقال:

-أهلاً بيك يا باشمهندس .. بس أنا حاسس انى شوفتك قبل كده

حانت من "عمر" التفاتته الى "ياسمين" فتلاقت نظراتهما .. فأسرعت بخفض بصرها بعدما تضرجت وجنتها خجلاً .. قال فى نفسه اذن فقد تذكرته كما تذكرها .. التفت "عمر" الى والدها مرة أخرى قائلاً:

-اتقابلنا فى المستشفى بعد الحادثة بتاعة مدام "ياسمين"

قال والدها وقد تذكر:

-أيوة أيوة انت اللى خبطها بعربيتك

كان "أيمن" يتابع ما يحدث فى دهشه فسألهم:

-حادثة ايه مش فاهم

قال له "عمر": "

-هبقى أشرحلك بعدين

بعدما سلم الرجلين على بعضهما البعض التفت "أيمن" حيث تقف "ياسمين" و "ريهام"

وقال لـ "عمر": "

-مدام "ياسمين" و أختها الأنسه "ريهام" ..

اقترب "عمر" منهما ولدهشتها مد يده ليسلم عليها .. عقد لسانها .. نقلت بصرها من يده الى

وجهه فى توتر .. ثم استجمعت شجاعته وقالت بصوت خافت دون أن تنظر اليه:

-أنا أسفه مبسلمش بالإيد

عقد ما بين حاجبيه فى دهشة .. ثم أعاد يده الى جواره قائلاً:

-أهلاً بيكي فى المزرعة

ردت قائله:

-أهلاً بحضرتك

التفت الى "ريهام" مبتسماً قائلاً:

-أهلاً بيكي يا آنسه "ريهام"

-أهلاً بحضرتك

جلس الجميع .. كانت "ياسمين" تحاول استيعاب الأمر .. سمعت صوت "عمر" الرخيم يقول:

-احنا عندنا هنا فى المزرعة أقسام كتير .. منها قسم خاص بالانتاج الحيوانى .. تربيته وتسمين

.. أنواع كتير بنزبها هنا فى المزرعة .. وكمان فى معمل عشان نفحص نتايج التحليلات اللى

بنعملها أول بأول ..

ثم التفت الى "ياسمين" قائلاً:

-شوفي المكان اللي تحبي تشتغلي فيه وأنا معنديش أى مشكلة
انتظر "عمر" ردها .. فكرت فترة وساد الصمت فى الغرفة .. ثم قالت وهى تحاول قدر الإمكان
تلافي النظر اليه:

-بصراحة دى أول مرة أشتغل فيها .. وأنا بعيد عن الدراسة بقالى 5 سنين .. يعني أى مكان
هشتغل فيه محتاجه أتدرب فيه الأول .. فأنا مش فارق معايا حالياً هشتغل فى ايه تحديدا لانى
معرفةش ايه اللي هقدر أعمله وايه لأ .. لازم التجربة الأول .. عشان كدة أقترح انى أساعد
القسم اللي محتاج مساعده .. لحد ما أشوف ايه اللي أنا أصلح للشغل فيه
أوماً "عمر" برأسه وقد أعجبه ما قالت .. فهى إذن لا تعتبر نفسها فى نزله هنا .. بل انها
تنوى العمل بالفعل .. نظر اليها قائلاً:

-مفيش مشكلة عندي .. زى ما تحبي .. ولو واجهتك أى مشكلة عرفيني .. هسيبكوا النهاردة
ترتاحوا من السفر .. وبكرة ان شاء الله هعرفك على المزرعة وتبتدى شغلك
ثم نظر الى والدها قائلاً:

-اتفضلوا معايا عشان أوريكوا مكان السكن

أخذهم "عمر" الى المبنى الذى يضم غرف العمال .. كان قد جهز غرفتين .. غرفة لـ "عبد
الحميد" وغرفة بفراشين لـ "ياسمين" و "ريهام" .. كانت غرف متواضعة لكنها تفى
بالغرض .. شكره "عبد الحميد" وذهب الجميع الى غرفهم ليرتاحوا .. دخلت "ريهام" الغرفة
بعد "ياسمين" وأغلقت الباب وهتفت قائله:

-مش قولتلك هو .. مكنتيبيش مصدقانى

نظرت اليها "ياسمين" قائله:

-بصراحة أنا مصدومة .. آخر حاجه كنت أتصورها ان الراجل اللي خبطنى بالعربية يكون
صاحب "أيمن" جوز "سماح"

-سبحان الله .. الدنيا صغيره .. بس باين عليه ابن ناس أوى

قالت "ياسمين" تغير الموضوع:

-أنا تعبانة وعايظه أنام نوم عميق .. أنا معرفتش أنام طول الليل من التوتر كنت خايفه
"مصطفى" يطب علينا ومنعرفش نساfer
اقتربت منها "ريهام" مطمئنه اياها:

-خلاص انسى حاجه اسمها "مصطفى" احنا فى مكان مش ممكن يعرفه .. اطمنى

أومات "ياسمين" برأسها ودخلت فراشها وغطت فى سبات عميق .. بعد ساعتين استيقظت
على صوت طرقات على باب الغرفة .. استيقظت فزعه .. ونظرت الى "ريهام" التى استيقظت
بدورها .. ارتدت "ياسمين" اسدال الصلاة ووقفت خلف الباب وقالت:
-مين ؟

أتاها صوت رجل من خلف الباب:

-الباشمهندس "عمر" باعت الحاجات دى

فتحت الباب وأخذت من الرجل لفة شعرت بسخونتها .. أغلقت الباب ونظرت لما تحمله بدهشة
.. سألتها "ريهام" قائله:
-ايه ده ؟

قالت "ياسمين" بحدده:

-الأفندى ده فاكرايه بالظبط .. جايبين نشحت منه ..

هبت "ريهام" واقفة وقالت:

-ليه ايه اللي حصل

تركت "ياسمين" اللفة التى تحملها وخلعت اسدالها وقالت بغضب:

-الباشا باعت أكل

-والله كتر خير

قالت بحدته:

-احنا مش مستنيين منه حاجه .. هو فاكر نفسه ايه بالظبط عشان بيعتلنا أكل أكننا جايين هنا نشحت منه

هدنتها "ريهام" قائله:

-أكيد مش قصده كده يا "ياسمين" .. أكيد كل اللي قصده ان احنا فى بلد غريبه مبقلناش كام ساعة ولسه معرفناش النظام هنا ولا الأماكن هنا .. متأفريش الموضوع كده تنهدت "ياسمين" قائله:

-معلش أنا اليومين دول حسه ان أعصابى متوتره على طول فتوجهت "ريهام" الى لفة الطعام تفتحه قائله:

-مممم ريحته تجنن

تركته "ياسمين" وتوجهت الى فراشها .. فسألته "ريهام":

-ايه مش هتاكلى

قالت "ياسمين":

-لا مش عايزه .. هكمل نومى .. تصبى على خير

لكنها كانت متوترة لدرجة هرب معها النوم .. بعدما فشلت فى النوم .. قامت وارتدت ملابسها فسألته "ريهام" باستغراب:

-رايحه فين ؟

-هتمشى شوية .. هحاول استكشف المكان هنا .. احنا هنعد هنا فترة ولازم نعرف الأماكن اللي حوالينا كويس

خرجت "ياسمين" من البناء فاستقبلتها النسومات تلفح وجهها .. ورائحه الزهور تملأ أنفها .. تمشت فى المزرعة وهى تنظر خلفها بين الحين والآخر حتى لا تضل طريقها وتنتبه الى علامات حوالها حتى تهتدى الى طريق العودة .. فعلا كما قالت "سماح" المزرعة كبيرة جداً .. ويتم العناية بها الى حد كبير .. فجأة تذكرت صديقتها فأخرجت هاتفها لتتحدث معا:

-السلام عليكم

-وعليكم السلام .. المنصورة نورت

ضحكت "ياسمين" قائله:

-منوره بأهلها

قالت "سماح" بحماس:

-ها ايه رأيك المزرعة حلوة ؟

-حلوة بس دى جنه

-بجد عجبك

-جدا جدا فوق مالا تتصورى .. ما انتي شوفتيها وأكيد عارفه انها تجنن

ضحكت "سماح" قائله:

-تصورى أنا لسه مشفتهاش لحد دلوقتى

قالت لها بدهشه:

-بجد ؟

-أيوه .. بس "أيمن" وعدنى ياخذنى يفرجنى عليها .. أه صحيح قبل ما انسى .. انتي

و"ريهام" وعمو معزومين عندنا بكرة على الغدا

قالت لها "ياسمين" فى حرج:

"-سماح" بلاش تتعبى نفسك مفيش داعى

-احترمى نفسك يا "ياسمين" .. لو بجد اتعاملتى كده معايا أنا هزعل منك جدا .. متحطيش

فرق بينا لو سمحتي
ابتسمت "ياسمين" قائله:
-مش بحط فرق بس مش عايزة أتعبك
-تعبك راحة يا ستي .. ملكيش دعوة هو حد اشتكالك
صاحت "ياسمين" فجأة:
-صحيح نسيت أقولك
-خير
-تصوري صاحب المزرعة طلع مين ؟
-يعني ايه طلع مين
-طلع الراجل اللي خبطنى بالعربية يوم خطوبتك
قالت "سماح" بإندهاش:
-بتتكملى جد
-آه والله .. أنا اتصدمت أما شوفته
ضحكت "سماح" قائله:
-يعني اللي خبطك بالعربية يوم خطوبتي هو صاحب "أيمن" اللي محضرش الخطوبة
-اه .. عشان كان فى المستشفى معايا .. شوفتى الصدف
-صدفة غريبة فعلا .. زمانه هو كمان اتصدم لما شافك
قالت "ياسمين" بإستغراب:
-أهو هو ده اللي أنا مستغرباله .. مبنش عليه أنه اتفاجئ .. اما انه كان عارف .. واما انه من
النوع اللي بيعرف يخبى فعله .. أو انه مفكر نيش أصلا

انهت "ياسمين" المحادثة بعدما أكدت عليها "سماح" عزومة يوم غد .. فجأة نظرت
"ياسمين" حولها لتجد أنها قد ضلت طريقها .. فكانت تسير بغير هدى أثناء حديثها مع
"سماح" ..
فجأة سمعت صوت من خلفها قائلاً:
-كنت واثق أنك هتوهى
التفتت لتجد نفسها فى مواجهه "عمر" .. الذى استنرد قائلاً:
-شوفتك وانتى ماشيه الجهه دى وكنت واثق أنك هتوهى لان الطرق من هنا متداخله وشبه
بعضها
قالت "ياسمين" بإباء:
-كنت بتكلم فى الموبايل وعشان كده مركزتش .. لو مكنتش بتكلم كنت عرفت أرجع لوحدى
التفتت أذنا "عمر" نبرة التحدى فى صوتها .. فقال فى تحدى مماثل:
-سواء كنتى مركزة أو مش مركزة المزرعة كبيرة وصعب حد غريب يمشى فيها لأول مرة
وميتهدش
صمتت وهى تحاول أن تكتم غيظها .. فأشار بيده على الطريق الذى جاء منه قائلاً:
-امشي من هنا على طول بدون ما تحودى هتلاقى مبنى السكن فى وشك على طول
مشيت خطوتين ثم التفتت اليه قائله:
-أحب أوضح لحضرتك حاجه مهمة
التفتت "عمر" بجسده ليوواجهها وقد أولاها كامل انتباهه .. قال لها:
-اتفضلى
قالت بحزم:
-أنا جيت هنا بعد ما "سماح" أكدتلى ان المنفعة بينا هتكون متبادلة يعني شغل مقابل مرتب ..
يعني اللي عايزه أقوله ان مفيش داعى ان الصحوبية والمجاملات يكون ليهم تأثير على

وجودى هنا ..أنا هنا فى شغل وزى زى أى حد بيشتغل فى المزرعة هنا .. بدون تمييز.
قالت "ياسمين" ذلك ولم تعطيه فرصه للرد و توجهت الى الطريق الذى أشار اليه.

الفصل الحادى والعشرون

فى صباح اليوم التالى استيقظت "ياسمين" فجرا انتهت صلاتها وقرأت وردھا وظلت تدعو الله عز وجل أن يوفقھا ويصرف عنها كل سوء .. وفى الساعة السابعة ارتدت ملابسها وتجهزت للذهاب الى عملها الذى لا تعلم عنه شيئاً حتى الآن .. كان معادھا مع "عمر" فى مكتبة فى الثامنة .. لكنها جهزت نفسها قبلھا بساعة حتى لا تتأخر وحتى تتمشى قليلا وتستنشق نسمات الصباح .. خرجت من الغرفة وهى تاركة "ريهام" خلفها تغط فى نوم عميق .. خرجت من المبنى وبمجرد أن رأت الأشجار والخضرة والأزهار أمامها شعرت بسكينة لم تألفها .. أخذت نفساً عميقاً تملأ رنتيها بذلك الهواء المنعش وابتسامه صغيره تملو شفقتها .. سارت قليلا فى الإتجاه الآخر الذى لم تجربہ يوم أمس...

لكنها انتبهت جيداً للطريق الذى تسير فيه حتى لا تضل طريقها مرة أخرى .. وجدت احد المباني .. عملت انه مخصص لإستراحة الغداء .. بالفعل صاحب المزرعة يهتم بها جيداً وبنى فيها كل ما يلزم لكى تدار من الداخل ادارة ممتازة .. ما لفت نظرها أيضاً أنه يعمل على اراحة العاملين عنده .. وهذه نقطة لصالحه لديها .. جاءت الساعة الثامنة الا الثلث .. فتوجهت الى المبنى الإدارى الذى يضم مكتب "عمر" وقفت أمام الباب وأخذت نفساً عميقاً ثم طرفته .. سمعت صوت من الداخل:

-اتفضل

دخلت "ياسمين" لتجد "عمر" جالس على مكتبه يطالع الملفات أمامه .. رفع نظره اليها قائلاً :

-اتفضلى

دخلت .. وتركت باب المكتب مفتوحاً .. حانت من "عمر" التفتاته الى الباب المفتوح لكنه تجاهل الأمر ولم يعلق .. جلست "ياسمين" على المقعد أمامه وهى تنتظر ما سيقول .. عاد الى مطالعة الأوراق أمامه مرة أخر .. كانت "ياسمين" تشعر بتوتر شديد .. فهذه هي المرة الأولى التى تعمل فيها .. والتى تتعامل فيه مع رب عملها .. هذا فضلاً عن أنها والى الآن لا تدرى ما هو عملها تحديداً .. أفاقته من شرودها لتتنظر الى "عمر" المنهمك فى مطالعة الأوراق أمامه .. انتظرته أن يتحدث .. دقيقة اثنتين عشرة ربع ساعه .. لكنه بقى كما هو .. صعدت الدماء الى رأسها وهبت واقفه ومشت لتغادر الغرفة عداها سمعت صوت "عمر" الهادر من خلفها قائلاً:

-استنى عندك

وقفت "ياسمين" مكانها دون أن تلتفت اليه .. قام من مكتبه ووقف مواجهاً لها وقال لها بحده :

-رايحه فين ؟

نظرت اليه بحده مماثله قائله:

-مادمت حضرتك مشغول خلاص اجي وقت تانى

عقد "عمر" ذراعيه أمام صدره وقطب جبينه ونظر اليها قائلاً:

-أنا ما قولتكيش تعالى وقت تانى

قالت بشئ من الغضب:

-آه .. قولتى اتفضلى وتجاهلت وجودى تماماً وسبتنى أعده منتظرة ربع ساعه بدون ما تتكلم

أكنك بتحاول تذلى .. لكن المعاملة دى أنا مقبلهاش

قال "عمر" بإستغراب:

-أحاول أذلك .. انتى ازاي تفكيرك وصل لكده

-طيب فهمنى حضرتك الصح .. فضلت أعد تبص فى الورق وتكمل شغلك ولا أكنى موجودة

تفرس فيها قليلا ثم قال بهدوء:

-المعاد اللى بينى وبين حضرتك الساعة 8 وحضرتك جيتي بدري ربع ساعة .. مكنش معقول أقولك روحى وتعالى كمان ربع ساعة .. قولتك اتفضلى .. وكملت شغلى اللى كان فى ايدي لحد ما تيجي الساعة 8

شعرت "ياسمين" بالندم على تسرعها .. هو اذن لم يرد ادلالها أو التعامل معها بتعالى كما ظنت .. ندمت جداً على ما تفوهت به .. رفعت نظرها لـ "عمر" لتجده ينظر اليها فى تحدٍ .. أطرقت برأسها قليلاً ثم رفعت نظرها قائلة:

-أنا أسفة فهتم الموضوع غلط

سر "عمر" لإعتذارها .. ثم نظر اليها لحظات وقال:

-خلاص محصلش حاجه .. بس حاولى تتحكمى فى انفعالاتك أكثر من كده .. من امبارح وانتى بتتعاملى معايا بحدده ملهاش مبرر

قالت "ياسمين" ببرود تغير مجرى الحديث:

-الربع ساعه فانتت .. حضرتك مش هتوريني مكان شغلى ؟

ألتفت "عمر" وأسار الى الباب قائلاً:

-اتفضلى

سبقته "ياسمين" فى الخروج من المكتب .. سارا معاً خارج المبنى حاولت ترك مسافة بينهما .. كانت تسير وهى واضعة كفيها فى جيب معطفها لتحاول تدفنتهما .. فهى تشعر بأن الدم هرب من أطرافها .. كانت مازلت متوترة لكنها تظاهرت بالتماسك .. سارا معا دون أن يتفوه احدهما بحرف واحد .. أخذها "عمر" الى الأقسام التى تُربى فيها المواشي واقترب من أحد الرجال كان يرتدى البالطو الأبيض .. رجل فى العقد السادس من عمره تبدو عليه الوقار .. كان يقف أمام أحد العمال ويعطى له بعض التعليمات .. اقترب منه "عمر" منادياً اياه قائلاً:

-دكتور "حسن"

التفت الرجل الى "عمر" وابتسم وصرف العامل الذى كان يتحدث معه وأقبل على "عمر" قائلاً:

-صباح الخير يا باشمهندس ايه النور ده

بادله "عمر" الابتسامه قائلاً:

-صباح النور يا دكتور .. أنا جيت أعرف الدكتوراة الجديدة على المزرعة عشان تختار المكان اللى تحب تشتغل فيه..

نظر اليها الرجل وابتسم لها بحنو .. شعرت "ياسمين" بالإرتياح فهو يبدو عليه الإحترام والطيبه .. التفت اليها الرجل قائلاً بابتسامه:

-أهلا بيكي يا دكتوراة منورة منورة المزرعة

ابتسمت له قائلة:

-أهلا بحضرتك

-ها قررتى تحبى تشتغلى فى ايه .. "عمر" قالى امبارح انك لو اخترتى قسم المواشي هتكونى تحت اشرافى ان شاء الله لحد ما أخليكي أحسن من أحسن دكتور هنا.. وانتى أصلا باين عليكي ذكية وهتتعلمى بسرعه

سعدت "ياسمين" لهذا الإطراء الذى أعطاها دفعة من الثقة بالنفس .. قالت له:

-طبعا دى حاجه تشرفنى يا دكتور انى أكون تحت اشراف حضرتك .. وان شاء الله أكون تحت حسن ظنك

التفت لها "عمر" قائلاً:

-تحبى تشوفى المعمل .. والاسطبل يمكن تغيري رأيك ؟

أسرعت "ياسمين" قائلة:

-لأ .. أنا هبدأ من هنا .. ده اذا مكنش عند حضرتك مانع

فكر "عمر" قائلا:

-لا معنديش مانع .. بس الشغل فى الزرايب هنا مرهق .. لكن معمل التحاليل.....
قاطعته قائله:

-أنا حبه أشتغل هنا

نظر لها "عمر" بقليل من الشك .. لكنه هز رأسه قائلا:

-خلاص براحتك

كانت بالفعل قد شعرت بالإرتياح لهذا الرجل خاصة بأنه فى عمر والدها .. فوجدت أن العمل سيكون جيداً تحت اشرافه

التفت "عمر" الى دكتور "حسن" قائلا:

-خلاص يا دكتور "حسن" .. الدكتور "ياسمين" هتكون معاك من النهاردة ان شاء الله ..
بس خلى بالك زى ما فهمتك هى لسه مبتدأه

ضحك دكتور "حسن" قائلا:

-متقلقش احنا مش بنعذب الدكاترة الجداد هنا بناخداهم واحدة واحدة الأول

التفت "عمر" الى "ياسمين" مرة أخرى قائلا:

-لو مرتحتيش فى الشغل هنا عرفيني

قالت "ياسمين" له بخجل وقد أطرقت برأسها:

-شكراً تعبت حضرتك

انصرف "عمر" .. فطلب دكتور "حسن" من أحد العمال احضار بالطو الى "ياسمين" ارتدته
وهى تشعر بالسعادة والتفائل وبدأت يومها الأول فى عملها كطبيبه

عاد "عمر" الى مكتبه ليجد "أيمن" فى انتظاره .. أحضر له بعض الأوراق التى تحتاج الى
توقيعه أخذ "عمر" يراجعها .. عندما سأله "أيمن":

-أخبار "ياسمين" ايه ابنتت شغل

قال "عمر" وهو ينظر الى الأوراق فى يده:

-آه ابنتت شغل .. وشكلها هتتعبنى أوى

قال "أيمن" بدهشة:

-ليه ايه اللى حصل ؟

رفع "عمر" رأسه ونظر الى "أيمن" قائلا:

-واخده كل حاجه على أعصابها .. بتتعامل معايا بحده من امبارح بدون سبب

-معلش يا "عمر" يعني راعى ظروفها .. أكيد الوضع مش مريح بالنسبة لها .. سايبه بيتها

وجايه مكان غريب عشان تهرب من جوزها

-بس أنا لا عملت ولا قولت حاجه تضايقها هى اللى بتفسر تصرفاتى غلط .. بتتعامل معايا

وهى حاطه مناخيرها فى السما

صمت قليلاً ثم قال:

-وكمان هى غريبه أوى .. يعنى توقعت بعد المعاملة اللى بتعاملهاى والرسم اللى بترسمه ده

.. انها تختار مكان زى المعمل تشتغل فيه .. او أضعف الايمان الاسطبل .. لكن تصور اختارت

ايه ؟

-ايه ؟

-الزريبه

هز رأسه فى حيره قائله:

-مش قادر أفهمها .. حسستنى وهى بتتكلم معايا كأنها برنسيسه وأنا أجمت وحاولت أقلل من

قدر سموها .. وبعدين .. ألقاها تختار الشغل فى الزريبه
ضحك "أيمن" قائلا:

-خلاص هى حره مش هى اللى اختارت
قال "عمر" بتحدى:

-أنا واثق انها يوم ولا اتنين ومش هتطبيق الشغل هناك وهتجلى تترجاني انها تشتغل فى مكان
تانى .. وأنا أهو وانت أهو

-طيب أسيبك بأه وأروح أكمل شغلى
هم بأن ينصرف لكنه التفت الى "عمر" مرة أخرى قائلا:

-صحيح .. انت معزوم النهاردة على الغدا
-مين اللى عزمنى

ضحك "أيمن" قائلا:

-أنا .. هيكون مين يعني هو فى حد هنا يعبرك ويعزمك غيري
ابتسم "عمر" قائلا:

-وهتأكلنى ايه بأه يا سي "أيمن"

هرش "أيمن" رأسه قائلا:

-بصراحة معرفش .. بس "سماح" عاملة وليمة كبيرة عشان صحبتها
قال له "عمر" باهتمام:

-هى عازمة "ياسمين"؟

-اه "ياسمين" وأختها وأبوها.. فقولت أعزمك انت كمان أهو تريح معدتك من أكل المطاعم
شويه

-مش عايز أضايقكوا يا "أيمن"

-تضايقنا مين يا عم .. أصلا هيبقى البنات أعيدين مع بعض .. واحنا اعيدين مع بعض .. هتيجي
مفيهاش نقاش .. يلا أشوف شغلى بأه .. سلام

انتهى عمل "ياسمين" فى يومها الأول ... كانت سعيدة بالعمل تحت اشراف دكتور "حسن"
كان الرجل بحراً من العلم .. استفادت منه كثيراً حتى أنها أحضرت دفتر وقلم لتدون ما يقول ..
كان الرجل لا يفتر عن الإدلاء بمعلوماته الطبية ونصائحه وطرق تعامله مع الحالات المختلفة ..
أحبت كثيراً العمل معه .. كان سريعاً نشيطاً ولديه خبره كبيرة فى العمل .. وأحبت "ياسمين"
ذلك كثيراً .. بعدما انتهت عملها .. كانت فى طريقها الى المبنى السكنى عندما تلقت اتصالاً من
سماح:

-ها خلصتى شغل

-اه لسه مخلصه حالا

-ايه اخبار الشغل فى المزرعة

قالت "ياسمين" بحماس:

-ممتاز يا "سماح" قابلت هنا دكتور مش قادرة أقولك انسان محترم جدا وكمان شاطر جدا
جدا ومش من النوع اللى ببخل يديكي معلومة .. بالعكس طول اليوم مبطلش كلام عن الحالات
بجد استفدت منه جدا

قالت "سماح" وقد سرها فرح وحماس صديقتها بالعمل فى المزرعة:

-كويس أوى الحمد لله .. بما انك خلصتى بأه فجهزى نفسك انتى و"ريهام" وعمو

قالت "ياسمين" بحرج:

-تعبتك أنا عارفه

-يا بنتى بطلى الهبل ده الله طول اليوم وأنا فرحانه ومش عارفه أعملكوا ايه ولا ايه

قالت "ياسمين" بامتنان:

-تسلمي يا "سماح"
ثم استطردت قائله:

-انتي وحشاني جدا .. ومش مصدقه اني اخيرا هشوفك

-انتي اللي وحشاني بجد .. يلا بسرعة بأه منتظراكو .. اه "ياسمين" انتوا هتيجوا مع
"أيمن" فى العربية

قالت "ياسمين" بحرج:

-لأ يا "سماح" قوليلي العنوان واحنا هنيجي

-يا بنتي أصلا "أيمن" عندك فى المزرعة .. ايه اللي يخليكو تتشحطوا فى المواصلات ..
وكم ان فى بلد غربية .. يلا اخلصى جهزى نفسك .. وهو أما يخلص شغله هيتصل بيكو

ذهب "ياسمين" الى غرفتها وأخذت دشا وارتدت ملابسها واستعدت هي و "ريهام" ووالدهما
.. وعندما اتصل "أيمن" أعطت الهاتف لوالدها وأخبره "أيمن" أنه ينتظرهم أمام بوابة
المزرعة .. ركب ثلاثتهم وانطلقوا الى بيت "سماح" .. تعانقت الصديقتان بشدة ودموع الفرح
يبلل وجهيهما .. لكم اشتاقت الى "سماح" والسمر معها .. كان "ياسمين" فى قمة سعادتها
فها هي أسرتها ملتفة حولها وصديقتها المقربة بجوارها .. كانت وجوه الجميع سعيدة ضاحكة
.. فتساءلت "ياسمين" هل توجد سعاده أكثر من ذلك .. جميع من تحبهم ملتفون حولك
يتسامرون ويضحكون .. كانت تشعر بسعادة فارقت قلبها مدة طويلة .. فى ذلك اليوم نسيت كل
مشاكلها وأحزانها .. ولم تغادر الابتسامه شفيتها قط .. أثناء ما كانت تجهز الطعام مع
"سماح" فى المطبخ .. سمعت جرس الباب .. فقالت "سماح" على الفور:
-ده أكيد "عمر"

التفتت "ياسمين" اليها قائله بدشهة:

"-عمر" مين؟

"-عمر" صاحب "أيمن"

هزت "ياسمين" رأسها .. فلم تتوقع أن توجه له الدعوة أيضاً .. قالت "سماح" شارحه:
-بيصعب عليا أوى .. عايش لوحده مفيش حد معاه .. وعشان كده "أيمن" عزمه النهارده
سألت "ياسمين" صديقتها:

-عايش لوحده ليه .. وأهله فين؟

-أهله فى القاهرة عايشين هناك .. وهو كمان كان عايش هناك .. بس استقر هنا من شهر
ونص تقريبا

-هو عايش فى المزرعة مش كده؟

-أيوة فى فيلا صغيرة .. أكيد شوفتها

أومات برأسها وصرفت ذهنها الى الإهتمام بالأطباق التي تحضرها.

التف الثلاث رجال حول طاولة الطعام .. أشاد "عمر" بالأكل قائلا:

-الأكل ممتاز يا "أيمن" مراتك نفسها حلو فى الأكل

ابتسم "أيمن" قائلا:

-تسلم يا "عمر" .. يلا عقبالك انت كمان ما تترحم من أكل النواشف

قال "عبد الحميد" لـ "عمر":

-انت مش متجوز يا باشمهندس

ابتسم له "عمر" قائلا:

-لأ يا عم "عبد الحميد"

-ليه يا ابني كده ده أنا لما كنت فى سنك كنت متجوز ومخلف البنين كمان .. وانت راجل ما

شاء الله عليك متتعيش

اختفت ابتسامه "عمر" ورد قائلا:

-لسه ملقتش بنت الحلال يا عم "عبد الحميد" .. ادعيلي الأقيها

-ربنا يريحك بالك ويكتبك الخير يا باشمهندس

ثم استطرد قائلا:

-ويجزيك خير على اللي عملته معانا ومع بنتي .. جميلك على راسنا من فوق

أسرع "عمر" قائلا:

-لا جميل ولا حاجة يا عم "عبد الحميد "

لمعت عينا "عبد الحميد" بالدموع وقال موجهها حديثه لـ "عمر" و "أيمن: "

-لولاكم مكنتش عارف ايه اللي كان ممكن يحصل .. كان زمانا تحت رحمة اللي ميتسماش ده

.. أنا لما عرفت انه حاول يخطفها كنت حاسس اني هموت من الرعب لأن ملناش ضهر نتسند

عليه .. وهو شراني هو وأهله .. ومش هيسيبيوا بنتي فى حالها

تحدث "أيمن" ليطمئنه قائلا:

-متقلقش يا عم "عبد الحميد" هو مستحيل يعرف مكانها هنا

قال "عمر: "

-وكمان مفيش حد غريب بيدخل المزرعة .. مبيدخلهاش الا اللي شغالين فيها بس .. يعني

اطمن

قال "عبد الحميد" بتأثر:

-ربنا يباركلكوا ويجزيكوا خير ويفتحها عليكوا ويكفيكوا شر طريقكوا

فى صباح اليوم التالى .. كان "عمر" فى مكتبه بالمزرعة عندما سمع طرقات صغيره على

الباب .. فهتف قائلا:

-اتفضل

انفتح الباب وانغلق بهدوء .. سمع صوت أنثوى يقول:

-صباح الخير يا باشمهندس "عمر"

رفع رأسه ليستطلع القادم .. كانت فتاة فى بداية العقد الثالث بيضاء البشرة ذات عينييين

عسليتين جميلة الملامح .. رسمت على شفثيها ابتسامه كبيرة وتلعت فى عينييه بجرأة .. نظر

اليها قائلا:

-أيوه يا دكتورة "مها" .. خير

كانت "مها" دكتورة تحاليل تعمل فى معمل المزرعة .. مدت يدها بملف صغير وقالت بنفس

الإبتسامه ودون أن ترفع عينيها عنه:

-ده ملف تحاليل العينات اللي أخذناها الاسبوع ده جبته لحضرتك عشان تطلع عليه

نظر اليها بصرامة قائلا:

-أنا قلت لحضرتك أكثر من مرة يا دكتورة ان النتائج تتجمع وتتعرض عليا كل شهر .. أنا مش

فاضى أطلع عليها مرة ولا مرتين فى الاسبوع .. وسبق وقولت لحضرتك الكلام ده أكثر من

مرة

شعرت "مها" بالارتباك وقالت:

-أنا بس كنت حبه ان حضرتك تشوفهم أول بأول عشان.....

فأطعها قائلا:

-لو عايز أشوفهم أول بأول هطلب من حضرتك كده

لم تجد ما تقول .. صممت قليلا ثم قالت:

-أنا أسفه يا باشمهندس انى عطلتك .. بعد اذنك

ثم توجهت الى الباب وانصرفت .. حرك "عمر" رأيه يمينا ويسارا بسخرية ثم انكب على عمله ليكمله

كانت "ياسمين" متجهه الى مبنى استراحة الغداء عندما وقع نظرها على "عمر" أشاحت بوجهها واستمرت فى طريقها .. عندها نادى عليها ليووقفها قائلا:
- لحظة يا دكتورة لو سمحتي
وقفت "ياسمين" واستدارت نحوه .. أقبل عليها قائلا:
- أخبار الشغل ايه .. مرتاحه فى المكان اللي اخترتيه
ردت قائله:

- أيوة الحمد لله

تفرس فيها قائلا:

- يعني الشغل مش متعب .. ومناسب ليكي

- أيوة الشغل ممتاز ومناسبنى جدا

فى تلك الأثناء كانت "مها" متوجهه الى مبنى الاستراحة فرمقت "ياسمين" بنظرة نارية .. تعجبت "ياسمين" لهذه الفتاة التى ترمقها بتلك النظرات وهى لا تعرفها .. سمعت "عمر" يقول:

- طيب لو واجهتك مشاكل عرفيني

قال ذلك ثم تركها وانصرف .. توجهت "ياسمين" الى المبنى و أحضرت صنية طعامها والتفتت لتبحث عن مكان لتجلس فيه .. كانت احدى الفتيات جاله على طاولة بمفردها أشارت لـ "ياسمين" كى تتقدم نحوها .. ذهبت اليها "ياسمين" فابتسمت اليها الفتاة قائله:

- انتى الدكتورة الجديدة .. انفضلى اعدى معايا

ابتسمت لها "ياسمين" وجلست فى المقعد المقابل لها

مدت الفتاة يدها الى "ياسمين" وقالت لها مبتسمة:

- أنا دكتورة "شيماء"

بادلتها "ياسمين" الابتسام وسلمت عليها قائله:

- و أنا دكتورة "ياسمين"

- أهلا بيكى .. أنا عرفت انك شغاله تحت اشراف دكتور "حسن"

اتسعت ابتسامه "ياسمين" قائله:

- بالظبط كده

قالت "شيماء" بمرح:

- أنا بأه شغاله فى الاسطبلات انا المشرفة على جميع الخيول هنا

-كويس أوى .. واضح انك شاطرة أوى

ضحكت "شيماء" قائله:

-متقلقليش بكرة تبقى زيي و أحسن

فى هذه الأثناء رأت "ياسمين" الفتاة التى كانت ترمقها بالخارج تتقدم نحول طاولتهما .. قالت

الفتاة لـ "شيماء" ونظراتها مصوبة تجاه "ياسمين": "

-مش تعرفينا يا شيماء"

قالت "شيماء" وكأنها تستثقل المهمة:

-دكتورة "مها" بتشتغل فى معمل المزرعة .. دكتورة "ياسمين" بتشتغل فى قسم المواشي

تحت اشراف دكتور "حسن"

رفعت "مها" حاجبيها قائله بخبث:

-مواشي !! بس دى شغلانه ذكوريه أوى .. أنا لما شوفتك واقفه بتتكلمى مع الباشمهندس

"عمر" كنت فكراكى حد مهم....

ثم نظرت الى "ياسمين" بسخرية قائلة:

-بس تعرفى الشغلانه لايقه عليكى

قالت ذلك وانصرفت .. كانت "ياسمين" بالفعل تحب عملها .. لذلك تضايقت من كلام تلك الفتاة .. واحتارت أكثر .. لماذا تتحدث اليها بتلك الطريقة .. ولماذا ترمقها بتلك النظرات .. أخرجتها

"شيماء" من حيرتها قائلة:

-سيبك منها هي متغاضة منك بس

التفتت اليها "ياسمين" قائلة بدهشة:

-ليه أنا معمלתهاش حاجه ؟

-كفاية انها شافتك واقفه بتكلمي مع الراجل اللى هتموت عليه

قالت "ياسمين" باستغراب:

-قصدك مين

"-عمر الألفى"

أطرقت "ياسمين" رأسها فى صمت .. أكملت "شيماء" حديثها وكأنها تبوح بسر من أسرار الدولة:

-أصلها حظه عينها عليه من زمان .. وكل شويه تتسهوك وتروحله مكتبه بأى حجه .. لا وإيه كانت مفهمانا انه معجب بيها وانهم خلاص على وشك الارتباط .. لحد ما خدت زمبه كبير أوى رفعت ياسمين رأسها ونظرت اليها متسانله .. فإنتقلت "شيماء" الى المقعد المجاور لـ "ياسمين" وأكملت "شيماء" قائلة:

-لقيناه فجأة خطب .. ونأبها طلع على شونه .. عرفنا ساعتها انها كانت بتسرح بينا .. بس ايه خطب تحت بنت موزه يا "ياسمين" تحل من على حبل المشنقة .. واهلها ناس واصلين أوى .. الباشمهندس "عمر" جنبها هنا من فترة هي وأمها و أبوها .. حته بنت عاملة زى الملبن .. لأ وأمها تشوفها تقولى أختها مش أمها

كانت "ياسمين" تستمع الى حديث "شيماء" بصمت وبدون تعقيب .. صمتت قليلا ثم قالت:

-مادام خاطب .. هي عايزه منه ايه

-لأ ما هو فسخ خطوبته من شهرين كده

رفعت "ياسمين" حاجبيها باستغراب .. فأكملت "شيماء" قائلة:

-كانوا خلاص محددين معاد الفرح .. وفجأه أول ما الفرح قرب .. سابها وفسخ الخطوبة ..

أكد طبعا اللى زي ده مش عايز يقيد حريته بالجواز عشان يبقى على راحته مع البنات ..

وتلاقيه مكش ناوى يتجوزها من الاول بس حب يقضيله يومين

شعرت "ياسمين" بالدهشة من كلام "شيماء" وقالت:

-مش للدرجة دى يعنى

فألت "شيماء" بثقه:

-لأ للدرجة دى وأكثر من كدة كمان .. واحد غنى جدا ووسيم جدا والبنات بتترمي تحت رجليه

ايه اللى يخليه يقطع علاقاته دى كلها ويتجوز..

أنهت "ياسمين" غداها وانصرفت الى عملها .. ودون أن تقصد أخذت تفكر فى كلام

"شيماء"

أنهت "ياسمين" عملها وأخذت تمشى فى المزرعة .. وصلت الى احدى الأشجار الكبيرة ..

كانت الشجرة كبيرة ولها شكل مهيب .. أعجبت "ياسمين" بجمالها وبالطريقة التى تم بها تقليم

أوراقها فأعطتها شكل جذاب .. توجهت اليها لتحتمى بظلها .. أسندت ظهرها على أحد فروعها

.. وشردت بعيداً .. كانت تشعر فى هذا المكان بسكينة غريبه .. وكأنه لا يوجد فى هذا العالم

سواها .. والسماء .. والمساحة الشاسعه من الخضرة أمامها

تمنت لو تبقى هنا للأبد .. فى هذا المكان وفى هذا الموضع .. جلست على غصن كبير وأسندت رأسها على الشجرة .. وأغمضت عينيها تستمع الى تغريد العصفير على الشجر .. تستمتع بالنسمات التى تلمح وجهها بنعومه .. ارتسمت ابتسامه على شفيتها وهى تستمتع بما حولها وهى مغمضة عينيها فى صمت

كان "عمر" يسير على غير هدى حتى استوقفه منظر الفتاة التى تجلس مغمضة العينين على غصن شجرته .. نعم شجرته .. الشجرة الوحيدة التى زرعا بيديه مع جده وهو صغير .. ظل يتأمل ابتسامتها العذبة البادية على محياها .. والهدوء والراحة والسكينة التى تبدو على وجهها .. أطلق احد الطيور صوتا عاليا بالقرب من "ياسمين" فابتفضت خانقه تنظر للطائر وهو يبتعد .. التفتت أمامها لتجد "عمر" الذى يقف على بعد أمتار منها .. واضعاً يديه فى جيب بنطاله ويوجه نظره اليها .. شعرت بالخجل .. وتساءلت منذ متى وهو يقف هنا .. أوقف يشاهدها أم استوقفه شئ آخر .. نهضت من على الجذع وأطرقت برأسها سارت لتعود الى غرفتها .. مرت بجواره . فالتفت اليها واستوقفها قائلاً:

-لحظة واحدة لو سمحتى

التفتت اليه دون أن تنظر اليه .. راقب "عمر" حمرة الخجل التى تتصاعد الى وجنتيها .. مشهد لم يعتاده من قبل .. وقف لحظات ينظر لها فى صمت حتى تملمت الفتاة قائلاً:

-خير يا باشمهندس فى حاجه ؟

أدخل يده فى جيب الجاكت وأخرج حفنة من المال كان قد أعدها سلفاً ومد يده بها اليها .. نقلت بصرها من وجهه الى يده ثم الى وجهه مرة أخرى وقالت باستغراب:

-ايه ده ؟

قال بهدوء:

-مرتبك

أعادت ما قال بدهشة:

-مرتبى ؟

ابتسم ابتسامه زادته وسامة قائلاً:

-أيوة مرتبك .. أمال كنتى فاكركه هنشغلك عندنا مجاناً ولا ايه

صمتت قليلاً ثم قال:

-صحيح دى أول مرة أشتغل فيها بس اللى أعرفه ان الناس بتقبض مرتبها آخر الشهر بعد 30

يوم .. مش بعد 3 أيام

قال وهو مازال محتفظاً بابتسامته:

-تمام .. بس انتى حالة خاصة

نظرت اليه "ياسمين" وقالت بحزم:

-قولت لحضرتك قبل كدة تعاملنى زى أى حد بيشتغل هنا بدون تمييز

-طيب خديهم يمكن تحتاجيهم .. ومن الشهر الجاى تقبضى زى زمايلك

قالت ببرود:

-لأ شكراً .. مش هحتاجهم

نظر اليها "عمر" بشئ من الغضب ثم أعاد المال الى جيبه قائلاً:

-براحتك

صمت قليلاً ثم قال:

-أنا مش فاهم انتى ليه بتتعاملنى كده

نظرت اليه صامته .. فأكمل قائلاً:

-بتتصرفى معايا بحده من أول يوم جيتى فيه هنا .. واسلوبك معايا غريب

نظرت اليه ببرود قائله:

-وايه الاسلوب اللى عايزنى أتعامل بيه مع حضرتك ؟

-المفروض اننا معرفة .. يعنى أخويا وصاحبى متجاوز أعز صحابك .. يعنى المفروض يكون فى ود وعشم فى التعامل بينا .. تجاملينى أجامك .. يبقى فى علاقة مريحة بينا .. تبتسمى فى وشى بدل ما انتى مركبالى الوش الخشب ده .. أنا شوفتك وانتى بتتعاملى مع دكتور "حسن" بتتعاملى معاه بطريقه طبيعیه وبدوق وبتبتسمى فى وشه .. يعنى كل اللى طالبه انك تتعاملى معايزى أى بنت عادیه

أطرت "ياسمين" وقد بدأت تفهم طبيعة هذا الرجل الواقف أمامها .. والذى اعتاد على تهافت الفتيات عليه .. واللاتي يحاولن جذبته اليهن بالكلمة تارة وبالابتسامه تارة أخرى .. فسار هذا عنده هو المعتاد والطبيعي والمألوف .. لذلك هو يجد طريقة تعاملها الجادة معه ووضع الحدود فى الكلام .. شئ غريب على مثله .. لكنه سيعلم قريباً بأنها ليست كغيرها رفعت رأسها ونظرت اليه وقالت بهدوء وحزم:
-أنا مش زى البنات اللى حضرتك بتتعامل معاهم فظر اليها صامتاً فاستطردت قائله:

-دى طبيعتى وده اسلوبى ومش هغيره عشان أى حد .. حتى لو كنا معرفة زى ما حضرتك بتقول .. فده مش معناه ان مفيش حدود بينا نظر اليها وقد ضاقت عيناه فى صمت .. تركته وانصرفت .. تابعها بعينيه وهى تسير فى طريقها بثقه .. رغم الضيق الذى شعر به من اسلوبها معه .. إلا أنه وجد ابتسامه صغيرة ترتسم على شفتيه ببطء

طرق والدها باب الغرفة ففتحت له "ريهام" دخل وجلس مع بنتاه ووجه حديثه الى "ياسمين" قائلاً:

-ايه يا "ياسمين" مرتاحه فى شغلك
ابتسمت له قائله:

-جداً يا بابا الحمد لله .. المكان هنا جميل .. والشغل مع دكتور "حسن" مفيد جداً
-طيب الحمد لله .. يعنى مفيش حد بيضيقك هنا
-لا يا بابا اطمن

-عامه لو حد ضايقتك قولى للباشمهندس "عمر" على طول
اختفت ابتسامتها وقالت لوالدها:

-لو حد ضايقتى أنا أقدر أتصرف معاه كويس .. مش محتاجه حد يدافع عني .. اطمن عليا يا بابا

فى تلك الليلة أغمضت عينيها فى محاولة للاستسلام للنوم .. لكنها وجدت نفسها تفكر فى كلام "شيماء" عن "عمر" .. ترى لماذا ترك خطيبته .. هل هو شخص لاهى كما تصوره "شيماء" .. هل له علاقة فعلاً بـ "مها" .. هل هى الوحيدة أم علاقاته امتدت لفتيات غيرها بالمزرعة .. اذا كان فعلاً شخص عابث فلماذا ترك القاهرة وأتى لتلك البلدة الريفية .. أله حبيبته هنا لا يقوى على فراقها ؟ .. لامت نفسها بشدة على الإهتمام بمعرفة اجابات تلك الأسئلة التى انطلقت كالشلال فى رأسها .. حاولت نفض تلك الأفكار من رأسها .. لكن عيناه السوداوين العميقتين ظلت صورتها تطاردها فى رأسها .. هبت جالسها وهى تشعر بالغضب من نفسها .. تروضات وصلت ركعتين وانشغلت بقراءة احدى الروايات لتصرف تفكيرها عنه.

الفصل الثانى والعشرون

مرت عدة أيام و "ياسمين" سعيدة بعملها فى المزرعة .. وتحت اشراف دكتور "حسن" كان مريحاً فى التعامل ولم تحدث مشاكل بينهما .. كانت مبهورة بعلمه وبمهارته فنتعلم منه كل يوم شيئاً جديداً .. أيضاً دكتور "حسن" أعجب كثيراً بذكائها وحماسها ونشاطها وسرعتها فى التعلم .. فكان يعتبرها تلميذته النجيبه ويتنبأ لها بمستقبل باهر فى عملها .. شعر الأسى عليها عندما علم منها بقصتها والسبب الذى دفعها هى وأهلها للمجئ الى المزرعة .. طمئنها وبث الأمل فيها بأن فرج الله قريب .. عليها فقط أن تتحلى بالصبر وسيخرجها الله من محنتها...

فى ذات يوم قدم الى المزرعة رجل فى العقد السادس من عمره .. أتى بسيارته الفارهه وبدلته الأنيقة استقبله "عمر" بعدما نزل من سيارته أمام بيت المزرعة :
- أهلا بيك يا أستاذ "شاكر"

سلم عليه الرجل قائلاً:

- أهلا بيك انت يا بشمهندس .. أنا متشكر انك هتديني شوية من وقتك

- لا أبدا ازاي حضرتك تقولى كده .. اتفضل

أدخل "عمر" الرجل الى بيت المزرعة .. كان الرجل هو عميل من عملاء "عمر" الذين يشتررون ما تنتجه المزرعة من ألبان .. رحب "عمر" بالرجل وقدمت لهم الخادمة أقداح الشاى الساخن .. تحدث الرجل قائلاً:

-بصرحة أنا كنت عايز منك خدمة يا بشمهندس واتمنى انك متخذلنيش
أسرع "عمر" قائلاً:

-طبعا يا أستاذ "شاكر" اتفضل

-أنا ابني الصغير فى آخر سنة له فى كلية الطب البيطرى .. وانت عارف ان أى شغل بيتطلب خبره .. الولد معدوش أى فكره عن أى شئ .. انت عارف ان فى مصر للأسف بندرس فى الجامعة حاجة والشغل العملى بيكون حاجة تانية خالص .. فأنا كنت حابب بما انه فى آخر سنة انه يبجي يتدرب عندك هنا فى المزرعة .. أنا عارف ان عندك دكاترة ممتازين جدا وانك مش بتشغل عندك الا ناس كفائتها عاليه .. أنا بس عايزه يكون تحت ايديهم .. وكمان ده هيفيده فى امتحاناته السنة دى لان عندهم جزء كبير عملى .. وهو زى ما قولت ميح خالص
أسرع "عمر" قائلاً:

-طبعا يا أستاذ "شاكر" .. يشرفنا وجوده فى المزرعة وهنا عندنا دكاترة ممتازين وان شاء الله يستفاد منهم

-متشكر جدا يا بشمهندس وهو ده كان العشم

انتهت المقابلة وانصرف "شاكر" ... حان معاد استراحة الغداء عندما تركت "ياسمين" ما بيدها لتذهب لتتناول طعامها .. لمحت عند البوابة فلاحه بسيطة كبيرة فى السن تتحدث مع الرجل الواقف على البوابة والرجل يحاول اخراجها وهى تأبى أن تخرج .. لفت المشهد نظر "ياسمين" خاصة وأن الرجل كان يتعامل مع السيدة الكبيرة بغلظة وخشونة .. اقتربت من البوابة فسمعت تلك السيدة تقول:

-أبوس ايديك يا ابني دخلنى .. أنا زى أمك

رد عليها الرجل وهو يدفعه لتخرج خارج المزرعة:

-لا أمى ولا أبويا .. ممنوع يامه محدش بيدخل هنا غير اللى بيشتغلوا بس

-يا ابني ما انا كنت بشتغل هنا .. أبوس ايديك دخلنى

-يا ست امشى بأه الله يسهلك

تقدمت "ياسمين" منهما قائلة:

-خير فى ايه ؟

قالت السيدة بسرعة وكأنها تستنجد بـ "ياسمين": "

-الهي يكرمك يا بنتي خليه يدخلني .. أنا ورايا عيال اعمل ايه بس يا ربي
وجهت "ياسمين" كلامها الى الرجل قائله:
-حضرتك مش عايز تدخلها ليه
-عشان ممنوع حد يدخل الا اذا كان بيشتغل فى المزرعة ودى مبتشتغلش فيها
انفجرت السيدة باكية وقالت:
-طيب أعمل ايه بس يا ربي ..
رق قلب "ياسمين" لحال تلك السيدة وأخذتها وخرجت من البوابة لتتحدث معها .. ربتت بكفها
على كتف السيدة قائله:
-خير يا حجه مالك فى ايه
قالت السيدة وهي مازالت تبيكى:
-أنا يا بنتي كنت بشتغل هنا .. بس عندي عيل تعب وكنت عده جمبه فى المستشفى ..بعيد
عنك وعن السمعيين جاله التهاب جامد فى الرئه وكان يا حبت عيني بيتوجع أوى .. دخلت بيه
المستشفى وغبت فترة .. رجعت لقيتهم حسبى الله ونعم الوكيل فيهم طردوني من الشغل عشان
غبت فترة طويله
-طيب وليه مشرحتلهمش ظروفك
-هما يا بنتي مديني فرصة أشرح حاجه .. أنا ورايا كوم لحم أعمل ايه فيهم بس يا ربي
وانفجرت مرة أخرى فى البكاء .. وأمسكت يد "ياسمين" قائله:
-انشاله ينجيكى ويكفيكى شر المرض ساعديني أدخل أتكلم مع رئيس العمال يمكن يرضى
يرجعنى تانى
كاد قلب "ياسمين" أن ينفطر لحال تلك السيدة المسكينة وقررت أن تساعدنا .. فقالت لها:
-طيب أنا هساعدك يا حجه وهشرحلهم ظروفك .. تعالى بكره فى نفس المعاد وأنا أقولك عملت
ايه
حاولت السيدة تقبيل يدها فسحبته "ياسمين" بسرعة .. قالت لها:
-ربنا يباركك يا بنتى ويكفيكى شر طريقك .. أنا كل يوم باجى هنا .. هاجى بكره ويارب أسمع
خبر حلو
ابتسمت لها "ياسمين" فى حنو وربتت على كتفها قائله:
-ادعى ربنا وان شاء الله يرجعوكى الشغل تانى
تركتها "ياسمين" ودخلت وهي متأثره بشدة .. كيف يطردون سيدة مثلها وهي فى أمس
الحاجة للمال .. توجهت الى المبنى الإدارى حيث مكتب "عمر" .. طرقته طرقات خفيفة
..سمعت صوت من الداخل:
-اتفضل
دخلت .. رفع "عمر" رأسه ليجدها أمامه .. هز رأسه لتتقدم .. تركت الباب مفتوحاً كما المرة
الماضية ودخلت وقفت أمام المكتب قائله:
-صباح الخير يا بشمهندس
رد "عمر": "
-صباح النور
نظر "عمر" الى الباب المفتوح .. ثم نظر اليها قائلاً:
-هو مينفعش الباب يتقفل .. لازم اللي رايح واللى جاى يتفرج علينا
ارتبكت "ياسمين" نظرت الى الباب ثم اليه .. كان يرقب ردود أفعالها .. قالت بتوتر:
-أسفه مش هينفع أقفله
همت بالإنصراف ثم قالت:
-خلاص مفيش مشكلة شكراً

أوقفها "عمر" قائلاً:

-استنى

الفتت اليه فنظر اليها قائلاً:

-اننى على طول متسرحه كدة

صمتت ولم تجب .. أشار برأسه الى الكرسي أمام المكتب قائلاً بصراحة:

-اقعدى

تقدمت "ياسمين" وجلست .. نظر اليها .. كانت تحاول استجماع قواها وترتيب أفكارها ..

صمتت لحظات ثم التفتت اليه تنظر اليه قائله:

-فى واحدة كانت بتشتغل هنا فى الحلب .. هى ست كبيرة فى السن .. وشكلها على أد حالها ..

كانت واقفة على البوابة الراجل مش راضى يدخلها .. اتكلمت معاها .. طردوها من الشغل

عشان كانت بتغيب كثير.. بس هى معذوره ابنها كان تعبان فى المستشفى وهى كنت أعده جمبه

كان "عمر" يراقبها وهى تتحدث وعلى وجهها ملامح التأثر لحال تلك السيدة .. بلعت ريقها ثم

استطردت قائله:

-هى غلبانه أوى .. وملهاش شغل تانى تصرف منه على ولادها .. يعنى لو ينفع .. يعنى ..

حضرتك..

قاطعها قائلاً:

-بتتوسطيلها عندى يعنى ؟

بللت شفيتها بلسانها وقد شعرت أن حلقها جاف من التوتر .. قالت:

-لو ينفع حضرتك ترجعها الشغل تانى يبقى خدت فيها ثواب .. لأن فعلا شكلها محتاجة للشغل

أوى

صمت "عمر" لحظات ثم نظر اليها قائلاً:

-لو فعلا مشوها للسبب ده يعنى بسبب غيابها .. فأنا هقول لرئيس العمال يرجعها تانى

لم تصدق "ياسمين" ما سمعت .. شعرت بفرحة عارمة أن استطاعت مساعدة تلك السيدة

الفقيرة .. نظرت الى "عمر" وهتفت والابتسامه تعلقو شفيتها:

-بجد ؟ .. يعنى هترجعوها الشغل ؟

راقب "عمر" ابتسامتها والفرحة التى تعلقو وجهها من أجل سيدة لا تعرفها ولم تلتقى بها من

قبل .. ساد الصمت .. لاحظت "ياسمين" تفرسه فيها .. فشعرت بحمرة الخجل وهى تتصاعد

الى وجنتيها فخفضت بصرها .. قال بعد برهه:

-أيوة .. لو كان زى ما قالت هو ده السبب اللى طردوها عشانه .. يعنى متكنش عملت حاجه

غلط سرقته مثلاً أو سببت تلفيات

شكرته "ياسمين" قائلاً:

-شكراً لحضرتك .. وهى عامة بتيجي تقف كل يوم أمام البوابة .. وهى هتيجي بكرة عشان

تعرف اذا كانت هترجع الشغل ولا لأ

هز "عمر" رأسه .. فنهضت "ياسمين" ونظرت اليه قائله:

-متشكره مرة ثانية

ثم خرجت وأغلقت الباب وراءها .. ظل "عمر" ينظر الى الباب المغلق و هو يفكر فى رقة قلب

تلك الفتاة .. التى شعرت الفرحة الذى أنار وجهها من أجل تلك السيدة الفقيرة .. كم هى رقيقه ..

تحب الخير للآخرين .. كان مستغرقاً فى تفكيره عندما طرق "أيمن" الباب ودخل قائلاً ببشاشة

:

-ازيك يا "عمر"

ابتسم له "عمر" قائلاً:

-تمام الحمد لله

جلس "أيمن" على المقعد التى كانت تجلس فيه "ياسمين" منذ قليل .. تفرس فى صديقه

الشارد الذهن قائلا:
 -ايه مالك فى ايه
 ابتسم "عمر" قائلا:
 -لا أبداً مفيش حاجه
 قال "أيمن" لصديقه وهو يشير الى ذراعه اليسرى الموضوعه على المكتب:
 -أخبار دراعك ايه دلوقتي
 رفع "عمر" ذراعه ونظر اليه قائلا:
 -الحمد لله .. من ساعة ما فكيت الجبس وأنا حاسس انها أحسن .. المشكلة بس انى كل فترة
 بحس فيها بتنميل شديد ومبكنش قادر احركها
 قال "أيمن" بقلق:
 -ما قولتش للدكتور اللى متابع معاك الكلام ده ليه ؟
 تنهد "عمر" قائلا:
 -قولتله وقالى طبيعى .. ده نتيجة لضعف الأعصاب فى دراعى بعد الحادثة .. وان العلاج
 الطبيعى هيقوى الأعصاب وهرجع ايدي تانى زى الأول
 حث "أيمن" صديقه قائلا:
 -يباه ركز فى موضوع العلاج ده ومتهملوش يا "عمر"
 ابتسم له "عمر" فى صمت .. ثم استأذن "أيمن" فى الإنصراف الى عمله.

دخلت "ياسمين" غرفتها لتجد "ريهام" جالسه على فراشها .. هبت واقفه بمجرد أن رأتها
 وقالت:
 -أخيرا شرفتى سيادتك
 قالت "ياسمين" وهى تغير ملابسها:
 -معلش يا "ريهام" النهاردة كن يوم متعب جدا واتأخرنا شوية
 قالت "ريهام" بتبرم:
 -على طول انتى مشغولة وبابا كمان مشغول فى الشغل الجديد اللى شافهوله البشمهندس
 "عمر" .. وأنا أعده لوحدى طول النهار
 نظرت الهيا "ياسمين" قائله:
 -ما انتى بتذاكرى يا "ريهام" عشان خلاص الترم قرب يخلص
 قالت بزهق:
 -اتخنقت خلاص .. طول النهار مذاكره مذاكره .. بجد اتخنقت نفسى نطلع أنا وانتى نتفسح
 شوية .. نشوف ناس نعد أعده حلوة
 ابتسمت لها "ياسمين" قائله:
 -خلاص اتفقنا .. بعد بكرة الجمعة ان شاء الله .. تعالى نطلع نتفسح فى أى مكان ونغير جو
 هتفت "ريهام" بفرحه:
 -بجد يا "ياسمين" ؟ ... هيببيبيبييه
 قالت "ياسمين" بفرحة:
 -ايه رأيك كمان أكلم "سماح" واهى تغير جو معانا هى كمان
 ابتسمت "ريهام" قائله:
 -طبعا فكرة حلوة جدا كلميها دلوقتي عشان تعمل حسابها
 هاتف "ياسمين" صديقتها واقترحت عليها الخروج معاً يوم الجمعة .. فقالت لها "سماح":
 -موافقة طبعا .. أنا كمان مخنوقة جدا .. ولسه كنت بقول لـ "أيمن" كدة .. خلاص هستأذنه
 وأرد عليكى يا "ياسمين"

-خلاص وأنا منتظرة اتصالك ان شاء الله
بعدما عاد "أيمن" من العمل التف الإثنان حول طاولة الطاعم وأخبرته "سماح" برغبتها فى
التنزه مع "ياسمين" و "ريهام" قائله:
-بصراحة نفسي أخرج يا "أيمن" أنا على طول محبوسه فى البيت
مسح "أيمن" بكفه على شعرها قائلا:
-معلش يا حبيبتي .. عارف انى بسبيك لوحك كثير
أخذت يده الموضوعه على شعرها وقبلتها قائله:
-ربنا يعينك يا حبيبتي أنا عارفه انت بتتعب أد ايه .. عارف نفسي نخرج سوا بس انت بتكون
مشغول حتى يوم الجمعة
ابتسم لها "أيمن" قائلا:
-أنا أفضى نفسي عشائك يا حبيبتي
هتفت بسعادة قائله:
-بجد يا "أيمن" ؟ .. يعنى هنخرج سوا يوم الجمعة ؟
قلبها قائلا:
-طالما حبيبتي عايزه تخرج تتفسح .. يبقى لازم نفسحها
ما لبثت أن تلاشت ابتسامه "سماح" قائله:
-طب و "ياسمين" .. يا ربي .. خايفه تزعل منى
فكر "أيمن" قليلا ثم قال:
-طيب أنا عندى اقتراح حلو
نظرت اليه "سماح" بلهفه قائله:
-ايه هو ؟
-ايه رأيك نطلع أنا وانتى و "ياسمين" و "ريهام" وعم "عبد الحميد" ونقضى يوم فى راس
البر
-بجد يا "أيمن" ؟
-أيوة بجد هيكون يوم حلو وتغيير جو .. وكمان الفترة دى البلد بتكون فاضية يعنى هنكون
على راحتنا .. وانتى تغيري جو وكمان تتفسحى مع صحبتك
قامت "سماح" معانقه اياه قائله:
-انت أحسن زوج فى الدنيا دى كلها
أمسك رأسها بين كفيه وقبلها قائلا:
-وانتى أروع زوجة فى الدنيا دى كلها

-صباح الخير يا دكتورة "ياسمين"
كانت "ياسمين" تستعد لبدء عملها .. عندما دخل دكتور "حسن" وألقى عليها تلك العبارة ..
التفتت اليه قائله:
-صباح الخير يا دكتور "حسن"
سألها دكتور "حسن" وهو يستعد بإرتداء البالطو:
-ايه أخبار حالة الـ mastitis بتاعة امبارح
-كله تمام يا دكتور .. اديتها جرعة الـ antibiotic بعد ما حضرتك مشيت .. وان شاء الله
همر عليها دلوقتي
توجهت الى باب المكتب لتهم بالخروج عندما استوقفها قائلاً:
-دكتورة "ياسمين"
التفتت اليه قائله:

-أيوة يا دكتور
-فى طالب هيجى يتدرب عندنا هنا .. هو ابن لعميل مهم من عملاء المزرعة .. البشمهندس
"عمر" وصاني عليه .. هو طالب فى البكالوريوس
كانت "ياسمين" تستمع اليه فى اهتمام .. فأكمل قائلاً:
-انتى اللى هنتولى تدريبيه
قالت بدهشة:
-أنا يا دكتور
-ايوة انتى
قالت باستغراب:
-بس يا دكتور أنا نفسي لسه بتدرب
-وعشان كدة عايزك تدريبيه .. شوفى يا دكتورة .. أحسن طريقة لتثبيت المعلومة لا بكتابتها
ولا بحفظها .. بممارستها .. كون ان يبقى فى طالب عندك وانتى بتشرحيله كل المعلومات اللى
عارفاها عن الحالة اللى أدامك ده يثبت المعلومة أكثر .. ومش بس كده ده بيديكى ثقة فى نفسك
كمان
ابتسمت قائله:
-فعلا يا دكتور .. أيام الكلية مكنتش بعرف أحفظ أسماء الـ Nerve والـ Muscles إلا وأنا
بشرحها لصحابي
ابتسم لها قائلاً:
-وعشان كده عايزك انتى اللى تدريبيه
ابتسمت له قائله:
-متشكرة على الثقة دى يا دكتور .. بعد اذنك
-اتفضلى
كانت "ياسمين" تقوم بعملها عندما أتاها اتصال من "سماح" .. أخبرتها صديقتها بفكرة
"أيمن" .. رحبت "ياسمين" بالفكرة لأنها لم تكن لتحب ترك والدها فى المزرعة بمفرده ..
اتفقا على السفر بعد صلاة الفجر يوم الجمعة ان شاء الله .. فى فترة الغداء أتت "شيماء"
لتجلس مع "ياسمين" على الطاولة .. استقبلتها "ياسمين" بالإبتسامه .. قالت "شيماء":
-ازيك يا "سمسم" أخبارك ايه
-تمام يا "شيماء" الحمد لله
-فينك بقالك كام يوم مش بشوفك فى فترة الغدا
-أها الشغل كتير أوى اليومين دول فياكل أى حاجة وأنا يشتغل
-هتقوليلى .. دكتور "حسن" مبيرحمش نفسه أبداً ولا بيرحم اللى معاه
دافعت "ياسمين" عنه قائله:
-ده لأنه عنده ضمير فى الشغل .. وفعلا بستفاد منه جداً
انتهت الفتاتان التهام طعامهما وتوجهتا الى الخارج .. عندها قالت "شيماء" لـ "ياسمين":
-وأنا أقول مجتتش تتعدى ليه مش عوايدها أتاها واقفه مع الدون جوان
نظرت "ياسمين" الى حيث تشير "شيماء" .. لتجد "مها" واقفه تتحدث الى "عمر" ..
وعلى وجهها ابتسامه كبيرة وتنظر فى عينيه بجرأة .. حانت من "عمر" التفاته اتجاه
"ياسمين" فتظاهرت "ياسمين" بالنظر الى شئ آخر .. ثم التفتت الى "شيماء" قائله:
-هروح أكمل شغلى
انصرفت الى عملها وهى تتساءل فى نفسها عن طبيعة العلاقة بين "عمر" و "مها"
استوقف "عمر" أثناء انصرافه أحد العمال قائلاً:
-يا باشمهندس "عمر" خلاص لقينا غفير كويس وابن حلال وساكن فى البلد دى

-سألتوا عنه كويس

-أيوة واد غلبان مقطوع من شجره وبيجرى على أكل عيشه
-طيب تمام خليه بييجي بكرة لرئيس العمال عشان يبدأ شغل من بكرة ان شاء الله
تنحج الرجل قليلا وبدا عليه التردد فسأله "عمر: "

-خير فى حاجه ؟

-يعني يا بشمهندس "عمر" متاخذنيش فى الكلام يعني .. بس يعني هو فين "عويس"
والجماعه بتوعه ؟
قال "عمر" ببرود:

-مشى

-أيوة يعني مشى فجأة كدة ومن يوم وليلة .. ده حتى هدومه وهدوم جماعته لسه فى الأوضة
.. ومقالش لجنس مخلوق انه هيسيب الشغل
قال "عمر" بنفاد صبر:
-دى حاجه متخصصنيش .. يلا على شغلك

فى صباح يوم الجمعة وبعد صلاة الفجر استعدت "ياسمين" و "ريهام" ووالدهما .. اتصلت
"سماح" ليخبرها أنها تنتظرهم مع "أيمن" أمام بوابة المزرعة .. كانت "ياسمين" فرحه
للغاية وأعدت الكثير من السندوتشات والعصير .. و "ريهام" أيضاً كانت متلهفة على تلك
النزله .. سبقهما والدهما .. وحملت الفتاتان حقيبة الطعام وأسرعوا الخفى .. عندها قالت
"ريهام" فجأة:

-ايه ده هو المز جاى هو كمان ولا ايه

نظرت "ياسمين" الى حيث تنظر أختها لتجد "عمر" وقد أوقف سيارته خلف سيارة "أيمن"
.. خفق قلبها بشدة وقالت لـ "ريهام":
-أكد لأ .. ايه اللي هيجيبه معانا
-لأ أنا حاسه انه جاى معانا

عندما وصلت الفتاتان نزلت "سماح" لترحب بهما .. وبعد تبادل عبارات المجاملة .. انطلقت
سيارة "أيمن" و "سماح" تجلس بجواره .. أما "ياسمين" و "ريهام" ووالدهما يجلسون
فى الخلف .. بعد فترة حانت من "ريهام" التفاته للخلف ثم مالت على أذن "ياسمين" قائله:
-مش قولتلك المز جاى معانا

نظرت اليها "ياسمين" فأشارت "ريهام" الى الخلف .. التفتت "ياسمين" لتتنظر عبر الزجاج
الخلفى للسيارة فتلاقت نظراتها مع نظرات "عمر" فأسرعت بإعادة رأسها الى الأمام .. وقلبها
يخفق بشدة .. وهى تتساءل لماذا لم تخبرها "سماح" بمرافقة "عمر" لهم .. وصلوا جميعاً
الى الشط .. انتهى الرجال الثلاثة معاً فى المزاح والضحك ولعب الدومينو .. أما الفتيات الثلاثة
فأخذن يتمشبن على الشاطى ويستعدن ذكريات الطفولة والجامعة .. كانت "ياسمين" فرحه
للغاية .. وتشعر بأنها خفيفه كالريشه .. كانت تنظر الى البحر وتملى نظرها بجمال سحره
وروعته .. فى الغداء تناول الجميع السندوتشات التى أعدتها "ياسمين" و "سماح" .. كانت
"سماح" مندمجة فى الحديث مع "ريهام" فتركتها "ياسمين" وتمشت على الشاطى بلا
هدف .. رآها "عمر" وهى تنحنى لتلتقط شئ من الأرض ثم تتحسسها بيدها وتنحنى لتلتقط
شئاً آخر .. فى نهاية اليوم كان الجميع فرحاً وسعيداً واندمج "عبد الحميد" مع الشابين جدا
وأحبا صحبتته أخذ يقص عليهم ذكرياته الى يختزنها فى زوايا عقله .. كانوا يستمعون له
والابتسامه تملو شفثيهما .. وصلت "ياسمين" و "ريهام" الى سيارة "أيمن" ووقفوا
بجوارها .. أقبل "عمر" ووقف على مقربه منهما فى انتظار الباقيين .. التفت "عمر" الى
"ياسمين" فوجدها تمسك شئ بيدها وتعبث به .. فنظر الى ما تحمله قائلا:

-ايه اللي فى ايدك ده ؟
رفعت "ياسمين" رأسها تنظر اليه وقد أدشها سؤاله .. ظلت صامته للحظات ثم قالت:
-أحجار صغيرة
ابتسم ابتسامه جذابه قائلاً:
-ايوة أنا عارف .. بس بتعملى بيهم ايه
احتارت "ياسمين" فيما تقول .. ساد الصمت برهه ثم قالت:
-بحب أجمعهم من على الشط
اتسعت ابتسامه "عمر" ولمعت عيناه قائلاً:
-أخيراً لقيت حد يشاركنى هوايتي الغريبة
تصاعدت حمرة الخجل على وجنتيها بسبب نظرتة العميقة التي تربكها وابتسامته التي تخطف
الألباب .. أكمل بنفس الابتسامه:
-أنا كمان بحب أجمع الصخور الصغيرة من على الشط .. بس مش أى صخور .. بحتفظ باللى
تلقت انتباهي بس
لم تبادلته "ياسمين" الإبتسام .. بل تجاهلت تماما كلامه والنظر اليه .. حضر الجميع وركبوا
وانطلقوا فى طريق العودة
توجهت "ريهام" الى فراشها .. عندما كانت "ياسمين" تقوم بطي ملابسها لتضعها فى
الدولاب .. نظرت اليها "ريهام" وقالت بخبث وهى تعبت بشعرها:
(-أخيراً لقيت حد يشاركنى هوايتي الغريبة)
التفتت اليها "ياسمين" مستفهمة .. قالت لها:
-ايه ؟ بتقولى ايه ؟
قالت لها "ريهام": "
-مفيش هو حد كلمك
أكملت "ريهام" بنفس الخبث:
(-بحتفظ باللى تلقت انتباهي بس)
نظرت اليها "ياسمين" قائله:
-بتكلمى نفسك .. برافو
قالت "ياسمين" ذلك وأطفأت النور وتودعت الى فراشها و تدرت .. حاولت التفكير فى أحداث
اليوم لكن التعب كان قد بلغ منها مبلغه فغطت فى سبات عميق
فى اليوم التالى أنهت "ياسمين" عملها وتوجهت الى شجرتها .. كانت تحب الإختلاء والجلوس
فى هذه البقعة التي تفصلها عن العالم .. شردت قليلاً فى رحلة يوم أمس .. وفى كلمات "عمر"
وجدت الإبتسامه تتسلل ببطء الى شفثيها .. ثم عادت لتتذكر الكلام الذى سمعته من "شيماء"
عنه .. وعلاقته بـ "مها" وغير "مها" .. تنهدت وحولت صرف تفكيرها عنه .. سمعت صوت
هاتفها .. وجدت رقماً غريباً ردت قائله:
-السلام عليكم
أناها صوت يقول فى قسوة:
-والله لو روحتى لآخر بلاد المسلمين لهوصلك يا "ياسمين" وساعتها مش هعتقك أبداً
قفز قلب "ياسمين" من مكانه .. وشعرت بالرعب لمجرد سماعها لصوت "مصطفى" أغلقت
هاتفها تماما .. ووقفت تتلقت حولها وهى لا تدرى ماذا تفعل .. كانت تخاف منه خوفاً شديداً ..
خشت أن يعرف طريقها ويحاول خطفها مرة أخرى أو يفعل بها ما هو أسوأ .. مشت مسرعة
عائدة الى غرفتها .. كانت لا ترى أمامها ..تشعر بتوتر بالغ .. ارتطمت فى طريقها بـ "عمر"
الذى كان متوجها الى بيت المزرعة .. وقفت تنظر اليه وهى لا تراه .. كانت علامات الرعب
باديه على وجهها .. نظر اليها "عمر" قائلاً بلهفه:

-ايه مالك فى ايه ؟
شعرت بأن الكلمات تهرب منها انحدرت دمعة حائرة من عينيها .. وأخذت تتعالى أصوات قلبها
وتزداد سرعة تنفسها .. هتف "عمر" بلووعه:
" -ياسمين" مالك ايه اللى حصل
نظر الى الطريق الذى أتت منه لعله يتبين سبب فرعها .. استجمعت قواها وقالت بصوت
مرتجف وهى تمد يدها بهاتفها قائله:
" -مصطفى"
نظر اليها قائلا:
" -مصطفى" مين .. مين "مصطفى" ؟
-رددت قائله:
" -مصطفى" كلمنى
خمن "عمر" بأنها تقصد زوجها .. لم تقوى أعصابها على التحمل كانت خائفة بشدة وترتجف
أحاطت نفسها بذراعيها وقالت وعينيها تدوران فى المكان بخوف:
-أنا خائفة أوى
نظر اليها "عمر" وطمأنها قائلا:
-متخفيش محدش يقدر يأذيكى طول ما انتى هنا
نظرت اليه قائله وهى تبكى:
-قالى هعرف طريقك ومش هعتقك
شعر "عمر" بالغضب لذلك المنعدم الرجوله الذى يهدد امرأة ويرعبها بهذا الشكل .. كانت
العبرات تنزل من عينيها فى صمت .. شعر بالألم يغزو قلبه مد يده وأمسك ذراعها أراد أن
يطمئنها ويوقف ارتجافه جسدها .. انتفضت "ياسمين" للمسته وأبعدت نفسها عنه .. وقفت
تنظر اليه بدهشة ممزوجة بالغضب .. أدرك "عمر" أنه أغضبها .. فأسرع يشرح قائلا:
-أنا مقصدتش حاجه ... كنت بس عايز.....
لم تدعه يكمل كلامه وانصرفت عانده الى غرفتها .. شعر "عمر" بالضيق لأنه أغضبها ..
صعدت "ياسمين" الى غرفتها وهى تفكر غاضبة كيف يجروء على لمسها بهذا الشكل .. أیظنها
فتاة سهله كفتيات اللاتى يعرفهن .. والللاتى يتهافتن عليه محاولات جذبته واستمالته .. أیظنها
واحدة منهن .. شعرت بالحنق والضيق من كليهما .. "عمر" و "مصطفى"

فى اليوم التالى كانت واقفة تتفحص احدى الأبقار عندما وجدت شاب تراه لأول مرة .. كان شابا
يافعاً يبدو وكأنه ضل طريقه .. خمنت "ياسمين" بأن هذا هو تلميذها الذى تحدث دكتور
"حسن" عنه .. اقترب منها الشباب وابتسم قائلا:
-السلام عليكم
ردت "ياسمين": "
-وعليكم السلام .. أهلا بحضرتك أنا دكتورة "ياسمين"
قال الشاب:
-أهلا بيكى أنا "هانى"
ثم استطرد قائلا:
-أنا "هانى شاكر"
قال ذلك ثم انفجر ضاحكاً .. نظرت "ياسمين" اليه بدهشة ثم لم تتمالك نفسها فضحكت ضحكة
خافته حاولت كتمها .. لم تضحك للفكاهه فى اسمه .. بل ضحكت لطريقة ضحك الشاب فقد
أرجع رأسه الى الوراء وضحك بصخب بطريقة أضحكتها ..

كان "عمر" يسير مع أحد العمال يعطيه بعض التعليمات .. عندما لفت انتباهه صوت الضحك
الصاخب فالتفت ليجد "ياسمين" تقف مع "هانى" ابن العميل الذى أتى اليه منذ أيام .. رأى
ابتهامتها وضحكتها التى تحاول كبحها ..شعر بالحنق فصرف العامل وسار نحوهما ... فى
هذه الأثناء قالت "ياسمين" لـ "هانى": "
-ادخل اتعرف على المكان على ما أرجع
تركته وانصرفت لتجد "عمر" يعترض طريقها .. نظر "عمر" الى الفتى الذى يسير للداخل ثم
أعاد نظره الى "ياسمين" قائلاً ببرود:
-مش نشوف شغلنا أحسن
نظرت "ياسمين" اليه بحيره قائله:
-مش فاهمة قصد حضرتك ايه
غير "عمر" الموضوع قائلاً:
-الست اللى كلمتيني عنها .. أحب أبشرك انها رجعت الشغل النهاردة
سعدت "ياسمين" كثيراً لهذا الخبر فقد كانت بالفعل تشفق على تلك السيدة وأولادها .. رددت
قائله:
-الحمد لله
رفعت نظرها لتجد نظرات "عمر" المصوبة تجاهها .. فقالت بسرعة:
-بعد اذن حضرتك
ثم تركته وانصرفت.

الفصل الثالث والعشرون

راقبها من بعيد وهي تباشر عملها .. كانت منهمة في عملها لدرجة أنها لم تشعر بوجوده .. بل لم تشعر بأى شئ حولها .. وقف يراقب حركاتها .. سكناتها .. لا يدري لماذا يفعل ذلك .. فهي ليست بالجميلة التي تبهز الأنظار والعقول .. وليست ممن اعتاد صحبتهن والتعامل معهن .. لكن بها شئ غريب يدفعه لأن يراقبها ويحاول فهمها .. ربما كان هذا هو سبب فضوله .. أنه لا يستطيع حتى الآن فهمها .. تصرفاتها غريبة .. مبادئها عجيبة .. لم يقابل مثلها من قبل .. تجمع المتناقضات في آن واحد .. خجوله .. واثقة بنفسها .. رقيقة القلب .. قوية الشخصية .. ذكية .. عملية .. ضعيفة .. هشه .. مديح عجيب لم يقابل مثله .. لذلك يشعر دائماً بأنها لغز غامض .. وفضوله يدفعه دفعا لاستكشاف هذا اللغز ومحاولة حله .. اقترب منها قائلاً:

-صباح الخير يا دكتورة

رفعت رأسها لتنظر اليه قائله وحبات العرق تثبت على جبينها:

-صباح الخير يا بشمهندس

وضع "عمر" يديه في جيب بنطاله وأخذ ينظر اليها والى ما فى يدها ثم قال:

-بتعملى ايه ؟

قالت "ياسمين" دون أن تنظر اليه:

-دى عينات خدناها من القطيع النهاردة عشان الكشف الدورى .. بجهزهم عشان أبعثهم

المعمل

هز رأسه .. ثم أخذ يتململ فى وقفته لا يدري أصلا ما الذى يفعله هنا .. نظر اليها ثم قال:

-أخبار الشغل ايه مرتاحه فيه ؟

قالت وهي لا تزال منهمة فى عملها:

-أيوة الحمد لله

سألها باهتمام:

-حد ضايقت تانى ؟

كان يقصد اتصال "مصطفى" .. ردت بإقتضاب:

-لا

لم يجد ما يقول .. فصمت قليلا ثم قال:

-طيب بعد اذنك

قال ذلك ثم انصرف .. رفعت "ياسمين" رأسها لتنظر اليه وهو يبتعد .. ثم عادت لتكمل عملها

مرة أخرى

كانت "ياسمين" جالسه مع "شيماء" فى استراحة الغداء يتسامران ويتضحكان .. وفجأة أتت

"مها" لتجلس معهم بدون استئذان .. توقف الحديث ونظرت الفتاتان الى بعضهما البعض ..

وأكملت كل منهما طعامها فى صمت .. قطعت "مها" هذا الصمت قائله:

-أنا عرفت ان مش بس انتى اللى بتشتغلى هنا ده كمان والدك وأختك يا "ياسمين" .. هى ايه

الحكاية بالظبط ؟

قالت "ياسمين" ببرود:

-حكاية ايه ؟

رفعت "مها" حاجبها قائله بسخرية:

-يعني انتى مش شايفه انها غريبة ان واحدة تيجي من محافظة تانية هى وأهلها عشان

يشتغلوا مع بعض فى المزرعة ؟ .. أكيد فى سر ورا الموضوع ده
قالت "ياسمين" بنفس البرود:

-ولا سر ولا حاجه

ازدادت "مها" فى سخريتها قائله:

-معروف عن البشمةهندس "عمر" انه بيحب يعمل خير فى الناس .. شكلك صعبتى عليه انتى
وأهلك وعشان كده شغلوكوا عنده فى المزرعة

هبت "ياسمين" واقفة وهتفت قائله:

-مسمحكيش تتكلمى ربع كلمة عنى أو عن أهلى .. وأنا جايه هنا أشتغل مش أشحت من حد
قالت ذلك ثم تركت طعامها وغادرت المكان .. نظرت إليها "شيماء" بعتاب قائله:

-كان ايه لزمته الكلام ده ؟

-بالله عليكى انتى مش شايفه ان الحكاية دى غريبة .. وان فى سر هى مخبياها عننا

-ملناش دعوة هى حرة

-أنا بأه يعرف السر اللي هى مخبياه .. واللى مخلى "عمر" مهتم بيها وبأهلها أوى كده
نهضت "شيماء" وانصرفت هى الأخرى .. تاركه "مها" خلفها.

"مش حماتك اتخطبت" !

نطق "أيمن" هذه العبارة وهو جالس فى أحد المطاعم مع "عمر" وهما يتناولان معاً طعام

العشاء .. رد "عمر" قائلاً:

-تغور هى وينتها

أكمل "أيمن" قائلاً:

-اتخطبت لواحد عربي من اللى بيستثمروا فلوسهم فى مصر .. شكله أكبر منها بكتير

نظر اليه "عمر" مستفسراً:

-وانت عرفت منين ؟

-شوفت صورتهم فى الجرنال من كام يوم .. واحدة معندهاش ريحة الدم مش تستنى ما عدتها

تخلص

قال "عمر" مستهزئاً:

-ده على أساس انها بتطبق كلام ربنا أوى فى الأمور الثانية .. يا سيدى هى جت على العدة ..

ربنا يسهلها

قال "أيمن" لصديقه:

-بصراحة يا "عمر" أنا مش عارف انت كنت واقع وسط الناس دى ازاي .. أنا لا كنت برتاح

للى كانت خطيبتك دى ولا لأمها .. كويس ان ربنا نجاك منهم

قال "عمر" بضيق:

-قفل على سيرتهم يا "أيمن" بجد مش حابب أفكر حاجه عنهم

نظر "أمين" الى صديقه فترة ثم سأله بشك:

-انت لسه حاسس بحاجة نحيثها

نظر "عمر" اليه بدشه قائلاً:

-نحية مين ؟

"-نانسى"

قال "عمر" على الفور:

-لأ طبعا

-واثق ؟

-أيوة واثق

-أمال ليه اضايقت لما جبت سيرتهم
صمت "عمر" قليلا ثم رفع بصره لصديقه قائلاً:
-لانى لما بفتكرهم بفتكر أد ايه أنا كنت غبي وأعمى .. وبضايق من نفسي جدا .. وبحس انى
رغم العمر ده كله معرفتش أحكم على الناس صح
تنهد ثم قال:

-بصراحة ندمان على كل كلمة حلوة سمعتها .. انت عارف انى طول عمرى مكنش ليا
علاقات مع أى بنت .. مجرد صحوبيه عاديه .. لكن حب واتباط لأ.. أولاً لانى مكنتش فاضى من
الشغل للدراسة .. كانت الحياة العملية وخداني فى دوامتها .. ولما فكرت أتجوز .. ادبت كل
مشاعرى لـ "نانسى" و كنت حاسس انها البنت اللى بدور عليها .. بس بجد كنت أعمى ..
معرفتش أختار صح .. وندمان أوى على كل كلمة قولتها لها .. لأن الكلام ده من حق واحدة
بس..

صمت قليلا ثم قال بسخرية:

-واحدة معرفش أصلاً اذا كنت هلاقيها ولا لأ

قال "أيمن" بتفائل:

-يا ابني البنات الكويسه كثير ... وانت ألفت واحدة تتمناك

نظر اليه "عمر" قائلاً بإصرار:

-مش هتجوز الا واحدة فتنع بيها 100% يا "أيمن" .. أنا مش عايز جوازه والسلام .. فإكر

كلامك ليا أيام خطوبتك لـ "سماح" قولتلى انك بتدور على واحدة تحس بيها وتحس بيك

وتكون سكن ليها وتكون هى سكن ليك وتكونوا انتوا الاتنين شخص واحد ..أنا عايز واحدة

كدة .. أكون أنا وهى كده

ابتسم له "أيمن" وربت على كتفه قائلاً:

-ان شاء الله هتلاقيها

صمت الصديقان وعادا الى تناول طعامهما فى صمت .. بعد فترة قطع "عمر" هذا الصمت قائلاً

:

-صحيح كنت عايز أسألك عن حاجه

-خير يا "عمر" ؟

بدا على "عمر" التردد قليلا ثم قال:

-هى صاحبة مراتك معاد جلستها اتحدد ولا لسه ؟

فهم "أيمن" ما يرمى اليه لكنه تظاهر بعدم الفهم قائلاً:

-صاحبة مراتي مين ؟

نظر اليه "عمر" بجدته قائلاً:

"-ياسمين"

ابتسم "أيمن" ورشف رشفه من كوب الماء الموضوع أمامه ثم قال:

-لأ لسه متحددتش الجلسة .. لو اتحددت كان زمان "سماح" مقدرتش تستنى عشان تبلغنى

الخبر

شرد "عمر" قليلا ثم قال:

-هو ممكن ما يتحكم لهاش بالطلاق ؟

هز "أيمن" كتفيه قائلاً:

-الله أعلم .. على حسب القضية وعلى حسب شطارة المحامى

قال "عمر" بسرعة:

-لأ أنا واثق فى أستاذ "شوقى" جدا

عادا ليكملا طعامهما فى صمت مرة أخرى .. و"أيمن" يرمق صديقه بنظرات صامته بين

الحين والآخر

كانت عائده من استراحة الغداء عندما استوقفها "عمر" قائلاً:

-ثوانى لو سمحتى
التفتت "ياسمين" اليه منتظره ما سيقول .. مد يده الى جيبه وأخرج شيئاً وقدمه اليها .. نظرت
الى ما يحمله ثم نظرت اليه متفهمه:
-ايه ده ؟

نظر "عمر" اليها قائلاً:

-خط جديد .. وارمى اللى معاكى .. عشان محدش يضايقك تانى
نظرت اليه مندهشه لا تدري ما تقول .. صمتت قليلاً ثم قالت:
-أنا مش عارفه ازاي مفكرتش فى الحل ده قبل كده .. فعلاً أحسن حاجه هو انى ارمى خطى
بدل ما أفضل أعده على أعصابى وخايفه أرد على أى رقم
لكنها استطردت قائلاً:

-بس مش هينفع أخده من حضرتك .. أنا هروح بكرة ان شاء الله أشتري خط تانى
قال لها بضيق:

-وتشتري ليه ما الخط موجود أهو
شعرت "ياسمين" بالخرج وقالت:
-يعني .. مفيش داعى .. أنا هجيب خط تانى بكرة
قال بحده:

-الأفضل ان الخط ميكنش بإسمك عشان ميقدرس بأى طريقة انه يوصلك .. لو الخط بإسمك
ويعرف حد فى شركات المحمول ممكن بسهولة يوصل لرقمك خاصة انه عارف ببياناتك كلها ..
ونفس الشئ بالنسبة لبيانات أختك ووالدك

أيقنت صحة ما يقول لكنها بقيت متردده .. نظر اليها ببرود قائلاً وهو مازال يمد يده بالخط
الجديد:

-متخفيش يا دكتورة هنخضم تمنه من مرتبك آخر الشهر
شعرت "ياسمين" بخرج بالغ فأخذت منه الخط .. فقال بجديه:
-متديش الرقم إلا للناس اللى بتتقى فيهم بس .. يعني والدك .. أختك .. "سماح" .. المحامى ..
عشان ميقدرس يوصل لرقمك ويضايقك تانى
أومأت "ياسمين" برأسها قائله:
-شكراً .. تعبت حضرتك .. بعد اذنك

كانت "مها" تراقب المشهد من مكان قريب .. لم تتمكن من معرفة عن ماذا يدور الحوار ..
ولا عما أعطاه "عمر" لـ "ياسمين" .. لكن عينيها كانت تشعان حقدًا وغلًا.

بعد انتهاء يوم من العمل الشاق .. خرجت "ياسمين" عائدة الى غرفتها عندما استوقفتها
"مها" معترضة طريقها قائله بسخرية:

-على فين يا دكتورة ؟

نظرت اليها "ياسمين" وهى تحاول كبح غيظها .. فقد كانت "ياسمين" تعلم جيداً بأن "مها"
لا تستلطفها ولا تحبها .. لذلك كانت تحاول قدر الإمكان تلاشى الصدام معها .. قالت لها:

-خلصت شغلى وراجعته أوضتى .. بعد اذنك

همت "ياسمين" بالإنصراف لكن "مها" وقفت أمامها وعقدت ذراعيها امام صدرها قائله:
-العينات اللى بعتهالى المعمل كلها اتجلطت

نظرت اليها "ياسمين" بدهشة قائلة:

-ازاى يعنى اتجلطت

قالت لها "مها" بسخرية:

-مش عارفه يعنى ايه عينة دم تتجلط؟! .. يعنى باظت يا دكتورة

قالت "ياسمين" بحده قائلة:

-ازاى يعنى .. ايه اللي جلطها

-اللي جلطها ان حضرتك محطتيش Anticoagulant قبل ما تحطى عينات الدم فى الأنابيب

هتفت "ياسمين" بغضب:

-انتى بتقولى ايه .. انا حطه بنفسى الهيبارين فى كل الأنابيب قبل ما أحط فيها العينات اللي

خدتها

قالت "مها" ببرود:

-بقولك العينات كلها اتجلطت يبقى ازاى يعنى كنتى حاطه هيبارين

احتدت "ياسمين" قائلة:

-يعنى أنا يكذب

-أنا ما قولتش كده

حاولت "ياسمين" كظم غيظها .. كتفت يديها أمام صدرها قائلة:

-والمطلوب دلوقتى

قالت "مها" بتشفى:

-المطلوب انك تاخذى كل العينات تانى والكلام ده يخلص النهاردة لانك زى ما انتى عارفه

الفروض النتائج كلها تظهر بكرة عشان نعرضهم على البشمهندس "عمر .. ولو البشمهندس

ملقاش النتائج هتبقى انتى اللي فى وش المدفع

قالت لها "ياسمين" ببرود:

-العينات هتكون عندك بكرة يا دكتورة

غادرت "مها" وهى ترسم على شفيتها ابتسامه التشفى

عكفت "ياسمين" على أخذ العينات مرة أخرى الأمر الذى أرهقها للغاية فعمل يومين مطلوب

منها أن تعيده مرة أخرى فى عدة ساعات .. كانت تعمل بسرعة لكن بدقة حتى لا تقع فى أى

خطأ .. كان "عمر" متوجهاً الى بيت المزرعة .. عندما وجد ضوء أحد الزرائب مضاءاً ..

استغرب لأن من المفترض أن الجميع غادر الى بيته .. اقتربت منه ودخل ووجد "ياسمين"

تعمل بهمة ونشاط .. اقترب منها "عمر" فرفعت رأسها لتتنظر اليه .. قال لها بدهشة:

-انتى بتعملى ايه هنا لحد دلوقتى؟

عادت الى اكمال عملها قائلة:

-عندى شغل

-لحد دلوقتى؟

-أيوة

رأى "عمر" علامات الإجهاد على وجهها فأشفق على حالها وقال بحنو:

-طيب أجلى الشغل لبكرة .. الوقت اتأخر دلوقتى

قالت "ياسمين" بشئ من الحده:

-لازم الشغل يخلص دلوقتى .. لأن العينات اللي خدتها باظت ولازم أخلصها دلوقتى عشان

أديها لدكتورة "مها" الصبح

شعر "عمر" بنبرة الضيق فى صوتها فسألها باهتمام قائلاً:

-فى حد بيضايقك هنا؟

صمتت "ياسمين" قليلاً ثم قالت:

-لا مفيش

تفرس فيها قائلاً:

-واثقة ؟

نظرت اليه مطمئنه اياه قائله:

-أبوة واثقه .. مفيش أى مشاكل الحمد لله

أوما "عمر" برأسه مطمئناً .. ثم نظر اليها قائلاً:

-أدامك كتير

شعرت بشئ من السرور لإهتمامه .. ردت بصوت خافت:

-يعني شوية

ابتسم "عمر" قائلاً:

-نفسى أسعادك .. بس مليش فى اللى انتى بتعملية ده خالص

خفق قلبها بشدة لمرأى ابتسامته .. ولكلامه عن رغبته فى مساعدتها .. فخفضت بصرها و

تجاهلت خفقات قلبها وأكملت عملها فى صمت .. شعر بنفسه يود البقاء معها أكثر لكنه رأى

توترها فنظر اليها قائلاً:

-أنا فى البيت مش خارج .. لو احتجتى حاجة عرفيني

شعرت فى قلبها بسعادة خفيه .. لم تجب .. فرحل فى صمت.

بعد فترة من انهماكها فى العمل سمعت صوتاً فى الخارج أمام الباب .. شعرت بالخوف .. سارت

ببطء لتتبين مصدر هذا الصوت .. خرجت لتجد أحد العمال يجلس بجوار الباب ويتفرش الأرض

.. قالت له بدهشة:

-انت بتعمل ايه هنا ؟

قفز الرجل من مكانه وقال لها:

-الباشمهندس "عمر" قالى أفضل هنا عشان لو الدكتوراة احتاجتني فى حاجة .. ومتحركش

من مكانى الا لما تخلص شغلها

شعرت بخفقات قلبها تتسارع مرة أخرى .. ثرى ما هو سر اهتمامه بها .. لماذا يهتم بتوفير

هذا العامل لها .. لأنها تعمل فى مزرعته ومسؤولة منه .. هل لو كانت أى فتاة أخرى مكانها هل

كان ليفعل ذلك أيضاً .. طردت "ياسمين" تلك الأفكار من رأسها وقالت لنفسها بسخريه ..

أفيقي يا "ياسمين" أين أنتِ وأين هو .. مثله معتاد الحصول على أجمل الفتيات وارقاهن ..

بالتأكيد اهتمامه بك لن يعدو أن يكون مجاملة لصديقه .. أو لعله مازال يشعر بالذنب بسبب

الحادث ويريد أن يكفر عن ذنبه ليريح ضميره.

جافى النوم "عمر" فى هذه الليلة .. ظل ساهراً فى شرفه منزله .. كان يشعر بشئ غريب لا

يستطيع هو نفسه تسميته .. نظر الى النجوم التى تزين السماء وهى تضى وتتوهج فى روعة

.. وجد الابتسامه تتسلل الى شفثيه بلا استئذان .. شعر بنسمات الهواء المنعش وكأنه

يستنشقها لأول مرة .. شعر بسعادة غريبة تسرى مع دماؤه فى شرايينه وأوردته .. لم يستطع

أن يحدد سبباً لتلك الحالة الغريبة التى تعتريه .. فقط كان يشعر بكل تلك الأشياء ولم يعرف لذلك

سبباً واضحاً ..

فى الصباح أتى الى المزرعة أحد عملائها الكبار .. استقبله "عمر" بترحاب شديد وقدم له

واجب الضيافة .. أراد الرجل شراء كمية كبيرة من عجول التسمين .. كانت بالنسبة لـ "عمر"

صفة كبيرة سندر عليه ربحاً وفيراً .. قاد "عمر" الرجل الى حيث المواشى ليلقى نظره عليها

وعلى الأعلاف التى تقدم لها .. وجدت "ياسمين" "عمر" يدخل مكتبها برفقة رجل فهبت

واقفه .. قدم "عمر" الرجل اليها قائلاً:
-صباح الخير يا دكتورة .. أقدمك الأستاذ "خالد الدمرداش" ده عميل عندنا من زمان .. ومن
الناس اللي احنا بنعتز بالتعامل معاهم
قال "خالد":
-متشكر يا بشمهندس ده من ذوقك
قدم "عمر" "ياسمين" الى الرجل قائلاً:
-الدكتورة "ياسمين" طبيبة بيطرية فى المزرعة عندنا وهى هتفيدك أكثر فى شرح نوعيه
الأعلاف وجودة القطعان عندنا
التفت الرجل الى "ياسمين" مبتسماً ومد يده قائلاً:
-اتشرفت بمعرفتك يا دكتورة "ياسمين"
نظرت "ياسمين" الى يد الرجل بتوتر ثم ما لبثت أن قالت:
-أسفة مبسلمش
نظر الرجل اليها بحده وأعاد يده قائلاً بسخرية:
-ليه خايفه يتنقض وضونك ؟
شعرت "ياسمين" بالإحمرار يغزو وجنتيها .. وقالت:
-لأ أكيد مش ده السبب
قال الرجل وهو ينظر اليها بتعالى:
-انتى أصلاً تعرفى أنا مين .. كون انى واقف بتكلم معاكى دلوقتى دى حاجه مكنتيش تحلمى
بيها
ثم التفت الى "عمر" قائلاً:
-الظاهر انك معرفتش تختار صح الناس اللى تقدمنى ليهم يا بشمهندس .. ياريت نكمل كلامنا
فى مكتبك

احتقن وجه "عمر" بشدة .. وألقى على "ياسمين" نظرة احتارت فى تفسير معناها ثم توجه
مع الرجل الى الخارج .. جلست "ياسمين" وهى تشعر بالحق الشديد .. من يظن نفسه ليتعامل
معها بهذا الشكل .. نعم هى لا تسلم على الرجال .. ولن تتنازل وتفعل ذلك لترضى أحداً مهما
كان الحرج الذى ستسببه له ولنفسها .. تسائلت فى نفسها ترى هل "عمر" غاضب منها لأنها
لم تسلم على الرجل .. ولكنه يعرف طبعها .. حتى هو رفضت السلام عليه فى أول يوم لها
بالمزرعة .. هل ظن بأنها تعمدت احراج الرجل .. هل يرى بأنها تسببت فى حدوث مشاكل بينه
وبين أحد عملاؤه المهمين .. ظلت الأسنان تدور فى رأسها بدون توقف .. بعد مضى ساعة
تقريباً .. لم تستطع تحمل هذا الكم من التوتر شعرت بأنها ترغب فى الدفاع عن نفسها وأن
تشرح لـ "عمر" بأنها لم تكن لتقصد أن تؤذيه وأن تتسبب فى أى مشكلة .. لكن هذه طبيعتها
ومبادئها ولن تغيرها .. نهضت وتوجهت الى مكتب "عمر" .. طرقت الباب فأتاها صوته:
-اتفضل

فتحت الباب وأخذت تتطلع الى وجهه لعلها تتبين انفعالاته .. نظر اليها ولم يتكلم .. دخلت
وتركت الباب مفتوحاً .. لم يعلق على الباب المفتوح هذه المرة ..وقفت أمام المكتب قليلاً .. ثم
تحدثت بصوت هادئ:
-أنا أسفة

نظرت اليه فوجدته ينظر اليها بدون أى رد فعل .. فأكملت قائله:
-مكنش قصدى أعمل مشكلة بين حضرتك وبين العميل .. بس حضرتك عارف انى مبسلمش
على حد
ساد الصمت لبرهه .. وجدته ينهض من مكتبه ويلتف حوله ليصبح مواجهاً لها .. التفتت اليه ..

نظر اليها قائلاً:

-عايزة تفهميني انك مبتسلميش أبداً على أى راجل .. حتى لو كان كبير فى السن زى الاستاذ "خالد"

قالت بجديه:

-أبوة مبسلمش على أى حد مهما كان سنه

نظر اليها نظرة غامضة ودت لو دخلت رأسه فى تلك اللحظة لتعلم فيها يفكر .. سألها بفضول وهو يتفحص اياها قائلاً:

-يعني جوزك .. أقصد لما كان خطيبك هو الوحيد اللي لمس ايديك ؟

دهشت لسؤاله .. فصمتت "ياسمين" للحظات .. ثم قالت دون أن تنظر اليه:

-لأ .. حتى هو لما كان خطيبي مسمحتلوش يلمس ايدي

رفع "عمر" حاجبيه فى دهشه .. ونظر اليها بامعان قائلاً:

-أبداً؟.. ملمسش ايديك أبداً ؟

هزت رأسها بالإيجاب

شعر بشعور غريب يجتاح قلبه ويتوغل فيه ببطء .. نظر اليها قائلاً بصوت خافت:

-ليه .. ليه مكنتيش بتخليه يلمس ايديك ؟

-قالت "ياسمين" بدون تردد وهى لا تزال لا تنظر اليه:

-عشان مش من حقه

شعر "عمر" بخففة فى قلبه لم يعتاد الشعور بها من قبل .. خفقه قوية .. عميقة ..نظر اليها

فشعر بحنان جارف يملأ قلبه تجاه تلك الفتاة التى تقف أمامه والتى تطرق بوجهها فى خجل ..

ود لو توقف الزمان حيث هما .. أخذ ينظر اليها بحنان ممزوج بدهشة وحيره .. وكأنه طالب

يدخل المدرسة لأول مرة ويقف أمام معلمته .. شعر بأن تلك الفتاة الواقفه أمامه تتحكم به

بطريقة أو بأخرى .. شعر بأن لها تأثيراً قوياً عليه لم يألّفه ولم يعتاده من قبل .. شعر بالخوف

يدب فى قلبه بسبب هذا الشعور الغريب الذى كاد أن يغمر كيانه كله .. شعور بالإستسلام

والتسليم .. قطعت "ياسمين" الصمت قائله بتوتر:

-أنا بس حبيت أوضح لحضرتك موقفى .. وأعتذر ان كنت سببت أى مشكلة ... بعد اذنك

التفتت لتتصرف فمد "عمر" يده ليمسك ذراعها ليوقفها .. لكنه تذكر .. هى ليست كغيرها ممن

عرفهن .. هذا الذى سيفعله غير موجود فى قاموسها .. سحب يده قبل أن تلمسها .. نظر فى

عينيها .. كان يخشى اغصابها .. وقفت حائرة .. قال بصوت رخيم:

-أنا مزعلتش منك انتى .. أنا اضايقت منه هو .. من الكلام اللى قالهولك

صمت لبرهه ثم قال:

-أنا وقفت التعامل معاه تماما

رفعت نظرها اليها فى دهشة وكأنها لا تعى ما يقول .. قالت له بعدم فهم:

-يعني ايه اللى حضرتك بتقوله .. مش فاهمة

ابتسم لحيرتها وقال:

-يعني اللى يهين دكتوراة بنتشغل فى مزرعتى ميشرفنيش أبداً انى أتعامل معاه

تلاقت نظراتهما فى صمت .. نظرة حنان منه .. ونظرة عدم تصديق منها .. أفعل هذا من أجلها

حقاً ؟ .. أخسر عميلاً مهماً من أجلها ؟ .. أمن أجلها هى تحديداً أم لو كانت "مها" أو

"شيماء" أو غيرهما فى نفس موقفها هل كان ليتصرف بهذا الشكل أيضاً ؟ .. خرجت من

شرودها لتتمتم فى خفوت:

-بعد اذنك

ثم خرجت وأغلقت الباب خلفها

ظلت طول الليل تتقلب في فراشها كأنها نائمة على جمر .. كانت تجاهد لمحو صورته من رأسها .. تجاهد لإعادة انتظام ضربات قلبها .. تجاهد لنسيان كلماته وابتسامته الساحره .. أخذت تردد لنفسها قائله .. لا لن أقع تحت تأثير سحره .. أنا لست كفتياته .. لن أكون واحدة منهم .. ليبي لم أعت الى المزرعة .. ليبي لم أراه .. لن أدع مشاعري تتحكم بي .. لن أحلم بما هو صعب المنال .. حتى لا يتحطم قلبي الصغير .. يجب أن أقتل مشاعري تجاهه وهي في مهدها .. قبل أن تكبر وتصبح وحشاً مفترساً يلتهمني ويقضى على الأخضر واليابس ... ظلت تستغفر ربها وهي مغمضة العينين حتى استسلمت لسلطان النوم.

حاولت "ريهام" الاتصال بـ "ياسمين" لكنها وجدت هاتفها مغلق .. فارتدت ملابسها وخرجت لتبحث عنها في مكان عملها .. دخلت لتجد شاباً طويلاً القامة نحيل يمسك كتاباً وقلماً أمامه ويدون شئ ما .. مسحت المكان بعينيها وهي واقفة على الباب فلم تجد "ياسمين" .. نظرت الى الشاب المنهمك في مطالعة الكتاب الذى أمامه وقالت له:

-لو سمحت متعرفش دكتوراة "ياسمين" فين ؟

رفع "هانى" رأسه ونظر اليها قائلاً:

-راحت المعمل وهرجع كمان شوية

-طيب شكراً

همت "ريهام" بالإصراف لكنه استوقفها وعيناه تتفحصانها:

-أقولها مين لما تيجي

-قولها بس "ريهام" عايزاكى افتح تليفونك

أوما برأسه قائلاً:

-حاضر هقولها لما تيجي

شكرته وانصرفت .. عادت "ياسمين" فأخبرها "هانى" بمجئ "ريهام" .. ثم سألها قائلاً:

-هى أختك ؟ .. أصل فيكوا شبه من بعض

ردت "ياسمين" باقتضاب قائله:

-أيوة أختى

حملت "ياسمين" الهاتف وخرجت تهاتف أختها:

-أيوة يا "ريهام" .. قالولى انك سألتى عليا

"-ياسمين" .. ايه الرقم ده ؟؟ .. وأفله تليفونك ليه ؟

-أنا بكلمك من تليفونى .. ده خطى الجديد

-خطك الجديد ؟ جبتيه امتى ده ؟ وخلص رميتي القديم ؟

-هبقى أحكيك بعدين .. فى حاجه .. كنتى عايزه حاجه ؟

-آه كنت عايزه أعرف هتخلصى امتى .. أنا زهقانه أوى

قالت لها "ياسمين" بحنو:

-أنا عارفه انى بسبيك لوحدك فترات طويله .. معلش يا "ريهام" .. ان شاء الله كام يوم

ونخرج نتفصح سوا .. احنا لسه لحد دلوقتى مشوفناش المنصورة ولا اتفصحنا فيها

-خلص اتفققنا .. هستنى انك توفى بوعدك ده .. عشان خلاص هطأ من جنابى

ابتسمت "ياسمين" قائله:

-متقلقش هنفذ وعدى .. ويلا سلام بأه عشان عندى شغل كثير

-سلام

بمجرد أن أغلقت "ياسمين" مع "ريهام" وجدت هاتفها يرن فأسرعت قائله:

-السلام عليكم أستاذ "شوقى"

-و عليكم السلام ازيك يا مدام "ياسمين"
قال بلهفه:

-الحمد لله .. فى أخبار جديده عند حضرتك ؟

-أحب أبشرك ان معاد الجلسة اتحدد يا مدام "ياسمين"
قالت "ياسمين" بفرحه عارمة:

-بجد ؟ أخيرا الحمد لله

-أيوة الحمد لله كلها اسبوعين وتخلصى من القضية دى تماما
-اسبوعين ؟

-أيوة معاد الجلسة بعد اسبوعين ان شاء الله .. وأنا متفائل ان النطق بالحكم يكون من أول
جلسه

قالت "ياسمين" متضرعه وهى تنظر السماء:
-يارب

ثم استطردت قائله:

-متشكره أوى يا أستاذ "شوقى"

-العفو .. مع السلامة

-مع السلامة

أغلقت هاتفها وهى تشعر بالراحة والسعادة .. ودت لو يمر الاسبوعين فى لمح البصر .. ويحكم
القاضى بتطبيقها لتصير حرة ظليقه وتتخلص من "مصطفى" الى الأبد .. وتمحو من عقلها أى
ذكرى له.

رن هاتف "عمر" فأسرع بالرد قائلا:
-ألو

قال "كرم" بلوم:

-أهلا بالناس الهربانه

-والله وحشنى

-ما هو واضح .. واضح أوى انى وحشتك وان شوقك ليا مقطع بعضه
ضحك "عمر" قائلا:

-عارف انى مقصر معاك الفترة اللى فاتت

-لا مقصر ولا مطول أنا قررت قرار وأعلى ما فى خيلك اركبه
قال "عمر" بقلق:

-خير قرار ايه

-قررت أخذ أجازة طويلة المدى .. وبكرة هتلاقيني طابب عليك فى المزرعة بشنطة هدومى ..
وقبل ما تقولى الشغل ومش الشغل هقولك ابوك فيه الخير والبركة . وانا كمان هفضل متابع

الشغل من المزرعة زى جنابك ما بتعمل .. يعنى مسمعش كلمة اعتراض
ضحك "عمر" قائلا:

-هو أنا اقدر اعترض

-أيوة كده بحسب

-يلا جهز نفسك وحضرلى وليمة فلاحى من اللى هى وعايز الأرض مفروشة ديناميت قصى
ورد .. وبنات على الصفين يقولولى ويلكم سى "كرم"

ضحك "عمر" قائلا:

-طب ويلكم سى "كرم" دى تركب على بعضها ازاي نفسي أفهم ؟

-بقولك ايه انا هسيب طريقة الاستقبال عليك وانت وذوقك بأه
-خلاص من عنيا هعملك احلى استقبال

-اهو كده يلا سلام وابقى قول للواد "أيمن" انى جاي واحشنى ونفسي اشوفه
-خلاص ماشى اتفقنا ..

-يلا سلام يا باشا

-سلام يا "كرم"

أنتهى "عمر" من محادثة صديقه وقد شعر بفرحه عارمة فقد اشتاق له كثيراً .. ابسم قائل
لنفسه:

-جيت فى وقتك يا "كرم" انت أكثر واحد بتفهمنى.

الفصل الرابع والعشرون

جلس الأصدقاء الثلاثة فى بيت المزرعة يتضحكون ويتجادبون أطراف الحديث .. قال "كرم" فى استمتاع:

-ياااه .. والله وحشنى يا ولاد الايه

ربت "عمر" بكفه على كتف "كرم" قائلاً:

-وانت كمان يا "كرم" .. بجد وحشتنى جدا .. ووحشتنى غتاتك
قال "أيمن": "

-أيوة واتك أوى على غتاته دى

قال "كرم": "

-تتكروا انى عملت جو للمزرعة من أول ما جيت وأنا مبقاليش ساعة واصل ..
ابتسم "عمر" قائلاً:

-آه والله وأحلى جو أنا من زمان مضحككش كده

قال "كرم" بجديه:

-بصوا بأه عايزكوا تشوفولى سكرتيرة كويسة .. أنا مش جاى عشان أفضى يومى فى الشغل
عايز واحده تنجز معايا

سأله "عمر" بإهتمام:

-طيب مشترط مؤهلات معينة

-آه يعنى تكون زى مدام "حنان" مديرة مكتبك

هتف "عمر" قائلاً:

-انت هتهرج يا "كرم" .. مدام "حنان" ايه .. انت فى بلد أرياف يا ابنى..

-طيب شوفولى أى واحدة المهم تكون ذكية وسريعة ونشيطة وبتفهم فى الكمبيوتر وبتعرف
انجلش كويس

طمأنه "عمر" قائلاً:

-خلاص سيب الموضوع ده عليا

نظر "أيمن" الى "عمر" قائلاً:

"-ريهام" مش كده ؟

أوما "عمر" برأسه قائلاً:

-أيوة بس هتاكد الأول ليها فى الكمبيوتر والانجلش ولا لأ

هتف "كرم" فى مرح:

-ايه يا عم انت وهو انتوا جابيينى تجوعونى ولا ايه .. لا ويقولوك بلد فلاحين .. فين المشلتت
والمحمر والمشمز أنا على لحم بطنى من الصبح

وهنا أتت الخادمة لتخبرهم بأنها انتهت من تحضير الطعام .. التف الجميع حول طاولة الطعام
فى استمتاع وهم يستعيدون ذكرياتهم معاً

-حالك مش عاجبنى اليومين دول

قالت "ريهام" هذه العبارة وهى واقفة مع "ياسمين" فى شرفة غرفتهما .. قالت "ياسمين"
دون أن تلتفت اليها:

-لا أبدأ مفيش حاجه

تفرست فيها "ريهام" قائله:

-واثقه ؟

-أيوة واثقه .. يمكن بس شوية ارهاق من الشغل

قالت "ريهام" بعدم اقتناع:

-هحاول أبلعها .. بس انتى عارفه انك وقت ما تحبى تتكلمى أنا موجوده وهسمعك
التفتت اليها "ياسمين" وابتسمت ابتسامه ضعيفة .. نظرت "ريهام" للأسفل قائله:

-مين ده ؟

نظرت "ياسمين" حيث تنظر أختها .. فرأت "عمر" و "أيمن" ومعهما شخص ثالث لا تعرفه

قالت "ريهام": "

-أنا حسه انى شوفته قبل كده

قالت لها "ياسمين": "

-أنا أول مرة أشوفه فى المزرعة

-لأ .. مش فى المزرعة .. تقريبا لمحتة فى خطوبة "سماح" .. أصلا احنا يوميه ملحقتاش

نعد ولا نشوف حد .. حضرتك مشتينا بدرى

تذكرت "ياسمين" يوم خطوبة "سماح" .. كانت فى صباح ذلك اليوم فى المحكمة .. مع

"مصطفى" .. أثارته ذكراه القشعريرة فى جسدها .. أحاطت جسدها بذراعيها وكأنها تحمي

نفسها من ذكراه .. نظرت الى الأسفل مرة أخرى .. على "عمر" الذى كان يتحدث مع صديقيه

فى مرح .. حانت منه التفاته لأعلى .. فتلاقت نظراتهما فى لحظة خاطفة .. خفق لها قلبها

الصغير .. ولم تكن تدري أن خفقات قلبها كان صداها يُسمع فى قلبه هو الآخر .. أشاحت

بوجهها بسرعة وقالت لـ "ريهام": "

-أنا دخله

هربت "ياسمين" الى الداخل بسرعة .. ولحقت بها "ريهام" التى نظرت بعتاب الى

"ياسمين" التى جلست على فراشها وضمت وسادتها الصغيرة الى صدرها قائله:

-براحتك مش هضغط عليكى

شردت "ياسمين" فى وجوم.

كانت "ياسمين" جالسه فى استراحة الغداء برفقة "شيماء" و "مها" .. التى كانت تحاول

الإقتراب من "ياسمين" بأى طريقة لتعلم معلومات عنها وعن أسرتها .. لكن "ياسمين" كانت

ذكية .. فلم تكن تتحدث معهما أو مع غيرهما فى أمورهما الخاصة .. حتى لا يتصيد أحد الأخطاء

لها .. فكان الجميع يظن بأنها أنسه لم يسبق لها الزواج .. هى لم تكذب .. لكن هذا ما ظنوه ..

وهى تركتهم وظنونهم .. قالت "شيماء" فجأة وكأنها تدلى بمعلومة خطيرة:

-تعرفوا مين اللي جه المزرعة امبارح ؟

قالت "مها" فى تعالى:

-أيوة طبعا عرفت .. مش مستنياكى تعرفيني

نظرت "ياسمين" اليهما بعدم فهم , فقالت لها "شيماء": "

-البشمهندس "كرم" صاحب البشمهندس "عمر" و البشمهندس "أيمن"

أومأت "ياسمين" برأسها وقد تذكرت الرجل الذى رأته بصحبة "عمر" و "أيمن" يوم أمس

أكملت "شيماء" هامسه وهى تحنى قامتها الى الأمام:

-ده بأه غير الاتنين التانيين خالص .. دمه زى الشربات .. ومرح جداً .. وتحبى تتكلمى معاه ..

ومش قفل زى البشمهندس "أيمن" .. ولا جد أوى زى البشمهندس "عمر"

اهتمت "ياسمين" بتناول طعامها وكأن الأمر لا يعينها .. فقالت "مها" بهيام مصطنع:

-لا كله كوم و "عمر" كوم تانى خالص .. هو فى زى "عمر" .. ده مفيش منه إلا نسخة

واحدة بس .. ومفيش راجل لا قلبه ولا بعده

شعرت "ياسمين" بالحنق لكنها تظاهرت بعدم الإهتمام وظلت محتفظه بتعبير اللامبالاة على

وجهها

فأكملت "مها" قائله بخبت:

- هو فعلاً يبان عليه انه جد .. بس لما يكون عنده فى المكتب .. بحس انه بيفك خالص ..
وبيحب الهزار جدا .. هو تقريباً بيركب الوش الخشب عشان الموظفين ميسوقوش فيها .. لكن
مع الناس اللي بيعزهم بيكون حاجه تانية

شعرت "ياسمين" بأن حنقها وضيقها يتصاعد .. لكنها كانت مصره على ألا تظهر أى رد فعل
لحديث "مها" .. بعد لحظات فوجئت بـ "عمر" يدخل الاستراحة .. نظرت "مها" اليه مبتسمه
.. فتوجه الى طاولتهم .. نظرت "ياسمين" الى الطعام أمامها ولم تعيره أى اهتمام .. بمجرد أن
وقف أمام طاولتهم قالت "مها" مبتسمه:

-ازيك يا بشمهندس "عمر" .. تعالى اتفضل معنا

تجاهلها "عمر" تماماً ونظر الى "ياسمين" قائلاً:

-بعد اذنك يا دكتورة "ياسمين" خلصى أكلك ومستنيكي فى مكتبي

قال ذلك ثم انصرف .. شعرت "مها" بالحنق وتصاعدت الدماء لتلون وجهها باللون الأحمر ..
ساد الصمت لفترة .. استأذنت "ياسمين" وقامت مغادره .. قالت "مها" بحنق:

-مش مكسوفين من نفسهم .. يجي يقولها تعاليلي المكتب .. وهى ما صدقت قامت جريت وراه
ضحكت "شيماء" قائله:

-الراجل أكيد عايزها فى شغل

قالت "مها" بغل:

-شغل أه ما هو واضح أوى نوعية الشغل ده

ابتسمت "شيماء" قائله:

-وانتى متغاضه ليه ؟

صاحت يغضب:

-وهتغاض من ايه يعني .. معدش الا البتاعه دى اللى أتغاض منها

وهبت واقفه وخرجت دون أن تكمل طعامها.

توجهت "ياسمين" الى مكتب "عمر" وهى تشعر بالتوتر وتتساءل .. عن ماذا يريد التحدث
اليها .. طرقت الباب طرقات خفيفه ثم دخلت بعدما أتاها صوته:
-اتفضلى

دخلت ووقفت أمام المكتب فأشار برأسه الى الكرسي أمامه قائلاً بإبتسامه:

-ايه هتفضلى واقفه .. اتفضلى اعدى

جلست "ياسمين" فى انتظار ما سيقوله .. نظر اليها "عمر" متملاً إياها .. شعر بقلبه يقفز
من مكانه مرة أخرى .. أضاق عينيه يحاول ترجمة مشاعره .. أمعقول أنه ...؟ .. لماذا ؟ ..
وكيف ؟ .. لماذا يشعر بهذا الحنان تجاهها .. والحنين اليها .. والرغبة فى القرب منه .. والنظر
اليها .. والاستماع لها .. لماذا هى دون غيرها .. لأنه يشفق على حالها وعما أصابها .. كلا ..
ما يحرك قلبه شئ آخر غير الشفقة والعطف .. شئ شعر أنه لم يذقه يوماً .. طال صمته .. وزاد
توترها .. فأخذت تتلملم فى جلستها .. فأفاق "عمر" من شروده وتساولاته تنحنح قائلاً
بهدوء:

-هى "ريهام" تعرف انجلش وكمبيوتر ؟

اندهشت لسؤاله فرفعت نظرها اليه فتلاقت نظراتهما .. شعرت بأن عينيه بحر عميق .. كانت

تخشى الغرق فيهما .. فتجنبت النظر اليهما قائله:

-أبوة .. هي واخده كورسات فيهم

ابتسم قائلاً:

-طيب تمام .. احنا محتاجين سكرتيرة .. شريكى هيعد هنا فترة ومحتاج سكرتيرة عشان يقدر يتابع شغلنا اللي فى القاهرة

-يعني حضرتك تقصد ان "ريهام" تشتغل سكرتيره

-أبوة بالظبط كدة .. لما قالى انه محتاج سكرتيرة أنا فكرت فى أختك على طول قالت له بامتنان:

-متشكرة أولاً على الثقة دى .. ثانياً أعتقد دى حاجه هتفرح "ريهام" لأنها بتمل من الأعداء لو حدها طول النهار .. وكم ان دى فرصة كويسة ليها عشان لو اضطرت انها تشتغل بعد كده سأله قائلاً:

-وليه مطلبتيش منى قبل كده انى الأقبلها شغل فى المزرعة قالت بحرج:

-مرضتش أز عج حضرتك أكثر من كدة .. يعني كفاية ان حضرت وفرت شغل ليا ولوالدى كمان ابتسم "عمر" قائلاً:

-مفيش از عاج ولا حاجه .. قولتك قبل كده لو احتجتى حاجه تعرفيني ثم استطرد قائلاً:

-تمام يبقى اتفقنا .. خليها تيجلى مكتبي بكرة الساعة 8 ان شاء الله .. ومتقلقش عليها "كريم" صاحبي وعشرة عمر

ثم نظر اليها وابتسم بخبت قائلاً:

-بس تخليها تيجي 8 بالظبط ها .. يعني متجليش بدرى ربع ساعة وتتأمص انى سايبها أعداه وبكمل شغلى

ابتسمت "ياسمين" رغماً عنها وتصاعدت حمرة الخجل الى وجنتيها .. شعرت بالحرج لتذكرها تسرعها فى هذا اليوم .. تأمل "عمر" وجهها بابتسامه قائلاً:

-تعرفى ان دى أول مرة فى حياتى أشوف بنت وشها بيحمر ويحلو كده لما بتتكسف نهضت "ياسمين" بسرعة قائله:

-ان شاء الله هتكون عند حضرتك فى المعاد قالت ذلك وانصرفت .. هاربه

أخبرت "ياسمين" "ريهام" ووالدهما بعرض العمل الذى قدمه "عمر" الى "ريهام" .. فقال والدهما:

-والله راجل فيه الخير .. ربنا يوسع رزقه صفقت "ريهام" فى مرح طفولى قائله:

-أخيراً هلاقى حاجه انشغل فيها .. ده أنا كنت قربت أتجنن من كتر البص للحيطه قالت "ياسمين" وقد ابتسمت لسعاده أختها:

-معادك بكرة ان شاء الله الساعة 8 متتأخريش -أتأخر ايه ده أنا هروح أبات على باب مكتبه من دلوقتي

ضحكت "ياسمين" .. وعانقتها "ريهام" فى حبور .. غادر والدهما الى غرفته .. فقالت "ياسمين":

-عارفه مين اللي هتشتغلى معاه ؟ تساءلت "ريهام" باهتمام:

-لأ ... مين ؟

-صاحب البشمةهندس "عمر" اللي شوفناه من البلكونه امبارح
قالت "ريهام" بمرح:
-ااه الواد الموز اللي واخذ قلم فى نفسه ده
قالت لها "ياسمين": "
" -ريهام" مش عايزه جنان
قبلها "ريهام" قائله بمرح:
-متخفيش عليا دى أختك تجنن بلد

توجهت "ريهام" فى صباح اليوم التالى الى مكتب "عمر" الذى أخذها الى مكتب "كرم"
نهض "كرم" بعد أن رآهما .. فقدمهما "عمر" لبعضهما البعض قائلاً:
" -كرم" دى الأنسه "ريهام" هتكون سكيرتيرتك طول فترة وجودك هنا .. انسه "ريهام" ده
البشمةهندس "كرم"
مد "كرم" يده ليسلم على "ريهام" قائلاً بابتسامه:
-أهلا بيكي يا أنسه "ريهام"
نظرت "ريهام" الى يده الممدوده ثم نظرت اليه قائله:
-أهلا بحضرتك
نظر "كرم" الى يده ثم اليها قائلاً:
-هفضل مادد ايدى كده كتير
تنحج "عمر" وابتسم الى صديقه قائلاً:
-الأنسه مبتسلمش
نظر "كرم" الى صديقه ثم اليها وسحب يده ومسح بها على رقبتة ورفع حاجبيه قائلاً:
-والله .. طب كويس
انصرف "عمر" وتركهما يبدآن عملهما .. أعطاها "كرم" تعليماته و آراها مكتبها:
-أهم حاجه عندى الالتزام بالمواعيد أنا باجى المكتب 8 .. عايزك 8 بالظبط موجوده مش عايز
دقيقة تأخير ... اللي عايزه منك دلوقتى انك تجمعيلى كل الايميلات اللى محتاجه رد وتنسخيها
عشان همليكى الرد اللى هتبعنيه لكل واحد فيهم .. فى أى مشكلة
قالت "ريهام" بجديه وهى تجلس على مكتبها:
-لا يا فندم .. هبدأ حالا
بدأت "ريهام" فى عملها بنشاط أنهت ما طلبه منها وتوجهت الى مكتبه .. طرقت الباب ثم
دخلت .. وجدت "كرم" يتحدث فى الهاتف وقفت أمامه حتى أنهى مكالمته .. ثم قال:
-جمعتم ؟
-أيوة يا فندم
أخذهم منها .. وأخذ فى املائها بالردود .. كانت سريعة فى الكتابة وهذا أسعده .. انتهت معه
وذهب الى مكتبها لكتابه الردود وارسلها .. كانت فرحه تعمل بهمه وبدقه واتقان .. بعد لحظات
طلبها "كرم" فتوجهت اليه .. قال دون أن يرفع عينيه عن الورق أمامه:
-هتلاقى عندك على الكمبيوتر ملف باسم شركة الصباحى هاتيلى منه كل بياناتهم
قالت وهى تهتم بالإصراف:
-حاضر يا فندم
استوقفها "كرم" بإشارة من يده قائلاً وهو مازال منهمك فى الأوراق أمامه:
-اعمليلى قهوة دبل لو سمحتى
توقفت "ريهام" ونظرت اليه قائله:
-أفندم ؟
-قهوة دبل .. وبسرعة لو سمحتى

وقفت "ريهام" لحظات صامته وهى تشعر بالضيق .. ثم نظرت اليه وقالت بهدوء:
-أنا هنا سكرتيرة مش خدامه .. اعملها لنفسك أو اطلب من الفراش يعملها
قالت ذلك ثم توجهت الى الخارج .. رفع "كرم" رأسه ينظر الى الباب الذى خرجت منه للتو ..
وهو يحاول استيعاب ما قالت .. جلست على مكتبها وقد بدأت فى البحث على الملف عندما أطل
عليها قائلاً:

-انتي قولتى ايه دلوقتى ؟
نظرت اليه قائله وهى لاتزال جالسه فى مكتبها:
-قولت أنا سكرتيره مش خدامه
ثم أعادت النظر الى الكمبيوتر مرة أخرى
نظر اليها بغيظ ثم خرج وطلب من الفراش احضار قهوته وتوجه الى مكتبه ليكمل عمله

اتصلت "ياسمين" بـ "سماح" قائله:
-لو انتى فاضية حبه أعدى عليكي نتكلم شوية
قالت "سماح" بقلق:
-خير فى حاجه
تنهدت "ياسمين" قائله:
-لا أبدا متقلقيش .. بس حبه أتكلم معاكى .. هو زوجك هيرجع امتى
-لا النهاردة "أيمن" هيجى متأخر لانه خارج يتعشى بره مع صحابه
-طيب تمام هعدى عليكي الضهر كده
-وشغلك

-هاخذ أجازة النهاردة .. وأصلا مفيش شغل كثير النهاردة
قالت "سماح" بقلق:
-قلقتيني يا "ياسمين"
طمأنتها قائله:
-قولتك متقلقيش .. حبه بس أتكلم معاكى
-طيب هتعرفى تيجي لوحداك ؟
-أبوة الطريق سهل وكمان هركب مش همشى أكيد .. قوليلي بس أركب ايه وأنزل فين .. أنا
عارفه شكل الشارع والعمارة بس معرفش اسم الشارع
أعطتها "سماح" العنوان .. وتوجهت "ياسمين" الى بيت صديقتها التى استقبلتها بالترحاب ..
عادت من الطبخ بالعصير وقدمته الى صديقتها قائله:
-قوليلي بأه مالك فى ايه

أخذت "ياسمين" رشفه من العصير قائله:
-مفيش .. حبه أتكلم معاكى عامة .. مش فى حاجه محدده يعني
نظرت اليها "سماح" بإمعان .. ثم قالت:
-طيب مفيش مشكلة .. اكملى
نظرت اليها "ياسمين" قائله:
-أخبارك ايه .. مبسوطه ؟
ابتسمت "سماح" قائله:
-الحمد لله .. أنا مكنتش أتمنى زوج أحسن من "أيمن" .. ربنا يباركلى فيه
ابتسمت "ياسمين" قائله:
-انتي يا "سماح" حد طيب أوى وتستاهلى كل خير .. مش الطيبون للطيبات .. كان لازم ربنا
يرزقك بواحد زى "أيمن" .. لأنك تستاهليه
عانقت "سماح" صديقتها وابتسمت قائله:

-وانتى كمان طيبة وتستاهلى كل خير .. وبكرة ربنا يرزقك بواحد طيب زيك
ابتسمت "ياسمين" بضعف .. ساد الصمت بينهما لفتره .. كانت "سماح" تفهم صديقتها جيداً
وتعلم بأن هناك ما يشغل بالها .. لكنها لم ترد الضغط عليها .. قطعت "ياسمين" الصمت قائله:
" -سماح" عايزة أسألك عن حاجه

-خير يا حبيبتي اتفضلى

قالت "ياسمين" بشئ من التردد وهى تعبت بأصابعها بكوب العصير الذى بين يديها:

-صاحب جوزك..

سألته "سماح": "

-مين تقصدى ؟

قالت بارتباك:

-اللى انا بشتغل فى مزرعته

-أيوة .. "عمر" .. ماله

قالت بارتباك:

-تعرفى عنه ايه ؟

صمتت "سماح" قليلا ثم قالت:

-اللى أعرفه ان هو و"أيمن" وصاحب تالت ليهم اسمه "كرم" .. صحاب من أيام الجامعة ..
و"أيمن" فضل على تواصل معاهم بعد ما سافر كل فترة .. بس فى اخر سنتين الاتصالات بينهم
انقطعت ..

تأملت "سماح" "ياسمين" قائله:

-بتسألى ليه ؟

قالت "ياسمين" وهى تتظاهر باللامبالاة:

-عادى .. فضول مش أكثر

لكن "سماح" شعرت بأن الأمر أكثر من مجرد فضول.

مكثت "ياسمين" ساعتين ثم همت بالإنصراف .. قالت لها "سماح":

-يا ابنتى متخليكي شوية كمان انتى جيتى فى ايه وماشية فى ايه

-معلش يا "سماح" عشان أروح قبل ما الدنيا تليل

-يا بنتى ده العصر لسه ماذنش والطريق للمزرعة ربع ساعة ولا تلت ساعة

-معلش هيجيلك مرة تانية ان شاء الله

-وأنا اللي كنت متعشمة اننا نتغدى مع بعض .. بجد انتى رخمه

ابتسمت "ياسمين" قائلا:

-هو بعد كل اللي انتى عماله تقدميهولى من ساعة ما جيت هيبقى فى مكان للأكل

-لأ اعملى احسابك المرة الجاية نتغدى سوا .. ممنوع اعدار

-خلاص اتفقنا

ودعت "ياسمين" صديقتها واستقلت السيارة المتوجهه الى المزرعة .. قبل أن تصل الى
المزرعة بخمس دقائق تعطلت السيارة .. واضطرت أن تنزل هى والركاب للبحث عن سيارات
قادمة فى هذا الاتجاه .. وقفت وهى متضايقه من ذلك المأذق .. سمعت صوت امرأة عجوز من
على بعد عدة أمتار منها وهى تتحدث الى نفسها وتنتحب .. كانت فلاحه بسيطه .. توجهت اليها
"ياسمين" قائله:

-فى حاجه يا حاجه ؟

قالت لها باكية:

-الفرس هتموت .. الفرس هتموت منى

أشارت المرأة الى الفرس النائمة على جنبها فى ظل احدى الأشجار .. توجهت "ياسمين" الى
الفرس لتجدها على مشارف الولادة .. فقالت للمرأة:

-دي بتولد

هتفت المرأة قائله:

-عارفة يا بنتى انها بتولد بس بألها ساعة بتتوجع ونايمة على جنبها ومش عارفه اتصرف ..
والواد ابني راح ينادى لجوزى ولسه مرجعش .. خايفه لتموت منى ..
تفحصت "ياسمين" الفرس لتجد كيس أحمر اللون ولا أثر للمهر .. فقالت للمرأة:
-مش هينفع نستنى أكثر .. دى عندها عسر ولاده .. لازم نقطع المشيمة ونولدها دلوقتى ..
أخذت المرأة تلطم وجهها قائله:
-عسر ولاده يعني هتموت
نهرتها "ياسمين" قائله:
-يا حجه حرام اللى انتى بتعمليه ده .. دوريلى على حاجه حاده يعني مقص سكينه أى حاجه
حاميه ..

هرولت المرأة الى بيتها الذى يبعد أمتار قليلة وعادت حاملة مقص .. جلست "ياسمين" بجوار
الفرس .. أخذت تمسح على جسمها بيدها وطلبت من المراه أن تجلس بجوار رأس الفرس
وتمرر يدها على وجهها لتطمئنها .. أخذت بقص المشيمة وحاولت مساعدتها على سحب المهر
الى الخارج .. أثناء انهماكها فى عملها مرت سيارة "عمر" فى طريق عودته الى المزرعة ..
لفت نظره الفتاة المنحنية على الفرس الراقد تحت ظل احدى الأشجار .. نظر الى الخلف ليتبين
هيئة "ياسمين" .. عاد قليلاً الى الخلف وأوقف السيارة على جانب الطريق .. ونزل ليتبين
الأمر .. ماذا تفعل هنا .. ومن تلك المرأة الجالسه بجوار المهر .. اقترب منهما .. وكانت
"ياسمين" قد بلغ منها التعب مبلغه .. فلم تستطع بجسدها النحيل أداء المهمة بمفردها ..
اقترب "عمر" قائلاً:

-بتعلمى ايه هنا ؟

نظرت اليه وقالت بلهفة:

-بسرعة تعالى ساعدنى

وقف "عمر" لبرهه وكأنه لا يعى ما تقول .. فأعادت ما قالت بحده:

-بسرعة بقولك

جلس "عمر" الى جوارها ولا يدري ماذا يصنع فأعطته قدم المهر .. وأمسكت هى بما ظهر
من الجسم .. تحاول جذبها للخارج .. جذب "عمر" قدم الفرس بقوة فصاحت به:
-حاسب براحه مش كده .. فعل "عمر" كما تفعل هى .. استغرق الأمر قرابة الربع ساعة حتى
ظهر المهر كاملاً .. كانت مهره جميلة ذات لون أسود فاحم .. أضفى لها جاذبيه خاصه ..
حضنت "ياسمين" رأس المهره والابتسامه تملو شفثيها ووضعها برفق على الأرض ..
سبحان الله الذى يخرج روح من روح .. وجسد من جسد .. وحياء من حياء .. تأمل "عمر"
المهره والابتسامه تملو شفثيه هو الآخر حاول أن يمسح على جسدها فأوقفته "ياسمين" قائله

:

-استنى لازم مامتها تشمها وتنصفها الأول

سألها "عمر" فى دهشة:

-ليه

قالت مبتسمة وهى تنظر الى المهره الصغيره فى حنان:

-عشان تتعرف عليها

هشت المرأة وبشت وأخذت تزغرط وكان ابنتها هى التى كانت تلد .. مثل هؤلاء الفلاحين
البسطاء يعتزون بدوابهم جداً وكأنها فرد من أفراد أسرتهم .. خاصة لو كانت هى مصدر رزقهم

..

كانت ملابس "عمر" و "ياسمين" فى حالة يرثى لها من افرازات الولاده .. نظرت "ياسمين"
الى ملابسها ولا تدري ماذا تصنع .. كيف ستوقف سيارة بملابسها المتسخة لتعود الى المزرعة

.. أخرجتها المرأة العجوز من حيرتها وقالت هاتفه فى فرح:
-احنا لازم نكرمكوا بركة ولاده المهر .. وتعالى الزغايه مرة أخرى .. عندئذ أقبل رجل كبير
ومعه غلام صغير .. ضربت المرأة الغلام على رأسه قائلاً:
-كل ده بتنادى لأبوك يا وله

قال الولد معتذراً:

-والله يامه دخت على مالقيته فى الغيط
أقبل الرجل فرحاً .. جلس بجوار الفرس وهو يمسح بيده على رأسها مردداً:
-اللهم لك الحمد والشكر
-قالت له زوجته:

-الهاتم والبيه هما اللى ولدوا الفرسه يا حاج
قام الرجل الطيب من فوره ومد يده الى "عمر" قائلاً:
-جميلكوا ده على الراس والله
-سلم عليه "عمر" قائلاً:
-مبروك عليكوا المهر
-صححت "ياسمين" قائله:

-مهرة

التفت الرجل الى "ياسمين" قائلاً:

-مدام مهرة وانتي اللى ولدتيها يبقى تتسمى على اسمك .. اسمك ايه ؟
ابتسمت "ياسمين" بخجل قائله:

"-ياسمين "

قال الرجل فى فرح:

-الله .. عاشت الأسامى يا ست "ياسمين" .. خلاص المهرة نسميها "ياسمين"
سمعت "عمر" الواقف الى جوارها يقول لها مبتسماً:
-الحمد لله انه مطلعش مهر .. كان زمانهم سموه "عمر"

ضحكت "ياسمين" ضحكه خافته .. أصر الرجل والمرأة على تقديم واجب الضيافة لـ
"ياسمين" و "عمر" .. وحلف الرجل بأغلظ الأيمان .. فإتصاع له الاثنان .. كان بيتهم صغير
مبنى بالطوب .. خرجت المرأة الى "ياسمين" حاملة جلباب مطوى وأعطته لها .. وأعطت
جلبابا الى "عمر" .. نظرت "ياسمين" الى ما بيدها وقالت لها محرجه:
-متشكرة أوى بس....

-ايه يا بنتى هتكسفيني ولا ايه .. ده احنا لو نطول نقدملكوا حتة من السما كنا قدمناها

أدخلت المرأة "ياسمين" الى حجرة صغيرة تحتوى على فراش موضوع على الأرض علمت
"ياسمين" أن هذه هى غرفة المرأة .. ارتدت "ياسمين" الجلباب النظيف ونظرت الى مرآه
صغيره متأكله موضوعه على الأرض .. كان جلباب واسع ذو لون أخضر مطعم بالورود
الصغيرة الحمراء وطرحه من نفس لون ونوع الجلباب .. نظرت "ياسمين" الى نفسها
وضحكت ضحكة خافته لهيئتها التى لم تعتاد عليها
حملت "ياسمين" ملابسها المتسخة وخرجت من الغرفة .. لتقابل "عمر" فى مواجهتها وهو
يخرج من غرفة أخرى .. نظرت اليه فرأته وقد ارتدى جلبابا بدى قصيراً عليه نظراً لطول
قامته .. لم تتمالك نفسها فابتسمت ثم التفتت لتغلق باب الغرفة
نظر اليها "عمر" بخبث قائلاً:

-قبل ما تضحكى عليا بصى لنفسك فى المراية الأول

ثم ضحك ضحكة عالية .. طار لها قلبها .. أقبلت المرأة وتقدمت "عمر" الى حيث يجلس

زوجها وابنها وقدمت لهم صنية بها كسر من الخبز الناشف وطبق عسل وطبق جبنه وبضع حبات الطماطم والخيار .. حلف الرجل وأقسم أن يأكل "عمر" ليرد اليه صنيعه .. جلست المرأة مع "ياسمين" وأخذت تقدم لها كسرات الخبز .. كانت المرأة سعيدة بما تقدمه لـ "ياسمين" وقالت لها:

-والله مقامك أكبر من كده يا بنتى .. بس احنا على أد حالنا زى ما انتى شايفه ..والحاج حالف اننا لازم نكرمك انتى والبيه .. يلا مدى ايدك وكلى متتكسفيش

أكلت "ياسمين" بنهم وهى تشعر بأن لهذا الطعام المقدم لها مذاقاً خاصاً وبركة خاصة ..كانت التجربة جديدة على "عمر" أيضاً لكنه شعر بسعادة وسكينة وهو جالس مع أولئك الناس البسطاء .. انها طعامهما وصليا العصر واستأذنا فى الإنصراف .. خرجت "ياسمين" بصحبة "عمر" ليتوجها الى الطريق .. اقترب "عمر" من سيارته .. فوقفت "ياسمين" .. التفت لها "عمر" قائلاً:

-تعالى أوصلك أنا راجع المزرعة

تمتمت "ياسمين" بخفوت:

-شكراً أنا هوقف عربية من على الطريق

ابتسم "عمر" ونظر اليها قائلاً:

-عارفه من ضمن الحاجات اللى عجبانى فيكى ايه ؟

خفق قلبها لوقع كلماته .. فأكمل قائلاً دون أن يرفع نظره عنها:

-انك يعتمد عليكى .. وبتعرفى تتحملى المسؤولية .. وشخصيتك قوية .. الواحد يسلم نفسه ليكى وهو مطمئن

صمت لبرهه ثم قال:

-ده طبعا بالإضافه لحاجات تانية كتير أوى

نظرت "ياسمين" الى السيارات المارة بجوارها لتهرب من النظر اليها .. كانت تخشى أن

يسمع صوت خفقات قلبها الذى يخفق بجنون .. فسألها بهدوء:

-هتعملى ايه ؟

ردت دون أن تنظر اليه:

-زى ما قولت هوقف عربية

قال لها:

-لا بلاش تركبى عربية من على الطريق فى الوقت ده خلاص الدنيا هتليل .. امشها أحسن

المسافة مش كبيرة .. ربع ساعه بالكثير وتكونى فى المزرعة

نظرت اليه "ياسمين" بدهشة وقالت:

-بس أنا أخاف أمشى لوحدى فى الوقت ده المغرب خلاص هياذن

نظر اليها وكان عينيه تعانقانا وقال فى حنان:

-مش لوحديك ..

نظرت اليه مستفهمه فاستطرد قائلاً:

-همشى وراكى بالعربية

شعرت "ياسمين" بسعادة تغمر قلبها .. أهو خانف عليها حقاً .. أخرجها من أفكارها قائلاً

بصوت خافت:

-أنا قولتلك بس عشان تبقى عارفه انى معاكى .. يعنى اطمنى متخفيش

مشت "ياسمين" بضع خطوات فأوقفها صوته قائلاً بمرح:

-مش تجيبى البوجه اللى معاكى دى .. أحطها فى العربية أحسن

ابتسمت وهى نظرت الى ملابسها التى تحملها والتي لفتها على بعضها البعض قائله:

-لا شكراً .. هشيلا أنا

ثم سارت فى طريقها .. ركب "عمر" سيارته وتبعها .. كانت كلما ابتعدت قليلا فى خطواتها سار بسيارته ووقف خلفها بخطوات ثم يتركها تسير لفترة ثم يعود ليقرب المسافة كلما بعدت .. كان يشعر بشئ واحد .. أن قلبه أصبح ملكاً خالصاً لتلك الفتاة التى تسير أمامه .. والتى يخاف عليها ويرغب فى حمايتها بأى شكل .. لأنها متربعة على عرش قلبه الذى ينبض بداخله .. شعر بسعادة لذيذة تسرى داخله .. وهو يراها أمامه .. ود لو أوقف السيارة ونزل ليعانقها عناقاً طويلاً لا ينتهى أبداً .. ظلت عينيه معلقة بها .. حتى عبرت الطريق ووصلت الى بوابة المزرعة .. كان قلب "ياسمين" يخفق بشدة طوال الطريق وهى تختلس النظر الى الخلف فتجده يسير بسيارته خلفها ببطء .. كانت الابتسامه واسعه على شفثيها .. حمدت ربها أنه يسير خلفها وليس أمامها .. حتى لا يرى تلك السعادة البادية على وجهها .. طرقت البوابة ففتح الغفير ونظر اليها قائلاً:

-مين انتى؟

فنظرت اليه قائله:

-أنا دكتورة "ياسمين"

تذكر الرجل أنه رآها تخرج فى الصباح .. انتبه الى ملابسها ونظر اليها فى دهشة .. دخلت "ياسمين" والرجل يتبعها بنظراته ويمط شفثيه فى دهشة .. كاد أن يغلق البوابة عندما سمع صوت زمر سياره "عمر" فالتفت اليه ليجد رجلا يرتدى جلبابا فصاح قائلاً:

-انت مين؟

أخرج "عمر" رأسه من السيارة قائلاً:

-افتح أنا البشمهندس "عمر"

فأسرع الرجل بفتح البوابة على مسرعها مردداً:

-اتفضلى يا بيه .. لا مؤاخذه..

نظر الرجل الى ملابس "عمر" والسيارة تمر أمامه فضرب كفاً على كف وهو يفتح فمه فى دهشة

دخلت "ياسمين" الى غرفتها .. رأتها "ريهام" فهبت واقفه .. نظرت اليها فى دهشة قائله:

-ايه يا "ياسمين" فينك موبايلك مفقول ليه .. قلفتينى عليكي .. وايه اللى انتى مهيباه فى

نفسك ده

قالت "ياسمين" وهى تخرج هاتفها وتضعه فى الشاحن:

-الموبايل فصل شحن معلش

هتفت "ريهام" بدشهة قائله:

-ايه اللى انتى لابساه ده .. عامله زى اللى جايه من ورا الجاموسه .. انتى آه دكتورة بيظريه

بس مش لدرجة النيو لوك ده يا "ياسمين" هتفضحيننا

ضحكت "ياسمين" وأخذت تقص على أختها الأحداث الغريبة التى مرت بها

دخل "عمر" بيت المزرعة ليجد نور مكتبه مضاءاً .. ترك الملابس المتسخة من يده على المقعد وتوجه الى المكتب .. ليرى "أيمن" جالس أمام الحاسوب .. نظر "أيمن" الى صديقه وانفجر ضاحكاً:

-ايه يا "عمر" اللى انت لابساه ده .. انت بقيت أبا العمده ولا ايه

-لا يا خفيف هدومى اتوسخت .. وملقتش حاجه ألبسها غير الجلبيه دى

قام "أيمن" من على المكتب ونظر الى صديقه وهو لا يستطيع وقف ضحكاته قائلاً:

-وكمان قصيره .. عارف بتفكرنى بيمين .. جاموسة راحت تقابل جاموسة يا عيني ملقتهاش

جاموسة لقتها بقرة يا عيني يا لبيبييل

ضحك الصديقان فى مرح .. وتركه "عمر" وذهب الى غرفته ليأخذ دسأ .. وصورة "ياسمين"
لا تفارق رأسه

فى صباح اليوم التالى دخل "كرم" مكتب "ريهام" قبل التوجه الى مكتبه لإعطائها بعض
التعليمات .. بمجرد أن دخل هبت "ريهام" واقفة وعلامات الغضب على وجهها .. قال "كرم"
:

-صباح الخير يا آنسه "ريهام"

لم تجب بل نظرت الى ساعتها وهتفت فى حنق:

-حضرتك جاى متأخر 3 ساعات ونص

نظر لها فى دهشة قائلاً:

-نعم؟

قالت بهدوء ممزوج بالغضب:

-معاد حضرتك فى المكتب الساعة 8 .. وحضرتك فى أول يوم نيهت عليا انى آجى فى معادى

ومتأخرش .. حضرتك اتأخرت 3 ساعات ونص وأنا اعده فى المكتب لوحدى ومش لاقية أى

حاجه أعملها .. طيب كنت قولى انك هتتأخر كنت روحت جبت كتاب ذاكرتلى كلمتين ينفعونى

ولا كنت عملت أى حاجه مفيدة بدل الوقت الضايع ده

نظر "كرم" الى أعلى وأغمض عينيه وحاول تمالك أعصابه ثم نظر اليها قائلاً:

-أنا آسف يا آنسه "ريهام" ان شاء الله لو حبيت اتأخر المرة الجاى هبقى أبلغ حضرتك

ثم تركها وذهب الى مكتبه وهو يحرك رأسه يمينا ويساراً فى بغیظ .. بعد فترة طلبها "كرم"

لتحضر له بريد اليوم ليملي عليها الرد عليه .. ذهبت اليه ووقفت أمام المكتب أعطته الأوراق

وانتظرت ما سيمليه عليها .. حانت منه التفاته اليها قائلاً:

-هو حضرتك مينفعش تبترسى؟

قالت له بجديه:

-نعم

-تبترسى تبترسى .. يعنى تعملى كده

ابتسم ابتسامه صفراء أظهرت أسنانه .. ثم قال لها:

-أى سكرتيره بتبترسى فى وش المدير بتاعها

قالت "ريهام" فى هدوء:

-أنا كده מבحبش ابتسم

ثم نظرت الى الأجنده التى تحملها قائلاً:

-حضرتك مش هتملىنى الردود

أنتهى "كرم" من تمليتها وقبل أن تغادر قال لها .. وهو يفحص احدى الملفات أمامه:

-انتى دايمى بتترسى الباب مفتوح وانتى دخلالى المكتب .. متبقيش تنسى تفقليه

قالت له ببرود:

-لأ أنا مبساش أفضله .. أنا متعمده أسيبه مفتوح

رفع نظره اليها قائلاً:

-ليه ان شاء الله

قالت بنفس البرود:

-عشان ميبقاش فى خلوة ..

نظر لها بعدم فهم للحظات .. ثم قال بسخريه:

-آه عشان الشيطان ثالثهما والجوده يعنى .. لا يا آنسه "ريهام" فى حالتك دى الشيطان

هيفاق يهوب هنا أصلاً

قالت له بحده:

-نعم ؟ .. حضرتك بتقول ايه

قال بسرعة:

-بقولك اطبعي الورق اللي اديتهاولك 3 نسخ ايه مبتسمعيش .. يلا بسرعة

نظرت له "ريهام" بغیظ ثم خرجت لتكمل عملها ... فى اليوم التالى حضر "كرم" الى مكتب "ريهام" قبل أن يمر على مكتبه .. دخل فرفعت رأسها تنظر اليه فأشار الى ساعته قائلاً:
-الساعة 8 يعني فى معادى بالظبط..

أشاحت بوجهها دون أن ترد .. فنظر اليها قائلاً بحسره:

-على رأى المثل "تأتى الرياح .. محملة بالأتربة"

خرج من المكتب فلم تتمالك "ريهام" نفسها فأبتسمت .. فدخل مرة أخرى بسرعة قائلاً:
-ما احنا بنبتسم زى البنى آدمين أهو .. وابتسامتنا حلوة كمان تحدثت اليه بجديه قائلاً:

-بشمهندس "كرم" .. اتفضل على مكتبك لو سمحت

أحنى رأسه قائلاً بسخرية:

-تحت أمرك يا أنسه "ريهام"

جلس الأصدقاء الثلاثة معاً فى مكتب "عمر" فهتف "كرم" قائلاً:

-ايه يا جماعة السكرتيرة اللي انتوا جايبينهالى دى ؟ .. أنا عايز بس أفهم حاجه واحدة هو

انتوا مشغلين السكرتيرة دى عندى ولا مشغليني أنا عندها

سأله "عمر" مبتسماً:

-ليه ايه اللي حصل ؟

قال "كرم" وهو يضرب كفاً بكف:

-أقولها اقللى الباب تقولى خلوة .. أقولها ابتسمى تقولى أنا كده مبتسمش .. أقولها اعمليلي

قهوة تقولى أنا سكرتيرة مش خدامه

ضحك "أيمن" و "عمر" .. فهتف "كرم" قائلاً:

-لا استنوا خدوا التقبله .. لقتيها بتز عقلى وكان هاين عليها تاخذنى ألمين عشان اتاخرت عن

معادى .. أنا خايف أروح بكرة الشغل الأقيها جيبالى دفتر حضور وانصراف

ضحك "عمر" قائلاً:

-أختها برده معلمانى الأدب

-هى أختها برده سكرتيره ؟

-لا .. دكتورة بيطرية

ابتسم "أيمن" قائلاً:

-والله بنتين ميه ميه

نظر "كرم" الى ساعته ثم قام لينصرف .. فسأله "عمر":

-على فين ؟

نظر اليه قائلاً بسخريه:

-استراحة الغدا خلصت .. خايف أروحها متأخر تخصملى يوم من مرتبي

الفصل الخامس والعشرون

هبت نسيمات الصباح لتداعب وجه "ياسمين" الجالسه على جذع شجرتها .. أصبح هذا المكان الصغير هو عالمها الخاص .. الذى تشعر فيه بالراحه والسكينه .. كانت تستيقظ باكراه وتأتى اليه قبل الذهاب الى عملها .. كأن بينهما موعداً أبدياً لا ينقطع .. جلست فى ذلك اليوم تفكر .. ترى كيف سنتتهى قضيتها .. وهل سنتتهى بالفعل من الجلسة الأولى التى من المقرر أن تكون بعد ثلاثة أيام ؟ .. أم ستضطر الى الإنتظار جلسات أخرى .. كانت لا تستطيع تحمل الإنتظار فترة أطول من ذلك لتتخلص من ذلك المدعو زوجها وتلقى بذكرياته فى بئر عميق وتردم فوقه التراب .. لتمحيه من ذاكرتها تماماً وكأنه لم يكن ...

ثم عادت لتفكر ترى ماذا يفعل "مصطفى" الآن .. أمازال يبحث عنها .. أمازال يتوعددها بالانتقام .. أمازال يرغب فى أذيتها وعودتها اليه .. كانت سابحه وسط كل تلك الأفكار عندما قفزت صورته فجأة الى رأسها .. صورة "عمر" .. تذكرته عندما ساعدها فى ولادة المهره .. ابتمت لتلك الذكرى .. لم تكن تتوقع أنها ستراه يوماً فى هذا الوضع .. بدا طيباً حنوناً يرغب فى مساعدتها ولا يتأفف .. بدا لها شخص متواضع للغاية جعلها للحظات تنسى من هو .. وماذا يملك .. انه مجرد شخصاً بسيطاً مثلها .. شعرت أن ذكرى هذا اليوم محفورة فى ذاكرتها ولن تنساه أبداً .. تذكرت وقت العودة عندما أصر على السير بسيارته خلفها .. مازالت فى حيره من أمرها .. لماذا فعل ذلك .. أمن المعقول ان كل ما يفعله لأجلها فقط لأنها صديقه زوجة صديقه .. أم بسبب تلك الحادثه .. حدثها قلبها بأن هناك سبباً آخر .. سبباً يلقي صداه فى قلبها .. أمعقول أنه توقفت عن الاسترسال فى أفكارها عند تلك النقطة .. كانت تحاول بقدر الإمكان تجاهل مشاعرها وما يعتمل داخل صدرها .. هى لم تخرج بعد من تجربة كادت أن تدمرها .. لا تريد ترك نفسها لتنساق خلف تجربة أخرى غير واضحة المعالم .. لن يتأذى فيها الا قلبها .. وقلبها لم يعد يحتمل الألم .. نهضت لتتوجه الى عملها .. وعندما اقتربت من المبنى .. تسمرت فى مكانها .. كان واقفاً هناك .. يضع يديه فى جيب بنطاله ويعبث بشئ على الأرض بطرف حدانه .. شعرت بالحنق على تلك النبضات التى تتسارع كلما رآته .. نظرت أمامها وسارت بهدوء وكأنها لا تراه .. رفع رأسه فرأها .. ابتمس لها .. لم تبادله الابتسام .. عندما اقتربت منه أوقفها قائلاً:

-صباح الخير

قالت بصوت خافت:

-صباح النور

همت بأن تواصل طريقها لكنه أوقفها بإشارة من يده قائلاً:

-استنى لو سمحتى عايز أسألك عن حاجة

قالت وهى تتوجس منه خيفه:

-اتفضل

بدا مترددا قليلاً .. ثم قال:

-معاد قضيتك اتحدد أنا عرفت من "أيمن" .. الجلسة بعد 3 أيام..

شعرت بالدهشة لإهتمامه بمعرفة معاد الجلسة .. أم أن "أيمن" هو الذى تطوع وأخبره .. أكمل قائلاً:

-انتى هتروحي مع والدك أكيد مش كدة؟

أومات برأسها قائله:

-أيوة .. "ريهام" هتفضل هنا

نظر "عمر" اليها قائلاً:

-أنا حابب آجى معاكوا

نظرت اليه بدهشة قائلة:

-ليه؟

ابتسم بحنان قائلاً:

-عشان ما تتبهدلوش فى المواصلات لوحدكوا

قالت له بجديه:

-مفيش داعى يا بشمهندس .. أنا ووالدى هنروح لوحدنا

تأملها قائلاً:

-مش عايزانى آجى معاكى؟

قالت ببرود:

-لأ .. زى ما قولت لحضرتك مفيش داعى .. وكمان أنا مش عايزه وجودك يسببلى مشاكل

صمت قليلاً ثم قال بضيق:

-طيب .. زى ما تحبى..

قال ذلك ثم تركها وانصرف .. ودخلت هى وبدأت فى أداء عملها .. وعقلها مشغول بسر

اهتمامه بها

"تسلم ايدك يا "ريهام" .. سرعة واتقان"

قال "كرم" هذه العبارة وهو يتأمل الورق الذى قدمته اليه .. ابتسمت لإطراءه قائلة:

-شكراً

نظر اليها قائلاً:

-اخيراً ابتسمنا

اختفت ابتسامتها وعادت ملامحها الى الجديه مرة أخرى .. فنظر اليها قائلاً بمرح:

-طفقتها ليه ماكانت منوره

استأذنته قائلة:

-حضرتك تطلب حاجة تاني

أرجع ظهره واستند به على مقعده ونظر اليها قائلاً:

-أنا عرفت ان أختك دكتورة بيطرية وبتشتغل هنا فى المزرعة

أومأت "ريهام" برأسها قائلة:

-أيوه .. ووالدى كمان

نظر "كرم" اليها بدهشة قائلاً:

-والدك كمان بيشتغل هنا فى المزرعة

-أيوه .. مسؤول عن مخزن العلف

اندهش "كرم" .. لكنه لم يزيد فى الأسئلة .. وقبل أن تنصرف قال لها:

-مممكن يا أنسه "ريهام" تطلبي من الفراش يعمل قهوة

ثم نظر اليها مستعظفاً اياها قائلاً:

-بصراحة مكسل أقوم .. خليكي جدعه واطلبهالى

هزت رأسها وخرجت من مكتبه وعيناه تتابعانها

جلست "سماح" بجوار زوجها الذى يطوقها بذراعه واضعه رأسها على صدره يشاهدان أحد

البرامج فى التلفاز .. انتهى البرنامج فالتفتت اليه "سماح" قائلة:

"-أيمن" عايزه أسألك عن حاجه

نظر اليها "أيمن" قائلاً:

-قولى يا حبيبتي

اعتدلت فى جلستها ونظرت اليه قائله:

-ايه أخبار "عمر" صحبك .. مفيش جديد ؟

نظر اليها باستغراب قائلاً:

-جديد من حيث ايه ؟

-يعني .. انت كنت قولتلى انه خاطب

-أيوة وقولتلك انه فسح

قالت "سماح" باهتمام:

-يعني مبيفكرش يرجعها

قال "أيمن" بثقه:

-مستحيل يرجعها .. أصلاً ربنا نجاه منها

صمتت "سماح" قليلاً تفكر فى كلامه ثم قالت:

-ومبيفكرش يخطب قريب ؟

تفرس "أيمن" فيها قائلاً بابتسامه خبيثه:

-انتى عايزه تعرفى ايه بالظبط ؟

أمسكت الريموت وانشغلت بالتقليب فى القنوات قائله:

-هكون عايزه أعرف ايه يعني

التفت اليها "أيمن" ونظر اليها قائلاً:

-طيب أنا عايز أسألك عن حاجه

نظرت اليه فقال لها:

-هى "ياسمين" لسه حسه بحاجه ناحية زوجها

نظرت اليه بدهشة قائله:

-حسه بحاجه يعني ايه ؟

حثها قائلاً:

-يعني لسه بتحبه ؟ والقضية اللى رفعتها كانت عشان كرامته مثلاً

هتفت "سماح" قائله:

"-أيمن" .. "ياسمين" مكنتش بتحب "مصطفى" أصلاً .. حتى من قبل ما يضربها ويخونها

قال فى دهشه:

-ازاى يعني

-زى ما بقولك مكنتش بتحبه ولا حتى كانت بترتحله .. باباها هو اللى جوز هولها وهى مكنتش

عايزه تتجوز

عقد ما بين حاجبيه وسألها مستفهماً:

-وليه باباها عمل كده ؟

تنهدت فى حسره قائله:

-عشان مامتها ماتت فجأة .. والبنتين ملهمش حد .. مقطوعين من شجرة" ..مصطفى "كان

عايز يتجوز بسرعة .. ووالدها وافق .. عشان يطمئن عليها لو حصله حاجه

فكر "أيمن" قليلاً ثم قال:

-منطق غريب .. يعنى أجوز بنتى لواحد هى مش مرتحاله .. عشان أطمئن عليها أما أموت

-هو تفكيره وصله لكده .. هو بيحبها جدا هى و "ريهام" وأنا واثقه ان ده من خوفه عليها ..

زى الدبه اللى قتلت صاحبها من كتر حبها فيه

صمت "أيمن" قليلاً يفكر فيما قالت "سماح" .. ثم قال:

-ربنا يخلصها منه .. وتكسب القضية
قالت "سماح" بحماس:
-أنا واثقه انها ان شاء الله هتكسبها وهتطلق منه .. مفيش قاضى عنده ضمير ممكن يرفض
انه يطلقها من واحد حقير زى ده .. ده كان عايز يغتصبها
هتف "أيمن" بدهشة:
-انتى بتتكلمى بجد .. ازاي يعني ؟
قالت وهى تشعر بالإحتقار تجاه "مصطفى":
-واحد لا عنده دين ولا أخلاق ... كان عايز ياخذ حقه غصب عنها .. وبعد ما ضربها كمان ..
لولا ان واحد من الجيران خلصها منه
ثم استطردت قائله:
-أصلاً أنا نسيت أقولك .. هى أصلاً لسه.....
قاطعها جرس هاتف "أيمن" .. رد "أيمن" قائلاً بمرح:
-ياريتنى كنت جبت سيرة جنية فضه
أتاه صوت "عمر" ضاحكاً:
-وأنا أقول عمال أشرق من الصبح ليه .. أتاريك عمال تقطع فى فروتى
-بالخير يا باشا
-بقولك ايه انت وراك حاجة يوم الأربعاء
قال "أيمن" بدهشة:
-يوم الأربعاء .. عادى يعني ورايا الشغل العادى بتاع كل يوم .. ليه فى حاجه
بدا "عمر" مترددا قليلاً .. ثم قال بجديه:
" -أيمن" عايزك تروح مع "ياسمين" ووالدها المحكمة
ابتسم "أيمن" ونظر الى "سماح" التى كانت تتابع ردود "أيمن" باهتمام:
-اشمعى يعني ؟
-هى رافضه انى أروح معاهم .. بس لو انت عرضت على والدها أعتقد مش هيرفض
-أيوة يعني انت هتستفاد ايه من كده ؟
قالت "عمر" بنفاذ صبر:
-عشان أبقي متابع معاك أول بأول يا "أيمن"
ابتسم "أيمن" بخبث قائلاً:
-هو الموضوع يهملك أوى كده ؟
ساد الصمت لفتره .. ثم أتاه صوت "عمر" قائلاً:
-أيوة .. يهمنى
اتسعت ابتسامه "أيمن" قائلاً:
-خلاص مفيش مشكلة .. حتى آخد "سماح" بالمره أهى تبقى جمبها
رفعت "سماح" حاجبها بدهشة .. أنهى "أيمن" مكالمته فقالت له بلهفة:
-قالك ايه "عمر" .. وهتاخذنى فين ؟
قال "أيمن" وهو مازال محتفظاً بابتسامته:
" -عمر" طلب منى انى أوصل "ياسمين" ووالدها المحكمة
بدت الابتسامه على وجه "سماح" قائله بخبث:
-وايه سر اهتمامه ده
قال "أيمن" بخبث مماثل:
-الله أعلم .. يمكن شفقه
تلاشت ابتسامه "سماح" وقالت فى حنق:
-ليه بأه ان شاء الله .. هى "ياسمين" ناقصة ايد ولا ناقصة رجل .. عشان يحس نحييتها

صمت قليلا ثم ابتسم قائلاً:
-احساسى نحيثها حاجه تانية خالص .. عارف يا "كرم" لما بشوفها بحس انى خايف عليها
أوى .. بحس انى ملهوف عليها أوى .. بحس انى شايف قلبها .. وحسه ..وسامع دقاته..
التف الى صديقه قائلاً:

-تصور يا "كرم" عمرها مسمحت لجوزها انه يلمس ايدها لما كانت مخطوباله
هتف "كرم" ينظر الى صديقه قائلاً:
-نعم يا اخويا ... هي متجوزة ؟
قال "عمر" بأسى:
-أيوة

صاح "كرم" قائلاً:
" -عمر" انت اتهبلت فى عقلك .. معجب بواحدة متجوزة
هتف "عمر" بنفاذ صبر:
-اصبر يا بنى آدم وانت تفهم
ثم استطرد قائلاً:
-هي رافعة قضية خلع على جوزها .. لأنه خانها وضربها .. هي أصلا متجوزتش الا شهر
واحد بس

سأله "كرم" بإستغراب:
-وانت شوفتها فين ولا عرفتها منين ؟
-ما هي أخت سكيرتيرتك
هتف "كرم" قائلاً:
-نعم

صمت قليلا ثم قال:
-لأ واحدة واحدة كده .. وترسيني على الدور من أوله

شرح له "عمر" كل ما يعرفه عن "ياسمين" وأهلها .. وهروبهم من "مصطفى" والعمل فى
مزرعته .. ثم استطرد قائلاً:
-كمان يومين هيكون النطق بالحكم
قال "كرم" بجديه:

" -عمر" متعلقش نفسك عشان متعش على جدور رقبتهك .. افرض القاضى محكمهاش
بالطلاق ورجعت تانى لجوزها
صاح "عمر" غاضباً:

- هو أنا كنت بحكيلك كل ده عشان تيجي تحبطنى يا "كرم" .. أنا مش ناقصك .. كفايه النار
اللى قايدة جوايا بسبب جوازها .. أنا عمرى ما كنت أتخيل انى ممكن أفكر فى واحدة كانت
متجوزة قبل كده .. انت عارف انى غيور جدا .. بموت من الغيرة .. وعلى دى بالذات أنا واثق
انى غيرتى عليها هتبقى أضعاف ما كنت بغير على "نانسى" .. فلو سمحت أنا مش ناقص
تحرقلى دمي بكلامك
ثم تركه "عمر" ودلف الى الداخل.

فى استراحت الغداء كانت "شيماء" تتناول غدانها بمفردها .. فجأة أتت "مها" وأزاحت احدى
الكراسي على طاولتها بعنف وجلست ووضع طعامها أمامها .. نظرت اليها "شيماء" قائله:
-مالك جايه بز عابيبك كده ليه
نظرت اليها "مها" هاتفه بغضب:

-شوفتى اللى حصل .. الهانم اخت البرنسيسه اشتغلت سكرتيره عند الباشا

نظرت لها "شيماء" بعدم فهم قائله:

-ايه ؟ .. أقطع دراعى ان كنت فهمت

قالت "مها" بغل:

"-ريهام" .. أخت الدكتورة "ياسمين" .. اشتغلت سكرتيرة عند البشْمهندس "كرم"

قالت "شيماء": "

-عادى وفيها ايه يعنى

نظرت اليها "مها" بحنق قائله:

-هى تشتغل تحت ايد دكتور "حسن" ومش بس كدة يبقى لها طالب كمان وعائشه فى دور

الأستاذة أم علم غزير ... وأبوها .. يمسكوه مخازن العلف ودى شغلانه مبيجبوش فيها الا حد

واثقين فيه .. وأختها بقت سكرتيرة للبشْمهندس "كرم" وهى اصلا لسه حتى عيله متخرجتش

.. كل ده وتقوليلى عادى .. لأ طبعا مش عادى

سألته "شيماء" باهتمام:

-أمال تفتكرى ايه الحكايه يعنى ؟

قالت "مها" بحزم:

-مش عارفه .. بس هعرف

كانت "ريهام" مغادره المكتب الى غرفتها بعد انتهاء عملها عندما وجدت "هانى" يستوقفها

قائلاً بابتسامه:

-ازيك يا آنسه "ريهام"

نظرت اليه قائله:

-أفندم ؟

استطرد قائلاً:

-أنا "هانى" .. أختك بتساعدنى فى شرح الحالات اللي موجودة فى المزرعة

نظرت اليه قائله:

-يعنى أنا أعمل ايه يعنى ؟

تنحى قائلاً:

-أنا بس كنت عايز أعرف انتى فى سنة كام .. ولا خلصتى كلية .. أصل شكلك صغير

صاحت "ريهام" قائله:

-ايه ده احنا هنتصاحب ولا ايه

ثم تركته وانصرفت .. كان "كرم" الذى خرج من المكتب بعدها يتابع المشهد من بعيد فاقترب

من "هانى" ووضع يده على كتفه قائلاً:

-انت مين يا ابنى انت ؟

التفت اليه "هانى" قائلاً:

-أنا "هانى شاكر"

قال "كرم" ببرود:

-وأنا "فيروز" .. "أبوة يعنى انت مين يعنى .. بتبيع ايه هنا فى المزرعة ؟

قال "هانى" وقد شعر الإهانه:

-ايه ببيع دى .. أنا طالب

قال له "كرم" بسخريه:

-طب يلا على فصلك

ثم تركه وانصرف

فى الصباح توجهت "مها" الى مكان عمل "عبد الحميد" فى مخزن العلف .. اقتربت منه قائله :

-صباح الخير يا عم "عبد الحميد"

التفت اليها "عبد الحميد" قائلاً:

-صباح الخير يا بنتى

قالت "مها": "

-كنت عايزة أسأل هو العلف الجديد اللي طلبه البشمةهندس "أيمن" وصل ولا لسه ؟

قال "عبد الحميد" بحيره:

-معديش فكرة يا بنتى ان فى علف جديد هيدخل المخزن محدش جبلى سيره

قالت بخبث:

-خلاص مش مشكلة يا عم "عبد الحميد" يمكن أنا اللي فهمت غلطت

ثم تظاهرت بأنها تهم بالإنصراف والتفتت اليه مرة أخرى قائله:

-صحيح يا عم "عبد الحميد" ازي الدكتوراة "ياسمين" هتيجي الشغل النهاردة ؟

قال "عبد الحميد": "

-الحمد لله يا بنتى كويسة .. وهى مبتغيبش أبدا ونزلت معايا الصبح يعنى تلاقيها دلوقتى فى

مكتبها أو بتتابع حالة من الحالات

قالت "مها" بخبث:

-أنا سألتك عليها لانى شيفاها حالها مش عاجبنى اليومين دول

نظر اليها "عبد الحميد" قائلاً:

-انتى صحبتها

أسرعت قائله:

-أيوه طبعا صحبتها .. ربنا يعلم أنا بحب "ياسمين" أد ايه يعتبرها زى أختى .. أه والله يا عم

"عبد الحميد" عشان كده عايزه أطمئن عليها

قال "عبد الحميد" بأسى:

-يمكن بس هى متوترة شوية عشان قضيتها

تساءلت "مها" بلهفة:

-قضية ايه ؟

تنهد تنهيدة عميقة ثم قال بصوت حزين:

-قضية طلاقها يا بنتى

ظهرت علامات الدهشة على وجهها .. لكنها تماكنت نفسها قائله بلهفه:

-أيوه أكيد الموضوع قالفها أوى

قال "عبد الحميد": "

-خلاص هانت كلها يومين وتخلص من المدعوع جوزها

سألته "مها" قائله:

-هو انتوا قرايب البشمةهندس "عمر"

أسرع "عبد الحميد" قائلاً:

-لا يا بنتى قرايبه ايه .. احنا فين وهو فين .. تقدرى تقولى معرفة من بعيد .. وهو الله يباركله

جبنا هنا المزرعة عشان اللي ميتسماش "مصطفى" جوز "ياسمين" كان عايز يرجعها بيته

غصب عنها

رفعت حاجبها وقالت بلوعم:

-وطبعا البشمةهندس "عمر" جبها هنا عشان يخيبها منه

قال "عبد الحميد":
-أبوة الله يباركله حمانا فى مزرعته وشغلنا فيها كمان
صمتت "مها" قليلا وهى شارده ثم التفتت اليه قائله:
-شكرا يا عم "عبد الحميد" .. شكراً أوى
ثم غادرت وتوجهت الى الاسطبلات حيث تعمل "شيماء" جذبتها من ذراعها وأخرجتها من
المكان ووقفت فى مواجهتها .. قالت "شيماء":
-ايه يا بنتى فى ايه انتى سحبه بقرة وراكى
قالت "مها" بتشفى:
-شوفتى مش قولتلك ان البت دى وراها سر هى وأهلها
سألتها "شيماء" قائله:
-بت مين ؟
-الدكتورة "ياسمين"
ثم استطردت "مها" قائله وعلامات الحقد على وجهها:
-طلعت يختى متجوزه .. وهربانه من جوزها .. و"عمر" أبو قلب رهيف مخبيها هى وأهلها
هنا فى المزرعة عشان جوزها ميوصلهاش
ظهرت علامات الدهشة على وجه "شيماء" وهتفت قائله:
-مش ممكن!
أكدت "مها" قائله:
-أنا عمرى قولتلك حاجه وطلعت غلط
صمتت "شيماء" قليلاً ثم قالت:
-يعنى ايه مش فاهمة .. البشْمهندس "عمر" ماله ومالها هى وجوزها
قالت "مها" بابتسامه ساخرة:
-طبعا عايز حته من التورته .. أمال هيهربها من جوزها ليه ويجيبها هنا ويسكنها فى أوضة
جنب بيته
-بس يا "مها" البنت باين عليها محترمة
-انتى بتفرك الأشكال دى .. شوية سهوكه وبصتين فى الأرض ونحنه ودمعتين .. يعملوا من
الفسيح شربات وتبقى البت اللى محصلتش
قالت "شيماء" غير مصدقه:
-معقول .. "ياسمين"
-أمال ليه مهتم بيها أوى كده .. ومشغلها هى وأهلها كمان .. خاصة انى عرفت انها لا قريبته
ولا حاجه
-يمكن بيعمل خير من غير ما يكون فى نيته حاجه وحشة
-انتى هبله يا بنتى .. هو فى حد فى الزمن ده بيعمل خير كدة من الباب للطاق
نبهت "مها" على "شيماء" قائله:
-أوعى تجبيلها سيرة اننا عرفنا حاجه
-ليه هتعملى ايه ؟
ابتسمت بخبث قائله:
-هعملها مفاجأة محصلتش

فى يوم المحكمة فجرأ .. ظلت "ياسمين" ساهره تصلى وتتضرع لربها أن يخلصها من زوجها
.. وأن يسخر القاضى لصالحها .. انتهت من قراءه الأذكار وظلت تقرأ فى مصحفها حتى

الشروق .. نهضت وارتدت ملابسها .. كانت فى حالة غريبة وكأنها لا تشعر بما حولها ..
سمعت طرقات على باب الغرفة فنهضت "ريهام" وفتحت الباب ..دخل والدهما قائلًا:
-ايه يا "ياسمين" خلصتى ؟

قالت فى وجوم:

-أيوه يا بابا أنا جاهزة

عانتها "ريهام" عناقاً طويلاً ثم نظرت اليها قائله:

-متخفيش ربنا معاكى ان شاء الله

خرجت "ياسمين" بصحبة والدها .. قال "عبد الحميد": "

-البشمهندس "أيمن" كلمنى امبارح وقالى هيوصلنا بعربيته

التفتت اليه "ياسمين" بدهشة قائله:

-وليه تعب نفسه

صمتت قليلاً ثم قالت بضيق:

-ياربى .. أكيد "سماح" اللي قالتله

قال والدها شارحاً:

-هو كتر خيره انه عايز يساعدنا يا بنتى

قالت بحنق:

-بس يا بابا احنا ممكن نروح لوحدنا .. ليه نتعبه فى سفر رايح جاى

اقتربا من بوابة المزرعة .. ولدهشتها وجدت "أيمن" واقفاً بجوار سيارته وبصحبه ...

"عمر" ... خفق قلبها لرؤيته .. نظر اليها بحنان جارف وكأنه يبث الطمأنينه فيها .. أشاحت

بوجهها عنه .. التفت "أيمن" اليهما قائلًا:

-اتفضلوا

تذكر والدها أنه نسى احضار بطاقته فعاد لإحضارها .. قالت "ياسمين" لـ "أيمن" بحرج:

-مفيش داعى يا بشمهندس "أيمن" احنا ممكن نروح لوحدنا العربيات على الطريق بتعدى

كثير من أدام المزرعة .. أنا عارفه ان "سماح" هى اللي قالت لحضرتك ..بس صدقنى مفيش

داعى تتعب نفسك

نظر "أيمن" الى "عمر" ثم الى "ياسمين" قائلًا:

-مش "سماح" اللي طلبت منى انى أكون معاكوا النهاردة

نظرت الى "عمر" الذى كان يتطلع اليها والإبتسامه على محياه .. أشاحت لوجهها عنه مرة

أخرى .. وأسرعت بالجلوس داخل السيارة .. نظر اليها "عمر" وهى داخل السيارة ودلو

اقترب منها وأمسك بيديها بين يديه وبث الطمأنينه فيها .. شعر بالألم لأنه لا يستطيع التخفيف

عنها .. ولا أن يكون بقربها .. ركب ثلاثتهم وانطلقوا فى طريقهم ..نظر "أيمن" فى المرأة الى

"ياسمين" الجالسه فى المقعد الخلفى قائلًا:

"-سماح" كانت جايه معايا .. بس تعبت فجأه الصبح

قالت "ياسمين" بقلق:

-خير ملها ؟

-مفيش تعب بسيط

أخرجت "ياسمين" هاتفها لتتصل بصديقها فنبهها "أيمن" قائلًا:

-مفيش شبكة على الطريق هنا .. هتلاقيها ضعيفه جداً

كانوا قد وصلوا القاهرة واقتربوا من مكان المحكمة حينما رن هاتف "أيمن" .. سمعت

"ياسمين" "أيمن" يقول:

-أيوه يا "عمر" .. أيوه لسه واصلين حالا .. لا قدمنا بتاع 10 دقائق كدة ونكون فى المحكمة ..

لسه أصلا الجلسة عليها نص ساعه .. طيب حاضر .. حاضر .. حاضر .. خلاص متقلقش

حاضر

أغلق "أيمن" الهاتف .. ورأته "ياسمين" عبر المرأة مبتسماً .. وصلوا الى المحكمة واستقبلهم المحامى على الباب .. دخلوا جميعاً ووصلوا الى المكتب الذى سيعقد فيه جلستها الأولى .. والتي تدعو الله أن تكون الأخيرة .. وأن يُحكم بطلاقها .. لم تجد أثراً لـ "مصطفى" .. فقط محاميه كان موجود .. تساءلت لماذا لم يحضر .. أم أنه سيأتى بعد قليل .. ظلت تقرأ ما تحفظ من القرآن فى سرها .. وقفوا جميعاً فى انتظار بدء الجلسة.

كان "عمر" يشعر بتوتر شديد .. أخذ يزرع شرفة المنزل مجيئاً وذهاباً .. استيقظ "كرم" من نومه وارتدى ملابسه للذهاب الى عمله .. وأثناء انصرافه لمح "عمر" داخل الشرفة فتوجه اليه قائلاً:

-ايه يا "عمر" انت مش رايح المكتب ولا ايه ؟
نظر اليه "عمر" دون أن يرد عليه .. وقف أمام سور الشرفة يمسكه بقبضتيه بقوة وكأنه يريد تحطيمه .. اقترب منه "كرم" وربت على كتفه قائلاً:

-ايه يا "عمر" فى ايه
قال "عمر" دون أن ينظر اليه:
-معاد الجلسة دلوقتى يا "كرم"

-متقلقش .. "أيمن" معاهم مش كده؟
أوما "عمر" برأسه دون أن يتحدث .. نظر اليه "كرم" وابتسم فى حنو قائلاً:
-هى تهمك للدرجة دى يا "عمر" ؟

التفت اليه "عمر" بسرعة وصمت قليلاً ثم قال:
-تهمني ؟ .. لو القاضى محكمهاش بالطلاق يا "كرم" أنا ممكن أدور على جوزها ده وأقتله
ثم قال بحزم:

-مستحيل أسمحه ياخذها يا "كرم"
ثم استطرد قائلاً:
-خاصة انها مش عايزاه
طمأنه صديقه قائلاً:

-ان شاء الله هيتحكمها بالطلاق .. مستحيل يعنى قاضى يسيبها مع واحد زى ده غصب عنها .. متقلقش

نظر اليه "عمر" قائلاً بصوت مرتجف:
-بجبها يا كرم .. وعايزها ..
ثم تنهد بقوة قائلاً:

-كون انها كانت متجوزة قبل كده دى حاجه وجعانى .. بس اللى هيوجنى أكثر .. هو انى أتكرم منها .. متصورش هى أد ايه مآثره فىا يا "كرم" .. شايفها جوهرة غالية أوى .. ممنوع لأى حد مهما كان انه يقرب منها .. حسسها غالية أوى وعالية أوى .. وهموت وأوصلها .. لما بشوفها يا "كرم" بحس انى بتخطف .. وقلبي معدش ملكى خلاص ..

نظر "عمر" الى "كرم" وقال بتصميم:
-بمجرد ما شهور العدة تخلص .. هطلبها من أبوها
ابتسم له "كرم" وربت على كتفه قائلاً:
-ان شاء الله

حانت اللحظة التى انتظرتها "ياسمين" طويلاً .. نظرت الى والدها قائله:
-بابا أنا خايفة أوى

طمأنها والدها قائلاً:

-متخفيش يا حبيبتي .. أنا واثق انك هتطلمي وتبشريني ان القاضى حكم لصالحك

مازال لا أثر لـ "مصطفى" .. كانت سعيدة لعدم اضطرارها لرؤيته .. لكنها بعدما وقفت أمام القاضى وتحدث محاميه .. علمت سر اختفائه .. أراد بذلك المماطلة حتى يتم تأجيل النطق بالحكم لجلسه أخرى.. لكن محاميهما الأستاذ "شوقى" كان بارعاً للغاية واستطاع اقناع القاضى بأن اختفائه متعمد للمماطلة .. وقرر القاضى اصدار الحكم فى نفس الجلسة

خرجت "ياسمين" من قاعة المحكمة واستقبلها والدها قائلاً بلهفة:

-طميني يا بنتى

اقترب "أيمن" منهما .. ألقى نفسها فى أحضان والدها والدموع تسيل من عينيها كالشلال قائله:

-الحمد لله يا بابا .. خلصت منه

ابعدت رأسها ونظرت الى والدها وهتفت بسعادة:

-القاضى طلقنى منه

تبلى وجه "عبد الحميد" بالدموع وتعالت شهقاته بالبكاء وعانقها مرة أخرى مردداً:

-الحمد لله .. اللهم لك الحمد والشكر .. لو مكنت القاضى طلقك كنت هفضل شايل ذنبك طول

عمرى .. الحمد لله

شعر "أيمن" بسعادة غامرة .. وأخرج هاتفه ليتصل بـ "عمر" .. لكنه وجد "عمر" وقد سبقه

بالإتصال .. رد عليه قائلاً :

-تدفع كام وأقولك الحكم ؟

صاح "عمر" بغضب:

"-أيمن" مش وقتك .. حكملها بيايه ؟

ابتسم "أيمن" قائلاً:

-طلقها منه

أغمض "عمر" عينيه للحظة وكأنه يريد أن يستشعر هذا الخبر عبر كل كيانه .. صمت وهو

يشعر بتقطع أنفاسه .. ثم تمتم فى خفوت:

-الحمد لله

أغلق "عمر" الهاتف وهو يشعر بسعادة بالغة .. ود لو كانت أمامه الآن .. ليرى السعادة

المرسومة على وجهها .. وعينيها التى تشع بهجه وفرحه .. والابتسامه على ثغرها .. ود لو

اعترف لها بحبه الآن .. وفى هذه اللحظة .. وده لو يخبرها .. بأنها ليست وحدها .. هو معها

.. بقلبه .. وبكل كيانه .. لكنه يعلم بأنه مضطر لأن ينتظر..

تقدم "أيمن" مع المحامى و "عبد الحميد" للخروج من المحكمة وكانت "ياسمين" تسير

خلفهم تبحث عن هاتفها فى حقيبتها .. حينما وجدت فجأة يدا تمسكها من ذراعها بقوة التفتت

الى الخلف لتجد نفسها وجهاً لوجه مع .. "مصطفى" .. شلتها الصدمة عن الحركة .. والتفكير

.. وجدته ينظر اليها بشراسة ويقول بقسوة وهو يضغط على ذراعها بقوة:

-القاضى طلقك منى؟ .. بس ورحمة أمى اللى ماتت بحسرتها عليا ما أنا عاتقك

اتسعت عيناها خوفاً والتفتت بسرعة لتنادى على والدها:

-بابا .. بابا

تركها "مصطفى" بسرعة واختفى وسط الحشود.

لكن تلك الساعات أشعرته بحنين جارف اليها .. تلك الساعات جعلته يتأكد أنه لن يستطيع العيش دونها .. وكأنها أصحاب في حياته الهواء الذي يتنفسه ويعيش عليه .. خطفت قلبه ببراعتها .. وقيدتها بحنانه .. وأنسته أي امرأة عرفها قبلها .. وكأنه لا يرى في الوجود سواها ..

رأى عبر السياج سيارة "أيمن" تقترب من البوابة .. خفق قلبه داخل صدره .. نهض الغفير وفتح البوابة عبر مسرعيها .. ابتسم "أيمن" الذي رأى صديقه واقفاً على بعد أمتار من البوابة .. دخل المزرعة وتوقف بجانب "عمر" .. "انحنى" "عمر" مستنداً على شبك السيارة بجانب "أيمن" .. ونظر الى الخلف .. حيث تجلس "ياسمين" .. هاله ما رأى .. كان يبدو عليها الحزن و الإضراب .. لم يتوقع أن يراها في تلك الحالة .. كانت ينتظر بلهفه رؤية الإبتسامه على شفيتها .. ففز قلبه داخل صدره من الالم وكأنه طعن بخنجر مسموم .. أمن المعقول أنها حزينه عليه .. على طليقتها .. أندمت على طلبها الطلاق .. هل شعرت بالحنين اليه .. نظر اليها عله يجد اجابات لأسئلته .. نزلت من السيارة بصحبة والدها .. توجهت الى مكان سكنها .. أوقف "أيمن" السيارة جانباً ثم وقف أمام "عمر" الذي أخذ يتابع "ياسمين" بعينيه وهي تتبعد .. نظر "عمر" الى "أيمن" قائلاً بحدده:

-هي مالها .. في ايه ؟
زفر "أيمن" قائلاً:

-جوزها .. قصدي طليقتها .. كلمها في المحكمة .. وهددها
اتسعت عينا "عمر" وقال بحدده:

-يعني ايه هدها ؟
قال "أيمن" بضيق:

-قالها القاضي طلقك مني بس مش هعتقك
نظر اليه "عمر" بحدده وصاح غاضباً:

-وانت كنت فين يا "أيمن" أما الحيوان ده هدها .. انت ازاي تسمحله يتكلم معاها أصلاً
-اهدى يا "عمر" .. كنت أنا و عم "عبد الحميد" بنتكلم مع المحامي .. وهي كانت ماشيه ورانا

وضع "عمر" احدى يديه في وسطه والأخرى على فمه وكأنه يكتم بركان ثائر .. ونظر الى حيث اختفت "ياسمين" .. ثم نظر الى "أيمن" قائلاً بغضب:

-لو أربلها تاني هقتله
ربت "أيمن" على كتفه قائلاً:

-خلاص اهدى .. هو مش هيقدر يوصلها هنا
أوما "عمر" برأسه .. وأخذ يفكر في "ياسمين" وفيما تشعر به الآن

-ده حقير أوى

نطقت "ريهام" بتلك العبارة بعدما قصت عليها "ياسمين" في غرفتهما ما حدث من تهديد "مصطفى" لها في المحكمة .. نظرت اليها "ياسمين" قائله:

-أما اتدورت ولقيته ورايا كنت هموت من الرعب .. أنا مش عايزه أشوف البنى آدم ده مرة تانية أبداً

نظرت لها "ريهام" في حنو قائله:

-متقلقيش خلاص معدتيش هتشوفيه تاني .. لا هو ولا أهله .. الله يحرقه هو وأهله
-أمه ماتت على فكرة

-وعرفتى منين ؟
-هو اللى قالى
أشاحت "ريهام" بيدها قائله:
-يلا خدت الشر وراحت
قالت "ياسمين" بأسى:
-ربنا يغفرلها ويرحمها .. ظلمتنى أوى .. بس مسمحاها
نظرت اليها "ريهام" بدهشة قائله:
-مسمحاها ايه يا بنتى .. دى تستاهل يتولع فيها هى وابنها
قالت لها "ياسمين" بهدوء:
-هى دلوقتى بتتحاسب يا "ريهام" على كل الى عملته فى حياتها .. أنا هسامحها .. عشان
ألاقى اللى يسامحنى لما أموت أنا كمان
ابتسمت "ريهام" قائله:
-انتى طيبة أوى يا "ياسمين" .. واحدة غيرك كانت دعت عليها
-هى خلاص معدتش تقدر تأذيني دلوقتى .. مش هيفيدنى الدعاء عليها فى حاجة
صمتت قليلاً ثم قالت:
-ربنا يرحمها هى وماما وكل أموات المسلمين
-اللهم آمين

التف الأصدقاء الثلاثة حول طاولة الطعام فى أحد المطاعم .. لتناول طعام العشاء .. بدأ "عمر"
شارداً .. يعبث بطرف ملعفته فى الطبق أمامه .. تبادل "أيمن" و "كرم" النظرات ..
والابتسامات الخبيثة .. هتف "كرم" فى مرح:
-الحب بهدله .. تررم تررم .. خلانى أندله .. تررم تررم
نظر اليه "عمر" فى غيظ قانلاً:
-لو متلمتش هسيبكوا وأمشى
قال "كرم" بمرح:
-أنا قولت حاجه .. واحد وبيغنى
صمتت قليلاً ثم قال:
-صدق الشاعر اللى قال : الهس بس هس حبيبي لازم يحس ... حبيبي عمال بيتخن وانا عمال
أخس
هم "عمر" بالإنصراف فجذبه "كرم" قانلاً وهو ينظر الى "أيمن":
-خلاص يا "أيمن" كفايه .. عيب كده
ثم نظر الى "عمر" قانلاً:
-خلاص حبه جد باه .. ناوى على ايه ؟
زفر "عمر" فى ضيق قانلاً:
-مضطر غصب عنى أستنى 3 شهور .. مش عارف أصلاً هقدر هصبر الوقت ده كله ازاي
سأله "أيمن" قانلاً:
-ومين قالك ان ياسمين عدتها 3 شهور ؟
نظر ايه "عمر" قانلاً:
-أمال ايه ؟
قال "أيمن" بإبتسامه:
-اللى بتخلع جوزها عدتها بتكون حيضة واحدة بس .. هى دى السنة

سأله "عمر" بلهفه:

-بجد يا "أيمن" ؟

-أيوة بجد

قال "كرم" فى مرح:

-قشطة أوى .. بسبب حسن السير والسلوك خفضنا المدة من 3 شهور لشهر ان شاء الله ..

لف لفه وتعالى يمكن نعملك أوكازيون تانى

ابتسم "عمر" وشرع فى تناول طعامه قائلاً:

-كده الواحد ياكل بنفس

سعد كثيراً عندما علم أن ما يفصله عن "ياسمين" هو شهر واحد فقط.

فى صباح اليوم التالى خرجت "ياسمين" من غرفتها .. وقبل الذهاب الى عملها .. توجهت حيث شجرتها .. لكنها اليوم تستقبلها بالإبتسامه فهذا هو يومها الأول بعد أن تحررت من قيد "مصطفى" .. القيد الذى كان أن يخنقها .. نظرت الى الخضرة حولها .. وللعصافير على الشجر .. كانت تشعر بأن تغريد العصافير مختلف اليوم .. لم تمسحهم يغردون بتلك السعادة من قبل .. شعرت بأنهم يشاطرونها فرحتها .. ويباركون لها حربتها .. أخيراً أصبحت حره مثلهم .. حتى الهواء الذى تستنشقه .. شعرت بأنه اليوم مختلف .. فكل نفس يحمل مزيج عجيب من السعادة والأمل والإرتياح .. يسرى عبر رئتيها لينعش جسدها ..

قامت وتوجهت الى عملها .. ولأول مرة يراها دكتور "حسن" مقبله على عملها والإبتسامه تعلقو شفيتها .. كان سعيداً لسعادتها .. وإن كان لا يعرف سبب تلك السعادة .. أثناء انهماكها فى عملها .. اقترب منها .. رفعت رأسها .. لتتلاقى نظراتهما فى صمت .. شعر بأنها اليوم أجمل من ذى قبل .. وجهها يشع نوراً .. عينيها لم تعد تحمل تلك العبرات التى تهدد دائماً بالإنهمار .. اختلفت نظرات الحزن والأسى لتحل محلها نظرات الفرح والأمل .. كانت عيناه اليوم أيضاً مختلفه .. كأنها تفصح عن سرراً لطالما أخفته .. لكنها خائنه اليوم .. وباحت بسرره .. عبر شفره صغيره .. استقبلت عينها تلك الشفره .. ومررتها على قلبها .. فترجمها .. وتعالق خفقاته عندما فهم تلك الشفرة التى أرسلتها عيناه الى عينيها .. أشاحت بوجهها .. فقلبت الضعيف وصلت سرعة خفقاته لذروتها .. قال لها بصوت حانى:

-صباح الخير

ردت بصوت خافت حاولت السيطرة على رجفته:

-صباح النور

ثم عادت لتكمل فحص الحاله التى أمامها .. ظلت عيناه معلقه بها .. وكأنه يخشى فرارها .. ابتسم قائلاً:

-مكنتش متوقع انك هتنزلى الشغل النهاردة .. لو تعبانه من سفر امبارح روحى ارتاحى

النهاردة

قالت وهى تستمر فى أداء عملها:

-لا .. أنا كويسه

أوما برأسه وقال لها بحنان جارف:

-لو احتجتى حاجه عرفيني

لم تجبه .. التفت وانصرف .. تابعته بعينيها فى صمت .. وابتسامه صغيره تتكون ببطء على شفيتها

توقفت عن العمل عندما حان موعد استراحة الغداء .. توجهت الى القاعة والإبتسامه تعلقو

شفيتها .. كانت على الرغم منها لا تستطيع اخفاء فرحتها .. كانت وجهها دائماً يفضحها .. لا تستطيع اخفاء ما تشعر به بداخلها .. حزناً كان أم فرحاً .. أنهت غداها .. ووقفت قليلاً مع بعض زميلاتها العاملات فى المزرعة .. كانت "ياسمين" تتهرب دائماً من صحبتها .. أو التحدث معها .. فكان قلبها يحمل همّاً يكثفها .. فلا تستطيع الاندماج مع الآخرين .. أو التواصل معها .. لكنها اليوم كالطير الحبيس الذى حصل أخيراً على حريته .. ووقفت تتجاذب معها أطراف الحديث وتضحك فى مرح .. وفجأة اقتربت منها "مها" .. "لم تلقى لها "ياسمين" بالاً .. ووقفت "مها" بين الجمع وصفقت بيديها لتجذب انتباههم قائلة:

-اسكت هووووس .. عندي ليكوا خبر حلو النهاردة
ثم التفتت الى "ياسمين" وقالت بخبث:

-ولا تحبى تقوليلهم الخبر بنفسك يا "ياسمين"
نظرت اليها "ياسمين" بدهشة قائلة:

-خبر ايه يا "مها" ؟

قالت "مها" بعتاب مصطنع:

-اخص عليكى .. طالما فرحتى يبقى تفرحينا معاكى
جف حق "ياسمين" ونظرت اليها قائلة:

-مش فاهمة قصدك ايه

نظرت "مها" الى الفتيات اللاتي توففن عن الحديث وتابعن ما يحدث .. قالت لهن فى مرح:

-النهاردة عايزين كلنا نبارك لـ "ياسمين"

نظرن الى "ياسمين" وقالت احداهن:

-نباركلها على ايه ؟

وقالت أخرى:

-ايه اتخطبت ؟

قالت "مها" وهى تنظر الى "ياسمين" بشماته:

-لأ .. اطلقت

تعالت صيحات عدم التصديق .. نظرت الى بعضهن البعض فى دهشة .. كانت "ياسمين" تنظر الى "مها" فى جمود .. لكن اخترق أذنيها ردود فعل من حولها:

-بجد

-ايه ده هى كانت متجوزة أصلاً

-أكيد بتهزرى

-ياسمين أصلاً مش متجوزة

قالت "مها" شارحة فى استمتاع:

"-ياسمين" كانت رافعة قضية خلع على زوجها وكسبتها امبارح

ثم نظرت الي "ياسمين" قائلة بخبث:

-والبشمهندس "عمر" كان كريم أوى معاها وخباها من جوزها هنا فى مزرعته لحد معاد

الجلسه .. اظاهر ان البشمهندس "عمر" بيعزك أوى يا "ياسمين"

لم تستطع "ياسمين" تحمل تلميحاتها فأنصرفت فى عجاله .. كانت تسير بسرعة وهى لا ترى

أمامها .. كانت العبرات تتجمع فى عينيها .. قابلها "هانى" فحاول يوقفها قائلاً:

-دكتورة "ياسمين" ثوانى لو سمحتى

لكنها لم تسمعه .. بل لم تراه .. صنعت العبرات غشاوة على عينيها فسارت تتبين طريقها بصعوبة .. وصلت الى شجرتها .. ألقت بنفسها على جذعها الذى فارقت منذ ساعات .. وضعت كفيها على وجهها وجهشت فى بكاء عميق .. لماذا لا يتركها الناس وحالها .. لما ينعصون عليها فرحها .. لماذا يستكثر بعض الناس أن يرى غيره سعيداً .. لماذا يخوض الناس فى

أعراض بعضهم البعض ويمزقونهم بلا هوادة .. لماذا لا يعلم الناس أن الكلمات التي تخرج من أفواههم هم محاسبون عليها تماما كأعمالهم .. لماذا لا يدرك البعض أن الكلمة قد تكون خنجراً ينغرس في قلب من أمامه بلا هوادة .. أو تكون بلسماً تطيب جرحه في لحظات .. الى متى ستشعر بهذا الظلم .. الى متى ستظل الإبتسامه عزيزة عليها .. وكأنها زائر لا يحل إلا بعد غياب طويل .. لحظات ثم يعود ليرحل مرة أخرى بقسوة .. أخذت تردد بصوت مرتجف :
-اللهم انى مغلوب فانتصر .. اللهم انى مغلوب فانتصر

فجرت "مها" قنبلتها ثم أخذت طعامها وجلست على احدى الطاولات تتجاذب أطراف الحديث مع "شيماء" .. وفجأة رأت دكتور "حسن" يقف بجانبها .. فالتفتت تنظر اليه فى صمت .. فقال بحزم:

-المزرعة هنا للشغل وبس يا دكتورة "مها" .. مش مكان للقييل والقال .. لو ضايقتى أى زميلة ليكي مرة ثانية أنا هبلغ البشمهندس "عمر" بنفسى
شعرت "مها" بالخوف فقالت له:
-أنا مكنتش قصدى أضايقها يا دكتور "حسن" أنا بس....
قاطعها الرجل بحزم قائلاً:

-أنا مبحبش أقطع عيش حد .. لو البشمهندس "عمر" عرف اللى انتى عملتيه أظن هيتصرف معاكى تصرف يزعلك .. مش عايز أشوف منك غلطة مرة ثانية .. لا فى حق دكتورة "ياسمين" ولا فى حق أى حد تانى هنا فى المزرعة .. مفهوم أومات برأسها فى صمت .. غادر القاعة فالتفتت الى "شيماء" قائله:
-هو ماله ده .. يكنش اشتغل محامى لست "ياسمين" وأنا معرفش
أخذت تتناول طعامها فى حنق

كان "عمر" يجلس فى مكتبه .. كان تركيزه كله موجه الى تلك الفتاة التي تبعد عنه بضع خطوات .. شعر بأنه يرغب فى رؤيتها مرة أخرى .. نهض من مكتبه وتوجه الى مكان عملها .. لم يجدها .. فسأل "هانى" الذى كان يجلس على أحد الكراسي يطالع كتاب بيده:
-مشفتش الدكتورة "ياسمين" يا "هانى" ؟

قال "هانى" بحنق:

-أدينى أعد مستنيها .. شوفتها من شوية ماشيه وواخده فى وشها نادتلها معبرتنيش
قال "عمر" بقلق:
-مشيت منين ؟

أشار له "هانى" الى الإتجاه الذى رأى "ياسمين" تسير فيه .. ذهب "عمر" فى اثرها .. ظن أنها ذهبت الى شجرتة .. اقترب من الشجرة فسمع صوت شهقات صغيره ..التف حول الشجرة ليجد "ياسمين" جالسه على الجذع تخفى وجهها بكفيها .. وتبكي .. هتف فى لوعه:
" -ياسمين" فى ايه ؟

رفعت رأسها لتراه أمامها .. مسحت عبراتها المتساقطه قائله:
-مفيش حاجه

تفرس فيها وسألها مرة أخرى:

-قوليلى ايه اللى حصل

ردت بحده دون أن تنظر اليه:

-قولتلك مفيش

احتار "عمر" فى تفسير سبب بكائها .. خطر بباله خاطر تألم له قلبه .. هل من المعقول أنها تبكى لفراق زوجها .. أمازالت تحبه .. أتبكيه .. أم تبكى حبها له .. أم تبكى صدمتها فيه .. أم تبكى بعدها عنه .. لم يتحمل حيرته .. سألها بصوت خافت:

-كنتى بتحبيه ؟
رفعت عينها اليه فى دهشة .. من يقصد .. أيقصد "مصطفى" .. كيف يسألها عن أمر خاص
كهذا .. ردت فى حزم قائله:

-لو سمحت اتفضل امشى

قال "عمر" بحده:

-طب ريحيني بس

نهضت قائله بغضب:

-خلاص همشى أنا

ثم تركته خلفها وانصرفت .. كانت الغيره تعصف بكيانه .. أتفكر فيه ؟ .. أتشتاق اليه؟ .. هل من
الممكن أن تسامحه يوماً؟ .. هل من الممكن أن ترغب فى العودة اليه يوماً؟ .. لماذا ترفض
التحدث اليه .. لماذا لا تخبره بما فى قلبها وعقلها ليسترىح قلبه .. عاد الى مكتبه والغضب على
محياء .. وجد "كرم" ينتظر بالداخل .. نظر اليه "كرم" قائلاً:
-فى ايه يا "عمر" ؟

أزاح "عمر" كرسي المكتب وجلس عليه فى عصبية قائلاً:

-شوفت "ياسمين" بتعيط من شويه سألتها مالك مرضتتش تريحنى

نظر الى "كرم" قائلاً بغضب:

-مش عارف حتى أتكلم مجرد كلام عادى مع البنت اللى بحبها .. مش مديانى أى فرصة أقرب
منها

قال له "كرم": "

"-عمر" هى لسه مطلقة امبارح .. وكمان تهديد طليقها ليها .. يعنى أكيد مشاعرها متضاربه
نظر اليه "عمر" قائلاً بصرامة:

-وأنا عايز أكون جمبها .. أقولها متخفيش من حد انا جمبك .. عايز أتأكد ان الحيوان ده ملوش
أى مكان دلوقتى فى قلبها .. وانها نسيته نهائى
صمت "عمر" قليلاً ثم هب واقفاً وهو يقول:

-أنا رايح حالا أطلبها من أبوها

اعترض "كرم" طريقه قائلاً:

-يا ابنى اهدى شوية .. دى لسه مطلقة

قال "عمر" بحده:

-هتجنن يا "كرم" دى مش راضية حتى تتكلم معايا .. عايز أثبتلها انى مش بلعب وانى

عايزها بجد .. أنا لحد دلوقتى ماقولتهاش انى بحبها .. هموت وأقولهاها يا "كرم" .. بس

خايف أقولها تضايق منى وتفتكرنى بلعب بيها .. عايز أتقدملها دلوقتى .. عشان لما أقولهاها
تعرف انى بحبها بجد وعايزها بجد

قال "كرم": "

-يا ابنى وأهلك .. انتى ناسيهم

سأله "عمر": "

-ومالهم أهلى ؟

-مش لازم يعرفوا تفاصيل الموضوع ده .. دول ميعرفوش ان فى موضوع أصلاً

فكر "عمر" قليلاً ثم قال:

-معاك حق لازم أستغل الشهر ده لحد ما عدتها تخلص .. أنا هكلم ماما وبابا وأعرفهم انى

عايز أخطب .. وأخليهم ييجوا هنا ويتعرفوا عليها .. أهو على الأقل بعد ما الشهر يخلص تكون

هى قربت من ماما وماما قربت منها وبقي بينهم علاقة كويسة

قال "كرم": "

-تمام كده .. مش تقولى أطلبها من أبوها فى العده

قال "عمر" بإصرار:

-أنا كدة كدة هكلم أبوها .. مش هستنى لما الشهر يخلص .. عايزها تعرف من دلوقتى انى عايزها .. وكمان عشان أقدر أقدمها لأهلى ويتعرفوا عليها
-خلاص تمام كده .. رتب انت موضوع أهلك ده

أوما "عمر" برأسه قائلاً:

-هكلمهم النهاردة ان شاء الله

هاتف "عمر" أهله فى المساء .. لم يتحدث عن أى تفاصيل .. فقط قال لأمه بأنه وجد فتاة أحلامه التى يتمنى الارتباط بها .. ويريدها أن تلتقى مع عائلته ويعرفهم عليها .. كانت والدته سعيدة للغاية .. فلطالما انتظرت اليوم الذى يدق فيه قلب ابنها مرة أخرى .. اتفقا على القدوم بعد ثلاثة أيام .. لن يحضر الأبوان فقط .. بل عمته "ثرى" أيضاً .. انتهى المكالمه وهو يشعر بالسعادة فى قلبه .. فها هو يقترب من حلمه شيئاً فشيئاً .. "ياسمين" نادى الخادمة وقال لها:

-عايزك تنظف البيت والأوض كلها كويس جدا لان أهلى جايبين المزرعة وهيعدوا كام يوم

اقترب "عمر" من "عبد الحميد" الجالس داخل المخزن يدقق فى الدفاتر التى أمامه .. ابتسم "عمر" قائلاً:

-صباح الخير يا عم "عبد الحميد" .. ربا يديك الصحة

هب "عبد الحميد" واقفاً والنف حول المكتب وسلم على "عمر" قائلاً:

-يا صباح النور يا بشمهندس اتفضل

جلسا الإثنان أمام بعضها البعض .. صمت "عمر" قليلاً وكأن يستجمع أفكاره ثم نظر الى "عبد الحميد" قائلاً:

-أنا كنت عايز أتكلم مع حضرتك فى موضوع .. موضوع يخص الدكتوراة "ياسمين"

قال "عبد الحميد" بلهفه:

-مالها "ياسمين" بنتى

طمأنه "عمر" بإشاره من يده قائلاً:

-متقلقش مفيش حاجة وحشه .. أنا بس كنت عايز أكلّمك فى موضوع .. أنا عارف انه مش

وقته .. بس على الأقل يبقى فى ربط كلام بينا

قال "عبد الحميد" بقلق:

-خير يا بشمهندس قلقتنى

تتحنح "عمر" ونظر اليه ببعض الحرج قائلاً:

-أنا عارف ان الوقت ممكن ميكنش مناسب .. بس .. أنا عايز أطلب منك ايد الدكتوراة

"ياسمين"

بهت "عبد الحميد" وفتح فمه فى دهشة .. صمت لفترة وهو يحاول استيعاب ما يسمع .. ثم

ردد قائلاً:

-عايز تتجوز "ياسمين" بنتى ؟

ابتسم "عمر" قائلاً:

-يشرفنى انى أطلب ايدها منك يا عم "عبد الحميد"

كان "عبد الحميد" مازال واقفاً تحت تأثير المفاجأة .. فتحدث "عمر" قائلاً:

-زى ما قولت لحضرتك .. أنا عارف ان الوقت مش مناسب .. بس أنا حابب انى أعرفك

وأعرفها برغبتي دى من دلوقتى .. وكمان أهلى جايبين بعد كام يوم وحابب ان الأسرتين

يتعرفوا على بعض .. لحد ما يبقى الوقت مناسب اننا نعمل خطوبة

صمت قليلاً ثم قال:

-وبعد أدنك أنا عايز خطوبة وكتب كتاب مع بعض .. والفرح هيكون بعدهم بوقت قصير
تحدث "عبد الحميد" أخيراً قائلاً:
-والله يا بشمهندس أنا اتفاجنت بطلبك .. وأنا عن نفسي مش هلاقى أحسن منك عريس لبنتي
.. بس أنا لازم أخذ رأيها الأول
قال "عمر" بسرعه:
-طبعاً يا عم "عبد الحميد" .. كلمها وأنا منتظر منك الرد ان شاء الله
ابتسم "عبد الحميد" قائلاً فى حبور:
-اللى فيه الخير يقدمه ربنا
استأذن "عمر" ثم انصرف .. وجدت العبرات طريقها الى عين "عبد الحميد" ورفع رأسه
وتمتم قائلاً:
-أحمدك وأشكر فضلك يارب

-أصلاً من ساعة ما دخلت المزرعة وهى مش طايقانى
هتفت "ياسمين" بهذه العبارة وهى جالسه مع "سماح" فى بيتها .. قالت "سماح": "
-ليه مش طايقاكى
قالت "ياسمين" بحدده:
-هى كده من الباب للطاق
ثم استطرقت قائله:
-من البداية وهى فاكدة ان فى حاجه بينى وبين البشمهندس "عمر"
نظرت اليها "سماح" بخبث قائله:
-وهو فى حاجه بينك وبينه ؟
هتفت "ياسمين" بغضب:
"-سماح"
-خلاص خلاص كنت بهزر
زفت "سماح" ثم قالت:
-بصى سيبك منها .. ولو عملتلك حاجه تانى قولى لـ "عمر"
هتفت "ياسمين" بحدده:
-أقوله ايه ... أقوله فى واحدة من اللى بيشتغلوا عندك فاكدة ان فى حاجه بينى وبينك!
تمتمت "سماح": "
-معاكى حق مينفعش تقوليله كده
ثم نظرت اليها قائله:
-أمال هتعملى ايه
قالت "ياسمين" بحزم:
-مش هسمحها تتكلم عنى تانى .. وهوقفها عند حدها .. مش عشان طيبة يبقى آخذ على أفايا
.. لأ بعد كدة هاخذ حقى بإيدي
قالت "سماح" بمرح:
-ماشى يا عم الجامد
سمعا صوت مفتاح فى الباب .. فقالت "ياسمين" بدهوة:
-ايه ده .. زوجك ؟
نهضت "سماح" واستقبلت زوجها على الباب وأخبرته أن "ياسمين" بصحبتها توجه الى
غرفتهما .. عادت "سماح" لتجد "ياسمين" تنهض قائله:

- همشى أنا بقه يا "سماح"
قالت "سماح" بأسف:
- كل مرة بيتأخر فى الشغل .. النهاردة اليوم الوحيد الى جه بدرى عن معاده
قبلتها "ياسمين" قائله:
- معلش هجيلك وقت تانى
أوصلتها الى الباب قائله:
- المهم متحطيش الموضوع فى دماغك وتخلى البتاعه دى تعكنن عليكى
قالت "ياسمين": "
- لأ خلاص .. هى حسبي الله ونعم الوكيل فيها وخلاص
انصرفت "ياسمين" ودخلت "سماح" الى زوجها الذى قبلها وعانقها قائلاً:
- وحشتينى
ابتسمت قائله:
- انت وحشتنى أكثر .. مش كنت تقولى انك جاى بدرى
- المويابل فصل شحن معرفتش أكلمك
قبلته على وجنته قائله:
- طب يا حبيبى ثوانى وأحضر السفارة
- تبعها الى المطبخ قائلاً:
- ماشى وأنا هساعدك
ضحكت قائله:
- ايه الهنا اللى أنا فيه ده
ابتسم قائلاً:
- آه بس متخديش على كده
أخذنا يعدان السفارة معاً .. وعندما جلسا قال "أيمن": "
" - ياسمين " عاملة ايه دلوقتى
- كويسة الحمد لله .. مبسوطه انها خلصت من اللى كان زوجها
صمت قليلاً ثم قال:
- قوليلى يا "سماح" هو مفيش حاجه كده ولا كده ؟
نظرت اليه قائله:
- كده ولا كده ازاي يعنى ؟
قال بخبث:
- يعنى الأعدة الحريمى اللى كانت بره من شوية دى .. متقالش فيها حاجه متعلقه بان فى حد
مثلا هى معجبه بيه
قالت "سماح" بخبث:
- لأ بصراحه ماقلتليش حاجه زى كده .. بس أنا حابه أسألك هو فى حد معجب بيه ؟
قال بخبث وهى يعاود تناول طعامه:
- الله أعلم
تركت الملعقة من يدها ونظرت اليها قائله:
" - أيمن " بطل غلاسه باه لو تعرف حاجه قولهاالى
ابتسم لها قائلاً:
- اعرف ايه .. كلى يا بنتى كلى
- مش واكله .. فى حاجه انت مخبيها .. ريحنى وقولهاالى
- هكون مخبي ايه يعنى
- ليه سألتنى عن ان "ياسمين" معجبه بحد

- عادى يعنى

صاحت بغضب طفولى:

-لأ مش عادى .. ريحنى بأه

ضحك بشدة قائلاً:

-يا ستير الستات دول عليهم فضول يودى فى داهية

أمسكت سكينه الطعام ورفعتها قائله:

-قر واعترف أحسنلك

صمت قليلاً ثم قال بجديه:

-طيب هقولك جملة بس متسألينيش عن أى تفاصيل اتفقنا

قالت بجديه مماثله:

-اتفقنا

أخذ رشفة من كوب الماء الموضوع على جانبه ثم قال:

-احتمال يبقى فى خطوبة قريب

كتمت انفعالها .. ونظرت اليه قائله:

-هسالك سؤال واحد بس

-لأ .. قولنا بدون أسئله

صاحب بصوت طفولى:

-عشان خاطرى يا "أيمن" .. عشان خاطرى .. سؤال واحد بس

-قولى يا ستى

نظرت اليه بلهفه قائله:

"-عمر" صح ؟

هتف "أيمن" قائلاً:

-يا سلام .. كدة بأه يبقى ايه التفاصيل اللي أنا مخبيها .. انتى بتستعيطى يا "سماح"

صفت بيديها وهتفت فى مرح قائله:

-يبقى "عمر"

نظر اليها "أيمن" بغیظ قائلاً:

-أنا غطان انى فتحت بقى أصلاً

ضحكت "سماح" قائله:

-أنا مفيش حاجه تستخبي عليا يا حبيبي

قال لها "أيمن" بجديه:

-او عى تقوليلها حاجه .. سيبي "عمر" هو اللي يقولها بنفسه بالطريقة اللي هو شايفها

اتسعت ابتسامتها قائله:

-متخفش هسيبها تتفاجئ .. وأكيد هتبقى أحلى مفاجأة

دخلت "ريهام" مكتب "كرم" لتقدم له أحد الفاكسات التى وصلته قبل قليل .. تطلع الى الفاكس

وهمت بالإنصراف .. لكنه استوقفها قائلاً:

-لحظة يا أنسه "ريهام" لو سمحتى

وقفت "ريهام" .. فوقف ولف حول المكتب وأصبح فى مواجهتها ..بدا متردداً قليلاً ثم قال:

-عايز أسالك عن حاجه شخصية شوية

قالت ببرود:

-أسفه مش بتكلم فى أمورى الشخصية مع حد

ثم همت بالإنصراف لكنه استوقفها مرة أخرى قائلاً:

-استنى بس .. مش خاصة بيكي انتى .. خاصة بأختك
قالت لها بدهشه:

"-ياسمين "

-أيوة

سألته باستغراب:

-مالها "ياسمين"

جلس على المكتب .. ونظر اليها قائلاً:

-يعني كنت عايز أعرف .. يعني فى حد فى حياتها ؟
قالت بدهشة:

-فى حياتها حد ازاي يعني

-يعني معجبه بحد

صاحت بحدة:

-دى لسه مطلقه مكملتش يومين

زفر "كرم" قائلاً:

-طيب هكلمك بطريقة مباشرة .. هى لسه حسه بحاجه ناحية جوزها
قالت بسرعة:

-لا طبعاً

تمتم قائلاً:

-ممنممم كويس .. طيب .. يعني ايه رأيها فى الشغل مع "عمر" .. "يعني وفى شخصية
"عمر" .. بتكلمك عنه ؟

فهمت بفطنتها ما يريد قوله فأسرعت قائله:

-لا اطلاقاً .. مبتجيش سيرته خالص .. وكمان شكلها بتستقل دمه
هتف "كرم": "

-نعم ؟ .. بتستقل دمه ؟

قالت بحدته:

-أيوة .. وبعد اذنك عندى شغل كتير وحضرتك معطلنى

قالت ذلك ثم التفتت لتصرف .. أخذ يتابعها بنظراته وهو يضرب كفاً بكف

دخلت "ريهام" الغرفة لتجد "ياسمين" جالسه على فراشها تقرأ احدى الروايات .. جلست
بجوارها قائله:

-أخبار الجميل ايه ؟

ابتسمت "ياسمين" قائله:

-الحمد لله

قالت "ريهام" بخبث:

-عارفه البشهندس "كرم" سألنى النهاردة عن مين ؟

-عن مين ؟

-عنك

قالت "ياسمين" فى حيره:

-سأل على حاجه فى الشغل

ابتسمت "ريهام" بخبث قائله:

-لا سأل على حاجه فى قلبك

قالت "ياسمين" بدهشة:

-نعم

ضحكت "ريهام" قائلة:

-آه والله .. فضل يسألني هي معجبه بحد .. فى حد فى حياتها .. بصراحة أول ما قالى كده قلبى وقع فى رجلى افكرته يقصد نفسه

رفعت "ياسمين" احدى حاجبيها قائلة:

-وقلبك يقع فى رجلك ليه بأه ان شاء الله

قالت "ريهام" بتأفف:

-أوووف يا ستى سيبك منى أنا دلوقتى .. خلينا فيكى .. عارفه سألنى قالى ايه .. سألنى رأيك

ايه فى البشمهندس "عمر" وبتقولى عنه ايه

قالت "ياسمين" بدهشة:

-سألك كده وش

ضحكت "ريهام" قائلة:

-آه والله .. وأنا اللي كنت فاكراه خبيث وحويط .. طلع على نياته .. آل فاكرنى هفتن عليكي

قالت "ياسمين" بحده:

-أنا أصلا مبخبش سيرته

-حتى لو كنتى بتجيبى سيرته أكيد مكنتش هقوله

شردت "ياسمين" قليلا ثن قالت:

-كلامه غريب أوى

-أنا كمان استغربت كلامه .. بس قلبى حاسس كده ان.....

قاطع "ريهام" صوت طرقات على الباب .. فتحت لوالدها .. قامت "ياسمين" واستقبلته

مبتسمه .. بادلها والدها الابتسام قائلاً:

"-ياسمين" يا بنتى فى حاجه عايز أقولهاك

-اتفضل يا بابا

كانت "ريهام" تنقل نظرها بينهما هما الاثنان .. قال "عبد الحميد" وابتسامته تتسع على

شفتيه:

-جالك عريس النهاردة

نظرت اليه "ياسمين" و "ريهام" فى دهشة .. وهتفت "ريهام" قائلة:

-عريس .. مين هو

نظر "عبد الحميد" الى "ياسمين" قائلاً:

-البشمهندس "عمر"

شهقت "ريهام" من الدهشة والفرحة معاً .. أما "ياسمين" شعرت بأن قلبها قفز من صدرها

من قوة دقاته .. تصاعدت حمرة الخجل الى وجنتيها .. والابتسامه تملو شفتيها .. حاولت

مداراتها .. لكنها أبت الا وأن تظهر واضحة للعيان .. أكمل الأب قائلاً:

-هو قالى انه عارف ان التوقيت مش مناسب .. بس هو عايز موافقة مبدنيه .. عشان كمان

أهله جايبين بعد كام يوم .. حابب يكون فى تعارف بينا وبينهم

كانت تشعر بأنها داخل حلم لذيذ وودت ألا تستيقظ منه أبداً .. "عمر" طلبها هى للزواج ..

"عمر" يرغب فى الزواج منها .. "عمر" يريد اها هى .. أخذت تردد تلك الكلمات فى عقلها

وتحاول استيعابها .. نظر "عبد الحميد" اليها فى حنان وقد شعر بموافقتها على الفور .. قال

لها فى حنو:

-ها يا "ياسمين" أقول للرجال ايه ؟

أسكتها الخجل فلم تجب .. قالت "ريهام" بسرعة:

-قوله هتفكر يا بابا .. هى أكيد محتاجه وقت تفكر فيه .. ما هو مش سلق بيض يعنى .. ده

جواز
قال "عبد الحميد":
- خلاص هبلغه الكلام ده
ثم التفت الى "ياسمين" قائلاً:
- وانتى يا بنتى استخيري ربنا .. ولما توصلى لقرار عرفيني ..
أومأت "ياسمين" برأسها فى خجل .. خرجة والدها .. أغلقت "ريهام" الباب وقفرت لتعانق
أختها قائلة فى فرح:
- والله كان قلبي حاسس
تركتها "ياسمين" وجلست على السرير فلم تعد قدماها تحملانها .. جلست "ريهام" بجوارها
قائلة بمرح:
- انطقى يا بنتى قولى حاجه
نظرت اليها "ياسمين" قائلة:
- مصدومة يا "ريهام" .. متوقعتش أبدا انه .. يعني أنا فين وهو فين .. متخيلتش أبداً ان ده
ممكن يحصل
ثم نظرت الى "ريهام" قائلة بلهفه:
- انتى سمعتى اللى أنا سمعته صح .. يعني بابا قال ان البشمةهندس "عمر" طلب ايدي
ضحكت "ريهام" قائلة:
- الله يسامحك يا "عمر" هبلت البت .. دى كانت زى الفل .. ياعينى عليكى ياختى
قالت "ياسمين" بعدم تصديق:
- أنا حسه انى بحلم يا "ريهام" .. حسه قلبي هيقف .. مش قادرة أصدق .. طيب اشمعنى أنا ..
يعني أدامه بنات كتير و أنا.....
قطعت كلامها .. نظرت "ريهام" اليها قائلة:
- ايه فى ايه ؟
قالت لها "ياسمين" باستغراب:
"ريهام" ... هو "عمر" يعرف انى فى حكم اللى مكتوب كتابها ؟
- معرفش .. ايه ده .. بس هيعرف منين
قالت "ياسمين" وهى تفكر بعمق:
- أكيد "سماح" قالت لـ "أيمن" .. و "أيمن" قاله
صمتت قليلا ثم قالت:
- ماهو مش معقول يكون اتقدملى وهو فاكر انى اتجوزت بجد
أخرجت هاتفها فى حقيبته الموضوعه على مقبض السرير خلفها .. ثم اتصلت بـ "سماح"
قائلة:
- السلام عليكم ازيك يا "سماح"
- وعليكم السلام .. تمام الحمد لله ازيك انتى يا "سمسم"
قالت "ياسمين" بلهفه:
"سماح" انتى قولتى لـ "أيمن" حاجه عن علاقتى بـ "مصطفى"
- مش فاهمة .. ازاي يعني
- يعني قولتيله ان محصلش حاجه بينا
- مम्म لـ ما قولتلوش حاجه زى كده .. اشمعنى
قالت "ياسمين" بخفوت:
- هبقى أحكيك .. بس ما تجيبش سيرة الموضوع ده خالص .. اتفقنا
- ماشى اتفقنا .. بس لازم أفهم .. هو نازل كمان شوية .. يخرج وأكلمك
- ماشى .. مع السلامة

-مع السلامة
نظرت الى أختها بدهشة قائلة:
-بتقول ما قالتلوش .. أمال هو عرف منين ؟
قالت "ريهام":
-أكيد معرفش
قالت "ياسمين" بإستغراب:
-ازاى يعنى .. استنى أكيد عرف من المحامى
هتفت "ريهام" قائلة:
-مستحيل طبعا دى أسرار يا بنتى مستحيل محامى يخاطر بسمعته ويتكلم فى حاجه شخصيه
تخص القضية مع موكل عنده
-بس ده مش أى موكل .. ده صاحب الشركة اللي بيشتغل فيها
-برده مستحيل
اتصلت "ياسمين" بالمحامى .. رأت "ريهام" الإسم فهتفت قائلة:
-انتى مجنونه .. هتقولى للراجل ايه
قالت "ياسمين" بإصرار:
-لازم أتأكد
أتاها صوت أستاذ "شوقى" عبر الهاتف:
-ألو
-السلام عليكم يا أستاذ "شوقى"
-وعليكم السلام .. أهلا يا دكتورة "ياسمين"
-أهلا بحضرتك
قالت "ياسمين" بحرج:
-كنت عايزة أسأل حضرتك سؤال
-اتفضلنى
-فى حد كلمك سألك عن تفاصيل القضية .. أو حضرتك شرحت التفاصيل لحد
-حد زى مين
-البشمةهندس "عمر"
قال الرجل بدهشة:
-لا طبعا .. ومال "عمر" ومال قضيتك
سألته بإصرار:
-يعنى حضرتك متكلمتش معاه فى أى تفاصيل
-اطلاقاً .. أنا مبتكلمش فى تفاصيل أى قضية الا مع صاحبها .. وكمان "عمر" عارف عنى
كده كويس .. فمستحيل يوجهلى سؤال زى ده
شكرته "ياسمين" بحرج قائلة:
-متشكره أوى .. ومعلش أسفه از عجتك
-لا ابدأ مفيش حاجه يا دكتورة .. مع السلامه
-مع السلامه
نظرت الى أختها بدهشة قائلة:
-المحامى ماقالوش
ابتسمت "ريهام" قائلة:
-ياااه .. ده شكله بيحبك أوى يا "ياسمين" .. كل ده وفارك كنتى متجوزه بجد
ابتسمت "ياسمين" ورقص قلبها داخل صدرها على أنغام تنفسها .. وقضت ليلتها لا يوجد فى
عقلها إلا صورة واحده ... "عمر" .. أغمضت عينيها وعانقت وسادتها والابتسامه على

شفتيها وتمنت أن تراه فى أحلامها تلك الليلة...

استقبل "عمر" أسرته التى وصلت الى المزرعة فى صباح اليوم التالى .. كان لقاءً مؤثراً بعد طول غياب .. قالت "كريمة" والدته وهى تجلس بجواره على الأريكة:
-أخص عليك يا "عمر" كل دى غيبه .. مفكرتش تنزل القاهرة طول الفترة دى .. ايه موحشتكش

ابتسم "عمر" وقبل رأسها ويدها قائلاً:
-لأ طبعاً وحشتيني يا ست الكل .. وعارف انى قصرت فى حقك أوى الفترة اللي فاتت .. ومش هقول أى اعدار وراضى بأى عقاب
ابتسمت وعانقته قائله:

-أيوه ما انت عارف انى قلبي حنين وبتعرف تضحك عليا بكلمتين التفت اليه والده قائلاً:

-قولى يا حبيبي أخبارك ايه وأخبار المزرعة ايه
ابتسم له "عمر" قائلاً:

-كله تمام يا بابا متقلقش
-مش قلقان يا ابني .. أنا عارف انى مخلف راجل
بعد دقائق وصلت سيارة عمته "ثرىا" يقودها السائق الخاص بها .. فتح لها الباب .. نزلت من السيارة فخرج "عمر" لاستقبالها .. عانقها وقبلها قائلاً:
-ازيك يا عمتو .. حمدالله على السلامة
قالت بعتاب:

-أخيراً افكرت ان ليك عمه وليك أهل تسأل عنهم..
-يا عمتو دى لسه ماما مديانى دش من شويه
-تستاهل كده منشفكش طول الفترة دى
-ما أنا كنت بظمن عليكم بالتليفون

-تليفون ايه .. وانت فين .. ما تشغل ناس عندك يمشولك المزرعة وانت اعد معزز مكرم فى القاهرة

غير "عمر" مجرى الحديث الذى ضايقه قائلاً:

-اتفضلى يا عمتو .. ماما وبابا وصلوا ومنتظرين حضرتك جوه

دخلت مدام "ثرىا" .. سعد الجميع الى غرفهم ليرتاحوا قليلاً من عناء السفر .. فى موعد الغداء التف الجميع على طاولة الطعام .. وحضر أيضاً "كرم" الذى يعد فرداً من العائلة .. استقبلهم بالرتحاب وشرع الجميع فى تناول الطعام

قالت مدام "ثرىا" التى كانت فى مواجهه والد "عمر" على رأس الطاولة:

-قولى يا "عمر" مين البنت اللي عايز تخطبها
ابتسم "عمر" قائلاً:

-طيب يا عمتو نخلص أكل وأكلمكوا عنها

قالت أمه التى كانت تجلس فى المقعد المواجه له:

-احنا بنعرف نسمع كويس واحنا بنتكلم .. ها قولى ده أنا طاييره من الفرح من ساعة ما قولتلى .. أخيراً قررت تتجوز وتريح قلبي

ابتسم "عمر" قائلاً لأمه:

-مكنتش أعرف ان عدم جوازى تاعبك كده

قالت له أمه بعتاب:

-انت بتهرج .. أنا قلبي مش هيدوق طعم الفرح الا لما أشوفك انت وعروستك فى الكوشة ..

وأشيل أحفادي فى حضنى .. وانت ولا على بالك وحرمنى من الفرحة دى
-اديني أهو يا ست الكل .. هتجوز .. وقريب أوى هتشيلي أحفادك كمان ان شاء الله
سألته أمه مبتسمه:

-اسمها ايه ؟

بادلها الايتسام قائلًا:

-اسمها "ياسمين"

قالت أمه:

-الله .. اسمها حلو أوى

نظرت مدام "ثرىا" الى "عمر" قائله:

-ها يا "عمر" .. ما قولتليش مين عيلتها .. حد نعرفه ؟

تنحج "عمر" ثم نظر اليها قائلًا:

-لأ مش بنت حد نعرفه يا عمتو .. باباها راجل على المعاش كان بيشتغل فى وظيفه حكومية ..

ووالدتها متوفيه .. وليها أخت واحده أصغر منها .. وهى "ياسمين" .. بتشتغل دكتورة

بيطرية هنا فى المزرعة .. وأختها كمان سكرتيرة "كرم"

وأشار فى آخر جملة برأسه الى "كرم" الجالس بجواره .. تبادل والده ووالدته النظرات ثم

نظروا اليه فى صمت .. لكن وجه مدام "ثرىا" ظهر عليه علامات الغضب .. وهتفت قائله:

-يعني ايه بنت موظف على المعاش .. وهى واختها بيشتغلوا هنا فى المزرعة

قال "عمر" ببرود:

-ووالدها كمان بيشتغل هنا .. مسؤل عن مخزن العلف

قالت مدام "ثرىا" بسخرية:

-ما شاء الله خلصت من "نانسى" وعيلتها .. ووقعت فى "ياسمين" وعيلتها

هتف "عمر" بحدده:

-لو سمحتى يا عمتو .. أنا لا عايز أفكر "نانسى" وعيلتها .. ولا عايز حد يتكلم بطريقة مش

كويسة عن "ياسمين" وعيلتها

قالت بحدده مماثلته:

-لازم تفضل فاك "نانسى" .. عشان تقدر تتعلم من أخطائك .. لأنك شكلك وقعت فى نفس

الغلط مرة ثانية

كان والداه يتابعان ما يحدث فى صمت .. حاول "عمر" تمالك أعصابه ونظر الى عمته قائلًا:

-أنا مش طفل صغير .. أنا راجل وناضج وواعى .. يعنى صعب أوى أقع فى نفس الغلط مرتين

.. ده بالإضافة ان دى حياتى .. ومن حقى أختار الانسانه اللى هتشاركنى فيها .. وأنا ميهمنيش

المستوى المادى لـ "ياسمين" .. طالما احنا الاتنين متفاهمين .. وبعدين لو بنقيسها بالمسطرة

يبقى أنا أقل منها فى المستوى الثقافى والعلمى لأنها دكتورة وأنا خريج زراعة

قالت مدام "ثرىا" بحنق:

-ده اسمه تهريج .. انت راجل ناجح فى حياتك ورجل أعمال له اسمه ووزنه فى مصر ..

وانسان مثقف ومتحضر .. وابن عيله من أكبر العائلات فى مصر .. ازاي تقارن نفسك لوحده

بنت موظف وتقول انها اعلى منك

قال "عمر" بحزم:

-وعشان كل اللى حضرتك قولتية ده ... أعتقد انى ناضج كفاية انى أختار الانسانه اللى

أتجوزها

صمتت مدام "ثرىا" ووجها محتقن من شدة الغضب .. نظر "عمر" الى "كرم" .. ثم نظر

اليهم جميعا وأخذ نفسا عميقا ثم قال:

-وأحب أقولكوا معلومة ثانية عن "ياسمين"

نظر اليه الجميع وتعلقت عيونهم به .. صمت قليلا ثم قال بهدوء:

"-ياسمين" مطلقة
شهقت أمه .. ونظرت اليه بدهشة .. أما عمته فقد قامت من مكانها وقالت:
-دى مهزله .. أنا مش ممكن أبداً أوافق على المهزله دى
ثم غادر وصعدت الى غرفتها .. ساد الصمت لفترة .. استأذن "كرم" فى الانصراف وغادر فى
صمت .. بعد برهه نظرت اليه أمه قائله:
-مطلقة يا "عمر" ؟
ثم استطرقت قائله:
-ليه انت نقصك ايه عشان تتجوز واحدة مطلقه
زفر "عمر" بضيق قائلاً:
-ومالها المطلقة مادام اتظلمت فى جوازتها الأولى
تعالى صوتها قائله:
-وأنا مالى وملها .. ماتجوز واحد مطلق واتظلم زيها .. لكن ابني اللى متجوزش قبل كده
يتجوزها ليه ؟
قال "عمر" بصرامة:
-يتجوزها عشان بيحبها .. وعشان شايف ان هي دى الإنسانه اللى مناسبه ليه .. وبعدين هي
اتجوزت شهر واحد بس .. يعنى ما أعدتش معاه كتير
قالت أمه بحده:
-وايه سبب طلاقها
قال "عمر" ببرود:
-خانها وضربها .. ورفعت عليه قضيه خلع .. وكسبتها من كام يوم
صاحت أمه فى غضب:
-والهانم مقدرتش تستنى حتى لحد ما عدتها تخلص .. قامت لفت على ابني
قال "عمر" فى غضب:
-ماما لو سمحتى .. انتى بتتكلمى عن الإنسانه اللى انا بحبها .. واللى هتجوزها
قامت أمه وقالت بصرامة:
-لو انت اتجوزت البنيت دى اعرف انى مش راضيه عنك ولا عن جوازتك دى
غادرت وصعدت الى غرفتها هي الأخرى .. ساد الصمت لفترة .. ثم سأله أبوه قائلاً:
-انت واثق فيها هي وأهلها ؟ .. يعنى أقصد سبب طلاقها ؟
أوما "عمر" برأسه قائلاً:
-أبوة يا بابا .. أصلاً أستاذ "شوقى" المحامى بتاعنا هو اللى كان متابعتها القضية بتاعتها
أطرق أبوه برأسه قليلاً ثم نظر الى "عمر" قائلاً:
-انت أدرى بمصلحتك يا ابني .. وزى ما قولت انت ناضج كفايه عشان تختار شريكة حياتك
صح .. لو مكنتش ناضج مكنتش قدرت تكتشف زيف "ناسى" وتتخلص منها
ابتسم "عمر" بوهن قائلاً:
-كويس على الأقل واحد من العيله دى واقف فى صفى
ابتسم له أبوه قائلاً:
-كل حاجه غير مألوفه بتاخذ وقت عشان تخلصى اللى أدامك يتعود عليها .. بالصبر وطولة البال
تقدر تاخذ كل اللى انت عايزه
جلست "كريمة" على الفراش واجمه .. سمعت طرقات صغيره على الباب .. قالت:
-ادخل
دخل "عمر" وأغلق الباب خلفه بهدوء .. أشاحت بوجهها عنه فى غضب .. فوقف قليلاً ينظر
اليها صامتاً .. قطعت أمه هذا الصمت قائله دون أن تنظر اليه:
-زى ما قولتلك .. عايز تتجوزها اتجوزها .. بس انا لا هبقى راضيه عنك ولا عن جوازتك ..

ومعنديش كلام تانى أقوله

نظر اليها "عمر" قائلا:

-وأنا مش هعمل حاجة انتى مش راضيه عنها

نظرت اليه أمه مبتسمة .. فأكمل بحزم قائلا:

-بس لو متجوزتش "ياسمين" مش هتجوز غيرها

قالت أمه بدهشة:

-يعنى ايه ؟

قال بهدوء وحزم:

-يعنى لو رفضتى جوازى منها .. تنسى تماما موضوع جوازى ده وترميه وره ضهرك .. لانى

لو متجوزتهاش مش هتجوز أبداً.

قال ذلك ثم فتح الباب وخرج بهدوء .. تنهدت "كريمة" تنهيدة حسرة ممزوجة بـ الحيرة.

الفصل السابع والعشرون

جلس "عمر" فى مكتبه واجماً يفكر فى العاصفة التى ثارت فى منزله الليلة الماضية .. لم يكن لديه أدنى استعداد للتنازل عن "ياسمين" .. لكنه أيضاً يريد من عائلته أن تتقبل زواجه منها .. وأن يباركون هذا الزواج .. كان شاردأ .. عندما طرق "كرم" الباب ودخل وجلس أمام "عمر" على المكتب .. نظر اليه قائلاً:

-متضايقش نفسك .. أصلاً أنا كنت متوقع حاجه زى كده

سأله "عمر" قائله:

-ليه توقعت كده ؟

-يعني أكيد أهلك عايزينك بنت متكنش اتجوزت قبل كده ويكون مستواكم متقارب...

صاح "عمر" بحدته:

-ما أنا كنت خاطب اللي متجوزتش قبل كده .. واللى كانت من نفس مستوايا .. خدت منها ايه غير قلة الأدب والخيانة والطمع والإستغلال
هدءه "كرم" قائلاً:

" -عمر" أنا فاهم كل اللي انت بتقوله ده .. أنا بكلمك عن وجهة نظرهم هما
قال "عمر" بحزم:

-لازم تتغير .. وجهة نظرهم دى لازم تتغير

-وهتغيرها ازاي ؟

زفر فى ضيق قائلاً:

-معرفة بس لازم تتغير .. أنا قولت لأمى امبارح أنا مش هعمل حاجه غير برضاكى .. بس لو متجوزتش "ياسمين" مش هتجوز أبداً ..

قال "كرم": "

-الله ينور عليك .. هو ده الكلام اللي هيجيب مع أمك .. بس المشكلة فى الراسين الكبار .. أبوك وعمتك

-لأ بابا معدوش اعتراض .. هو طول عمره مبيرضاش يجبرنى على حاجه .. وبيثق فى قراراتى

صاح "كرم" فى مرح:

-كده فل أوى .. باقى بأه عمته

قال "عمر" بضيق:

-أنا مش هاممنى توافق ولا متوافقش .. هى مبتفكرش غير فى اسم عيلتها بس .. لا بتفكر فى ولا فى اللي يريحنى .. هى على طول مناخيرها فى السما .. حتى فى تعاملاتها وصدقاتها العادية مبترضاش تتعامل إلا مع ناس من نفس مستواها .. عارف عصر البشوات والبكوات ..

أنا حاسس ان عمته لسه عايشه فيه لحد دلوقتى

-طيب تمام طالما مش همك رأيها .. كبير يا باشا

-أنا كان نفسي طبعاً انها تكون مرحبة بـ "ياسمين" .. لكن طالما هى شايفه ان جوازى منها مهزلة .. خلاص هى حره

ابتسم "كرم" قائلاً:

-هى أصلاً طول عمرها منمره عليك لبنتها

قال "عمر" متحكماً:

-أهو بنتها دى نسخه مصغره منها .. لو فاكراى فى يوم هفكر فيها تبقى بتحلم وهتفوق على كابوس .. ما كانت أدامى قبل "نانسى" مخطبتهاش ليه .. مش هاجى دلوقتى وأرمى نفسي الرمية السوداء دى .. وبعدين أنا بعتبر "ايناس" دى اختى .. عارف يعنى ايه اختى .. يعنى

مستحيل افكر فيها بشكل تانى
هنا طرق "أيمن" الباب ودخل ... علم من "عمر" ما حدث ليلة أمس .. فقال:
-انت غلطان يا "عمر" مكنش لازم تكلم أبوها الا بعد ما تكلم أهلك الأول
قال "عمر" بحدة:
" -أيمن" .. أنا هتجوز "ياسمين" .. بابا وموافق .. وأمي أنا هعرف أقنعها ازاي ..
وميهمنيش رأى أى حد تانى
نظر اليه "أيمن" قائلاً:
-بس عمك ممكن تسببك مشاكل مع عيلة "ياسمين" خاصة انت ناوى تجمعهم مع بعض
وتعرفهم ببعض
زفر "عمر" بضيق قائلاً:
-وهو ده اللي أنا خايف منه .. "ياسمين" حساسه أوى .. ومعتزة بكرامتها أوى .. وخايف
عمتو تقول كلمة تضايقها
قال "أيمن": "
-خلاص يبقى أجل المقابلة دي دلوقتي لحد ما الوضع عندك يهدى .. لأن لو العيلتين التقابلوا
فى ظل التوتر ده .. هتكون النتيجة مؤسفه
أوما "عمر" برأسه قائلاً:
-معاك حق .. هأجل المقابلة دي لحد ما الجو يهدى شويه .. وربنا يهديهم ويوافقوا .. عشان
متحصلش مشاكل .. لان اللي هيجرح "ياسمين" بكلمة أنا مش هسكتله
ابتسم "أيمن" قائلاً:
-شكلك بتحبها أوى
نظر اليه "عمر" قائلاً والابتسامه على شفتيه:
-بحبها بجد
قال "أيمن": "
-وهي بنت حلال وأنا واثق انك مش هتلاقى أحسن منها ..
نظر "أيمن" بنظرة ذات معنى الى "كرم" قائلاً:
-هي وأختها بصراحة بنتين ميتسابوش
صاح "كرم": "
-لا كله كوم وأختها دي كوم تانى خالص .. ده أنا لا شوفت زيها ولا هشوف
قال له "أيمن" بتحدى:
-تنكر انها بنت جدعة ومحترمة ومؤدبة وشخصيتها قوي
ابتسم "كرم" قائلاً:
-بصراحة منكرش .. ومنكرش كمان ان شخصيتها عجباني .. مجناني بس عجباني
رفع "عمر" احدى حاجبيه قائلاً يابتسامه:
-والله
نهض "كرم" وصاح وهو يغادر الغرفة:
-ايه فى ايه .. بقول شخصيتها عجباني .. مش هي عجباني

كان هذا الصباح أيضاً مختلفاً بالنسبة الى "ياسمين" .. كانت تشعر بأنها فى حلم جميل ..
تخشى أن تستيقظ منه .. مازالت لا تصدق ما أخبرها به والدها منذ يومين .. منذ يومين وهي
ترفرف بجناحيها فى سماء السعادة .. شعرت بأن أيام بؤسها ولت مدبره .. وأيام فرحها أتت
مستبشره .. كانت شارده عندما ناداها دكتور "حسن" قائلاً:
-دكتورة "ياسمين"

ذهبت اليه مسرعه قائله:

-أفندم يا دكتور

أعطاها ملفاً وقال لها:

-ممكن لو سمحتى تدى تقرير آخر الاسبوع للبشمهندس "عمر" فى مكتبه .. وعرفيه

النواقص اللى اتكلمنا فيها مع بعض امبارح .. لاننا محتاجينها ضرورى

أخذت الملف قائله:

-حاضر يا دكتور

ذهبت وهى تقدم قدماً وتؤخر الأخرى .. كانت متلهفه على رؤيته .. لكنها متوتره للغايه ..

تخشى أن يصدر منه ما يضايقها .. لكن لهفتها غلبت خوفها .. طرقت الباب ثم فتحتة ودخلت ..

كان "عمر" جالساً مع "أيمن" .. فحمدت الله على ذلك .. تقدمت قائله:

-ده التقرير الاسبوعى يا بشمهندس

ابتسم لها "عمر" ونظر اليها باعجاب لم يحاول حتى أن يخفيه .. أخذه "عمر" قائلاً:

-متشكر

لم تجد صوتاً تخبره به بالنواقص كما طلب منها دكتور "حسن" ودت لو هربت من أمامه فى

التو واللحظة .. كانت حمرة الخجل تزين وجنتيها .. تأملها "عمر" فى اعجاب للحظة قبل أن

تستأذن لتصرف .. ظل "عمر" محتفظاً بابتسامته حتى بعد انصرافها .. قال له "أيمن" مازحاً

:

-ايه يا عم روح فى

سأله "عمر" بنفس الابتسامه:

-تفتكر ممكن ترضى بكتب الكتاب مع الخطوبة .. ولا هتخاف ؟

قال "أيمن" مطمئناً اياه:

-اطمن حتى لو موفقتش .. معتقدش الخطوبة ممكن تطول .. بصراحة أنا شايفكوا لايقين

لبعض أوى

قال "عمر" بمرح وهو يفتح التقرير الذى أمامه :

-طيب يلا على مكتبك يا "باشمهندس" خليني أشوف شغلى

قال "أيمن" مبتسماً:

-دلوقتى نفسك اتفتحت للشغل .. ماشى ربنا يهنيك يا سيدى

عكفت "ياسمين" مع زميلتها "ولاء" على انهاء التقارير اليومية .. كانت "ولاء" تعمل منذ

سنوات فى المزرعة .. فى نفس القسم الذى تعمل به "ياسمين" .. اقتصرت علاقتهما طوال

الفترة الماضية على التعاون فى أداء عملهما .. لم تسبب لها "ولاء" أى مشاكل .. ولم يكن أى

ملاحظات سلبية عليها .. كانت فتاة بسيطة مثلها .. تعيش فى نفس القرية الموجود بها

المزرعة .. ابتسمت "ياسمين" قائله:

-وأخيراً خلصنا

تمطعت "ولاء" لتريح آلام ظهرها من طول الجلوس قائله بتعب:

-ياه .. النهاردة كان يوم متعب جدا

-معلش .. أدينا خلصنا

قالت "ولاء" بتأفف:

-كتابة التقارير كل يوم حاجه مملة جداً

قالت "ياسمين" وهى تنهض لتحضر حقيبتها:

-معلش بس لازم نكتبهم كل يوم .. أحسن ما نراكمهم لآخر الاسبوع .. يلا سلام أشوفك بكرة

أوقفقتها "ولاء" قائله:

-استنتى يا "ياسمين" عايزاكى
التفتت اليها "ياسمين" تنظر اليها قائله:
-خير؟

بدت "ولاء" متردده قليلا .. ثم عزمت أمرها وقالت:
-مممكن نعد نتكلم مع بعض شوية
قالت "ياسمين" باستغراب:
-آه طبعا

جذبت "ياسمين" كرسي وجلست بجوارها .. ساد الصمت لبرهه .. بدت وكان "ولاء" تحاول
استجماع أفكارها .. فحتمتها "ياسمين" قائله:
-خير يا "ولاء" .. فى حاجه خاصه بالشغل
-لا مش خاصه بالشغل
-أمال خاصه بايه
نظرت اليها "ولاء" وقالت بهدوء:
-خاصه بيكي انتى
قالت "ياسمين" بدهشة:

-بيا أنا

-أيوة

-طيب .. قولى

نظرت "ولاء" اليها قائله:

-هتكلم معاكى بس مش عايزاكى تقاطعيني غير لما اخلص كلامى .. اتفقنا ؟
وأمأت "ياسمين" برأسها وهى توليها كل انتباهها .. تحدثت "ولاء" بهدوء قائله:
-أنا شغاله هنا فى المزرعة من 3 سنين .. يعنى عارفه الناس اللى هنا كويس .. وأولهم ...
"عمر"

نظرت اليها "ياسمين" بدهشة .. لكنها لم تقاطعها .. فأكملت "ولاء" قائله:

-زيبى زي بنات كثير هنا .. طبعا "عمر" راجل بنات كثير يتمنوه .. بس الموضوع كان تطور
معايا أوى .. ميقاش اعجاب أو حلم بشخص ... أنا حبيته بجد
قالت جملتها الأخيرة وهى تنظر فى الأرض وكأنها تخجل من هذا الإعراف .. ثم أكملت قائله:
-هو طبعا مكنش حاسس بيا .. ولا كان شايفنى أصلاً .. لانى طبعا مش من البنات اللى يجذبوا
انتباه واحد زي ده .. وأنا مش من البنات اللى تحاول تجذب انتباه راجل ليها .. حتى لو كنت
بحبه وبموت فيه .. وعشان كده حبي فضل محبوس فى قلبي محدش يعرف عنه حاجه ..
مبتدئتش أفوق من الوهم اللى كنت معيشه نفسي فيه إلا لما عرفت انه خطب .. ما أقولكيش
الدنيا اسودت فى عنيا ازاي .. بس حمدت ربنا .. لان ده صحنى وفوقنى .. وحسنى انى
بضيع عمرى وأحلى أيامى فى حب من طرف واحد .. حب ملوش أى مستقبل .. حب أنا الوحيدة
اللى بدوق عذابه .. بس كان فى فضول جوايا انى أشوف خطيبته .. وفضلت أسأل نفسي يا
ترى شكلها ايه .. يا ترى لبسها ازاي .. يا ترى يا ترى .. وبعد فترة من خطوبته جاب خطيبته
هنا المزرعة تقضى كام يوم هى وأهلها .. لما شوفتها عرفت ان حبي ليه مكنش مستحيل بس
.. لا ده كان من رابع المستحيلات
صمتت فسألها "ياسمين" قائله:

-ليه؟

أكملت "ولاء" بنفس الهدوء وهى تنظر الى "ياسمين":

-بصراحة مش لاقية وصف مناسب ليها إلا وصف النبي صلى الله عليه وسلم (نساء كاسيات
عاريات) .. على أد ما كنت بحبه على أد ما احتقرته أوى .. مش غيره منى عشان خطب غيري
.. لأ .. عشان خطب دى بالذات واختار دى بالذات .. هى دى اللى شفها انها زوجه مناسبه له ..

اتصدمت فيه بجد .. كنت فاكراه انسان عاقل وناضج .. طلع زى رجاله كتير أوى ما بيجروش الا ورا رغباتهم وبس .. عايز البنت الصارخة الجمال اللى يتباهى بيها وسط الناس .. يعنى واحد مغدوش أى نخوة .. ومش لاقية وصف مناسب ليه الا وصف النبي صلى الله عليه وسلم (ديوث ..)

ارتجف قلب "ياسمين" من هول الكلمة .. أكملت "ولاء" بسخريه:
-طبعا هو كان ماشى معاها وفرحان بيها .. بشكلها ولبسها اللى هيتقطع من كتر ما هو ضيق عليها .. وماشى معاها فى المزرعة يفرج الناس عليها وكأنه يقولهم المزرة دى خطيبتى صمتت قليلا ثم قالت:

-عارفه .. لما شوفتهم مع بعض .. حمدت ربنا انه كشفه أدامى .. وشوفت اللى جواه .. لانى كنت مخدوعه بالظاهر .. راجل .. وجدع .. ومستوى .. وابن ناس .. ومتعلم .. ويعتمد عليه .. وواتق فى نفسه .. وشخصية جباره ..بس عارفه .. على الرغم من كل ده .. الا انه انسان سطحى أوى .. بيهتم بالمظاهر وبس .. والجواز بالنسبة له واحده حلوة تكون على الفرازه عشان مزاجه وبس .. لان ده لو يفكر فى بيت وأسرة وعشرة وأولاد وتربية ومسؤوليه وربنا وحساب وجنه ونار مكنش اختار واحده زى دى واتبسطت من اللى هى عملاه فى نفسها .. حمدت ربنا انه فوقنى من الوهم ده ..

كانت "ياسمين" تستمع اليها فى وجوم .. نظرت اليها "ولاء" وأكملت قائله:
-عارفه أنا عمرى ما خرجت اللى فى قلبي ولا قولت الكلام ده لحد .. بس عارف قولتك انتى بالذات ليه ؟

نظرت "ياسمين" اليها مستفهمه .. فأكملت قائله:

-لانى حساكى ماشيه فى نفس الطريق اللى كنت ماشيه فيه .. صحيح تصرفاتك محترمه والشهاده لله ما شوفتش أى تصرف أو كلمة غلط صدرت منك .. بس بيبقى واضح أوى على وشك لما بتشوفيه انك حسه بحاجه نحيته
أطرقت "ياسمين" رأسها فى خجل .. فأكملت "ولاء" قائله:

-أنا كنت موجودة فى الاستراحة يوم ما الدكتوراة "مها" عملت فيكى الفصل البايخ ده .. بصراحة "مها" دى مبحبهاش .. واحتقرتها أكثر من اللى عملته فيكى .. ابعدى عنها أحسن يا "ياسمين" .. وكمان "شيماء" متثقيش فيها .. هى آه مش زى "مها" بس من النوع اللى ما بتتصفش حد .. يعنى معاكوا معاكوا عليكوا
صمتت "ياسمين" للحظات ثم سألتها قائله:

-تعرفى ليه خطوبتهم اتفسخت ؟

تنهدت "ولاء" قائله:

-بصراحة لأ .. بس اخر يوم كانوا فيه فى المزرعة كان باين عليهم انهم متخانقين .. و "عمر" كان مضايق جدا .. وهى كمان .. مكنتش راضية تركب جميه وشوفت مامتها بتزقها عشان تركب أدام .. واضح ان فى مشكلة كبيرة حصلت بينهم ..لكن ايه هى الله أعلم
صمتت قليلا ثم قالت:

-فى نفس اليوم "عمر" عمل حادثة بالعربية وهما راجعين القاهرة
هتفت "ياسمين" بدهشة:

-حادثة ؟

-أيوه .. وفى الحادثة دى باباها اتوفى .. وبعدها بفترة عرفنا ان الخطوبة اتفسخت .. بس لحد دلوقتى منعرفش اتفسخت ليه .. بس اللى عرفته ان باباها طلع مديون .. وكل أملاكهم البنك حجز عليها .. حتى الجرايد كتبت عن الموضوع ده لانه كان رجل أعمال كبير
شردت "ياسمين" فى كلام "ولاء" .. فأخرجتها "ولاء" من شرودها قائله:

-وفى حاجه كمان حابه أقولها لك عشان أبقي خلصت ضميري أدام ربنا
قالت "ياسمين" بوهن:

-اتفضلنى

أكملت "ولاء" قائله:

-بعد الحادثة وبعد ما الخطوبة اتفسخت .. "عمر" جه واستقر هنا .. وبعد فترة سمعنا اشاعات عنه

قالت "ياسمين" باستغراب:

-اشاعات ايه ؟

قالت "ولاء": "

-كان فى هنا غفير اسمه "عويس" .. وكانت مراته "صفية" بتشتغل فى بيت المزرعة .. فجأة اختفوا هما الاتنين ومحدث يعرف طريقهم صمتت قليلاً ثم قالت بشئ من التردد:

-سمعنا ان "عمر" كان على علاقة بـ "صفية" .. و"عويس" اكتشف الموضوع وخذ مراته ومشى من المزرعة .. معرفش مشوا بنفسهم ولا "عمر" طردهم .. ومعرفش أصلاً القصة دى صح ولا لأ أنا مشوفتش حاجه بنفسى .. بس فى كلام كتير فى الموضوع ده .. احنا هنا فى بلد أرياف وأنا عايشة فى البلد دى والبلد صغيره والكل عارف بعضه .. عشان كده مفيش حاجه بتستخبى

كانت "ياسمين" تستمع اليها وعلى وجهها علامات دهشة ممزوجة بالألم نظرت اليها "ولاء" فى حنو قائله:

-اللى أنا شيفاه على وشك دلوقتى بيدل على انى كان عندى حق .. وانك فعلا حسه بحاجه نحيته والا مكنش كلامى زعلك كده .. ربنا يعلم انى ماقولتش الكلام ده الا عشان مش عيزاكى تتجرحى .. أو يتلعب بيكى .. خاصة وانى واخده بالى ان "عمر" مهتم بيكى .. وواخده بالى من نظراته نحيته .. أنا مكنش فى خوف عليا .. لانه مكنش حاسس بيا أصلاً .. لكنى لما حسيت انه بيحاول يقربلك .. خفت عليكى .. قولت لازم أنبهك..

قامت وحملت حقيبتها قائله:

-أنا مضطرة أمشى دلوقتى عشان اتأخرت .. أشوفك بكرة ان شاء الله قالت ذلك وغادرت .. وظلت "ياسمين" مكانها شاردة واجمه.

التف الجميع حول طاولة العشاء فى بيت المزرعة .. ساد الصمت طويلاً .. ظلت "كريمة" ترمق ابنها الجالس أمامها بنظراتها بين الحين والآخر .. قطعت أمه هذا الصمت قائله:

-نسيت أسألك ايه الحرق اللى فى ايدك ده يا عمر

ألقى "عمر" نظرة على الحرق فى يده وتحسسسه قائلاً:

-عقاب

قالت بدهشة:

-عقاب

قال بمراره وقد شرد قليل:

-أيوة عقاب .. عقاب من ربنا

قاطعت مدام "ثرىا" حديثهم قائله:

"-ايناس" جايه بكرة

التفتت "كريمة" اليها قائله بابتسامه:

-كويس

قالت مدام "ثرىا" بلهجة قوية:

-كانت جايه أصلاً عشان تتعرف على عروسة "عمر" .. بس بما ان الموضوع اتقفل ..

هتيجي تعد يومين ونرجع سوا
ترك "عمر" الملعقة من يده بحدده ونظر الى عمته قائلاً:

-أنا ما قولتس ان الموضوع اتقفل
توتر الجو .. قالت مدام "ثريا" بحدده:
-يعني ايه ؟

نظر اليها "عمر" بحزم قائلاً:
-يعني أنا هتجوز "ياسمين" .. الموضوع متقفلش
ثم نظر الى والدته نظره ذات معنى قائلاً:
-يا هي .. يا مفيش جواز
صاحت عمته غاضبة:

-أنا مش فاهمة انت ليه مصر عليها .. هو اللي خلقها مخلقش غيرها
حاول "عمر" تمالك أعصابه .. لكن كلمات خرجت بحدده شديدة:
-أنا مش فاهم انتوا ليه حكمتوا عليها من قبل ما تشوفوها .. مش تشوفوها الأول وتعدوا
معها وبعدين تقرروا هي مناسبة ولا مش مناسبة .. رغم ان القرار ليا بس برده انتوا عيلتى
ويهمنى ان العلاقة بينكوا وبين الانسانه اللي اخترها تكون كويسه
قالت أمه ببرود:

-نشوفها أو منشوفهاش ده مش هيغير واقع انها مطلقه
أضافت عمته فى عصبية:

-وبنت موظف على المعاش يعني لا ليها أصل ولا فصل
قام "عمر" من فوراه غاضباً وأزاح كرسيه وقال:
-كفاية لحد كدة سمعت بما فيه الكفاية

خرج غاضباً من البيت وتوجه الى سيارته .. ركب بعصبية ثم انطلق خارج المزرعة
ساد الصمت فى حجرة الطعام وتوقف الجميع عن تناول طعامهم .. قال "نور الدين" موجهاً
حديثه لزوجته وأخته:

-انتوا ليه مصريين تخسروه ؟
نظرت اليه أخته بحدده قائله:

-يعني انت عاجبك اللي ابنك عايز يعمله ده
قال بحدده مماثله:

-وهو عايز يعمل ايه .. يتجوز على سنة الله ورسوله .. ايه المشكله فى كده
ظهرت علامات الغضب على وجه "كريمه" وقالت:

-عايز يتجوز واحده مطلقه

-وايه المشكله يعني ؟ .. طالما شايف انها مناسبة ليه .. وطالما ان جوازتها الأولى كان الغلط
من جوزها مش منها .. وكمان جوازها كان شهر واحد زى ما قالنا
قالت "كريمه" باستغراب:

-يعني انت موافق ؟ .. موافق ان ابنك الوحيد يتجوز واحده كانت متجوزه قبل كده
قال بحزم:

-أيوه موافقه .. لان دى حاجه تخصه هو لوحده ملناش اننا نتدخل فيها .. وابنك راجل مش
عيل صغير .. بيدير مجموعة شركات كبيرة فى مصر .. مش هيقدر يدير حياته ؟
قالت "كوثر" فى غضب مكتوم:

-انتوا حريين وافقوا زى ما انتوا عايزين .. أما أنا فمش ممكن أبارك الجوازه دى .. عنده
مليون بنت مش لاقى الا دى ويختارها .. ليه من قلت البنات فى البلد .. واحده زيتها تيجي ايه
جيب بنتى "ايناس" عشان يسيبها ويبص لبره .. "ايناس" مش عجباه .. والست اللي سبق
لها الجواز هي اللي عجباه

نظر اليها "نور الدين" قائلاً ببرود:
- هو حر .. يختار البنت اللي على مزاجه .. اذا كانت البنت دلوقتي مبتتغصبش على الجواز ..
هنيجي نغصب الولد
قالت "ثرية" بتعالى:
- ويتغصب ليه .. هي "ايناس" دي فى زيتها .. بنت عيله وأدب وأخلاق وجمال ومال وحسب
ونسب .. يعني لقطة أى شاب يتمناها
قالت "كريمة" مبتسمه تحاول تلطيف الجو:
- طبعاً دي "ايناس" دي ست البنات
قالت لها "ثرية" بتهكم:
- قولى لابنك .. بدل ما يبص بره العيله .. احنا أولى بلحمنا
قالت ذلك ثم انصرفت غاضبه الى غرفتها

دخل "أيمن" الأنتريه وقدم الى "عمر" صنيه موضوع عليها شاي وطبق من الكيك .. ونظر
الى صحبه قائلاً:
- دوق بأه الكيك ده .. حاجه كده عمرك ما دوقت زيتها فى حياتك
تناول "عمر" رشفه من فنجاناه وظل صامتاً .. نظر اليه "أيمن" قائلاً:
- أنا كنت متوقع كده
نظر اليه "عمر" قائلاً:

- انت هتقولى زى "كرم" .. هو كمان كان متوقع كده .. اشمعنى أنا الوحيد اللي متوقعتش كده
أخذ "أيمن" فنجاناه ورجع الى الوراى قائلاً:
- للأسف احنا فى مجتمعنا شويه أفكار متخلفة عايزه بنزين وعود كبريت ويتولع فيها .. دائماً
يُنظر للمرأة المطلقة بدنيويه كأنها مش زى باقى النساء .. حتى لو سبب الطلاق مش منها ..
برده لازم يتصلها البصه دي .. وكل أم بتبقى هتجنن لو ابنها قال ان عايز يتجوز واحده
اتجوزت قبل كده على الرغم ان النبي صلى الله عليه وسلم لم يتزوج الا واحدة بس بكر وهي
أما عائشة رضى الله عنها وباقي أمهات المؤمنين كانوا متزوجات قبل كده وأولهم أمنا خديجه
رضى الله عنها اللي النبي صلى الله عليه وسلم قال (انى رُزقت حبها)
تمتم "عمر":
- عليه الصلاة والسلام
تنهد عميقاً ثم قال:

- أنا كمان مكنتش أتخيل فى يوم من الأيام انى ممكن أتجوز واحده اتجوزت قبل كده .. بس بجد
حببتها يا "أيمن" .. كل حاجه فيها عجبانى .. هي دي الزوجة اللي أتمناها فعلاً .. فإكر لما
قولتلى انك مش بتدور على زوجة وبس .. انت بتدور على أم لولادك كمان
أوماً "أيمن" برأسه .. فأكمل "عمر" قائلاً:
- أهو انا شايف "ياسمين" مش بس زوجه .. شايفها أم لولادى .. وصاحبه .. وحببيه .. وأخت
.. وصديقه .. وكل حاجه فى دنيتي .. بجد بحبها أوى .. ومش هرتاح الا لما تكون ليا
ابتسم "أيمن" قائلاً:

- ان شاء الله هتكون ليك .. بس انت اصبر شوية .. وبلاش صدام بينك وبين أهلك .. لحد ما
يتقبلوا الأمر ان شاء الله .. بس قول يارب
تمتم "عمر" قائلاً:
- يارب .. يارب تكون من نصيبي

كان يقف يعطى تعليماته لأحد العمال عندما وجدها فجأة تقف أمامه .. صرف العامل ثم توجه ناحيتها قائلاً:

"-نهلة" .. ايه اللي جابك هنا

قالت "نهلة" ببرود:

-عايزة أتكلم معاك

قال لها بتأفف:

-مش فاضى .. عندي شغل

قالت بحده:

-دلوقتي يا "مصطفى"

ثم استطردت قائله وفي عينيها نظره محذره:

-حالاً

ذهبا الى حيث مكتبه وطلب من زميله مغادرة المكتب للحظات .. أغلق الباب ونظر اليها قائلاً

ببرود:

-خير في ايه ؟

نظرت اليه قائله:

-أنا حامل

اتسعت عينا "مصطفى" دهشه وهتف قائلاً:

-نعم ياختي

قالت بحزم:

-بقولك أنا حامل

صمت قليلاً يحاول استيعاب الأمر ثم نظر اليها قائلاً بحده:

-وأنا ايه يضمنلى انك حامل منى أنا .. انتى أصلاً واحدة تبييييييييييت .. روجى شوفى مين

أبوه أنا مش ممكن أعترف بيه

صاحت "نهلة" بحده:

-آه يا تبييييييييييت .. انت عارف ان محدش لمسنى غيرك

قال بسخرية:

-لا مش عارف .. وأنا ايه يثبتلى كلامك ده

قالت بصرامة:

-بسيطة يا بشمهندس .. تحليل صغير للـ DNA يتعمل وفي خلال شهر واحد بتطلع النتيجة

بُهِت "مصطفى" .. فأكملت "نهلة" قائله:

-ولو رفعت بالتحليل ده قضية هقدر بكل سهولة انى أثبت انه ابنك وأكتبه بإسمك كمان

جلس "مصطفى" فلم تعد قدماه تحملانه .. أخذ يتخيل كلام من حوله عندما تُلطخ سمعته بهذا

الشكل .. قال بوهن:

-والمطلوب دلوقتي

قالت "نهلة" بقسوة:

-المطلوب اننا نتجوز

قفز من مقعده صائحاً:

-نعم يا روح أمك

قالت "نهلة" بلهجة تهديد:

-اعملها بمزاجك أحسن من الفضيحة فى المحاكم .. ده غير الفضيحة اللي هعملهاك هنا فى

شغلك وعند بيتك .. مش هخلى حد الا ويتف فى وشك

صرخ قائلاً:

-وهتفضحى نفسك انتى كمان

قالت بمراره:

-أنا كده كده خلاص اتفضحت يعني عليا وعلى أعدائي
صمت يحاول استيعاب الموقف .. ثم نظر اليها قائلاً:
-وأهلك هتقوليلهم ايه على الجوازه السريعة دى

قالت بسخريه:

-أهلى؟ .. انت عارف ان اخواتى كلهم متجوزين وكل واحد فى حاله محدش بييسأل عنى ولا
أصلاً أفرق معاهم فى حاجه مليش الا أمى ودى ما هتصدق تخلص منى والبيت يفضى عليها
هو وجوزها
قال بسخريه:

-مرتبته كل حاجه يعني

نظرت اليه قائله بلهجة تهديد:

-آخر الاسبوع تكون كتبت عليا يا "مصطفى" .. وإلا وديني وما أعبد لهتشوف منى اللى
يشيبك قبل أوانك .. وانتى عارف "نهلة" لما بتقول حاجه مبتقولهاش على الفاضى .. بتنفذ
على طول

خرجت وتركته يتخبط بين الحيرة والحسرة والندم والغضب

جلست "ياسمين" فى غرفتها واجمه .. تفكر فيما سمعته من "ولاء" ومن قبلها "شيماء" ..
كان عقلها مشنت للغايه .. لكن الشئ الوحيد الأكيد .. هى أنها تريد زوجاً بصفات معينه .. ولن
تتنازل فى هذه الصفات أبداً .. فى صباح اليوم التالى ذهبت الى عملها كالمعتاد .. استقبلتها
"ولاء" بالإبتسام .. فبادلتها "ياسمين" الإبتسام ..بدأت فى أداء عملها بتركيز وفى صمت ..
وفجأة وجدت سيدة تقف أمامها .. كان يبدو من ملابسها أنها سيده راقية .. لكن لم يعجب
"ياسمين" نظرة التعالى التى تتطلع بها اليها .. اقتربت منها المرأة قائله:
-انتى مدام "ياسمين"؟

قالت "ياسمين" بصوت خافت وهى تشعر بالحيره لمعرفة تلك السيدة بإسمها:
-أيوه أنا "ياسمين"

نظرت المرأة اليها من رأسها الى أخصص قدميها وكأنها تتفحص جاريه فى سوق الجوارى
احمرت وجنتا "ياسمين" من الغضب ..وعادت الى اكمال عملها متجاهله تلك المرأة التى
ترمقها بنظرات وقحه .. اقتربت منها المرأة أكثر قائله:
-أنا عمت "عمر الألفى"

نظرت اليها "ياسمين" بدهشه وقد صدمت عندما علمت بشخصيتها .. أكملت مدام "ثرىا"
بنبره متعاليه:

-جيت أشوف البنيت اللى "عمر" عايز يدخلها عيلتنا

احمرت وجنتا "ياسمين" مرة أخرى لكن هذه المرة خجلاً .. وابتسمت لمدام "ثرىا" قائله:
-أهلا وسهلاً بحضرتك .. نورتى المزرعة
قالت مدام "ثرىا" بنفس النبرة المتعاليه:

-اللى عرفناه من "عمر" .. ان انتى ووالدك وأختك بتشتغلوا هنا فى المزرعة
أومات "ياسمين" برأسها قائله:
-أيوه فعلاً

-طيب أنا هتكلم معاكى من الآخر .. لان طبعى انى واضحه وصريحه ومبجيش اللف ولا
الدوران

شعرت "ياسمين" بالقلق .. قالت:

-اتفضلى

قالت مدام "ثرىا" بهدوء وحزم:

-طبعا انتى عارفه مين هو "عمر" .. وهو ابن مين .. وعنده ايه .. وان بنات كتير اوى يتمنوه .. ومش اى بنات .. بنات لهم حسب ونسب .. يعنى بنات متتعييش ..ومن نفس مستواه المادى والإجتماعى .. انتى باه شايفه انك هتكونى زوجه مناسبه لواحد زى "عمر" .. يعنى شايفه نفسك زوجك يتشرف بيها وهو بيقدمها للناس .. ولا يتكسف منها ومن عيلتها انفجرت الدماء فى أوردة "ياسمين" فصار وجهها مثل الجمره المشتعله .. كانت تشعر ببركان ثار بداخلها لوقع تلك الكلمات عليها .. لكنها راعت أنها تتحدث الى سيدة فى عمر والدتها رحمها الله .. فقالت بصوت حاولت أن تجعله هادناً بقدر الإمكان:

-أنا مش شايفه حاجه تعيبنى أو تعيب عيلتى .. والانسان اللى هتجوزه لو محسش انى أشرفه .. يبقى ميلزمنيش أصلاً

ابتسمت مدام "ثرىا" بسخريه .. ثم قالت:

-طبعا انتى عارفه ان "عمر" كان خاطب قبل كده أومات "ياسمين" برأسها فى صمت .. فأكملت قائله:

-هى وأهلها كانوا طمعانين فى "عمر" .. وفضلت البنت تلف عليه وتعمل المستحيل عشان الجواز ده تتم لحد ما كشفها على حقيقتها .. وفسخ الخطوبه أخرجتها مدام "ثرىا" من حيرتها عندما أخبرتها بسبب فسخ الخطوبه .. لأن هذا الأمر ظلت تفكر فيه كثيراً .. أكملت مدام "ثرىا" قائله بشئ من الكبر:

-عشان كده لازم المرة دى لما ييجى يختار .. يختار صح .. وكلنا لازم نشاركه الاختيار ده ..

لان البنت اللى هيتجوزها هتشيل اسم عيلتنا اللى طول عمرها فى السما نظرت اليها "ياسمين" بشفقه .. نعم بشفقه فلقد تذكرت حديث النبي صلى الله عليه وسلم " لن يدخل الجنة من كان فى قلبه مثقال ذره من كبر" .. أكملت مدام "ثرىا" قائله:

-اللى عايزه أقوله .. انى شايفه انك اخر واحده ممكن تكونى مناسبه لعيلة "الألفى" .. انتى واحده كويسة وأكيد هتلاقى انسان كويس زيك له نفس ظروفك ومن نفس مستواكى شعرت "ياسمين" بالعبرات تحاول أن تجد الطريق لعينيها .. لكنها أوقفتها بحزم .. لن تسمع لتلك المرأة المتغترسة أن ترى تأثير كلماتها المسمومة عليها .. قالت "ياسمين" بصوت مرتجف:

-أنا لسه مدتش قرار فى الموضوع ده

قالت "ثرىا" بسخريه:

-هو فى واحده عاقله تقول لـ "عمر" لآ

شعرت "ياسمين" بمزيد من الحنق .. فأكملت ثريا:

-أنا بس حبيت أنصحك .. الفرق بينك وبين "عمر" هيدمر حياتكوا بعد كده .. هو ممكن يكون بيحبك دلوقتى .. بس بعد الجواز الحب بيضيع والحاجات التانية هى اللى بتظهر .. ساعتها هيندم على اختياره .. وعلى تسرعه .. وهيعرف انكوا مش مناسبين لبعض .. أنا بقولك الكلام ده لان أكيد انتى مش عايزه تكونى مطلقة للمرة التانية

شعرت "ياسمين" وكأنها تلقت صفة قوية على وجهها .. الآن لم تعد تستطيع كبح جماح عباراتها التى أخذت تتجمع فى عينيها مهدده بالسقوط فى أى لحظة .. علمت مدام "ثرىا" أنها لمست وترأ حساسا .. فأكملت بقسوة:

-هو ده اللى يحصل بعد ما يفوق من النزوة اللى هو فيها .. ويقارن بينك وبين البنات اللى حوليه .. زى بنتى "ايناس" مثلا .. هى جايه المزرعة بعد شوية لما تشوف فيها هتعرفى نوعية البنات اللى فعلاً مناسبه لـ "عمر" صممت قليلاً ثم قالت بإبتسامه مصطنعه:

-انتى شكلك بنت طيبة وتستاهلى كل خير .. بس عشان مترجعيش تندمى لازم تفكرى كويس .. وشكلك كمان عاقلة وعشان كده أنا واثقه انك مش هتجيبى سيره لـ "عمر" عن كلامى معاكى

..انا اتكلمت عشان مصلحتكوا انتوا الاتنين .. ولو احتجتى حاجه فى أى وقت عرفيني
أنهت كلامها ثم استدارت وانصرفت .. شعرت "ياسمين" بالألم يغزو قلبها .. وبنفسها يضيق
.. وسمحت لدموعها أخيراً بالسقوط .. لم تتعرض لمثل هذه الإهانه من قبل .. شعرت وكأنها
كانت تقف أمام تلك المرأة عاربه كيوم ولدتها أمها .. شعرت بأن هذه المرأة توجه الى قلبها
وروحها طعنات حاده غير مباليه بتأثير تلك الطعنات عليها .. شعرت بأنها تختنق .. أخذت نفساً
عميقاً تحاول به اىصال الهواء الى رنتيها .. لكن هيهات .. مازالت تشعر أن الدنيا تضيق
وتضيق حتى أطبقت على أنفاسها .. أخرجها صوت "ولاء" من شرودها:
" -ياسمين" مالك

نظرت اليها "ياسمين" والكلمات محبوسه فى حلقها
قالت لها "ولاء" بلهفه:

-ايه مالك .. تعالى اعدى جوه طيب .. هي عمت "عمر" قالتلك ايه ضايك كده
تركتها "ياسمين" ومشت فى طريقها وصلت الى حيث يعمل والدها فنادتته .. أقبل والدها ..
فقالته له بحزم:

-قول للبشمهندس "عمر" انى رفضته
بهت "عبد الحميد" وقال:

-ليه يا بنتى كده ده راجل كويس ميتعيبش
قالت "ياسمين" بصوت متهدج:

-أرجوك يا بابا متضغطش عليا

ثم تساقطت عبرة من عينيها وهى تنظر اليها قائله:

-ولا هتغصبنى عليه زى "مصطفى" ؟

بدا التأثر على وجه "عبد الحميد" وقال:

-لما الولاد بيغلطوا الأب ببسامح .. لكن لما الأب بيغلط ولاده بيكونوا فاكرين غلطته
ومبينسوهاش أبداً

نظرت الى والدها بتأثر قائله:

-أنا أسفه يا بابا مكنش قصدى أزعلك .. أنا بس مضايقه شوية ومش عارفه أنا بقول ايه ..
حقك عليا

-خلاص يا بنتى محصلش حاجه .. ومادمتى مش عايزاه خلاص .. دى حياتك مش هغصبك
على جواز تانى أبداً

ابتسمت له قائله:

-ربنا يخليك ليا يا بابا .. وبعد اذنك أنا هروح ل "سماح" أعد معاها شوية

-ماشى يا بنتى بس متأخرىش .. وخلصك من نفسك

ذهبت لدكتور "حسن" واستأذنته فى الانصراف لأنها تشعر بتوعك .. فقال لها:

-لا سلامتك ألف سلامه .. احنا اصلاً النهاردة يعتبر مفيش شغل كثير .. مفيش مشكلة روحى

ارتاحى

شكرته قائله:

-شكراً يا دكتور

غادرت واتصلت بـ "سماح" قائله:

" -سماح" انتى فاضيه النهاردة

-أه فاضية خير هتيجى ؟

-لو مكنش يضايقك .. حسه انى مخنوقه ومحتاجه اتكلم مع حد

-طيب يا حبيبتي منتظراكى ومتقلقيش "أيمن" هيتأخر النهاردة مش جاى الا بالليل

-خلاص أنا خارجه أركب حالا

أثناء سيرها فى اتجاه البوابه .. ومن بعيد .. رأت سيارة تدلف الى داخل المزرعة .. توقفت "ياسمين" .. رات فتاة تنزل من السيارة .. فتاة جميلة ذات شعر طويل ترتدى ملابس أنيقة ضيقه عارية الساقين .. تفحصتها "ياسمين" وهى تسأل نفسها ترى هل هى تلك الفتاة المدعوة "ايناس" والتي حدثتها مدام "ثرى" عنها .. كادت أن تهتم بالإنصراف لكنها وجدت "عمر" يخرج من البيت ويذهب فى اتجاه تلك الفتاة .. و كانت المفاجأة التى عصفت بكل كيان "ياسمين" .. ألقت الفتاة نفسها بين ذراعيه وقبلته على وجنتيه بدون أدنى خجل أو حياء .. شعرت "ياسمين" بسكين حاد يُغرس فى قلبها .. نظرت الى "عمر" للتتبيين رد فعله .. لكنها وجدت ملامحه عاديه .. وكان هذا هو الطبيعي والمعتاد .. وكان مس امرأة لا تحل له أمراً عاديا بالنسبة له .. وكان تلك الأمور أصبحت عادية لمجرد أنها ابنة عمته .. كانت الفتاة تنظر اليه مبتسمة ضاحكه تتحدث وتتحدث .. وهو واقف يستمع ويتحدث .. تجمعت الدموع فى عينيها فرأت بصعوبة الفتاة وهى تدلف الى الداخل .. أما "عمر" فتوجه الى سيارته وانطلق بها خارج المزرعة.

جلست "سماح" بجوار "ياسمين" تنظر اليها فى صمت .. تحدثت "ياسمين" قائلة:
- عارفه .. من كتر ما أنا حسه بألم جوايا .. حسه انى متخدره وعامله زى المشلوله اللى مش قادره تتحرك .. أنا كنت فاكراه انى خلاص هفرح زى باقى البنات .. وهرجع ابتسم وأضحك من قلبي تانى .. لما بابا قالى انه اتقدملى .. فرحت أوى .. مكنتش مصدقه .. كنت فرحانه أوى .. كنت حسه ان قلبي طاير .. كنت بفكر بسطحيه أوى .. انا زى "ولاء" فكرت فى القشرة بس .. قاطعتها "سماح" قائلة:

"- عمر" مش وحش يا "ياسمين"

نظرت اليها "ياسمين" قائله بمراره:

- احنا مننفعش بعض يا "سماح" .. مش عارفه ازاي انا كنت عاميه كده .. هو واحد اتربى بطريقه غير اللى أنا اتربيت بيها .. واحد مبادئه وأفكاره وحياته كلها مختلفه تماماً عنى .. مفيش أى تكافؤ بينا يا "سماح" .. عمته كانت معاها حق .. بعد ما الحب ده يضيع مش هيلاقى حاجه تخليه يتمسك بيا .. هيعرف ساعتها اننا مكناش مناسبين لبعض .. "سماح" أنا طول عمري عايزه واحد يتقى ربنا فيا .. واحد أنا وهو نعين بعض .. ونقرب من ربنا سوا .. ونبنى بيتنا سوا ونربى ولادنا تربيه صح .. ونكون قدوة حسنه ليهم .. ازاي اختارلهم أب .. بيستحل حرمان ربنا بالشكل ده

قاطعتها "سماح" مرة أخرى قائلة:

-بصى اللى أنا أعرفه انه هو وبنت عمته وأخوها متربيين مع بعض وزى الاخوات .. يعنى هما واخدين على بعض اوى يعنى...

قاطعتها "ياسمين" بحده:

-انتى مقتنعه باللى انتى بتقوليه ده .. اللى يغلط غلظه صغيره يغلط غلظة كبيرة يا "سماح" .. مابالك وهو اصلا مش شايف انه بيغلط..

صمتت قليلا ثم هتفت باكيه بصوت متقطع:

"-مصطفى" لما خانى كان عارف انه بيخونى .. أما ده الخيانه عنده عادى .. هيخونى وهو اصلا مش حاسس ان دى خيانه .. واحد عايش فى عالم غير اللى أنا عايشة فيه وغير اللى انا متربيه عليه .. بكره لما نتجوز يقولى اقلعى الحجاب زى بنت عمتى وزى خطيبتى القديمة .. بكره يلبسنى زيهم .. وسلمي على الرجاله زيهم .. وأبقى خسرت دينى ودينى .. بتقولى انه مش وحش .. طيب لو هو مش وحش اختار واحدة بالشكل اللى وصفتهولك ليه عشان تكون خطيبته ؟ .. ها .. وبعدها يختارنى انا

قلت "سماح": "

-بس هو دلوقتي اختارك انتي يا "ياسمين"
قالت بمراره:

-هو مفرقش اى حاجه عن "مصطفى" .. "مصطفى" اختارنى لانه عايز واحده يحطها فى البيت زى اى كرسي فى البيت ويبقى واثق فيها وفى اخلاقها .. وهو بره يعمل اللى على مزاجه .. و"عمر" زيه اختارنى لنفس السبب ..
قالت والدموع تتساقط من عينيها:

-لما "مصطفى" خانى يا "سماح" الألم كنت حساه فى كرامتى .. لكن لو "عمر" خانى....
تعالى صوتها فى البكاء قائله قائله:
-الألم هيكون فى قلبي .. وأنا مش هقدر أتحمل ده
هدنتها "سماح" قائله:

-وانتى ايه اللى يخليكى تفكرى انه هيخونك يا "ياسمين"
قالت "ياسمين" بحزم من بين دموعها:

-لان حياته غلط وعيشته غلط .. وتصرفاته غلط .. هو واحد مبيخفش من ربنا ويبعمل الغلط عيني عينك كده أدام الناس .. اللى يعمل حاجه صغيره ببجاحه كده يعمل الكبيرة يا "سماح"
صمتت قليلا ثم قالت:

-وبعدين مش دى المشكلة الوحيدده .. المشكلة انى اكتشفت انى فعلا انه مينفعشيش .. ده واحد هينزلنى معاه لتحت .. وأنا عايزه واحد ياخد بايدي ونطلع سوا .. عايزه واحده له نفس مبادئى نربي ولادنا على مبادئ واحده وقيم واحده وافكار واحده .. مش أنا ابني وأبوهم يهد ..
ثم قالت بوهن:

-مش عايزه أطلق تانى يا "سماح" كفاياني جرح واحد .. مش هقدر أتحمل جرح تانى .. مش هقدر أخاطر تانى .. أنا معنديش أى ثقته في "عمر" .. زى ما كان معنديش أى ثقته فى "مصطفى"

نظرت لها "سماح" بحزن قائله:

-طيب فكرى تانى .. واستخيري تانى

نظرت اليها "ياسمين" قائله بحزم:

-أنا استخرت .. وفكرت كويس .. الراجل الى هختاره زوج ليا هختاره بقلبي وعقلي .. مش بقلبي بس .. ولا بعقلي بس .. لازم الاتنين يوافقوا عليه .. لازم يتشرف بيا وسط عليته ووسط الناس .. أنا مش واحده من الشارع زى ما عمته حاولت تفهمنى .. أنا بنت ناس .. صحيح ناس فقرا .. بس محترمين ونعرف ربنا .. هى فاكرة انى مش هقدر ارفض "عمر" وقالتهالى وش كده ان مفيش بنت تقول ل "عمر" لأ .. بس أنا هقول لأ .. أنا وعمر مستحيل نكون لبعض ..
ده آخر واحد ممكن أوافق انى أتجوزه

توجه "عبد الحميد" الى مكتب "عمر" طرق الباب فسمه صوت "عمر" بالداخل:
-اتفضل

دخل "عبد الحميد" فهب "عمر" واقفاً واستقبله بابتسامه قائلاً:

-اتفضل يا عم "عبد الحميد" .. اتفضلى اعد

قال "عبد الحميد" فى وجوم:

-تسلم يا بشمهندس بس أنا جاي أقولك كلمتين وهمشى عشان ورايا شغل

وقفت "عمر" أمامه مبتسماً ونظر اليه قائلاً:

-خير .. اتفضل

تنهد "عبد الحميد" تنهيدة حسرة وبدا متردداً وقال دون أن ينظر اليه:

-بنتى رفضتك يا بشمهندس

وقع الخبر كالصاعقة على رأس "عمر" .. اختفت ابتسامته شيئاً فشيئاً حتى تلاشت تماماً ..
صمت وهو يحاول استيعاب ما سمع .. فنظر اليه "عبد الحميد" قائلاً:
-أنا مش ممكن أخصبها مرة ثانية .. جوازتها الأولى كانت غصب عنها .. وحلفت بعدها انى
عمرى ما هعمل كده فى بنت من بناتى
صدم "عمر" للمرة الثانية فى أقل من دقيقة .. عندما علم أن زواج "ياسمين" كان رغباً عنها
نظر اليه "عبد الحميد" بأسف قائلاً:
-أنا أسف يا بشمهندس
ثم استدار وانصرف .. جلس "عمر" على أقرب مقعد وهو مازال تحت تأثير صدمة رفضها
اياها.

حضر المأذون والشهود فى بيت "نهلة" .. لم يحضر أى من اخوتها .. فقط أمها وزوجها .. بدأ
المأذون فى مراسم الزواج .. وهنا قال "مصطفى" للمرة الثانية:
-قبلت زواجها.

الفصل الثامن والعشرون

دخل "عمر" الى بيته واجماً حزيناً .. سمع صوت المزاح والضحكات تتعالى من غرفة المعيشة .. توجه اليهم ليبرى والدته ووالده و عمته و "ايناس" مجتمعون معاً .. هتفت "ايناس" بمجرد أن رأته:

"-عمر" تعالى .. السهرة نقصاك

دخل "عمر" الغرفة ووقف أمامهم .. قالت عمته مبتسمة:

-حقيقي يا "ايناس" انتى عامله جو تانى للمزرعة .. الأيام اللى فاتت مكناش بنلاقى حاجه تسلينا هنا .. أنا من زمان مضحككش الضحك ده

قالت "كريمة" مبتسمة:

"-ايناس" طول عمرها دمها خفيف .. وتعمل روح حلوة لأى مكان بتروحه ضحكت "ايناس" وتنحنت فى حرج مصطنع قائله:

-أخرجتونى بكلامكوا يا جماعة

التفتت الى "عمر" قائله فى مرح:

-وحضرة سمو الأمير رأيه ايه فى .. رأيه برده زيهم انى مرحة ودمى وخفيف وعملاكوا جو حلو من ساعة ما جيت ؟

كان "عمر" مازال واجماً .. نظر الى كل العيون الى تطلعت اليه مبتسمة .. وقال بلهجة باردة خلت من أى انفعال:

-البنت اللى انتى كنتوا رافضين انها تدخل عيلتكوا .. هى اللى رفضت تدخلها

قال ذلك ثم غادر المكان وتوجه الى غرفته فى الطابق العلوى وأغلق الباب فى هدوء ..صمتوا وكأن على رؤسهم الطير .. كانت تعبيراتهم متباينه .. فمدام "ثرىا" ظهر على وجهها علامات الارتياح والإنتصار .. أما "ايناس" فلم تستطع أن تخفى ابتسامه الفرحة الممدوجه بالخبت التى تكونت على شفثيها .. أما "نور الدين" فبدأ شاردأ وكأنه يفكر تفكيراً عميقاً .. أما "كريمة" فكانت مشاعرها متباينه .. صدمة .. عدم تصديق .. ارتياح .. حزن .. حيرة .. مزيج عجيب تراه على وجهها .. نهضت من مكانها وهمت بأن تغادر الغرفة فأوقفها "نور الدين" قائلاً:

-سببيه دلوقتى يا "كريمة"

نظرت اليه قائله فى استنكار:

-لازم أظمن عليه

ثم خرجت وتوجهت الى غرفة "عمر" .. أما "ايناس" و والدتها فقد تبادلتا نظرة ذات معنى طرقت "كريمة" الباب فلم تسمع صوتاً .. ففتحته ودخلت وأغلقتة خلفها .. كان "عمر" يجلس فى الظلام على مقعد فى مواجهة شبك الغرفة وضوء القمر يتسلل الى غرفته ليلقى بأشعته الفضيه على وجهه .. حاولت اضاءه الغرفة لكنه التفت اليها قائلاً:

-لو سمحتى يا ماما سببيه مققول

أغلقتة كما طلب .. وتوجهت اليه .. جلست على المقعد المجاور له وعينيها تتطلعان الى وجهه تراقب انفعالاته .. سألته بصوت حانى:

-انت كويس يا "عمر" ؟

تنهد "عمر" وأغلق عينيه للحظة .. ثم نظر اليها قائلاً:

-ماما بجد أنا مش قادر أتكلم

قالت "كريمة" فى لهفة:

-عايزه أظمن عليك بس

قال بشئ من الحده:

-اطمنى .. بس لو سمحتى أنا فعلاً مش قادر أتكلم مع حد .. لو سمحتى سببيني مع نفسي شوية
ربتت أمه على رجله ثم نهضت وألقت عليه نظرة أسى قبل أن تخرج وتغلق الباب خلفها
كانت هناك مشاعر شتى تعتمل داخل صدر "عمر" .. كان يسأل نفسه سؤال واحد .. لماذا
رفضته ؟ .. كان يبحث داخله فى حيره وألم عن اجابه لهذا السؤال .. ظل يبحث ويبحث الى أن
تمكن التعب منه .. تعب ذهنى ونفسى .. شعر برغبة عارمه فى أن يذهب اليها الآن ويمسكها
من ذراعيها ويهزها بقوة لتخبره بسبب رفضها اياه .. ود لو يقول لها أجننتى يا امرأة لا
أستطيع العيش دونك .. أنت أصبحتى كل شئ فى عالمى .. فلماذا تطرديني من جنتك بلا رحمة
أو شفقه .. أتظنين أن هذا سهلاً أتظنين أن حرمانى منك أمراً هيناً .. كلا .. انه كالموت بالنسبه
لى .. بحرمانى من الهواء الذى استنشقه .. لماذا تفعلين هذا بي ؟
قضى ليلته ساهراً على هذا المعقد .. لم تذق عينيه غمضاً .. حتى أشرق الصباح .. كانت
"كريمة" تعد الفطور على السفرة مع الخادمة .. عندما رأت "عمر" ينزل مسرعاً ويتوجه الى
الباب ..حاولت اللحاق به .. لكنه خرج مسرعاً وأغلق الباب

توجه "عمر" الى مخزن العلف .. وجده مازال مغلقاً .. وقف أمامه واضعاً يديه فى جيب بنطاله
كان يبدو عليه التوتر والتلمل من الانتظار .. بعد قرابه الربع ساعه .. رأى "عبد الحميد"
مقبلاً من بعيد .. فتوجه اليه ..نظر اليه "عبد الحميد" بدهشه .. وانتظر أن يتحدث .. نظر اليه
"عمر" قائلاً:

-بنتك رفضتني ليه يا عم "عبد الحميد"

تنهد "عبد الحميد" فى حسره ..ثم ربت على كتف "عمر" قائلاً:

-أنا عارف ان أفضالك علينا كتير يا بشمهندس .. وان لولاك كان زمانا الله أعلم بحالنا دلوقتى
.. وخيرك مغرقنا و...
قاطع "عمر" قائلاً:

-مش ده سؤالى يا عم "عبد الحميد" ... سؤالى بنتك رفضتني ليه ؟

جذبه "عبد الحميد" من كتفه وسارا معاً قليلاً قال له "عبد الحميد": "

-أنا زى ما قولتلك امبارح جوازتها الأولى أنا غصبتها عليها .. مكنتش مرتحاله .. ومكنتش
عايزه تتجوز بسرعه .. بس أنا من خوفي عليها .. انى أموت وأسببها فى الدنيا دى لوحدها
هى وأختها .. والناس معدتش بترحم .. قولت أهى تكون فى عصمة راجل تتحمى فيه ويكون
سندها .. لكنه طلع كلب ولا يسوى..

ثم قال بحزم:

-عشان كده حلفت انى عمرى ما هغصب واحده فيهم على راجل هى مش عايزاه

صمت "عمر" وهو يستمع الى "عبد الحميد" .. شعر بالأسى على "ياسمين" التى اضطرت
الى العيش شهر كامل مع رجل لا تريده .. شعر بالحنق والضيق والغضب لأجلها .. وشعر
بالغيره تطعنه فى قلبه طعنات قاتله .. التفت الى "عبد الحميد" قائلاً بحنق:

-ياريتك ما غصبتها عليه

تنهد "عبد الحميد" بحسره قائلاً:

-الى حصل بأه يا بشمهندس .. والحمد لله ان ربنا خلصها منه .. مع انها خلاص اتحسبت
عليها جوازه

توقف "عمر" عن السير ونظر اليه قائلاً:

-برده ماقولتليش هي ليه رفضاني ؟
-ما قالتليش سبب الرفض .. قالتلي بس انها مش عايزاك .. وأنا محاولتش أضغط عليها
شعر "عمر" بالألم عندما سمع (مش عايزاك) .. أطرق برأسه في صمت .. ربت "عبد
الحميد" على ذراعه قائله:

-بص يا بشمهندس .. هي لسه يا دوب مطلقه .. ومصدقت انها خلصت من اللي ميتسماش ..
أكيد البنيت لسه مش على بعضها .. ولسه خايفه من طليقها ليأذيها .. وأكيد هي مش عارفه هي
عايزه ايه .. اصبر عليها .. أنا عارف انها مش هتلاقى أحسن منك .. بس الموضوع محتاج
صبر شوية
وأما "عمر" برأسه .. ثم تركه وانصرف .. وعينا "عبد الحميد" تتابعه بحسره.

-استيقظت "ياسمين" متكاسله .. أخذت تنظر الى ساعتها لتعلم انها تأخرت على عملها .. لكنه
لا تشعر بأى رغبة للذهاب الى العمل .. أو حتى لمغادرة فراشها .. كانت تخشى أن تراه فتضعف
مقاومتها .. ظلت تُفكر تُرى ماذا كان رد فعله عند علم برفضها اياه .. طبعاً صدم ابتسمت
لنفسها بسخريه .. هو بالتأكيد غاضب ثائر الآن .. ليس لأنه خسرها .. بل لكرامته التي أهدرت
.. للصفعة التي أعطتها اياه .. وبالتأكيد عانلته سعيده الآن .. أنه ابتعد عن الفتاة التي يرونها
غير لانقه لتصبح واحده منهم .. شعرت بالغضب يجتاح كيانها .. ويملاً نفسها .. ظلت تستغفر
ربها .. لتحاول تهدئه نفسها .. ثم نهضت وتوضأت وصلت الضحى .. وارتدت ملابسها
وخرجت للذهاب الى عملها

-وقفت "نهلة" في مطبخ بيتها الجديد .. بيت "ياسمين" سابقاً .. وأخذت تعد طعام الفطور وهي
تدندن في سعادته .. استيقظ "مصطفى" ودخل المطبخ فرآها وعلامات الفرح على وجهها ..
شعر بالغیظ وقال لها:

-مكنتش أعرف انك بتقومي من النوم مزاجك رايق كده
التفتت اليه قائله بسخريه:

-وهتعرف منين .. انت كان كبيرك تشوفنى بالليل وتخلع
تركها وذهب الى الحمام .. أعدت السفرة وجلست في انتظاره .. خرج وجلس يتناول طعامه في
صمت .. التفتت اليه قائله:

-كان رجل طيب
قال لها بدهشة:

-هو مين ده
قالت له بحدته:

-اللى انت عامله حداد يوم صبحيتنا

ألقى الطعام من يده والتفت اليها وصاح بسخريه:

-صبحيتنا .. سمعيني تانى كده .. ليه انتى فاكركه نفسك بنت بنوت ولا ايه .. ده احنا دفينيه سوا
قالت بنفس السخريه:

-ما هو عشان دفينيه سوا .. لازم تبقى العلاقة بينا أحسن من كده
قال بحدته:

-عايزانى أعاملك ازاي ان شاء الله

قالت "نهلة":

-تعاملنى زى ما كنت بتعاملنى زمان .. فرق ايه زمان عن دلوقتى .. هي مجرد الورقة اللي
كتبتناها امبارح عند المأذون .. تخيل انها متكتبتش واحنا مع بعض زى ما احنا
قال بمراره:

-أتخيل ازاي انها متكتبش دى أنا حاسس ان الورقة دى سلسله ربطانى من رقبتي
نظرت اليه بحزن قائله:

-لدرجة دى يا "مصطفى" .. شايف ان جوازك منى سلسله حوالين رقبتك
قال بقسوة:

-أبوة سلسله خنقانى ولو أطول أخلص منها كنت خلصت
نهض وأخذ الجاكيت ارتداه وفتح باب البيت وخرج وأغلقه بقوة .. وترك "نهلة" خلفه ودموع
الحزن تتجمع فى عينيها وقالت لنفسها (ليك حق تعمل فيا أكثر من كده .. أنا اللى أهنت نفسى
من البداية)

اتصل "كرم" بـ "ريهام" على الخط الداخلى وطلب منها احضار أحد الملفات الى مكتبه ..
طرقت "ريهام" الباب فأسرع برفع سماعة الخط الخارجى .. دخلت "ريهام" فأشار اليها بيده
أن تنتظر .. أمسكت الملف بكلتا يديها وانتظرت حتى ينهى مكالمته .. تحدث "كرم" وهو يرجع
بظهره الى الوراء ويضع ساقاً فوق ساق :

-طبعا هو احنا عندنا أعز منك .. انتى عارفه معزتك عندنا كويس .. وعندى أنا تحديداً
ألقى نظره على "ريهام" الواقفة أمامه .. والتي لا تظهر أى انفعالات على وجهها .. لكن كانت
بداخله تشعر بالضيق والحلق وودت لو أخذت منه سماعة الهاتف وحطمتها فوق رأيه .. أكمل
"كرم" فى صوت هائم:

-مش هتيجي تنورينى فى المكتب .. يا سلام تعالى انتى بس وانتى تشوفى أنا هستقبلك ازاي ..
بس ياريت القمر يحن وميتأخرش علينا .. عشان احنا مش حمل بعباده
كانت "ريهام" قد وصلت الى ذروة غضبها .. همت بالإصراف لكنها لمحت على الأرض نهاية
سلك الهاتف الذى يتحدث فيه "كرم" .. كانت عاملة التنظيف تتعثر فى الأسلاك .. كلما نظفت .
فكانت تفصلها من مكانها .. وكانت "ريهام" تعيدها مرة أخرى قبل وصول "كرم" .. لكنها
اليوم نسيت تركيب سلك الخط الخارجى..

التفتت لتنظر اليه مرة أخرى وعلامات خبيثه ترتسم على وجهها .. أنهى "كرم" مكالمته
ووضع السماعة مكانها وهو يختلس النظر الى "ريهام" التى قالت:
-اظاهر ان حضرتك كنت بتتكلم مع شخصية مهمة جدا

ابتسم "كرم" بخبث وتمطع قائلاً:

-فعلاً شخصية مهمة جدا .. تقدرى تقولى واحده مش عادية

نظرت اليه "ريهام" وعيونها تلمع فى مرح وخبث وقالت:

-اظاهر فعلاً انها واحده مش عادية أبداً لدرجة انك سبحان الله تقدر تتكلم معاها من غير ما
يكون فى حرارة فى التليفون

نظر اليها "كرم" وقد بهت .. فأشارت برأسها الى سلك الهاتف الملقى على الأرض .. نظر
"كرم" اليه وهو يتمنى أن تنشق الأرض وتبلعه فوراً .. تقدمت "ريهام" ووضعته الملف على
المكتب .. وخرجت وهى ترسم ابتسامه خبيثه على شفثيها .. أما "كرم" فقد كان يشعر بحرج
شديد من هذا المأذق السخيف الذى وضع نفسه فيه

-يعني هى قالتك هى رفضته ليه ؟

ألقى "أيمن" هذا السؤال على "سماح" وهما جالسان معاً يتناولان طعام الإفطار .. قالت
"سماح" فى ضيق:

-بصراحة صحبك مينفعهاش

قال "أيمن" باستغراب:
-ليه بأه ؟

-هما الاتنين مختلفين عن بعض فى كل حاجة .. الأخلاق الطباع التربوية اسلوب حياتهم .. كل
حاجة مختلفين فيها .. هما الاتنين مينفعوش بعض يا "أيمن" .. "ياسمين" طول عمرها عاقله
وبتفكر بعقلها .. وبصراحة أنا معاها فى قرارها ده
-بس ده مكنش رأيك لما عرفتى ان "عمر" اتقدم لها
قالت "سماح" بسرعة:

-لاى مكنتش شايغه الموضوع من وجهة نظر "ياسمين" بس بعد ما سمعتها امبارح فهمت
وجهة نظرها .. وفعلاً معاها حق تخاف منه وترفضه ... متنساش يا "أيمن" انها مطلقه ..
يعني أكيد مش عايزة تخوض تجربة فاشله للمرة الثانية
قال "أيمن" بحده:

-ومين قالك انها هتكون تجربة فاشله .. انتى متعرفيش "عمر" بيحبها ازاي .. "عمر"
صاحبى يا "سماح" عشرة سنين طويلة مش سنة ولا اتنين .. أنا عمرى ما شوفته متعلق بحد
كده .. حتى البنت اللى كان خطبها قبل كده .. مكنتش شايغه متعلق بيها كده
-أهو البنت اللى كان خطبها دى أحد أسباب رفض "ياسمين" لـ "عمر"
قال "أيمن" بدهشة:

-ازاي يعنى .. هى رفضاه عشان كان خاطب ؟
-لأ طبعاً يا "أيمن" مش عشان خاطب .. عشان الانسانه اللى خطبها دى .. هى سمعت كلام
كثير عنها هنا فى المزرعة .. يعنى اللى يخطب واحدة بالمنظر ده .. هيكون ايه يعنى غير واحد
تافه

قال "أيمن" بحزم:
-كانت غلطة .. ورجع عنها فى الوقت المناسب .. هنعلقه حبل المشنقة يعنى
قالت "سماح" تحاول افهامه:

-يا "أيمن" أنا ما قولتش ان ده السبب الوحيد .. قولت ده أحد الأسباب .. وفى أسباب قوية
جداً .. بس مش هقدر أقولك عليها .. لأن "ياسمين" مأمانى ان الكلام مايوصلكش .. بس فعلاً
هى معاها حق ترفض
قال "أيمن" فى حيره:

-والله انتوا الاتنين أغرب من بعض .. انتى مش شرحالى الموضوع على بعضه عشان كده انا
مش عارف أفهم أسباب رفضها .. بس الحاجة الوحيدة اللى أنا عارفها .. ان "عمر" بيحبها
بجد .. و دى أول مرة أشوفه بيحب واحده كده
تأملته "سماح" قائله:

-انت واثق انه بيحبها بجد
أكد لها "أيمن" قائلاً:

-أيوة واثق
قالت فى حيره:

-معرفش بأه .. ربنا يبسرلها الخير وخلص

كانت تقف وتولى ظهرها الى الباب .. تقرأ الملف الذى بين يديها وتضيف عليه ملاحظاتها ..
التفتت لتجده أمامها .. يقف أمام الباب وينظر اليها فى صمت .. تسارعت خفقات قلبها ..
شعرت بالإضطراب .. ودت الهرب .. لكنه واقف يسد المنفذ الوحيد للهرب .. هربت من عينيه
.. وساد الصمت .. قال "عمر" بهدوء:
-مممكن أعرف انتى ليه رفضتيني

ازداد ارتباكها .. صمتت .. لا تدري ما تقول .. أعدد سؤاله مره أخرى:
-ليه رفضتيني ؟

أيقنت أن لا مفر منه .. نظرت اليه قائله:

-أعتقد ان من حقي انى أقبل أو أرفض .. وأنا رفضت

تلاقت نظراتهما فى صمت للحظة .. نظرة عتاب منه .. ونظرة صد منها .. قال لها بهدوء:

-طبعاً من حقا تقبلى أو ترفضى .. لكن أنا بسأل عن أسباب الرفض

قالت ببرود:

-أفضل أحتفظ بيها لنفسى

قال بصرامة:

-لأ مش من حقا

احتدت عليه قائله:

-يعنى ايه مش من حقي

قال "عمر" بنفس الصرامة:

-مش من حقا تحفظى بأسباب الرفض لنفسك .. لازم أعرفها

تماسكت قائله:

-وأنا معنديش كلام أقولها لك .. رفضت وخلص

ظهرت علامات الغضب على وجه "عمر" واقترب منها قائلاً:

-انتى ليه بتعملى كده

قالت بغضب هى الأخرى:

-ايه يا بشمهندس .. مضايق انى رفضتك ..ايه كنت فاكرا ان مفيش بنت تقدر ترفضك

صمتت قليلاً ثم نظرت فى عينيه قائله بقسوة:

-لأ .. أنا رفضك .. تحب تسمعها تانى .. أنا رفضتك .. أنا مش زى البنات اللى انت تعرفهم

واللى يتمنوا اشاره منك .. أنا مش زيهم .. أنا أبعد من أحلامك

قالت ذلك ثم انصرفت مسرعه .. لتترك "عمر" فريسه للشعور بالغضب

وقفت "ياسمين" فى المساء مع أختها فى شرفة غرفتهما .. قالت "ياسمين" بهدوء:

-احنا لازم نمشى من هنا .. معدش ينفع نستنى فى المزرعة

قالت "ريهام" بلووعه:

-ليه ؟ .. نمشى ليه ؟

نظرت اليها "ياسمين" قائله:

-نمشى بكرامتنا قبل ما "عمر" يطردنا

-تفتكرى "عمر" ممكن يطردنا

شردت "ياسمين" قليلاً ثم قالت:

-حتى لو مطردناش .. فده هيكون عشان خاطر "أيمن" بس .. لكن هو أكيد عايزنا نمشى من

هنا بعد ما رفضته

نظرت اليها "ريهام" وقالت:

-انتى مش ممكن تغيرى رأيك يا "ياسمين"

هزت "ياسمين" رأسها نفيماً وقالت بضعف:

-لأ .. مش هغير رأيي

قالت "ريهام":

-بس انتى....

ثم قطعت كلامها .. نظرت اليها "ياسمين" قائله:

-حتى لو كنت كده .. ده مش كفايه بالنسبة لى .. عشان أوافق عليه

تركها "مصطفى" وقد أدرك صحة ما تقول .. هو مضطر للبقاء معها .. مضطر لدفع ثمن أخطائه .. مضطر أن يبقى مقيداً بذلك القيد الذى يطبق على أنفاسه .. مضطر لأن يبقى زوجاً لآخر فتاة كان يتمنى الزواج بها

تقدمت "ياسمين" الى مكتبه .. وقفت أمامه للحظات .. كانت هذه آخر مرة ستراه فيها .. سترحل وتترك المزرعة هى وأهلها .. كان من الممكن أن تترك مهمة اخباره بذلك الى والدها .. لكنها أرادت أن تخبره بنفسها .. لم تدري لماذا تفعل ذلك .. هل لكى تشعر بانتصارها أمامه ان استطاعت الخروج من المزرعة برغبتها ودون اراقة ماء وجهها .. أم لكى تراه لآخر مرة

وقفت للحظات ثم استجمعت شجاعته وطرقت الباب .. كان بمفرده .. جالس يتأمل الورق الذى أمامه دون أن يرى منه حرفاً .. عندما رآها شعر بمزيج من الحب والألم يغزو قلبه .. فها هى حبيبته القريبة البعيدة .. لا يستطيع الاقتراب منها ولا الابتعاد عنها .. وقفت أمامه ثم قالت:

-أنا جايه أبلغ حضرتك اننا يومين وان شاء الله هنسبب المزرعة أرجع ظهره وأسنده على الكرسي .. صمت لبرهه .. ثم نظر اليها ببرود قائلاً:

-كلامى فى الموضوع ده مش معاكى انتى .. مع والدك نظرت اليه بدهشة فأكمل قائلاً:

-الموضوع ده القرار فيه لوالدك مش ليكى قالت بحزم:

-ده قرار مشترك لينا احنا التلاته .. وأنا جايه أبلغ حضرتك بيه قالت بنفس البرود:

-وأنا كلامك ده ملوش أى معنى عندى إلا اذا سمعته من والدك ضهرت علامات الغضب على وجهها لماذا يتجاهلها وكأن رأيها لا يعنيه .. قالت بحده:

-بقول لحضرتك ده رأينا احنا التلاته ولو كلمت والدى هيقولك نفس الكلام صمت قليلاً ثم قال بهدوء:

-طيب هتكلم معاه .. اتفضلى على شغلك

ثم أمسك قلمه وشرع فى النظر الى الأوراق التى أمامه .. شعرت بالحنق والضيق وغادرت مكتبه فى عصبية .. نظر "عمر" الى الباب الذى أغلقته خلفها ثم ترك القلم من يده وتنهى فى حزن .. قام من فورهِ وذهب الى عم "عبد الحميد" فى المخزن وسأله عما قالت "ياسمين" .. فقال "عبد الحميد":

-أظن يا بشمهندس معدش ينفع نستنى هنا بعد كده سأله "عمر" قائلاً:

-ليه يا عم "عبد الحميد" حد هنا ضايقتكوا .. أنا صدر منى حاجه ضايقتكوا قال "عبد الحميد" بسرعة:

-لأ طبعا يا بشمهندس .. أنا مشفتش فى ذوقك ولا فى أدبك واخلاقك -أمال عايزين تمشوا من المزرعة ليه ؟

قال "عبد الحميد" بخرج:

-يعنى بعد اللى حصل .. أظن انت اللى هتكون حابب اننا نمشى نظر اليه "عمر" قائلاً:

-أظن احنا اتفقنا آخر مرة ان الموضوع محتاج صبر مش كده .. يعنى الل عايز أقوله أنا مفقدتس الأمل .. عارف ان الوقت مش مناسب بالنسبيلها .. وهى ممكن يكون تفكيرها مضطرب .. وعشان كده رفضت .. وحتى لو موافقتش وأصرت على الرفض ..ده مش معناه انكوا تسيبوا المزرعة وتمشوا

قال له "عبد الحميد: "

-بس يا بشمهندس....

قاطعه "عمر" قائلاً:

عم "عبد الحميد" انت السنين اللى اشتغلتها فى الشغل الحكومى خلتك منظم زى الساعة بالظبط .. ومحدث قبلك مسك المخزن بايد من حديد زيك كده .. يعنى فعلاً أنا محتاجك هنا .. وانت عارف ان الشغلان ده دي مينفعش أحط فيها الا واحد أثق فيه .. من بعد ما عينت كذا واحد واكتشفت انهم كانوا بيسرقوا من العلف ويبيعوه برخص التراب .. يعنى مفيش حد غيرك أثق فيه وأسلمه مفاتيح المخزن ده ..يا ترى بأه بعد كل اللى قولتهولك ده لسه برده عايز تسيب المزرعة وتمشى

ابتسم "عبد الحميد" فى سرور وقد فرح لثقة "عمر" به وبعمله وقال:

-ده احنا نخدمك بعيننا يا بشمهندس

ابتسم "عمر" وربت على كتفه قائلاً:

-تسلم يا عم "عبد الحميد"

ثم تركه وانصرف

خرجت "ريهام" من المكتب بعد انتهاء عملها فى طريقها الى غرفتها .. عندما أوقفها "هانى" واعترض طريقها .. نظرت اليه فى حده قائله:

-أفندم ؟

ابتسم لها قائلاً:

-ازيك يا آنسه "ريهام"

تركته وأكملت طريقها فاعترض طريقها مرة أخرى .. فهتفت قائله:

-لو محترمتش نفسك أنا هشتكك للبشمهندس "كرم"

اتسعت ابتسامته قائلاً:

-مش تعرفى الأول أنا عايزك فى ايه

قالت بحدده:

-مش عايزة أعرف

وهمت بالسير مرة أخرى .. لكنه وقف أمامها قائلاً والابتسامه تعلق شفتاه:

-أنا عايز أتقدملك

بهتت ووقفت تنظر اليه فى دهشة قائله:

-نعم

أعاد ما قال:

-أنا عايز أتقدملك

احمرت وجنتاها .. ونظرت اليه قائله:

-وانتى تعرفنى منين عشان تتقدملى

نظر اليها قائلاً:

-صحيح معرفكيش انتى لانتك مش مديانى فرصة اعرفك .. بس اعرف اختك الدكتورة

"ياسمين" وواضح انك انسانه محترمة زيها .. وعشانك كده عايز أتقدملك ونتعرف على بعض

أكثر

شعرت بالإضطراب فقالت له:

-بعد أدنك

ثم غادرت بسرعة حتى لا يعترض طريقها مرة أخرى

كانت "ياسمين" عائدة الى مكتبها عندما رآها "هانى" واستوقفها قائلاً:

-دكتورة "ياسمين" لو سمحتى
التفتت اليه قائله:

-أفندم

شعر بالارتباك قليلاً ثم قال:

-عايز أتكلم مع حضرتك فى موضوع

قالت بنفاذ صبر:

-اتفضل بس بسرعة عندى شغل

تنحج قليلاً ثم ابتسم قائلاً:

-أنا عايز أتقدم لأختك

نظرت اليه بدهشة قائله:

"-ريهام"؟

اتسعت ابتسامته قائلاً:

-أيوه

سألته باستغراب:

-وانت تعرفها منين؟

-شوفتها كذا مرة وهى جيبالك وكمان بشوفها كتير هنا فى المزرعة .. وبصراحة عجبانى

رآهما "عمر" واقفان معاً يتحدثان فى هدوء والابتسامه تملو شفتى "هانى" .. "فاشتعل قلبه

بنيران الغيره واقترب منهما ووقف أمامهما فى صمت .. ظل الثلاثة ينظرون الى بعضهم

البعض دون أن يتحدث أحدهم بكلمه .. قطع "هانى" هذا الصمت وتنحج قائلاً:

-طيب يا دكتورة هبقى أتكلم معاكى فى موضوعنا فى وقت تانى

قال ذلك ثم غادر المكان .. نظر اليها "عمر" بحده قائلاً:

-موضوع ايه اللي عايز يكلمك فيه

قالت ببرود:

-موضوع ميخصش حضرتك

ثم همت بالانصراف فاعترض طريقها بيده .. نظرت اليه بحده .. فقال بحزم:

"-ياسمين" .. اياكى أشوفك واقفه بتتكلمى معاه تانى

تحولت نظرات "ياسمين" الى الدهشة وقالت :

-يعنى ايه؟

قال بحزم:

-يعنى اللي سمعته .. متقفيش تتكلمى معاه تانى لأى سبب .. ومن بكرة هقول لدكتور

"حسن" يشوف حد غيرك يشرحله الحالات

شعرت بالحرق والضيق فقالت:

-ليه بأه ممكن أعرف السبب

صمت قليلاً ثم قال ببرود:

-أحب أحتفظ بالأسباب لنفسى

قال نفس جملتها التى قالتها عندما سألها عن سبب رفضها اياه .. سألته قائله:

-انت مالك ومالى؟

نظر اليها بنظرات شعرت بأنها تخترق أعماق روحها .. قال فجأة بصوت رخيم:

-انتى بتاعتى

ارتجف قلبها .. قالت وقد اعترتها الحيرة:

-ايه

تعمقت نظراته فى عينيها أكثر لتشل أى قدرة لها على المقاومة ..وقال بصوت خافت :
-زى ما سمعتى .. انتى بتاعتى
ثم أردف قائلاً بصوت هامس وعيناه تعانقان عينيها:
-مهما قولتى مش هسيبك .. لأنك بتاعتى خلاص .. ملكى أنا وبس .. لا هسمحك تبعدى عنى ..
ولا هسمح لأى حد انه يقربك
قال ذلك وتركها خلفه وصدى كلماته يتردد فى أذنها .. تحاول استيعابها فى حيره .. وعلى
الرغم من قدرتها على السيطرة على تعبيرات وجهها .. إلا أن قوتها لم تكفى لتسيطر على قلبها
الذى أخذ يقفز فرحاً لكلماته.

الفصل التاسع والعشرون

عاد "عمر" الى منزله كالعادة سلم على الجميع ثم صعد الى غرفته .. تركته أمه وشأنه طيلة الأيام الماضية ولم يقترب أحد منه .. قالت مدام "ثريا" بحده:
-ماله عامل كده أكن ميتله حد .. أحسن انه خلص منها أوام أوام .. بكرة يلاقى اللي أحسن منها مليون مرة
قامت "كريمة" وتوجهت الى غرفة ابنها دخلت وأغلقت الباب وجدته كما المرة الماضية يجلس فى الظلام شاردأ حزيناً .. اقتربت منه لتجلس على المقعد بجواره .. نظر اليها فى صمت .. ثم عاود النظر الى تلك السماء أمامه التى تزينت باللون الأسود .. كالسواد الذى يشعر بأنه يغمر قلبه ويغرقه فيه .. نظرت اليه "كريمة" قائلة:
-انت بتحبتها أوى كده يا "عمر" ؟

تنهد بقوة .. وصمت دون أن يجيب .. سألته قائلة:

-هى ليه رفضتك

رد بهدوء قائلاً:

-معرفش

-يعني محاولتش تتكلم معاها

-حاولت

-وقالتك ايه

-مرضتش تريحنى وتقولى السبب

صمتت "كريمة" تفكر للحظات .. ثم نظرت الى ابنها قائلة فى حنان:

-هى تستاهل ؟

تلألأت العبرات فى عين "عمر" خفق قلب أمه لرؤية تلك العبرات التى تعلم جيداً أنها لا تعلن عن ظهورها إلا إذا كان الخطب جلل .. أيقنت عندئذ أن ابنها غارق فى الحب حتى النخاع ..

تمتم "عمر" فى خفوت:

-أيوة تستاهل

ابتسمت "كريمة" قائلة:

-أكيد تستاهل .. طالما قدرت تأثر فيك كده يبقى أكيد تستاهل

نظر "عمر" الى أمه التى ابتسمت قائلة:

-فاكر يا "عمر" لما كنت صغير وكان عندك قفص كبير أوى فيه عصافير .. كنت كل فترة

تشتري عصفورة وتضمها للقفس الكبير .. كنت بتحبههم ومهتم بيهم أوى .. بس كان فى

عصفورة كانت مميزة أوى بالنسبة لك .. وكنت بتحبتها أكثر عن باقى العصافير اللى فى القفص

.. الوحيدة اللى كنت تخرجها بره القفص وتفضل حضينها بإيدك .. وكنت كثير أتخاق معاك

عشان بتسيب مذاكرتك وتلعب معاها

ابتسم "عمر" فى صمت لتلك الذكرى .. فأكملت أمه:

-و فى يوم العصفورة دى تعبت .. ونقلناها فى قفص صغير لوحدها .. انت زعلت عليها أوى

لدرجة أنك صممت اننا نشوفلها دكتور .. وعرفنا انها تعبانة وخلص هتموت .. انت اتأثرت

أوى لأنك كنت متعلق بيها جداً .. فضلت كل يوم تحطلها الدوا بنفسك فى المايه .. وتمسكها

وتحطلها الأكل فى بقها .. فضلت مهتم بيها ومراعيها .. لدرجة انى كنت بدخل عليك بالليل

ألاقيك حاطط القفص بتاعها جمبك على السرير وانت نايم .. وبعد اسبوع .. العصفورة رجعت

ترفرق تانى .. وخفت وبأت كويسة يومياً انت كنت هتطير من الفرحة

ظلت الابتسامه مرسومه على شفتى "عمر" وقال:

-كنت مسميها "سمسمه "
وضعت أمه كفها على كفه .. فنظر اليها .. فأكملت بحزم قائله:
-ابنى مبيتخلاش أبداً عن حاجه بيحبها .. ولا بيسيبها تضيع من ايده .. وبيحارب عشان تفضل
معاه .. طالما تستاهل
شعر "عمر" بأن كلمات أمه لمست وترأ حساساً فيه وبعثت فى قلبه الأمل والتفائل و .. الحب
.. قام من فورهِ وأمسكها من يدها لتقف وعانقها قائلاً:
-ربنا يخليكي ليا يا أحسن أم فى الدنيا
اتبسمت "كريمة" ونظرت الى ابنها قائله:
-وربنا يخليك ليا يا أحسن ابن فى الدنيا
قال لها "عمر" بحماس وعيونه تلمع من الفرح:
-صدقيني هتحببها .. أنا واثق انك لو عرفتها هتحببها
ربتت "كريمة" بكفها على وجنته قائله:
-طالما انت بتحببها يبأه أنا أكيد هحببها
عانقها "عمر" مرة أخرى وقد شعر بأنه اقترب خطوة أخرى .. بل قفزة أخرى .. اقترب بها
من .. "ياسمين"

دخلت "ريهام" المكتب .. ثم طبعت البريد وتوجهت به الى مكتب "كرم" وأعطته اياهم ..
وقفت ليملى عليها "كرم" الرد بعدما انتهى .. رسمت تعبيراً جاداً على وجهها ونظرت اليه
قائله:

-بشمهندس "كرم" كنت عايزة أطلب من حضرتك حاجه
نظر اليها "كرم" مبتسماً وقال:
-ايه ده هو النهاردة العيد ولا ايه
سألته قائله:
-ليه ؟

قال بمرح:

"-ريهام" بجلالة قدرها هتتنازل وتتواضع وتطلب منى أنا طلب .. يبأه لازم يكون اليوم ده
مميز

قالت "ريهام" بجديه:

-كنت عايزة أبلغ حضرتك انى احتمال أخذ أجازة قريب .. بس مش أكيد لسه معرفش
ابتسم قائلاً:

-وهتاخدى الأجازة اللى مش أكيد ليه
نظرت اليه وقلت:

-لانى احتمال أتخطب

اختفت ابتسامه "كرم" .. ونظر الى الأوراق التى أمامه وكأنه انشغل بها فجأة .. فأكملت
"ريهام" قائله بخبث:

-أنا بس حبيت أبلغ حضرتك عشان تكون عارف انى ممكن مكنش موجودة لفترة .. بعد اذنك
ثم استدارت لتتصرف وعلى ثغرها ابتسامه خبيثة .. تابعها "كرم" بعينه حتى خرجت وأغلقت
الباب خلفها .. جلس مكانه واجماً .. يفكر فيما قالته للتو .. وعن احتمالية خطبتها .. وجد نفسه
يشعر بالحنق والضيق .. فزفر وقال لنفسه بضيق بصوت عالى :

-أنا مالى متتخطب ولا تتهبب أنا مضايق نفسى ليه

حاول العودة الى اكمال عمله .. لكن صدق كلماتها ظل يتردد فى أذنه ليشئت أفكاره .. ووجد
نفسه يتساءل عن شكل وصفة ذلك الذى سيكون قريباً خطيبها.

توجهت "ايناس" الى حيث اسطبلات الخيل وظلت تنظر حولها وكأنها تبحث عن شخص ما الى أن وجدت من يهتف من خلفها بمرح:

-ايه ده مش معقول "ايناس" بنفسها عندنا .. ايه النور ده

التفتت وابتسمت الى "مها" التي استقبلتها بالترحاب قائلة:

-ازيك يا "مها" أخبارك ايه؟

-تمام الحمد لله .. ايه الغيبة دي بقالك كثير مبتجيش المزرعة

قالت "ايناس" بنبره فيها تعالى:

-يعني .. كنت مشغولة شوية

قالت "مها" بحفاوة:

-بس بجد المزرعة نورت

قالت لها "ايناس": "

-انتي فاضية نتكلم شوية

-طبعاً فاضية وان مكنتش فاضة أفضالك

ابتسمت "ايناس" بترفع .. وسارتا معاً داخل المزرعة .. سألتها "ايناس" فجأة:

-تعرفى دكتوراة بتشتغل هنا اسمها "ياسمين"

قالت "مها" بخبث:

-طبعاً أعرفها .. هو أنا بيخفى عنى حاجه برده .. عيب عليكي

ابتسمت ايناس قائلة:

-أروبة طول عمرك .. أنا قولت برده ان انتى اللى هتجيبلى من الآخر

سألتها "مها" باهتمام:

-انتي بتسألنى عنها ليه؟

-عايزة أعرف كل اللى تعرفيه عنها

قالت "مها" بحماس:

-بصى يا ستى .. هى وأختها وأبوها .. البشمهندس "عمر" جبهم المزرعة هنا عشان يخبيها

من جوزها

قالت "ايناس" بدهشة:

-يخبيها منه؟

قالت "مها" وهى تشعر بالسعادة لإمتلاكها معلومات قيمة تصب بها فى أذن "ايناس": "

-أصل جوزها ده كان عايز يرجعها البيت بالعافية وهى رفعت عليه قضية خلع .. فالبشمهندس

"عمر" جبها هنا يخبيها منه وشغلها هى وأختها وأبوها فى المزرعة ..ومن فترة صغيرة

اتحكملها بالخلع .. وخلص اطلقت منه

شردت "ايناس" قليلاً ثم قالت:

-ها وايه كمان؟

-هما التلاته ساكنين هنا فى المزرعة فى سكن العمال

قالت "ايناس" بسخرية:

-سكن العمال؟

سخرت "مها" هى الأخرى قائلة:

-أيوة هى وأختها أعيدين فى أوضة .. وباباها فى أوضة

-وايه كمان تعرفيه

قالت "مها" بخبث:

-اللى أعرفه كمان انها بتلف حولين البشمهندس "عمر" .. وأختها بتلف حولين البشمهندس

"كرم" .. عقربتين هما الاتنين بنات مش سهله

قالت "ايناس" بترفع دون أن تلتفت لكلامها:

-أنا "ايناس" بنت عمته "عمر"

صمتت "ياسمين" ولم ترد .. فأكملت "ايناس" بتعالى:

-مش بنت عمته بس .. أنا كمان بشتغل معاه فى الشركة مديرة العلاقات العامة .. وغير كده أنا

و"عمر" متربيين مع بعض من واحنا صغيرين ومكناش بنفترق أبداً

صمتت قليلاً ثم قالت بخبث:

-يعنى تقدرى تقولى أنا حب الطفولة والمراهقة بتاع "عمر"

قالت لها "ياسمين" بحزم:

-كل الكلام اللي حضرتك بتقوليه ده ميخصنيش فى حاجه .. بعد اذنك

والتفتت ودخلت الى مكتبها .. ظلت "ايناس" تنظر اليها بغل لبرهه ثم انصرفت

شعرت "ياسمين" بالغضب يعصف بداخلها .. لكنها كانت مصممه على ألا تدع أحداً يقلل من

شأنها أو يحط من قدرها .. هى لن تتخلها عن ملابسها المحتشمة وحجابها لترضى من حولها

أو ليقل عنها راقية .. فليقل من حولها ما يقولون طالما ترضى ربها ولا تعصيه .. فلا شئ آخر

يعنيها .. كانت تتق بأن من أرضى الناس وأسخط الله أسخط الله عليه وأسخط عليه الناس ..

لذلك كانت قاعدتها التى تضعها دائماً نصب عينها .. من وجد الله فماذا فقد ومن فقد الله فماذا

وجد

ذهبت "ياسمين" الى استراحة الغداء .. حاولت أن تتجنب النظر الى "شيماء" و "مها" حتى

لا يطلبها منها الإنضمام اليهما .. ذهبت للجلوس برفقه "ولاء" وأصدقائها .. رحبت بها

"ولاء" وعرفتها على الفتيات الثلاث الجالسات معها .. ظلت تستمع الى حديثهن المازح

وتتشارك معهن فى الحوار والمزاح .. كانت سعيدة بصحبتهن للغاية .. أنهت غداها وأثناء

انصرافها وجدت "مها" توقفها قائله:

-مش كنتى تعرفينا يا عروسه .. عشان نفرحك

نظرت اليها "ياسمين" بدهشة .. فقالت "مها" بتشفى:

-يا بنتى أنا مفيش حاجة هنا تستخبي عليا

قالت "ياسمين" بحدده:

-عرفتى منين ؟

قالت "مها" مبتسمه:

-مصادرى الخاصة

قالت "ياسمين" بإندفاع وبدون تفكير:

-البشمهندس "عمر" هو اللي قالك ؟

صمتت "مها" قليلاً .. وشعرت بأنها تصيدت فرصة لتعكر صفو مزاجها فقالت:

-مش هريحك هسيبك على نارك كده

ثم تركتها وغادرت القاعة .. شعرت "ياسمين" بالحنق الشديد .. أ "عمر" من أخبرها ..

ولماذا يخبرها .. لماذا أصلاً يتحدث فى هذا الموضوع .. ألم ينتهى برفضها اياه .. أحقاً يقصد

ما قاله لها بأنه لن يتركها .. وبأنها أصبحت له وملكه .. أشعرتها تلك الكلمات بالقشعريرة ..

حاولت نفض تلك الكلمات من رأسها .. وعادت فى طريقها الى المكتب .. لكنها لدهشتها دخلت

لتجد "عمر" جالس فى مكانها يمسك بيده ميداليه مفاتيحها الموضوعه على المكتب يقلبها بين

أصابعه .. رأته فتسمرت مكانها .. رأها فنهض ليقف فى مواجهتها .. ابتسم لها قائلاً:

-ازيك يا "ياسمين"

دخلت المكتب فأفسح لها الطريق .. جلست على مكتبها وأخرجت أحد الملفات وقلم وبدأت فى

تدوين بعض الملحوظات دون أن تتحدث معه أو تنظر اليه .. استند بكفيه على المكتب وأخذ يتفحص وجهها .. والتعبيرات الغاضبة الواضحة عليه .. فسألها قائلاً:
-مالك في حابه ضايقتك ؟

نظرت اليه قائله:

-أيوة

-ايه اللي مضايقتك

قالت بحدده:

-انت

ابتسم لها ابتسامه أشاحت وجهها بسرعه حتى لا تقع تحت تاثير سحرها .. قال بصوت حانى:
-مضايقه منى ليه

هبت واقف فى مواجهته .. فاعتدل فى وقفته قالت بحدده:

-أولاً أنا مش حبه أبداً الاسلوب اللي انت بتكلمنى بيه لازم يبقى فى حدود بينا يا بشمهندس ..
ثانياً كل شوية أشوفك أدامى أكن مفيش وراك حابه فى المزرعة دى غيري .. ثالثاً انت ليه
قولت لـ "مها" انك اتقدمتلى ؟

قال "عمر" بهدوء:

-أولاً : أنا مش شايف انى تجاوزت حدودى معاكى فى الكلام .. ثانياً : أيوة ورايا حاجات كتير
فى المزرعة بس انتى أول اهتماماتى .. ثالثاً : أنا مبتكلمش مع الدكتور "مها" أو غيرها عن
حابه تخصنى

قالت باستغراب:

-أمال مين اللي قالها ؟

قال شارحاً:

-مممكن من "ايناس" بنت عمى .. لأنهم يعرفوا بعض

شعرت "ياسمين" بالغضب يشتغل بداخلها مرة أخرى على ذكر "ايناس" تلك .. وعاودتها
ذكرى رؤيتهما معاً متعانقان .. فقالت بشئ من الحده:

-طيب لو سمحت عرف قرابيك ان الموضوع انتهى .. لانى مش حبه ان حد يتكلم معايا فى
الموضوع ده .. ولا حبه ان حد فى المزرعة يعرف الموضوع ده
اقترب برأسه منها لينظر الى عينيها مباشرة .. فارتجفت .. كانت نظرتة صارمه حازمه
مصممه .. قال بصوت وكأنه أتى من مكان سحيق:

"-ياسمين" الموضوع منتهاش .. احنا لبعض .. دلوقتى .. بعد شهر .. بعد سنة .. ميهمنيش
أسنتى أد ايه .. المهم انك فى الآخر هتبقى ليا أنا
ارتجف قلبها .. فخرج صوتها مرتجفاً:

-انت ليه مصر الإصرار ده

قال وقد لمعت عيناه:

-انتى اللي عملتى فيا كده .. وختينى مش شايف غيرك .. لما ببصلك بحس ان فى حابه قوية
ربطانى بيكي .. وبتشدنى نحيتك .. مش عارف أتحرق منها
ابتسم ابتسامه عذبه قائلاً:

-ولا عايز أتحرق منها

ألجمتها كلماته .. واشتعلت النيران فى وجنتيها .. فغادرت مسرعة .. كالعادة .. لتهرب منه ..
ومن نفسها.

كانت "ريهام" فى مكتبها تضرب بأصابعها على لوحة المفاتيح أمام الكمبيوتر .. عندما شعرت بأحداً يقف بجانبها رفعت رأسها لتفاجأ بروية "هانى" يقف بجوارها مبتسماً .. قائلاً:
-ازيك يا آنسه "ريهام"

قالت له ببرود:

-أفندم .. حضرتك عايز البشمةهندس "كرم" فى حاجه

-لا .. أنا كنت عايز أتكلم معاكى فى الموضوع اللى فتحتة معاكى .. يعنى عايز رقم والدك .. أو ولى أمرك

ابتسم بخرج قائلاً:

-يعنى بصراحة أنا معرفش تفاصيل أوى عنك .. وحابب أعرف شوية حاجات وقفت وقالت له بنفاد صبر:

-دكتور "هانى" أنا مشغولة دلوقتى لو سمحت

وفجأة وجدت "كرم" يدخل الى المكتب يحمل ملف قائلاً:

"-ريهام" لو سمحتى عايز.....

قطع كلامه عندما وجد "هانى" فى المكتب وقف يتحدث الى "ريهام" .. شعر الحنق .. نظر اليه "هانى" قائلاً:

-ازيك يا بشمةهندس "كرم" .. احنا اتعرفنا قبل كده

قال "كرم" بلا مبالاه:

-بجد ؟ .. مش فاكرك

ثم التفت الى "ريهام" قائلاً ببرود:

-عايز نسختين من الملف ده .. دقيقتين وتجيبه عندى فى المكتب

ثم ألقى نظره صارمه على "هانى" وخرج من المكتب .. بعد خمس دقائق دخلت "ريهام" المكتب تحمل الملفات المطبوعة وضعتهم أمامه وهمت بالإنصراف .. لكنه استوقفها قائلاً بعده :

-المكتب ده مفتوح للشغل مش لغرامياتك يا آنسه "ريهام" .. بعد كده عايزة تقابلى خطيبك يباه مش فى المكتب عندك أماكن كتير فى المنصورة تخرجى فيها معاه هتفت بغضب قائله:

-لا استوب عندك .. أنا مسمحكش انك تقولى الكلام ده .. أولاً أنا مليش فى الغراميات وقلة الأدب .. ثانياً : حتى لو هو خطيبى فأنا مستحيل أخرج معاه .. ثالثاً : أنا لسه موافقتش عليه يعنى مسمحكش انك تقول عليه خطيبى أصلاً .. رابعاً : لو اتكلمت معايا بالاسلوب ده تانى أو لمحت بأى تلميح مش محترم أنا هسيبك الشغل وأمشى ثم غادرت المكتب وأغلقت الباب خلفها فى عصبية

أحاط "نور" زوجته بذراعيه من الخلف عندما وجدها واقفه شاردة فى شرفة غرفتهما التى تطل على الحديقة الخلفية للمنزل .. ثم قال لها مبتسماً:

-كنت عارف ان قلبك أبيض

ابتسمت قائله:

-أعمل ايه .. מבحبش النكد

ضحك قائلاً:

-ودى أكثر حاجه بحبها فيكى

اختفت ابتسامتها قائله:

-بس خايفه أوى .. خايفه "عمر" يكون مغشوش فى البنت دى .. وتكون مش كويسة

طمأنها قائلاً:

- هو رجل ويقدر يعرف الناس كويس .. وكمان حاولى تتعرفى عليها وكونى رأى عنها على
الواقع بدل التخمينات اللي فى راسك دى
-ازاى بس .. البنت أصلاً رفضته
فكر قليلاً ثم قال:

-ما قالكيش سبب الرفض ؟

-لأ .. بيقول مرضتش تقوله .. ودى كمان حاجه هتجننى .. مين مجنونه ترفض "عمر" .. إلا
فى حالة واحده
-ايه هي ؟

-يكون فى حياتها حد تانى

تنهدت بقوة وقالت:

-أنا خايفه تكون بتحب واحد تانى .. ولا تكون لسه متعلقه بزوجها .. لو فعلاً كده "عمر" يا
حبيبي هيتصدم .. ده بيحبها أوى يا "نور"

اقترح عليها زوجها قائلاً:

-طيب ما تتكلمى معاها انتى

قالت باستنكار:

-ازاى يعني طبعاً مينفعش

-طيب على الأقل حاولى تتعرفى عليها من بعيد لبعيد .. هي أصلاً متعرفش شكلك .. حاولى
على الأقل تشوفيه وتكونى ولو فكرة مبدئيه عنها

قالت وقد راقت لها الفكرة:

-هفكر فى الموضوع ده

دخلت "ريهام" غرفتها والغضب بادٍ على وجهها .. نظرت اليها "ياسمين" الجالسه على
فراشها قائله:

-ايه مالك .. حد ضايقتك ؟

قالت "ريهام" بحده:

-الباشا قالى كلمتين حرقوا دمي

قالت "ياسمين" باستغراب:

-باشا مين ؟

قالت "ريهام" بنفاذ صبر:

"-كرم" يا "ياسمين" متركزى

-قالك ايه يعني

-سى بتاع اللي اسمه "هانى" ده جالى المكتب .. كان عايز رقم بابا .. و"كرم" دخل .. وبعد
ما مشى .. سعمنى كلمتين سم .. قال ايه .. عايزه تقابلى خطيبك قابليه فى مكان تانى فى اماكن
كتير فى المنصورة حلوة

قالت "ياسمين" باستغراب:

-ومين قاله أصلاً ان "هانى" عايز يتقدملك .. "هانى" اللي قاله ؟

قالت بارتباك:

-لأ مش "هانى" .. أنا اللي قولتله

-ليه بأه ؟

صمتت قليلاً ثم قالت بخبث:

- عشان يتحرك شويه
ثم عادت لتشعر بالضيق قائله:
- هو اتحرك فعلاً بس اتحرك فى الإتجاه الغلط
ابتسمت "ياسمين" قائلاً:
- أحسن وقعتى فى شر أعمالك
ثم استطرقت قائلاً:
- انتى ناويه توافقى على "هانى" ؟
قالت "ريهام" باستنكار:
" - هانى" مين ده اللي أوافق عليه ده تحت عيل
ضحكت "ياسمين" قائله:
- عيل ايه يا "ريهام" ده أكبر منك بسنه
قالت بإصرار:
- برده شيفاه عيل
قالت "ياسمين" بجديه:
- طيب لو افترضنا ان "كرم" اتحرك فى الإتجاه الصح .. انتى مش شايفه انه فرق السن بينكوا
كبير شويه
سألت "ريهام":
- ليه هو "كرم" عنده كام سنه ؟
- يعنى 37 او 38 فى الحدود دى
قالت "ريهام" بدهشه:
- وانتى عرفتى منين
- ايه يا بنتى مش كان زميل "أيمن" زوج "سماح" فى الكليه
- أه صحيح
ثم أردفت "ريهام":
- بس تعرفى شكله ميجبش 37 دى خالص .. شكله يدى أصغر
ثم هتفت فى مرح:
- وبعدين أصلاً البنات أنضج من الولد اللى فى سنها بـ 3 سنين ..
ضحكت "ياسمين" قائله:
- يا سلام .. طيب برده لسه الفرق كبير
أكملت "ريهام" بمرح:
- و "كرم" يدى بتاع 33 سنة .. نخصم منهم الـ 3 سنين النضوج بتوعى يبقى كده الفرق بينى
وبين "كرم" نفس الفرق اللى بين "سماح" و "أيمن" .. ونفس الفرق اللى بينك انتى و
"عمر"
قالت "ياسمين" بحدده:
- لو سمحتى يا "ريهام" متحطيش اسمى مع اسم "عمر" فى جملة واحده
ضحكت "ريهام" بشدة وقالت:
- تكرر يا "ياسمين" تكرر .. حاضر هبقى أخط بينكوا فاصله بعد كده .. أو أقولك نقطة ومن أول
السطر
قامت "ياسمين" وقذفتها بغيظ بالوسادة التى كانت تستند عليها

انتهى الإجتماع المنعقد للأطباء العاملين فى المزرعة مع كل من "عمر" و "كرم" و "أيمن"

... كان "عمر" طوال الإجتماع يختلس النظر الى "ياسمين" التي اختارت أبعاد مقعد للجلوس عليه .. انفض الإجماع فكانت أول من غادر القاعة .. وجدت صوت خلفها:

-دكتورة "ياسمين" لو سمحتي

نظرت خلفها لتجد "هانى" مرة أخرى قالت فى نفسها بتأفف (ياربى مش هنخلص)
ابتسم "هانى" قائلاً:

-ازى حضرتك عامله ايه ؟

قالت بنفاذ صبر:

-خير يا دكتور فى حاجة ؟

-أنا بس كنت عايز رقم والد حضرتك .. لان الأئسه "ريهام" اتكسفت تديهولى صممت "ياسمين" قليلاً لتتخير كلماتها ثم قالت:

-مفيش داعى انك تكلم والدى يا دكتور "هانى"

قال باهتمام:

-ليه يا دكتورة

قالت بشئ من التردد:

-يعني بصراحه .. كل شئ نصيب

-يعني ايه ؟

وجدت فجأة من يقول من خلفها بحده:

-خير يا دكتور فى حاجة ؟

لم تلتفت لأنها تعرفت على صاحب الصوت .. "عمر" .. ها هو يتدخل فى أمورها مرة أخرى .. شعرت بالحرق .. متى سيتوقف عن ذلك ويتركها وشأنها .. قال له "هانى" بحده:

-موضوع بيني وبين الدكتورة "ياسمين" يا بشمهندس

قال "عمر" بحزم:

-أى حاجة تخص "ياسمين" تخصنى أنا كمان

التفتت اليه "ياسمين" بحده .. كيف يخاطبها أمامه هكذا بدون لقب .. وكيف يقول أن ما يخصها يخصه .. لكن "عمر" لم يلقى بالألنظرة الغضب فى عينيها .. نظر اليه "هانى"

بسخرية قائلاً:

-ليه بأه كل اللي يخصها يخصك ؟

قال بهدوء:

-لأنى خطيبها

شهقت "ياسمين" بدهشة .. يا لجرنته .. بل يا لوقاحتته .. كيف يجرو على قول ذلك .. نظرت الى "هانى" قائله وكأنها تنفى عن نفسها تهمة ألصقت بها:

-لأ مش خطيبي

نظر اليها "عمر" قائلاً بحزم:

-لأ خطيبك

التفتت اليه بحده قائله:

-لأ مش خطيبي

-لأ خطيبك

شعرت "ياسمين" بسخافة فى الوضع الذى وصلوا اليه فغادرت مسرعه .. أما "عمر" فقد رمق "هانى" وعيد ثم غادر هو الآخر .. وقف "هانى" مذهولاً يضرب كفاً على كف قائلاً:

-شكلى وقعت فى مزرعة شوية مجانين

دخل "عمر" الى مكتبه وتبعه "كرم" ثم "أيمن" .. قال "كرم" فجأة:

-أنا مش طايق أشوف أدامى الزفت اللي اسمه "هانى شاكرا" ده
قال "عمر" بحدده:

-ولا انا طايق أشوفه فى المزرعة كلها
قال "كرم" بحدده:

-ما تطرده يا "عمر" ساكت عليه ليه

-هو بيشتغل هنا يا "كرم" عشان أطرده .. ده ابن عميل عندنا طلب انه يتدرب عندنا فى
المزرعة

قال "كرم" بانفعال:

-ما يشوفله أى خرابه تانية يغني فيها .. ده ايه الهم ده
سأله "أيمن" قائلاً:

-ليه عملك ايه عشان تضايق منه أوى كده ؟

قال "كرم" بضيق:

-أهو أنا كده مش طايقه من الباب للطاق
سأله "عمر":

-أكيد فى سبب

-من غير سبب .. لما بشوفه بحس انى عايز أديله ألم أخلى أفاه أدام ووشه وره
ضحك "عمر" و "أيمن" .. فقال "كرم" بضيق:

-بتضحكوا .. بكره آخر ما هزهق هعملها وهتشوفوا
ثم صاح فى حنق:

-ده واد غتيت

ثم قام وانصرف .. سأل "أيمن" ضاحكاً:
-ماله ده

ابتسم "عمر" قائلاً:

-والله ما أعرف يا ابنى

-طيب انت مضايق من "هانى" ليه عملك حاجه ؟

ظهرت علامات الضيق على وجه "عمر" وقال بحدده:

-كل شويه لأقيه واقف يتكلم مع "ياسمين" ولما أسأله يقولى حاجه خاصه بينى وبينها .. أما
خلاص قربت أعمل زى ما "كرم" كان بيقول من شويه

ضحك "أيمن" قائلاً:

-لأ ده انتوا الإتنين حالتكوا صعبه ميتسكتش عليها
ثم قام ليغادر قائلاً:

-أنا ماشى بأه .. أه على فكرة "ياسمين" معزومة بكرة عندنا على الغدا .. "سماح" عزماها
سأله "أيمن" باهتمام:

-لوحدها ؟

ابتسم "أيمن" قائلاً:

-أيوة لوحدها .. ايه عايز ايه

ابتسم "عمر" بخبث قائلاً:

-بصراحة الأكل البيتى وحشنى أوى

ضحك "أيمن" قائلاً:

-انت هتصيع عليا .. اخطف رجلك لحد بيت المزرعة تلاقى الحاجه "كريمة" عملاك أكل
.. هو فى زى نفس والدتك دى عليها أكل محصلش

ابتسم "عمر" قائلاً:

"أيمن" خليك جدع واعزمنى بكرة على الغداء
ضحك "أيمن" ثانية:

-يا ابني هتستفاد ايه .. حتى لو عزمتك هيبقى هما أعدين فى مكان .. واحنا أعدين فى مكان
تانى

-ملكش انت دعوة

-طيب .. هقول لـ "سماح" انك جاى

قال "عمر" بسرعة:

-بس متخليهاش تقول لـ "ياسمين"

ابتسم "أيمن": "

-أموت وأعرف هتستفاد ايه .. بس ماشى هريحك .. يلا سلام

-سلام

انصرف وترك "عمر" غارقاً فى التفكير.

كانت فى غرفتها "ياسمين" ساهره .. تقرأ احدى رواياتها عندما وجدت ورقة تُدس من تحت الباب .. قفزت من مكانها وأضاءت نور الغرفة .. كانت ورقة صغيرة حمراء اللون .. مطوية نصفين .. أمسكتها ثم أغلقت النور وارتدت اسدالها وفتحت باب الشرفة وخرجت لتتنظر منها .. ولدهشتها بعد لحظات وجدت "عمر" يخرج من باب المسكن .. ويسير فى اتجاه الطريق الذى فيه شجرتها .. كان يتهدى فى سيره وكأنه ليس فى عجلة من أمره .. خفق قلبها بشدة .. وأغلقت النافذة .. وأمسكت الورقة بين كفيها .. لا تجرؤ على فتحها .. لكن فى النهاية غلبها الفضول .. فتحت الورقة بيد مهتره قليلاً وبقلب متلهف كثيراً .. لتجد مكتوب فيها:

متى ستعرفى كم أهواك يا أملاً أبيع من أجله الدنيا وما فيها
لو تطلبي البحر فى عينيك أسكبه أو تطلبي الشمس فى كفيك أرميها
انا أحبك فوق الغيم أكتبها وللعصافير والأشجار أحكيها
انا أحبك فوق الماء أنقشها وللعناقيد والأقداح أسقيها
انا أحبك... حاولي أن تساعديني
فإن من بدأ المأساة ينهيها
وإن من فتح الأبواب يغلقها
وإن من أشعل النيران يطفئها

تسارعت نبضات قلبها الذى أخذ يرقص فرحاً لوقع تلك الكلمات عليه .. كانت تشعر وكأن قلبها نبت له جناحان وأخذ يرفرف بهما داخل صدرها .. كانت تشعر بأن الورقة التى فى يدها هى أعلى هدية حصلت عليها يوماً .. وأعلى مما تمنى الحصول عليه .. أعادت قرائتها مرات ومرات والإبتسامه على شفيتها .. مررت أصابعها على الكلمات تتحسسها وكأنها تريد حفرها فى قلبها للأبد .. لا تدرى الى متى وقفت تعيد قرائتها ببط ورويه .. طوتها وحضنتها فى كفها .. فتحت باب الشرفة مرة أخرى تنتظر عودته .. فبالتأكيد سيعود من نفس الطريق لكى يصل الى بيته .. وقفت قرابه النصف ساعه .. ثم لاح طيفه من بعيد .. فوقفتم تتخفى خلف الستاره حتى لا يراها .. ألقى "عمر" نظره على الشرفة فرجعت الى الوراء خشية أن يراها .. ثم أعادت النظر مرة أخرى لتجده يكمل طريقه الى بيت المزرعة همت بالدخول لولا أنها رأت خيال مقبل فى اتجاهه دققت النظر فوجدتها "ايناس" .. وقفت تراقب ما يحدث وهى مقطبة الجبين تقدمت "ايناس" من "عمر" ووقفت أمامه قائله بإبتسامه:

-كنت هربان فين ؟
قال "عمر" وهو يهم بالإصراف:
-كنت بتمشى شوية
أمسكت ذراعه لتوقفه .. شعرت "ياسمين" بالضيق وهي تراها ممسكة بذراعه على هذا النحو
دون أدنى اعتراض منه .. قالت "ايناس":
-استنى يا "عمر" عايزة أتكلم معاك شويه
قال بشئ من الضيق:
-مينفحش نأجل الكلام وقت تانى يا "ايناس"
قالت مبتسمة:
-لأ دلوقتي أحسن .. أنا شايفه ان المكان مناسب والوقت مناسب
نظر اليها باهتمام قائلاً:
-خير فى ايه
اقتربت منه ووضعت كفها على صدره .. فنقل نظره منها الى كفها ثم نظر اليها فى دهشه ..
فقال بصوت هامس:
-انا بحبك يا "عمر"
كان غضب "ياسمين" وصل الى ذروته .. وهي تراهما مقتربان من بعض الى هذا الحد .. دون
أى اعتراض منه .. دخلت وأغلقت باب الشرفة بعنف .. وصل الصوت الى "عمر" الذى التفت
بسرعة ينظر الى الشرفة الخالية .. سأل نفسه هل سمع حقاً باب الشرفة يُغلق أم أن الصوت
مصدره شيئاً آخر .. هل "ياسمين" من فعلت ذلك .. هل استيقظت .. هل قرأت ورقته .. هل
خرجت الى الشرفة لتراه .. كان يسبح فى بحر الأسئلة عندما أخرجته "ايناس" من شروده
وهي تمسك بذراعه لتجعله يلتفت اليها قائلة:
" -عمر" مردتش عليا
التفت "عمر" لينظر اليها وكأنه نسي وجودها قائلاً بحده:
" -ايناس" ايه اللي انتى بتقوليه ده
نزع ذراعه من يدها .. وتركها وغادر المكان .. زفرت بضيق ونظرت بحقد الى الشرفة التي
خمنت أنها لغرفة "ياسمين" ثم أعادت أراجها الى بيت المزرعة.
استيقظت "ريهام" على صوت غلق باب الشرفة وأضاءت النور قائلة:
-خير فى ايه .. انتى اللي رزعتى الباب كده ؟
لم تجبها "ياسمين" .. نظرت اليها "ريهام" فوجدت علامات الغضب على وجهها فسألتها
بلهفه:
-فى ايه يا "ياسمين" ايه اللي حصل
التفتت لها "ياسمين" بأعين دامعه وقالت:
-فى ان أختك غبية جداً .. ومبتعلمش من أخطائها ..
انهمرت عبرة على وجنتها فقامت "ريهام" واقتربت منها قائلة صوت حانى:
-مالك ايه اللي حصل ؟
قالت لها "ياسمين" برجاء:
" -ريهام" مش قادرة أتكلم أرجوكى .. بس عايزة منك حاجة واحدة بس
-قولى يا حبيبتي
قالت بمراره:
-مش عايزاكى تجيبى سيره "عمر" أدامى أبداً .. مش عايزه أسمع أى حاجة عنه .. ولا حتى
أشوفه .. لحد ما أقدر أفنع بابا اننا نمشى من هنا
قالت "ريهام" بقلق:
-طيب قوليلى فى ايه ؟

انحدرت دمعة أخرى على وجهها وقالت:
- فى انه واحد فاضى وبيلعب فى كل حته شويه .. بس أنا مش هكون لعبة فى ايده .. أنا
مشاعرى أعلى من انى أديها لواحد زيه
قالت ذلك وتوجهت الى الباسكيت الموضوع فى أحد أركان الغرفة وأطبقت على الورقة فى
قبضة يدها وألقت بها فى الباسكيت .. ثم دخلت الحمام وأغلقت الباب ورائها .. ذهب "ريهام"
والتقطت الورقة التى رمتها "ياسمين" .. فتحتها وقرأتها .. ثم طوتها ووضعتها فى أحد
الأدراج وهى تتنهد فى حسره.

الفصل الثلاثون

لم تستطع "ياسمين" النوم طوال الليل ظلت تفكر فيما رآته يوم أمس .. كان أكثر ما تخشاه هو أن يتم خيانتها للمرة الثانية .. وكل ما تراه من "عمر" يشعرها بالخوف والرغبة فى الهرب .. حياته مختلفه عن حياتها .. أفكاره مختلفه عن أفكارها .. حتى مبادئه وقوانينه وحدوده مختلفه تماماً عنها .. كانت تعلم أنه أعلن حرب ضاربه عليها .. وأنه مصمم أن يكسبها ويفز بقلبها .. لكنها ستواجهه وتحاربه وتجبره على أن يعود صفر اليدين .. يجر أذيال الهزيمة .. ستعلم أنها ليست كغيرها .. ان أراد أن يتسلى فليبحث عن غيرها .. لأن قلبها ومشاعرها أعلى من أن تهدرهم مع رجل يريد خوض تجربته معها وتذوق شئ مختلف عما اعتاده .. نهضت من فراشها وهى مصممه على مواجهته .. وألا تدع له أى سلطان على قلبها ومشاعرها .. توضأت وصلت الضحى ثم ارتدت ملابسها وذهبت الى عملها

..أنهت "ياسمين" عملها بالمزرعة واتصلت بـ "سماح" تخبرها بأنها أنهت عملها مبكراً وبأنها ستأتى لها الآن .. وأخبرتها "سماح" أنها بانتظارها .. التفتت "سماح" الى زوجها قائله:

-هى جايه وفكره ان انت مش موجود .. وطبعاً ما قولتلهاش ان "عمر" كمان هيكون موجود قال "أيمن": "

-كويس كده

سألته "سماح" باستغراب:

-نفسى أفهم "عمر" هيستفاد ايه من كده .. يعنى احنا أصلاً هنعد فى مكان وانتوا فى مكان ابتسم "أيمن" قائلاً:

"-سماح" .. "عمر" بيحبها وبيموت فيها .. وهى مش مدياله أى فرصه .. فمجرد وجوده فى المكان اللى هى موجوده فيه أكيد ده شئ يسعده سألته "سماح" بشك:

-هو بجد "عمر" بيحبها ؟

قال "أيمن" مؤكداً:

-أيوه يا "سماح" .. بيحبها

تنهدت "سماح" فى حيره قائله:

-أنا مبقتش عارفه حاجه .. ربنا يبسرلها الخير .. لأنها مش حمل حد يجرحها أو يلعب بيها كفايه أوى اللى شافته لحد دلوقتى قال "أيمن" بثقه:

-أنا واثق ان "عمر" بيحبها .. وهيعوضها عن كل اللى هى شافته فى حياتها .. هى بس توافق عليه وأنا واثق انها مش هتندم

بعد قرابة النصف ساعة أتت "ياسمين" .. أدخلتها "سماح" فى غرفة صغيرة بجانب المطبخ تحتوى على أريكة وتلفاز .. وجلستا معاً .. أغلقت الباب عليهما قائله :

"-أيمن" بره وفى واحد صاحبه معزوم على الغدا قالت "ياسمين" بحرج:

-طيب ما قولتلش ليه كنت أجلتى عزومتى أنا ليوم تانى

-لأ وأنا مالى ومالهم أصلاً كده أحسن كنت هبقى أعده لوحدى .. أدينا أعيدين نسلى بعض .. يلا قومى ساعدينى

دخلت "ياسمين" مع "سماح" المطبخ .. قالت "ياسمين": "

-ايه المكرونة واللبن ده انتى ناوية تعملى ايه ؟

قالت "سماح": "

- عايزة أعمل مكرونة بشاميل جمب الأكل

قالت "ياسمين" باستغراب:

- ما شاء الله ايه كل الأكل ده يا "سماح" انتى عازمة جيش

ضحكت "سماح" قائله:

- يا سنى اللى يتبقى أشيله فى الفريزر أهو ينفع وقت ما الواحد يبقى طالبه معاه كسل

- طيب أساعدك فى ايه

اقترحت "سماح" قائله:

- انتى بتعملى المكرونة بالشاميل تحفة .. اعملبها انتى وأنا أسوى الفراخ

عملت الفتاتان معاً .. الى أن رن جرس الباب .. فتح "أيمن" .. كانت "ياسمين" تعد السلطة ..

تسمرت فى مكانها عندما سمعت "أيمن" يقول:

- اتفضل يا "عمر"

وما هى الا لحظات حتى سمعت صوته بالخارج .. نظرت الى "سماح" بدهشة .. فقالت

"سماح" معتزده:

- هما اللى طلبوا منى انى مجيش سيره

قالت "ياسمين" باستغراب:

- مش فاهمة .. هو فاكر اننا هنعد ناكل مع بعض

قالت "سماح" بسرعة:

- طبعاً لأ .. هو عارف نظام بيتنا

تذكرت "ياسمين" ما حدث الليلة الماضية ووقوفه مع "ايناس" واقترابه منها الى هذا الحد ..

فعاودها غضبها من جديد .. لاحظت "سماح" تقطيبها لجبينها فسألته قائله:

- انتى مضايقه انى ما قولتكيش ان "عمر" جاى ؟

هزت "ياسمين" رأسها نفيماً قائله:

- لا مش كده

- أمال ايه ؟

نظرت "ياسمين" اليها قائله:

- نجهز الأكل وأحكيلك

جهزت "سماح" الطعام على السفرة .. رفضت "ياسمين" مساعدتها .. كانت تريد أن تقطع

عليه أى طريق للتواصل .. إذا كان يمنى نفسه اليوم برويتها والتحدث معها خارج المزرعة

فسوف تجعله يعود بخفي حنين .. التفت الصديقتان حول طاولة طعام صغيره فى المطبخ ..

والتف الصديقتان حول طاولة الطعام فى حجرة السفرة .. نظر "عمر" الى الطعام قائلاً:

- ما شاء الله دى وليمه

ابتسم "أيمن" قائلاً:

- احنا عندنا أعز منك يعنى .. وبعدين مش انت قولت انك نفسك فى الأكل البيتي ولا كان كلام

فى الهوا

ابتسم "عمر" وعندما هم بتناول الطعام .. لمعت عيناه بخبث ونظر الى "أيمن" قائلاً:

- هى "ياسمين" ساعدت "سماح" فى تحضير الأكل ؟

قالت "أيمن" وهو يبدأ فى تناول طعامه:

- أيوة هما مع بعض من الضهر فى المطبخ

ابتسم "عمر" بخبث قائلاً:

- طيب اسأل "سماح" ايه الأكله اللى "ياسمين" عملها بإيدها ؟

ضحك "أيمن" قائلاً:

- نعم يا أخويا

قال "عمر" بجديه:

"-أيمن" قوم اسألها
نهض "أيمن" ونادى "سماح" خرجت من المطبخ فسألها مبتسماً:
-هي "ياسمين" عملت ايه فى الأكل ده
نظرت اليه مندهشه وقالت:
-اشمعنى يعني
-قولى بس
-عملت المكرونة بالبشاميل
-ساعدتيها فيها ؟
-لأ .. قولى اشمعنى
ابتسم قائلاً:
-معرفش "عمر" عايز يعرف
ضحكت بصوت خافت قائله:
-صحبك ده غريب
عادت "سماح" مبتسمة وجلست مرة أخرى على الطاولة سألتها "ياسمين" بفضول:
-فى حاجه ؟
ابتسمت "سماح" بخبث قائله:
-معرفش .. "عمر" ببسأل ايه الأكله اللي انتى عملها
قالت "ياسمين" باستغراب:
-اشمعنى يعنى .. وهو ماله
ضحكت "سماح" قائله:
-أنا أعرف يختى
عاد "أيمن" قائلاً:
-عامله المكرونة بالبشاميل يا سيدى .. ارتحت
ابتسم "عمر" قائلاً وهو يزيح الطبق من أمام صديقه ويضعه أمامه:
-تمام .. يبقى المكرونة اتصادرت يا باشا
ضحك "أيمن" قائلاً:
-نعم يا اخويا .. أنا عايز أكل مكرونة
-ابقى خلى مراتك تعملهاك
-والله انت بتهرج
قال "عمر" بجديه:
-ومش بس كده .. باقى صنيه المكرونة تتلف عشان هاخدها وأنا ماشى
ضحك "أيمن" قائلاً:
-صدق الواد "كرم" .. الحب بهدله فعلاً
-طب كل وانت ساكت
انتهى الجميع من تناول طعامهم .. أزاحت "سماح" الأطباق من السفرة وقالت لـ "أيمن" الذى
كان يغسل يديه فى الحمام:
-الأكل زى ما هو .. "عمر" مكلش حاجه
ابتسم "أيمن" بخبث قائلاً:
-مرضاش ياكل إلا مكرونة بالبشاميل .. وممدش ايده على حاجه غيرها
ضحكت "سماح" بصوت خافت فأكمل "أيمن":
-وبيقولك لفى باقى الصنية عشان هياخدها معاه وهو ماشى
ازدادت ضحكات "سماح" ودخلت المطبخ نظرت الى "ياسمين" التى ابتسمت وهى تنظر اليها
بدهشه قائله:

-ما تفرحينا معاكى
قالت "سماح" بإبتسامه:
-والله الراجل ده مجنون
-مين ؟
" -عمر"
قالت "ياسمين" بلا مبالاة:
-ليه يعني
نظرت اليها "سماح" بخبث قائله:
-البشمهندس مرضاش ياكل غير الأكله الوحيدة اللى حضرتك عملاها بإيدك
احمرت وجنتا "ياسمين" وتلاشت النظر الى صديقتها .. فأكملت "سماح" بخبث:
-وكمان طالب باقى الصنية مش هيسمح لحد فينا يمد ايده عليها ومرضاش يخلى "أيمن"
ياكل منها
هتفت "ياسمين" قائله وقد احمرت وجنتاها بشدة:
-بيهرج ده ولا ايه
ثم غيرت الموضوع قائله:
-يلا نعمل الشاى
كانت تشعر بداخلها بالحنق الشديد .. لأنه يستطيع وبطرقه الغريبه أن يلمس أوتار قلبها على
الرغم من السدود والأسوار التى تبنيها حوله .. على الرغم من قرارها هذا الصباح .. إلا أنها
لم تستطع ان تنكر أنها تشعر بسعاده خفيه مما فعل

-يعني ايه وافقتي ؟
قالت "ثرى" هذه العبارة بحده وهى جالسه فى الصالون مع "كريمه" يحتسيان الشاى الساخن
.. قالت "كريمه": "
" -عمر" راجل يا "ثرى" منقدرش نفرض عليه مين يتجوزها ومين ميتجوزهاش
تركت "ثرى" كوب الشاى من يدها قائله بغضب:
-يعني انتى موافقه ان ابنك يتجوز البنت دى ؟ .. ابنك اللى تعبتى فى تربيته وتعليمه لحد ما
وصل للمركز اللى هو فيه آخره صبرك تبقى واحدة زى دى لا ليها أصل ولا فصل وكمان
متجوزه قبل كده
قالت "كريمه" بحزم:
-طالما "عمر" اختارها عشان تكون زوجه ليه .. يبقى أكيد هى بنت كويسة .. وأنا ميهمنيش
أبدأ اذا كانت غنية أو فقيرة
ابتسمت "ثرى" بسخريه قائله:
-طبعاً ميهمكيش .. انتى بالذات ميهمكيش وأنا وانتى عارفين السبب
شعرت "كريمه" بالحنق وقامت لتغادر المكان وعينا "ثرى" تتبعها بنظرات ساخره .. أمسكت
كوب الشاى مرة أخرى .. ورشفت رشفه ثم قالت لنفسها بتصميم:
-أنا هعرف ازاي أمنع الجوازه دى .. وأرميها هى وأهلها بره المزرعة
ظلت تفكر وتفكر حتى تولد فى عقلها فكرة خبيثه
"عود كبريت مشتعل وسيجاره مشتعل بجوار الاسلاك العارية كافي لاشعال النار فى المكان
وتحويله الى رماد"

سألت "سماح" "ياسمين" وهما جالستان معاً يتسليان بأكل اللب والسودانى:

-ها ماقولتيش ايه اللي كان مضايكك وانتي فى المطبخ وقولتيلي هحكلك بعد ما نجهز الغدا
تنهدت "ياسمين" ولم تجب .. قالت "سماح": "
-ايه هو الموضوع صعب للدرجة دي
نظرت اليها "ياسمين" قائله بأسى:
" -عمر" ابارح جه عندي أوضتى وسبلى ورقة من تحت الباب
ابتسمت "سماح" قائله:
-بجد؟

أكملت "ياسمين" وعلامات الحزن باديه على وجهها:
-أيوه .. عرفت انه هو لاني فتحت البلكونه وشوفته
سألته "سماح" بلهفه:
-فين الورقة معاكى؟ وريهالى
قالت "ياسمين" بحده:
-رميتها فى الزباله
اندهشت "سماح" قائله:
-ليه؟ .. طب قريتها طيب؟
قالت "ياسمين" بحرج:
-أيوه قرتها وكنت هحتفظ بيها كمان .. كان فيها شعر
ابتسمت "سماح" قائله:

-مكنتش أعرف انه رومانسي كده
التفتت اليها "ياسمين" بحده قائله:
-لأ ده رومانسي أكثر مما تتوقى .. لدرجة ان الرومانسيه بتدلق منه وهو ماشى وتغرق أى
بنت تيجي جمبه
قالت "سماح" بإستغراب:
-قصدك ايه؟

ظهرت علامات الحزن مرة أخرى على وجه "ياسمين" قائله:
-امبارح بعد ما قرئت الورقة .. استنيتته فى البلكونه .. لانه مشى فى طريق غير طريق بيته ..
وبعد ما رجع لقيت بنت عمته جايه نحيتها ووقفوا سوا .. ودمى اتحرق يا "سماح" حسيت انى
غبية انى اتأثرت بالكلمتين اللى كتبهملى
-ليه؟ .. كانوا واقفين بيتكلموا عادى أكيد
قالت بحده:

-لأ مش عادى .. واقفين بمنتهى قلة الأدب .. ومقربين من بعض جدا .. شوية شوية كان
هيحضنها .. والله أعلم أصلاً حضنها ولا لأ أنا دخلت بسرعة ورزعت الباب ورايا
زفرت "سماح" قائله:
-المشكلة انه مش عارف انه بيعمل تصرفات تضايكك .. هو بيتصرف كده لانه اتربى ان ده
عادى وانها زى أخته والكلام العبيط ده
احتدت "ياسمين" قائله:

" -سماح" انتى مشفتيهمش امبارح .. مكنتش أبداً واقفة واحد مع اخته .. بقولك شوية وكان
هيحضنها
ثم أكملت بصرامة:

-إذا كان بالنسبة له الأمور دي عادى يبقى ميلزمنيش .. ده واحد أصلاً مش عارف يفرق بين
الحلال والحرام .. وعمال سايح مع كل واحده شويه .. ملوش أى حدود ولا أى خطوط حمرا ..
واحد زى ده سهل عنده أوى انه يخون .. ويقع فى الغلط .. لأن حياته أصلاً غلط .. وتجاوزاته
مع البنات لا تعد ولا تحصى .. ده غير أصلاً ان فى بنات راميه نفسها عليه .. يعنى ده واحد

الحرام أدامه عيني عينك كده وعلى طبق من فضه .. لو مفيش خوف من ربنا فى قلبه ..
وحدود بينه وبين البنات .. يبقى ايه يضمنلى انه ما يخونيش .. مفيش فرق بينه وبين
"مصطفى" .. هما الاتنين بيستحلوا حاجه حرام .. وبيكابروا فى الغلط
صمتت قليلاً ثم أكملت قائله بسخرية:
-ده غير بأه انى كل شوية ألقى حد من عيلته ناطط أدامى .. وبيتعاملوا معايا بكل غرور ..
أكنى واحده من الشارع .. أكنى راميه نفسى عليه زى البنات اللى يعرفها
سألت "سماح" باهتمام:
-حد كلمك تانى غير عمته ؟
قالت "ياسمين" بسخرية:
-أيوة بنت عمته .. اللى اسمها "ايناس" .. اللى كانت واقفه معاه امبارح .. وقال ايه بتقولى
أنها حب الطفوله والمراهقة بالنسبة للبشمهندس
صمتت قليلاً ثم قالت بغضب مكتوم:
-خليها تشبع بيه
حاولت "سماح" التخفيف عنها قائله:
-طيب خلاص متضايقيش نفسك .. ولو حد فيهم حاول يكلمك بعد كده متعبريهوش
نهضت "ياسمين" ولفت حجابها وقالت لـ "سماح" وهى تحمل حقيبتها:
-أنا همشى بأه يا "سماح"
قالت "سماح" برجاء:
-خليكي أعده شوية يا "ياسمين" .. "أيمن" أعد مع "عمر" وأنا هفضل أعده لوحدى
قالت "ياسمين" بأسف:
-معلش يا حبيبتي نفسى أعد معاكى أكثر .. بس انتى عارفه بخاف أمشى بالليل خاصة انه
طريق سفر
-فعلاً معاكى حق .. خلى بالك من نفسك وطمنين لما توصلى
قبلتها "ياسمين" وخرجت مسرعه دون أن تنظر للرجلان الجالسان فى الصالون .. أغلقت
الباب خلفها فنهض "عمر" قائلاً:
-يلا أشوفك بكره
ابتسم "أيمن" قائلاً:
-متعد شويه يا ابنى
توجه "عمر" للبواب قائلاً:
-زهقت منك .. يلا سلام
فتح "عمر" الباب ثم أغلقه مرة أخرى والتفت الى "أيمن" قائلاً:
-فين صنيه المكرونة بتاعتي
نظر له "أيمن" بدهشة قائلاً:
-انتى هتاخدها بجد
قال له "عمر" بجديه وعيونه تلمع من المرح:
-أمال هسيبهالك .. يلا هاتها
دخل "أيمن" ليجد "سماح" التى كانت تستمع الى الحوار تمد يدها بالصنية المغلفة وهى
تحاول كتم ضحكاتهما .. عادر "أيمن" اليه وهو يضحك قائلاً:
-والله أنا أول مرة أشوف ضيف يجبر صاحب البيت انه يعزمه على الغدا .. ومش بس كده لأ
ياخد باقى الأكل معاه وهو مروح
ابتسم "عمر" قائلاً:
-خلاص هتدلىنى .. عليا ليك عزومة ان شاء الله
حمل "عمر" الصنية ونزل بسرعة .. رأى "ياسمين" واقفه تنتظر سيارة أجره .. فأسرع الى

سيارته ووضع فيها ما يحمله .. نظرت اليه "ياسمين" بدهشة قائله في نفسها (معقول خد الصنيه وهو نازل ده يبقى مجنون رسمي) .. أوقفت التاكى وركبت ثم ولدهشتها .. وجدت "عمر" يفتح الباب الأمامى ويأمر السائق أن ينطلق .. أجمتها المفاجأة .. كان يعلم أنها ذاهبة الى موقف الدراسات لتركب سيارة أخرى الى المزرعة فاخبر السائق عن نفس المكان الذى ستذهب اليه .. وبهذا سار السائق فى طريقه .. كانت "ياسمين" تحاول استيعاب ما يفعله .. ولماذا يفعله .. اما هو فظل ينظر اليها فى المرآه الجانبيه وهو يبتسم بين الحين والآخر .. لكنها تحاشت النظر فى هذا الإتجاه تماما حتى لا تتلاقى عيناها بعينيه .. وصلا الى الموقف .. نزلت "ياسمين" لتبحث عن سيارة متوجهه الى مكان المزرعة .. وجدت بسهولة ركبت فى المقعد خلف السائق .. ولدهشتها للمرة الثانية وجدت "عمر" يصعد ليركب بجوارها .. نظرت اليه بدهشة ممزوجه بالغضب .. لكنه قابل نظرة الغضب فى عينيها بنظرة مرحة وابتسامه عذبه .. التفتت لتتنظر الى النافذة وصممت أن تنظر منه طوال الطريق وألا تلتفت الي "عمر" أبداً .. وضعت حقيبتها بينهما .. أخذ ينظر الى الحقيبة ثم اليها .. نظرت اليه بتحدى .. فنظر اليها بمكر .. ووجدته يميل عليها قليلاً ويهمس قائلاً:
-لو بتعلمى كده مع اى حد يركب جمبك .. فدى حاجه تبسطنى

التفتت لتتنظر الى النافذة دون أن ترد عليه .. اكتمل العدد وانطلق السائق فى طريقه .. لم يعتاد "عمر" بالطبع على ركوب المواصلات العامة .. لذلك كان يجهل أن المعقد الذى اختاره تحديداً هو أسوأ موضع فى السيارة لأن الراكب فى هذا المقعد تصبح عليه مهمة اعطاء الأجره من الركاب الى السائق وباقى المال يعيده الى الركاب .. كل دقيقتين يجد من يربت على كتفه ليعطيه الأجره وينتظر الباقي .. شعر بالحنق والضيق .. أما "ياسمين" فكانت سعيدة للغاية عندما التفتت اليه ورأت علامات الضيق على وجهه .. شعرت بأنها انتقمت منه بطريقه ما .. نظر اليها ليجدها تنظر الى الشباك مبتسمه .. فابتسم وأمال برأسه تجاهها قائلاً بهمس:
-فداكى .. المهم انى أعد جمبك

تلاشت ابتسامتها .. وخفق قلبها .. تبال لك أيها القلب الذى لا تكاد تسمع صوته حتى تقفز ثائراً معلناً عن عصيانك لأوامري .. ظلت تنظر من الشباك .. بعد دقيقه أمال رأسه مرة أخرى قائلاً:
-تسلمي ايدك المكرونة عجبنتى أوى .. مكنتش أعرف انك شاطره كده
لم تبدى أى رد فعل فأكمل قائلاً:

-عرت ان حد ياكل منها غيري عشان كده خدتها معايا .. سبتها فى العربية
حاولت قدر الإمكان أن تصم أذنها عن كلماته .. وألا تتأثر بما يقول .. صمت قليلاً ثم أتاها صوته بشئ من الألم:

-نفسى أفهم حاجه واحده بس .. انتى ليه رفضانى
قطبت جبينها وهى تتذكر الأسباب الكثيرة التى تجعلها ترفضه
حثها قائلاً:

-مش هتريحينى وتعرفينى السبب ؟
صممت ولم تجب .. أتى مكان نزولهما .. نزل أولاً ثم نزلت "ياسمين" كانت متوجه الى البوابه عندما اعترض طريقها قائلاً حزم:

-مش هسيبك تعدى إلا لما تقوليلى سبب واحد لرفضك ليه
نظرت اليه بدهه وحاولت المرور لكنه سد عليها الطريق نظرت اليه غاضبه وقالت:
-لو سمحت عديني .. ميصحش اللى انت بتعمله ده
قال بتصميم:

-أسمع سبب واحد وساعتها هعديكي
قالت بتحدى:

-مش هتكلم
قال بتحدى مماتل:
-مش هعديكي
زفرت ونظرت حولها .. لم تجد من ينقذها من هذا المأذق .. قال "عمر" بنفاد صبر:
-ها .. هنفضل واقفين كده كتير
ثم قال بخبث:
-وبعدين لو حد من جوه المزرعة شافنا واقفين مع بعض أكيد هيقولوا الموضوع فيه ان ..
وانتى عارفه الناس هنا مبيتسكتش
نظرت اليه بغضب قائله:
-طيب عديني
قال ببرود:
-قوليلي سبب واحد وأنا اعديكي
صمتت قليلا ثم قالت بحده:
-أنا وانت مننفعش لبعض لمليون سبب
قال بنفس البرود:
-اديني سبب واحد من المليون سبب دول
عضت على شفتيها ثم نظرت اليه قائله:
-انت فى طريق غير اللي أنا ماشية فيه .. فى مليون اختلاف بينى وبينك
ثم قالت بحده:
-ممكن بأه تعديني
صمتت قليلاً ثم قال:
-هساعدك انك توصلى للطريق اللي أنا فيه وتمشى معايا فيه
قالت بحزم وكان كلامه أهانها:
-أبدأ .. متمناش أبداً أنى أمشى فى الطريق اللي انت ماشى فيه
تأملها قليلا .. قالت فى نفسها لقد أغضبتة الآن .. ولن يعاود التفكير فيها مرة أخرى .. حسناً
هذا ما أردته .. وقد حصلت عليه .. أتاها صوت "عمر" الحانى وابتسامته العذبة لتصددها
قائلاً:
-لو انتى مش عايزة تمشى فى طريقي .. أنا هوصل للطريق اللي انتى فيه .. وأمشى معاى
فيه .. المهم عندى اننا نكون سوا
عانقها بعينيه للحظة قبل أن يبتعد جانباً ليفسح لها الطريق .. مشت ودخلت من البوابه .. وقبل
دخولها ألقى عليه نظرة وهو يعاود أدراجه ليحضر سيارته التى تركها

-مممممم نفسها فى الأكل حلو أوى .. لأ كده انا اطمنت عليك
قالت "كريمه" هذه العبارة لابنها وهما جالسان معاً على طاولة فى المطبخ
ابتسم "عمر" قائلاً:
-كويس أول الطريق خطوه .. دلوقتى حبيتى أكلها بكره تحبها
ابتسمت "كريمه" قائله:
-بس انت رهيب يا "عمر" حد يتعزم عند واحد صحبه ويأخذ باقى الأكل وهو نازل
ضحك "عمر" بشدة قائلاً:
-نفس اللي قالهولى "أيمن"
قالت "كريمه" فى سرور:
-ربنا يسعدك يا حبيبي وينولك اللي فى بالك

قبل "عمر" يدها قائلاً:

-يارب يا ماما

فى صباح اليوم التالى وقفت "كرم" على باب مكتب "ريهام" .. "كان قد تحاشى الذهاب الى العمل ورويتها منذ أن انفعلت عليه فى مكتبه بسبب كلماته .. وقف أمام المكتب فنظرت اليه ثم عادت عملها فى صمت .. تنحنح وشعر بالحرج قليلاً هو يقول:
-أنا أسف على الكلام اللي قولتهولك آخر مرة فى مكتبي
نظرت اليه صامته .. فأكمل قائلاً:

-أنا مكنش قصدى أهينك أو أجرحك .. وأنا عارف وواثق انك بنت محترمه .. وفعلاً كلامى مكنش يصح أقولتهولك

أومات "ريهام" برأسها ثم عاودت مزاوله عملها:

تفرس فيها "كرم" قائلاً:

-يعني خلاص سمحتيني؟

نظرت اليه قائله:

-خلاص محصلش حاجه

ابتسم وقال قبل أن يغادر .. مستنى البريد فى مكتبي

أحضرت "ريهام" البريد وهى تبتسم فى نفسها

فجأة سمع الجميع أصوات هرج ومرج .. خرجت "ياسمين" من مكتبها لتستطلع الأمر .. وجدت أعد العمال يجري فى اتجاه .. وعامل آخر قادم مهول من نفس الطريق فأوقفته "ياسمين" قائله:

-لو سمحت .. ايه اللي حصل ؟

قال الرجل وهو يلهث :

-عامل ايده اتحشرت فى ماكنه طحن الحروب .. جه البشمهندس "عمر" يساعده قامت

الماكنه طايله ايده هو كمان

أصاب "ياسمين" الفزع وشعرت بقلبها يهوى على الأرض .. أسرع "ياسمين" فى اتجاه مخزن الأدوية وأحضرت شنطة الإسعافات الأولية .. ثم ذهبت مسرعه فى الإتجاه الذى ذهب فيه العامل .. رأت عدة عمال متجمعين خارج المبنى وأحد العمال يقف على الباب يمنعهم من الدخول .. أسرعت وصرخت فيه قائله:

-عديني بسرعه

أفسح الرجل لها الطريق دخلت لتجد رجل نائم على الأرض وحوله رجلين .. بحثت بنظرها عن "عمر" فلم تجده .. ذهبت اليهم لتجد يد الرجل فى حاله يرثى لها .. فلقد أجهزت الماكينه على كفه .. والرجل فقد وعيه من شدة الألم .. خفق قلبها بقوة ترى ماذا أصاب "عمر" وأين هو الآن .. هل أصيب مثله .. جثت بجوار الرجل الفاقد الوعي وأخرجت من الحقيبته التى تجملها قماشة طويلة ربطت بها رسغه بقوة لكى تقلل من الدم الذى يفقده .. قال لها أحد الرجلين مش هتربطينى كف ايده اللي بتنزف دى .. نظرت اليه قائله:

-لأن عظم كف ايده كله مكسور المفروض ميتحركش لحد ما الإسعاف تيجي تشيله زى ما هو كده

ثم قالت بلهفه:

-فين البشمهندس "عمر" ؟ .. جراه حاجه ؟

سمعت حركة خلفها نظرت لتجد "عمر" .. وقفت فى هلع وهى تنظر الى قميصه الأبيض الذى صبغ باللون الأحمر الدامى .. كان يمسك قطعه قماش ويضغط بها على كفه .. هتفت قائله بصوت مرتجف:

-انت كويس؟

نظر اليها يتأمل الخوف واللهفة على وجهها .. ونظرات عينيها الدامعه والتي تنتقل بسرعة ولوعه بين وجهه وكفه .. قال بصوت خافت:

-متخفيش

ازداد لمعان الدموع فى عينيها وكررت سؤالها وكأنها لم تسمع اجابته:

-انت كويس؟ .. ايدك حصلها حاجه؟

أزاح "عمر" قطعة القماش ليريها جرحاً صغيراً فى يده .. ونظر اليها قائلاً:

-الحمد لله ربنا سترها معايا ..

نظرت الى قميصه المبلل بالدماء وهى مازالت بعد تحت تأثير الصدمة وقالت:

-أمال ايه الدم اللى على قميصك ده

أجابها قائلاً:

-ده مش دمي .. ده دم العامل اللى اتصاب

فى تلك اللحظة حضرت سيارة الإسعاف ونقلوا العامل اليها وأمر "عمر" رجلين من رجاله

بالذهاب مع العامل الى المستشفى ومتابعته بتفاصيل حالته

تعالت صوت سرينه سيارة الإسعاف وهى تبتعد لتغادر المزرعة التفت "عمر" الى "ياسمين"

مرة أخرى يتفرس فى وجهها ويراقب كل خلجاته .. قالت له "ياسمين" وهى تحاول استجماع

شئنا نفسها:

-لازم تطهر الجرح وتربطه .. متستهونش بيه

لمعت عيناه وابتسم لها قائلاً بصوت هامس:

-خايفه عليا؟

تحاشت النظر اليه وقالت:

-أنا هروح أكمل شغلى .. بعد اذنك

أوقفها قائلاً:

-عارفه .. أنا كنت بدأت أياس .. وأحس انى مش ممكن هعرف أخليكي تحبيني

ثم ابتسم قائلاً:

-بس أنا دلوقتى اطمنت

شعرت بأن وجنتيها سارتا جمرتين مشتعلتين ونظرت اليه قائله بتوتر وبصوت مرتجف تدافع

عن نفسها:

-لو كان أى حد مكانك كنت هفلق برده أما أشوف قميصه غرقان دم كده .. يعنى مش حاجه

خاصه بيك انت

أخفض رأسه قليلا ونظر فى عينيها مباشرة قائلاً:

-أنا مش صغير يا "ياسمين" .. أنا عارف كويس ايه اللى أنا شوفته فى عينيكي

شعرت بالإرتباك .. خفضت بصرها ثم سارت فى اتجاه الباب .. التفت "عمر" اليها قائلاً

بصوت عالى:

-أيوة .. اهربي العادة

كانت بالفعل تعلم أنه محق .. محق فى الأمرين .. محق فيما رآه فى عينيها .. ومحق فى أنها

تهرب.

ذهب "عمر" فى اتجاه بيت المزرعة ليجد أمه مقبله عليه تهتف فى لوعه:

"-عمر" ايه اللي حصل .. ايه الدم ده

نظرت الى يده هاتفه:

-مالك يا ابني ايه اللي حصل

مسح "عمر" على كتفها وطمأنها قائلاً:

-متحفيش عليا أنا كويس ده جرح بسيط

هتفت فى لوعه:

-جرح بسيط أمال ايه الدم ده ؟

قال شارحاً:

-ده دم العامل اللي اتصاب كنت بحاول أطلع ايده اللي اتحشرت فى الماكنه

قالت "كريمه" بقلق:

-وهو فين دلوقتي

قالت "عمر" بأسى:

-الإسعاف جم خدوه من شوية .. وأنا هطلع بس آخد شاور وأغير هدومي وأروحله على هناك

دخل "عمر" البيت ثم سعد الى غرفته .. دخلت "كريمه" البيت جلست على أحد المقاعد تلتقط

أنفاسها وتهدى من روعتها ثم سعدت الى غرفة "ثريا" التي كانت تجلس مع "ايناس"

لتخبرهما بما حدث .. نهضت "ايناس" وطرقت باب غرفة "عمر" .. كان قد انتهى من ارتداء

ملابسه .. فتح الباب ليجد "ايناس" أمامه .. سألته قائله بصوت ناعم:

"-عمر" انت كويس .. ايه اللي طنط بتقوله ده

قال "عمر": "

-محصلش حاجه .. الحمدلله

قالت "ايناس" بعتاب:

-وانت مالك ومال العامل .. كنت تخلى أى حد من الرجاله الموجودين يساعده .. افرض كانت

الماكنة ضيعت ايدك انت كمان

قال "عمر" بنفاد صبر وضيق:

-يعني أطلب من الرجاله الواقفين انهم يساعده وأنا مش راجل يعنى ؟ .. أقف أفرج عليهم ؟

حاولت امتصاص غضبه قائله بصوت ناعم:

-أنا بس كنت خايفه عليك .. أول ما سمعت من طنط جيت على طول أظمن عليك

تمتم "عمر": "

-شكراً يا "ايناس"

أمسكت يده المصابه قائله:

-مش هتروح للدكتور يشوفهاك

نزع يده من يدها قائلاً:

-ان شاء الله .. يلا سلام

ثم نزل مسرعاً وتوجه الى المستشفى التي أخذوا العامل اليها .. استقبله أحد الرجال الذين

ذهبوا فى سيارة الإسعاف بصحبة العامل .. فسأله "عمر" باهتمام:

-ايه أخباره دلوقتي ؟

قال الرجل:

-بيقولوا محتاج عمليات كتير عشان ايده ترجع زى الأول .. وأهله جوه قالبينها مناحه

دخل "عمر" فوجد امرأة بسيطة ترتدى السواد تبكى أمام غرفة العمليات وبجوارها رجل كبير

يرتدى جلباباً ويبدو عليه البساطة هو الآخر وكان يبكى بحرقة ويتمتم بشفتيه بكلماته خافته ..

قال الرجل الذى بصحبة "عمر": "

-ده أبوه .. ودى أمه

اقترب "عمر" من الرجل قائلاً:

-متقلّش يا حاج ان شاء الله هيقوم بالسلامه
قال الرجل:

-يارب .. يارب

هتفت الأم فى حسره وسط شهقاتها:

-يا عيني عليك يا ابنى .. ايدك راحت يا ابنى ..

التفت "عمر" اليها قائلاً:

-متقوليش كده يا حجه ان شاء الله هيبقى بخير
قالت له المرأة فى لوعه:

-ده بيقولولك محتاج عمليات أد كده وأدوية أد كده .. واحنا ناس على أد حالنا
وانفجرت فى بكاء شديد

ربت "عمر" على كتفها قائلاً:

-متقلّش كل مصاريف العمليات والأدوية أنا هدفعهم ان شاء الله .. وكمان مرتبه هيوصل أول
كل شهر مش ناقص منه حاجه .. لحد ما يقوم بالسلامة ان شاء الله
نظرت المرأة اليه غير مصدقه وتمتمت:

-انت مين يا ابنى وهتعامل معانا كده ليه ؟

قال "عمر" شارحاً:

-أنا "عمر الألفى" صاحب المزرعة اللي ابنك بيشتغل فيها .. وطالما اتصاب وهو بيشتغل فى
المزرعة عندى بيبأه أنا متكفل بكل مصاريف علاجه

أمسك الرجل يد "عمر" وقبلها بسرعة .. سحب "عمر" يده .. فقال الرجل باكياً:

-ربنا يكرمك ويكفيك شر طريقك وبيباركلك فى صحتك وعفيتك يا قادر يا كريم

تأثر "عمر" للغاية من حالة والداه .. طلب من الرجل الذى بجواره أن يبقى فى المستشفى
معهما و قام بحجز غرفة لهم كمرافقين للمريض

عاد "عمر" الى المزرعة .. خرج "عمر" من السيارة فأقبل عليه "أيمن" قائلاً:

-الحق يا "عمر" مخزن العلف ولع

صاح "عمر" فى فزع:

-ايه ؟ .. ولع ؟

قال "أسمن" شارحاً وهو ينهج:

-أيوة بس متقلّش الرجاله طفوه

أسرع "عمر" الخطى الى مخزن العلف ليجد جزء كبير من العلف المخزن احترق تماماً وتحول
الى رماد .. نظر الى الرجال اللذين يحملون طفايات الحريق الصغيره وقال بلهفه:

-حد اتصاب ؟

قال له أحد الرجال:

-لأ يا بشمهندس متقلّش محدش كان فى المخزن

أقبل "أيمن" ليقف بجوار "عمر" فالتفت اليه "عمر" قائلاً:

-عم "عبد الحميد" فين ؟ .. مش المفروض يكون فى المخزن ؟

قال "أيمن" فى حيره:

-من ساعة الحريقه وهو مظهرش

قال "عمر" باستغراب:

-غريبه

ضرب "أيمن" كفاً بكف قائلاً:

-سبحان الله حادثتين فى المزرعة فى يوم واحد

تركة "أيمن" وذهب ليبحث عن "ياسمين" لكنه قابل عمته وهى مقبله نحوه قائله:

-ايه اللي حصل يا "عمر"

قال "عمر" وهو يسرع بالإنصراف:

-هحكيلك بعدين يا عمتو

أمسكته من ذراعه لتوقفه وقالت بحنق:

-حرق المخزن وهرب مش كده

نظر "عمر" اليها وقال بدهشة:

-تقصدى مين؟

قالت بجد:

-أقصد "عبد الحميد" اللى انت سلمته مفاتيح مخزن العلف ووثقت فيه بس عشان بنته تبقى

حبيب القلب

شعر "عمر" بالغضب وحاول الانصراف قانلا:

-بعد اذنك يا عمتو

أوقفته مرة أخرى قائله:

-أكد عمل كده لصالح أى مزرعة من المزارع المنافسه .. خاصة بعد ما عرفوا جودة العلف

اللى بقينا بنستخدمه دلوقتى .. مش بعيد يكونوا ادوه رشوية عشان يحرقلنا المخزن .. وواحد

جعان زى ده ما هيصدق طبعاً فرصة وجاتله لحد عنده

صمتت قليلاً ثم قالت بحزم:

-لازم تبلغ عن "عبد الحميد" عشان يتسجن

نزع "عمر" ذراعه من يدها ونظر اليها بصرامة ثم غادر دون أن ينطق بكلمة.

الفصل الحادى والثلاثون

ذهب "عمر" للبحث عن "عبد الحميد" لكنه وجد "ياسمين" تقف أمام مبنى سكن العمال وتتحدث فى هاتفها ويبدو عليها التوتر .. انهت مكالمتها .. اقترب منها قائلاً باهتمام:
- فى ايه يا "ياسمين" .. والدك فىن ؟

نظرت اليه قائله بتوتر:

- كلمته دلوقتى

قال لها "عمر: "

- ازاي .. هو معهوش موبايل

قالت "ياسمين" شارحه:

"- ريهام" معاه

سألها "عمر" باهتمام:

- طيب هو فىن ؟ وليه ساب المخزن ومشى ؟

ابتلعت "ياسمين" ريقها بصعوبه ونظرت اليه بحيره قائله:

- بيقول ان فى حد اتصل بيه على موبايل "ريهام" وقالها انك طلبت ان بابا يروحك على المستشفى اللى فيها العامل اللى اتصاب .. "ريهام" كانت خلصت شغلها فراحت معاه

قال لها "عمر" بدهشة:

- أنا مطلبتش من حد انه يبلغ والدك بكده .. ولا طلبت انه يروحلى على المستشفى

قالت "ياسمين" فى دهشة:

- أمال مين اللى كلمه .. وعلى موبايل "ريهام" كمان .. يعنى حد عرفنا

قال "عمر" فى حيره:

- أنا أصلاً معرفش رقم "ريهام"

قالت "ياسمين" فى ضيق:

- ايه اللخبطة دى بأه

هدءها "عمر" قائلاً:

- متقلقيش لما ييجى والدك هنفهم منه كل حاجه

هم بأن ينصرف لكن نظر اليها قائلاً فى حنان:

- تعالى اعدى عندنا فى بيت المزرعة لحد ما والدك وأختك يرجعوا

نظرت "ياسمين" اليه قائله بحرج:

- لآ شكراً .. أنا هطلع أوضتى أستاهم

أوما برأسه قائلاً:

- طيب براحتك .. ولما ييجى والدك خليه يجيلى .. أنا هناك عند المخزن

أومات برأسها فى صمت .. عاد "عمر" الى المخزن ليتفحص الأضرار التى لحقت به .. وجدت

والده وعمته و "أيمن" و "كرم" هناك فى المخزن .. استقبله "كرم" قائلاً:

- فىن عم "عبد الحميد" .. لسه مظهرش ؟

قال "عمر: "

- جاى فى الطريق

قالت مدام "ثريا" بحنق:

- وكان فىن حضرتته وسايب المخزن ليه ومشى .. مش قولتلك يا "عمر" هو اللى ورا

الموضوع ده

قال "عمر" بنفاد صبر:

- لما ييجى هنعرف منه الحكايه

ما هي الا نصف ساعة وجاء "عبد الحميد" بصحبة "ريهام" .. الى مخزن العلف .. هتف
"عبد الحميد" بمجرد أن رأى آثار الحريق في المخزن:

-يا ستير يارب .. يا ستير يارب .. ايه اللي حصل ؟
نظرت اليه مدام "ثرثيا" بحزم قائله:

-المفروض حضرتك تقولنا ايه اللي حصل .. مش انت المسؤول عن المخزن
نظرت اليها "ريهام" بحدده وقد شعرت بالضيق للطريقه التي تتحدث بها تلك المرأة مع والدها
.. قال "عبد الحميد" شارحاً وهو مازال مذهولاً مما حدث:

-لقيت "ريهام" بنتى بتقولى ان فى واحد اتصل بهيا على الموبايل وقال ان البشمهندس
"عمر" طلبنى أروحله على المستشفى اللي فيها العامل اللي اتصاب .. فقلت المخزن كويس و
"ريهام" كانت خلصت شغلها خدتها معايا وروحت على المستشفى اللي الراجل ملئ عنوانها
لبنتى

قالت "ثرثيا" بسخريه:

-والله .. ايه الفيلم العربي ده

سأله "عمر" باهتمام:

-انت واثق انك قفلت المخزن كويس قبل ما تمشى يا عم "عبد الحميد" ؟

أكد له "عبد الحميد" قائلاً:

-أيوه يا بشمهندس أنا قافل القفل بايدي

ثم أشار الى "ريهام" قائلاً:

-مش انتى يا بنتى شوفتيني وأنا بقفله؟

أومأت "ريهام" برأسها قائله:

-أيوه يا بابا حضرتك قفلته أدامى

صاحت "ثرثيا" فى غضب:

-والله .. وهتشهد بنتك كمان .. ما هي أكدي هتشهد لصالحك .. أمال هتقول بابا كداب

صاحب "ريهام" بحدده:

-لو سمحتى

أشار "عبد الحميد" بيده لـ "ريهام" كى تتوقف عن الحديث والتفت الى مدام "ثرثيا" قائلاً

بكبرياء:

-أنا مش كداب يا هانم .. ومليش مصلحة فى أذية البشمهندس "عمر" .. ولا يمكن أفكر انى

أأذيه فى أكل عيشه

قال "عمر" يطيب بخاطره:

-محدثش قال انك كداب يا عم "عبد الحميد" .. أنا مصدقك طبعاً

التفتت اليه مدام "ثرثيا" بحدده قائله:

-يعني ايه مصدقه ؟ .. هتسيبه يفلت من غير عقاب ؟

قال لها أخيها:

"-ثرثيا" مفيش داعى للكلام ده

قال "عمر" بصرامه:

-لو سمحتى يا عمتو מבجش حد يتدخل فى ادارتى لشغلى

قالت عمته بسخريه:

-ده مش شغل يا بشمهندس .. انا وانت واللى واقفين دول كلهم عارفين انت بتعمل كده ليه ..

عشان ست الحسن طبعاً

صاح "عبد الحميد" بغضب قائلاً:

-لو سمحتى يا هانم .. كله إلا بنتى مقبلش ان حد يجيب سيرتها بكلمه

قال "عمر" بصرامه:

-ولا أنا أسمح ان حد يجيب سيرتها بكلمه
ثم نظر الى أبيه قائلاً:
-ياريت يا بابا حضرتك وعمتو تسبقوني على البيت أنا دقائق وجاي
أشار "نور" برأسه الى "ثريا" التي تبعته مضطرة وعلامات الحنق على وجهها .. نظر
"عمر" الى "عبد الحميد" قائلاً:
-أنا بعذر عن اللي حصل يا عم "عبد الحميد"
قال "عبد الحميد" فى إباء:
-حصل خير يا بشمهندس .. بس كده خلاص معدلناش قعاد هنا
قالت "ريهام" موافقه أبيها:
-معاك حق يا بابا .. كده كفاية أوى
صاح "كرم" قائلاً:
-ايه يا جماعه انتوا هتقلبوها درامه ليه .. خلاص سوء تفاهم واتحل .. و "عمر" بنفسه
اعتذر
التفتت اليه "ريهام" قائله بحدده:
-ده مش سوء تفاهم .. ده اتهام صريح .. واهانه لينا كلنا
التفت اليها "عمر" قائلاً:
-وأنا بعذر تانى عن كل اللي عمتي قالته
ثم التفت الى "عبد الحميد" قائلاً:
-مش مكفيك اعتذارى يا عم "عبد الحميد"
قال له "عبد الحميد" فى حزم:
-يا بشمهندس "عمر" مش انت اللي غلظت عشان تعتذر .. وده مكنش سوء تفاهم .. الهانم
واثقه ان أنا اللي دبرت الحريقه دى .. والله العظيم اللي حكيتة هو اللي حصل بالظبط بدون
زيادة أو نقصان
قالت له "ريهام":
-بابا متحلفش .. اللي مش عايز يصدقك هو حر
التفت "كرم" الى "ريهام" قائلاً:
-ورينى الرقم اللي اتصل بيكي
قالت له "ريهام" وعيونها تشتعل من الغضب:
-حضرتك مش مصدقتى ؟
قال لها "كرم" بسرعه:
-طبعاً مصدقك .. بس عايز أشوف الرقم أكيد اللي عمل كده حد من هنا فى المزرعة .. أمال
عرفوا رقمك ازاي
أخرجت هاتفها وأظهرت الرقم على الشاشة ثم أعطت الهاتف لـ "كرم" .. دون "كرم" الرقم
على هاتفه ثم اتصل بصاحب الرقم .. وأشار لهم بالصمت:
-ألو
الصوت:
-ألو .. مين ؟
قال "كرم" وهو يشير لهم بأصبعه حتى لا يتحدث أحد:
-لو سمحت كنت عايز الأستاذ أحمد المحامى
-لا يا بيه الرقم غلط
-بس أنا واثق انه ادانى الرقم ده
-يا بيه بنقولك غلط .. أصلاً ده رقم فى كشك الناس بتتكلم منه
-فين الكشك ده ؟

وصف الرجل المكان لـ "كرم" .. شكره "كرم" وأغلق الهاتف .. وقال لهم:
-الكشك فى البلد .. يعين قريب من هنا .. يعنى اللى عمل كده حد من هنا من المزرعة
قال "أيمن" فى حيره:

-وايه مصلحتهم فى كده
أخذ "عمر" يفكر تفكيراً عميقاً .. ثم قال:
-وازاى وصلوا لرقم "ريهام" ؟
التفت "كرم" الى "ريهام" قائلاً:
-انتى اديتى رقمك لآى عامل من هنا فى المزرعة
قالت "ريهام" فى حيره:
-لأ وأنا أدى رقمى لعامل ليه
قال "كرم" بضيق:

-طب ادتية للبتاع اللى اسمه "هانى شاكر" ده ؟
التفتت اليه بحدده قائله:
-لأ طبعا أديله رقمى بتاع ايه
التفت اليها والدها قائلاً:
-مين "هانى شاكر" ده يا "ريهام" ؟
نظرت الى "كرم" بغيظ .. فأسرع "كرم" لينقذها قائلاً:
-المهم دلوقتى نعرف الراجل ده وصل لرقم "ريهام" ازاي
قال "عمر" وأقد أرهقه التفكير:
-أنا هتجنن مين مصلحته انه يحرق المخزن
قال "أيمن": "

-احنا ملناش أعداء يا "عمر" لاننا الحمد لله بنراعى ربنا فى شغلنا .. فمعتقدش ان اللى عمل
كده كان قاصد يأذيك انت .. وبعدين اللى عايز يأذيك هيحرق مكتلك بالملفات المهمة اللى فيه ..
أو يحرق الزرع نفسه .. أو يحرق الزرايب والاسطبلات .. مش بييجى يحرق مخزن علف
التفتت اليه "عمر" قائله:
-قصدك ايه ؟

قال "أيمن" بحزم:
-اللى عمل كده قصده انه يأذى عم "عبد الحميد" .. "مش يأذيك انت
قال "عبد الحميد" بدهشة:
-ومين مصلحته انه يأذيني ؟
التفتت "عمر" اليه قائلاً:
-مممكن يكون اللى اسمه "مصطفى" ده
قال "عبد الحميد" فى حيره:
-هو راجل شرانى وأتوقع منه أى حاجه .. بس ايه اللى هيعرفه مكاننا هنا
قال "كرم": "

-مين "مصطفى" ؟
قال "عمر" بضيق شديد:
-طليق "ياسمين"
هتف "كرم" قائلاً:
-اه صح .. ممكن يكون هو
قالت "ريهام" شارحه:
-و"مصطفى" هيجيب رقمى منين .. أصلاً الخط ده أنا غيرته من ساعة ما جيت المزرعة ..
لانه كان ساعات لما يلاقى موبايل "ياسمين" مقفول يكلمها على رقمى .. فريحت نفسى

-هموت وأعرف مين اللي مصلحته انه يأدى بابا .. احنا ملناش أعداء غير "مصطفى"
ثم نظرت الى "ياسمين" قائله:
-تفتكرى "مصطفى" اللي عمل كده ؟
كانت "ياسمين" شارده تفكر تفكيراً عميقاً فنادتها "ريهام":
" -ياسمين "
أفاقت من شرودها قائله:
-أيوة
-ايه مالك روحتى فين
-بفكر
-فى اللي حصل ؟
أومات برأسها قائله وقد شردت مرة أخرى:
-بفكر مين مصلحته ان بابا يتأذى ... أو.....
-أو ايه ؟
-أو انه يتخلص مننا
قالت "ريهام" بدهشة:
-ازاى يعنى يتخلص مننا .. يقتلنا تقصدى
نظرت اليها "ياسمين" بغيظ قائله:
-يقتلنا مين انتى كمان
هتفت "ريهام" قائله:
-مش انتى اللي قولتى يتخلص مننا
" -ريهام" .. اسكتى يا "ريهام"
قمت "ريهام" وتركت "ياسمين" تفكير بعمق وتساءل نفسها سؤال واحد : من من مصلحته أن
يأذى عائلتها ويتخلص منهم ؟

دخل "عمر" غرفة المعيشة حيث اجتمعت العائلة .. جلس على مقعد فارغ فبدأت مدام "ثرى"
فى الهجوم:
-ممكن أفهم ايه التسيب ده اللي انت بتدير بيه المزرعة و بتتعامل بيه مع الناس اللي بيشتغلوا
عندك ؟
نظر اليها "عمر" بصرامة قائلاً:
-ادارتى اللي حضرتك بتسميها تسيب بتدير عليا سنوياً أرباح بالملايين
قالت مدام "ثرى" بحزم:
-لو سبت اللي غلط بدون عقاب مش هتعرف تسيطر على العمال بعد كده .. وكل واحد يغلط
زى ما هو عايز ما هو مفيش عقاب
قال "عمر" بحزم:
-لما أبقي أعرف مين المذنب مش هسيبه الا لما يتعاقب
هتفت بحدده:
-هو انت لسه معرفتوش .. ولا الحب عامى عينك للدرجة دى
قام "عمر" غاضباً وقال:
-برده مصره تدخل الخيوط فى بعضها .. احنا بنتكلم عن الحريقة اللي حصلت .. ايه دخل
"ياسمين" دلوقتى فى الموضوع
قالت بغضب مماثل:
-ياسمين

-ما هي اللي واكله عقلك .. وممشياك وراها يمين يمين .. شمال شمال
كظم "عمر" غيظه بصعوبه قانلاً بصوت هادر:
-أنا خارج أحسن ما أقول كلام يضايقنا احنا الاتنين يا عمته
خرج مسرعاً وأغلق الباب خلفه بقوة .. هتف "نور" قانلاً:
-برده مفيش فايدة يا "ثريا" .. هو نفس اسلوبك الهجومى .. قولتلك 100 مرة "عمر" ما
بيجيش بالاسلوب ده
التفتت اليه قائله بده:
-أمال عايزنى أتكلم معها ازاي وأنا شايفه البنت بتضحك عليه هي وأهلها
قالت "كريمه": "
-حرام عليكى يا "ثريا" مين قالك ان أبوها هو اللي عمل كده
التفتت اليها "ثريا" قائله بسخريه:
-أهلاً .. أدى محامى تانى لست الحسن وعيلتها
ثم غادرت الغرفة وذهبت الى غرفتها وأغلقت الباب خلفها بقوة

سار "عمر" فى تجاه سكن العمال .. كانت "ياسمين" واقفه فى الشرفة .. تلاقت نظراتهما فى
صمت .. وقف قليلاً ثم ذهب فى اتجاه شجرته .. كان هناك الكثير مما يشغل عقله .. من فعل ذلك
؟ .. ولماذا فعل ذلك ؟ .. وكيف فعل ذلك؟ .. كان يشعر بالضيق من عمته بسبب تحاملها الدائم
على "ياسمين" وأهلها .. و "ياسمين" نفسها والتي تهرب منه دائماً .. جلس على الجذع
مهموماً حزيناً .. وفجأة وجدها أمامه .. واقفه تنظر اليه فى صمت .. قام من عل الجذع وتقدم
بضع خطوات ووقف فى مواجهتها .. نظرت اليه "ياسمين" قائله:
-أنا عايزه أسألك سؤال واحد ؟
أوما برأسه قانلاً:
-اسألى

صمتت قليلاً ثم قالت:
-انت مصدق ان بابا ملوش علاقه بالموضوع وان فعلا حد اتصل بيه وخلاه يسحب المخزن
صمتت قليلاً .. لحظات لكنها شعرت بأنها سنوات .. ثم رأت الابتسامه على محياه ورد قانلاً:
-أبوة مصدق
أومات برأسها وقد ظهرت علامات الارتياح على وجهها .. ثم نظرت اليه قائله:
-مفيش غير شخص واحد من مصلحته انه يآديننا عشان نمشى من هنا
سألها "عمر" باهتمام:
-مين الشخص ده ؟

نظرت اليه "ياسمين" بقوة قائله:
-الشخص اللي جالى وقالى انتى متناسبيش عيلة الألفى .. دورى على واحد من مستواكى ..
بدل ما تطلقى للمرة الثانية
نظر "عمر" الى عينيها بدهشة .. صمت .. طال صمتهما .. ثم قال بصوت هادر وقد اشتعلت
عيناها بالغضب:
-مين اللي قالك كده ؟
قالت له بشئ من الأسى:
-عمتك

قالت ذلك ثم التفتت وغادرت المكان وتركته ونيران الغضب تشتعل بداخله

عاد "عمر" أدراجه الى البيت وصاح بصوت هادر:

-عمتو .. عمتو

دخل غرفة المعيشة ولم يجد بها أحداً .. صعد الى غرفة عمته وطرق الباب .. فتحت عمته ..

والتي كانت "ايناس" عندها فى غرفتها .. قالت مدام "ثرىا" ببرود:

-خير فى ايه .. أكيد مصيبه تانيه من مصايب الهانم وأهلها

نظر "عمر" اليها بغضب وقد كان فى قمة ثورته قائلاً:

-انتى قولتى ايه لـ "ياسمين" ؟

فتح والده باب الغرفة ليخرج هو ووالدته .. قالت "كريمه":

-فى ايه بتزعق ليه يا "عمر"

ظل "عمر" ينظر الى عمته وسألها مرة أخرى بغضب:

-قولتى ايه لـ "ياسمين" يا عمتو ؟

اهتزت مدام "ثرىا" قليلا لكنها تماسكت بسرعة وقالت:

-وأنا هقولها ايه يعنى

عض "عمر" على شفتيه فى غيظ ثم قال:

-يعنى ما قولتيلهاش انها مش مناسبه لعلتنا ومش من مستوانا وانى لو اتجوزتها هتطلق

للمرة التانيه ؟

شهقت "كريمه" ونظرت الى "ثرىا" فى دهشة .. قال "نور" موجهاً كلامه لـ "ثرىا":

-الكلام ده صح يا "ثرىا"

هتفت "ايناس" فى غضب:

-ايه فى ايه .. كلكوا عليها كده ليه .. هى غلطت فى مين يعنى .. تحتت بت مفعوصه فاكرة

نفسها حاجه

التفت اليها "عمر" قائلاً بحزم:

-خليكي انتى بره الموضوع يا "ايناس"

قالت له "ايناس" بسخريه:

-البنيت اللى انت محموق عشانها أوى كده انت اصلا مش فى دماغها .. ولا تفرق معاها حاجه

.. دى قالتلى بعضمة لسانها ان أى كلام عنك ميخصهاش .. يبأه ليه بأه انت حامق نفسك

عشانها أوى كده

التفت "عمر" الى "ايناس" ببطء وقال لها بصرامه:

-نعم ؟ .. وانتى اتكلمتى معاها امتى انتى كمان ؟

بُهتت "ايناس" وقد شعرت فى نفسها بالحماسة لزلّة لسانها تلك .. فصاح "عمر" بغضب

شرس:

-انطقى قولتيلها ايه انتى كمان ؟

صاحت مدام "ثرىا" بغضب:

-لأ كده كتير أوى .. احنا اتهزأنا بما فيه الكفاية فى بيتك يا "نور" .. شايف ابنك طايح فينا

وساكت .. يلا يا "ايناس" حضرى شنطتك عشان نرجع القاهرة حالاً

قالت "كريمه":

-استنى بس يا "ثرىا"

هتفت "ثرىا" قائله:

-أستنى ايه .. أستنى ما أتَهزأ أكثر من كده

نظر اليها "عمر" ببرود قائلاً:

-انتى ليكى علاقة بحرق المخزن يا عمتو ؟

نظرت اليه "ثرىا" بغضب قائله:

-ايه اللى انت بتقوله ده ؟

قال "نور" ل "عمر": "

"عمر" متخيلش غضبك يعميك .. مينفعش تقول لعمتك كده

قال "عمر" بنفس البرود:

-أنا متهمتش حد بحاجه .. أنا بسأل سؤال

قالت "ثرى" بغضب:

-مجرد انك تسأل سؤال زي ده .. دى حاجه مش مقبوله أبداً

نظر اليها "عمر" نظرة كأنها سهم خارق قائلاً:

-هعرف الحقيقة يا عمتو .. سمعاني .. هعرفها

ثم تركهم وغادر البيت .. اتصل برئيس العمال قائلاً بصرامة:

-بكرة الصبح تجمعي كل اللي شغالين فى المزرعة دي .. دكاترة عمال فلاحين .. كلهم

تجمعهملى .. مفهوم

قال الرجل بسرعة:

-مفهوم يا بشمهندس "عمر"

قضى "عمر" ليلته ساهراً كان يشعر بغضب ثائر كالبركان بداخله .. كيف لعمته أن تقول مثل

هذا الكلام لـ "ياسمين" .. كيف أمكنها أن تفعل به ذلك .. كيف أمكنها أن تكون قاسية لهذه

الدرجة .. شعر برغبته فى الذهاب حالاً الى "ياسمين" وأن يأخذها بين ذراعيه ويزيل كل

المخاوف التى فى قلبها تجاهه .. لكنه قال لنفسه صبراً يا "عمر" ليس الآن .. فلتكتشف حقيقة

حرق المخزن أولاً

أتى الصباح واجتمع جميع العاملون بالمزرعة فى ساحة كبيرة فلم تتسع القاعة لهذا العدد

الكبير .. كان من ضمن الحضور "ياسمين" و "ريهام" و "عبد الحميد" وبالطبع "كرم" و

"أيمن" .. وقف "عمر" وتحت فى مايك صغير ليصل صوته الى هذا الجمع وقال لهم بصرامة

شديدة:

-طبعاً كلكم سمعتوا عن الحريق اللي حصل امبارح فى مخزن العلف .. اللي عايز أقوله انى

هعرف اللي هعمل كده يعنى هعرفه .. ولو وقع فى ايدي بجد مش هرحمه وهسلمه للبوليس

بايدي وهرفع عليه قضية بكل الخسائر اللي حصلت فى المخزن

ساد الصمت وكان الأعين كلها مترقبة .. فأكمل "عمر" وهو ينظر اليهم:

-لكن لو اللي عمل كده .. جه واعترفلى وقالى مين اللي وزه .. مش هوصل الموضوع للبوليس

ولا هطالبه بتعويض

نظر الجميع الى بعضهم البعض .. وأكمل "عمر" بلهجة تهديد:

-مفيش أدمك الا حلين اتنين يا تفضل ساكت وهجيبك يعنى هجيبك مش هتقلت من تحت ايدي

.. يا اما تيجى وتعرفلى بكل اللي حصل .. أدامك ساعتين من دلوقتي وبعدها اعتبر عرضى

منتهى وهبلغ البوليس فوراً

قال ذلك ثم توجه الى مكتبه وتبعه "أيمن" و "كرم" وساد الهرج والمرج وتعلت الأصوات ..

دخل الأصدقاء الثلاثة المكتب .. وقال "أيمن": "

-تفتكر اللي عمل كده هيجى يعترف فعلاً

زفر "عمر" بضيق قائلاً:

-مش عارف .. بس مكنش قدامى حاجه تانية أعملها غير كده

قال "كرم" بتفائل:

-أنا واثق انه هيعترف .. الناس هنا غلابه وعلى أد حالهم وأكد ه يخاف على نفسه وعلى أهله

من الفضايح والشوشرة والسجن .. وهو عارف انك واصل وأكد ليك معارف كبار .. أنا واثق

انه هيعترف

ما هى الا لحظات وسمعوا طرقات على الباب .. نظر الثلاثة الى بعضهم البعض .. فتح "كرم"

الباب ليدخل شاب صغير فى أوائل العشرينات .. كان يبدو عليه الخوف والإضطراب .. توجه

الى المكتب نظر اليه "عمر" منتظراً أن يتحدث فقال له "عمر" بصوت خافت:

-انت فعلت يا بشمهندس لو حد جه اعترفك مش هتسلمه للبوليس ؟
تبادل "أيمن" و "كرم" النظرات وقال "عمر" مؤكداً دون أن يرفع نظره عن الفتى:

-أيوة مش هسلمه للبوليس .. بس يقولى على كل حاجه

بلغ الفتى ريقه بصعوبه وكان يبدو عليه التوتر الشديد .. قال له "عمر": "

-اعد

جلس الفتى .. صمت قليلاً ثم قال:

-أنا والله مكنت عايز أعمل كده .. بس هي اللي أغرتنى بالفلوس .. قولتها لأ .. بس هي قالتلى

ان محدش يعرف ان أنا اللي عملت كده

جلس "أيمن" قبالتة .. ووقف "كرم" خلفه ينظرون الى الفتى الذى يتحدث وهو خائف

مرتجف .. سأله "عمر" قائله:

-هي مين الى قالتك كده ؟ .. وقالتك تعمل ايه بالظبط ؟

قال الفتى شارحاً:

-قالتلى اتصل برقم ادتهولى فى ورقة وقالتلى هترد عليا واحده أقولها البشمهندس عمر عايز

عم "عبد الحميد" فى المستشفى واديهها عنوان كانت كتبهولى فى الورقة

حته "عمر" بلهفه قائله:

-ها وبعدين ؟

بلغ الفتى ريقه ثم قال بتوتر:

-عملت كده .. وبعدها راقبت المخزن لحد ما الراجل اللي كان جوه خرج مع بنت ..وقفل

المخزن بالقفل .. وهى كانت مديانى مفتاح القفل فتحتة وولعت سجارة ورمتها جنب سلك

عريته وولعت عود كبريت ورميته على العلف واتأكدت ان الناس مسكت فيه وبعدين خرجت

كان "عمر" يستمع فى ذهول ثم قال:

-مين هي اللي قالتك تعمل كل ده ؟

بلغ الفتى ريقه مرة أخرى وكان قد وصل الى قمة التوتر ثم نظر الى الرجال الثلاثة الذين تعلقت

أعينهم به ثم التفت الى "عمر" قائله:

-الدكتورة "مها"

اتسعت أعينهم من الدهشة وقال "أيمن": "

-الدكتورة "مها" بتاعة المعمل ؟

اوما الفتى رأسه بالموافقه

شعر "عمر" بالدهشة لماذا تفعل "مها" ذلك ؟ ومن أين حصلت على مفتاح المخزن ؟

قال الفتى بقلق:

-مش هتبلغ عنى يا بشمهندس مش كدة

نظر اليه "عمر" قائله:

-لأ مش هبلغ عنك .. ومش هطالبك بتعويض

ثم قال بصرامة:

-لكن هتمشى من المزرعة

هتف الفتى فى لوعه:

-ليه كدة يا بشمهندس

قال "عمر" بقسوة:

-احمد ربنا انى هكتفى بطردك .. واحد غيريى كان رماك فى السجن مع كل الخسائر اللي

خسرتهاالى .. بس أنا وعدتك وأنا كلمتى سيف على رقبتى .. بش لازم تطرد عشان اللي يخونى

ملوش مكان عندى .. يلا افضل روح لرئيس العمال وأنا هقوله يدريك شهر مرتب لحد ما تلاقى

شغل .. مع انك مستحقش

خرج الفتى مطأطأ الرأس .. أغلق "كرم" الباب والتفت اليهم قائلاً بدهشة:
-ايه الفيلم الهندي ده .. "مها" دي ايه مصلحتها انها تعمل حركة تبييييييييييييت زي دي
قال "عمر" بحزم:
-أنا عندي تخمين بس هستنى لما أسمع من اللي اسمها "مها" دي بنفسى ..روح هاتها يا
"كرم" بس ما تقولهاش حاجه
ذهب "كرم" الى المعمل وأحضر الدكتورة "مها" التي كانت تشعر بتوتر بالغ .. دخلت المكتب
فوقف "عمر" في مواجهتها قائلاً:
-جيتى منين مفتاح المخزن يا دكتورة ؟
ارتبكت "مها" وقالت:
-مخزن ايه يا بشمهندس مش فاهمة
صرخ "عمر" فيها قائلاً:
-انتى هستعبطى .. لا مش أنا اللي يتعمل عليا الشويتين دول .. يا تقوليلى على كل حاجه من
الألف للياء .. لهروح بنفسى دلوقتى وأعملك محضر فى القسم وشوفى بأه الفضايح اللي
هتحصلك من ورا الموضوع ده
بكت "مها" ولم تستطع التحدث .. فهتف "عمر" بغضب:
-خالصيني .. مش هنعذ طول اليوم فى النحنحة بتاعتك دي
ثم قال:
-مين اللي اداكى مفتاح المخزن وقالك تعملى كده ؟
قالت من بين شهقاتها:
-مدام "ثرىا" هى اللي قالتلى أشوف عامل غلبان وأديه فلوس عشان يعمل كده .. وأهدده ان
لو فتح بقه هيتسجن
كانت دهشة "كرم" و "أيمن" قد وصلت لذروتها .. قال "عمر" بإحتقار:
-مكنتش أتخيل ان واحدة متعلمة زيك والمفروض انها محترمة وبنيت ناس تعمل كده ..فرقتى
ايه ع نالمجرمين والبلطجية يا دكتورة .. اتفضلى من أدامى وما أشوفش وشك فى المزرعة
دي تانى
نظرت اليه باكيه وقالت:
-بشمهندس "عمر" أنا أسفه .. أنا مكنش قصدى ..أنا.....
صرخ فيها "عمر" قائلاً:
-بقولك اتفضلى اطلعى بره المزرعة .. سمعتى ولا سمعك تقل .. وابقى خلى عمى تنفك
خرجت "مها" تجز أذيال الخيبة .. ذهبت الى المعمل وأحضرت حقيبتها وخرجت وهى تحاول
تمالك نفسها من البكاء الذى عصف بها
ضرب "أيمن" كفاً بكف قائلاً:
-انا مش مصدق اللي حصل .. ليه عمك تعمل كده يا "عمر"
قال "عمر":
-أنا عراف ليه عملت كدة
ثم نهض وتوجه الى بيت المزرعة .. دخل فوجد الجميع فى غرفة المعيشة كالعادة ..عندما
دخل أشاحت عمته بوجهها ونظرت الى الجهة الأخرى فى تعالى .. فوقف أمامها قائلاً:
-العامل اللي حرق المخزن .. والدكتورة "مها" اللي وصلته تعليماتك .. الاتنين اطرخوا من
المزرعة
بُهِتت مدام "ثرىا" حتى أن كوب الشاي الذى تحمله أخذ يتراقص بين يديها المرتجفة .. أكمل
"عمر" قائلاً بإحتقار:
-كل ده عشان تبعدىها عنى .. كل ده عشان تكرهيني فيها وفى أهلها .. زي ما روحتى تكرهياها
فيا .. أنا مش عارف انتى ازاي عمى ومن دمي

وقفت مدام "ثرىا" دون أن تنطق بكلمة .. وخرجت من الغرفة مسرعة لحقتها "ايناس" ..
جلس "عمر" فى مواجهة والديه وشرح لهم كل ما حدث .. شعر والداه بالأسف لما حدث .. ما
هى إلا دقائق حتى نزلت "ثرىا" و"ايناس" وقبل أن تغادر دخلت الى غرفة المعيشة وقالت
بنبرة متعاليه:

-أنا ماشية ولما تبقى تتعلم ازاي تتكلم مع عمك أبقى آجى
ثم غادرت هى وابنتها .. ابتسم "عمر" فى سخرية وهز رأسه ..
انتشر خبر معرفة العامل الذى قام بحرق المخزن وتم تبرئة "عبد الحميد" أمام الجميع ..
وكانت سعادته وسعاده بناته لا توصف ..

فى المساء وقفت "ياسمين" فى الشرفة مع "ريهام" والتي قالت بفضول:
-نفسى أعرف ايه اللى حصل .. وازاي اكتشفوه .. ولا هو اللى راح اعترف
قالت "ياسمين" بحيره:

-مش عارفه .. محدش عارف التفاصيل .. هما قالوا بس انهم عرفوا اللى عمل كده
قالت "ريهام" بتثائب:

-طيب أنا داخله أنام بأه سهرت كتير النهاردة
أومأت "ياسمين" برأسها
فقالت لها "ريهام": "

-مش هتنامى
-هقف شوية وبعدين هدخل أنام
دخلت "ريهام" وتركت أختها سابحه فى أفكارها .. تحاول تخمين ما حدث .. وكيف حدث ..
ولما حدث ..

فى صباح اليوم التالى توجهت الى شجرتها .. وما ان وصلت حتى وجدت "عمر" جالسا هناك
.. لم تعد هذه شجرتها .. أو شجرته .. بل أصبحت شجرتهم .. همت بالإصراف .. لكنه أوقفها
قائلاً

-استنى يا "ياسمين"
لم تتوقف أكملت طريقها فأسرع واعترض طريقها قائلاً:
-انتى كان معاكى حق .. عمتو فعلاً هى اللى ورا موضوع حرق المخزن
نظرت اليه بدهشة .. فأكمل قائلاً:

-وهى و "ايناس" سابوا المزرعة امبارح ورجعوا القاهرة
كانت مازالت تحت تأثير المفاجاه .. نظر فى عينيها وأكمل بصوت رخيم:
-عايز بس أفهمك حاجه
نظرت اليه فأكمل قائلاً:

-مش عايزك تخافى منى .. أو من حد من أهلى .. ماما وبابا موافقين .. وأنا ميهمنيش رأى حد
غيرهم .. وأنا واثق لو اتعرفتى عليهم هتحببهم وهحبوكى
صمت قليلا ثم قال وعيناه تغوصان فى بحر عينيها:
-زى ما أنا بحبك بالظبط

شعرت "ياسمين" بحرارة تسرى فى جسدها كله .. أرادت الهرب لكنه سد طريقها ثانية قائلاً:
-والله العظيم بحبك .. ومش ممكن أسيبك أبداً .. "ياسمين" أنا لو اتجوزتك مستحيل أسيبك
أبداً

نظرت اليه وبداخلها حيرة كبيرة تتخبط بها .. قال لها بصوت هامس:
-قوليلى خايفه من ايه تانى وأنا اظمنك .. قوليلى ايه تانى باعدك عنى وأنا أشيله من طريقنا
جف حلقها .. لم تستطع النطق .. حاولت الهرب للمرة الثالثة لكنه كان لها بالمرصاد .. ابتسم
قائلاً برفقه:

-مش هسببك تهربى .. قوليلى ايه تانى بعدك عنى

نظرت اليه قائله بهدوء:

-رغم كل اللي انت قولته ده أنا مش عارفه أثق فيك .. لانك واحد مبادئك غير مبادئى .. انت فى حياتك حاجات كتير غلط أنا مش ممكن أقبلها .. ممكن لو سمحت تسيبنى أمشى .. لأن مينفعش وقفنا كده

صمت برهه .. ثم نظر اليها بتصميم قائلاً:

-وأنا هعرف ازاي أخليكي تتقى فيا .. لو هى مشكلة ثقه .. فأنا هعرف أخليكي تتقى فيا وهثبتك انى أستاهل قلبك يا "ياسمين"

ثم قال هامساً وأشعة عينيه السوداوين تخترق أعماق روحها:

-لانى بحبك بجد .. ونفسي تكونى ليا زى ما أنا بقيت بكل ما فىا ليكي انتى .. وملكك انتى .. وراجلك انتى .. والله العظيم بحبك انتى.

نظرت اليه وهى تشعر بالصدق فى كلماته .. وفى عينيه .. وفى صوته .. وأيقنت أنها أصبحت بكل كيانها .. عاشقه له..

الفصل الثانى والثلاثون

سارت الأيام التاليه فى المزرعة فى هدوء وسكينة .. مازالت "ياسمين" تعيش مشاعر الحيرة والتخبط .. بين نداء قلبها ونصائح عقلها .. كانت تشعر أنها ممزقة بينهما .. كل منهما يجذبها فى اتجاه مختلف تماماً عن الآخر .. كانت تتمنى شئ واحد فقط .. وهو أن يتفق قلبها وعقلها على شئ واحد .. أى ان كان هذا الشئ .. أما "عمر" فكل ما كان يفكر فيه هو كيف يكسب ثقة "ياسمين" وكيف يفز بقلبها .. الذى أيقن الآن تماماً بأنه جوهره غاليه جداً تستحق التعب للحصول عليها .. منذ أن رحلت "ثرثيا" و "ايناس" من المزرعة لم تحاولان الاتصال .. ولم يحاول "نور" وزوجته مهاافتها .. فضلوا ترك الأمور لتهدأ لبعض الوقت .. قبل فتح جلسة للعباب والمصارحه ..

فى بيت المزرعة .. التفت الأسرة على طاولة الطعام .. عندما قالت "كريمه":

-ازى أحوالك انت و "ياسمين"

نظر اليها "عمر" قائلاً:

-مفيش جديد

-هى لسه رفضاك ؟

فكر "عمر" قليلاً ثم قال:

-مش رفضانى .. ومش قبلانى

ابتسم أبوه قائلاً:

-فزورة دى

قال "عمر" فى شرود:

-لأ مش فزورة .. بس هى لحد دلوقتى موثقتش فىا .. أنا اللي مش قادر أفهمه هو ليه هى مش

قادرة تثق فىا .. يعنى مش قادر أفهم تحديداً ايه اللي مخوفها منى

نظرت اليه أمه قائله بخبث:

-ما يفهمش الست الا الست

قال "عمر" باستغراب:

-يعنى ايه ؟

ابتسمت "كريمه" قائله:

-يعنى لو أنا اتكلمت معاها ممكن أقدر أفهم أسباب رفضها

ظهرت علامات السعادة على وجع "عمر" وابتسم قائلاً:

-بجد يا ماما .. هتتكلمى معاها

-أيوة يا حبيبى

قال "عمر" بحماس:

-تماماً أوى .. أنا هعزمهم عندنا هنا هى وأختها وأبوها .. وفرصه الكل يتعرف ببعضه

قالت أمه بهدوء:

-أفضل ان أول مقابله تكون بيني أنا و"ياسمين" بس .. وبعد كده نبقى نعزمهم هنا

قال "عمر" بحيره:

-بس ما أعتقدش انها ممكن توافق تيجي هنا لوحدها

ابتسمت أمه قائله:

-خلاص مفيش مشكلة .. أروحها مكتبها .. وكمان عشان أعتذرلها عن اللي "ثرثيا" و

"ايناس" عملوه .. ده الواجب يا "عمر" عشان البنيت تعرف ان كرامتها مصانته عندنا

قام "عمر" من فوراه وتوجه الى أمه عانقها وهى جالسه وقبل رأسها قائلاً:

-بجد يا ماما ربنا ميحرمينش منك .. فعلا ده اللي كان نفسى فيه بس خفت أطلب منك كده

ترفضى .. "ياسمين" فعلاً لازم تحس اننا بنحافظ على كرامتها .. وان اللى حصل ده تصرف فردى من فرد واحد فى العيله لكن انتى وبابا حاجه تانيه .. وأنا فهمتها الكلام ده وقولت لها ان ميهمنيش رأى حد غيركوا انتوا الاتنين
قال "نور": "

-متقلقش ان شاء الله الموضوع هيتحل على خير
ثم التفت الى زوجته مبتسماً:
-طالما "كريمه" بنفسها دخلت فى الموضوع يبقى اعرف انه هيتحل ان شاء الله
نظرت اليهما "كريمة" قائله:
-ربنا يخليكوا ليا انتوا الاتنين

طلب "كرم" من "ريهام" الحضور الى مكتبه .. ذهبت اليه فأعطاها بعض التعليمات .. وقبل أن تغادر قال لها:
-استنى يا آنسه "ريهام"
توقفت .. فوقت ودار حول المكتب ليقف فى مواجهتها .. ظل ينظر اليها بصمت .. انتظرتة أن يتحدث فلم يفعل .. شعرت بالخجل من نظراته فهربت بعينيها لتنظر الى شئ آخر .. فقال لها
بهدوء:

-أنا كنت عايز أقولك خبر .. يعنى بما انك سكرتيرتى .. وبقالنا فترة شغالين مع بعض يبأه أكيد هتفرحلى

نظرت اليه قائله باهتمام:

-خير يا بشمهندس "كرم"

تفرس فيها لحظة ثم قال:

-أنا هخطب قريب

شعرت بقلبها يرتجف بين ضلوعها لكنها حاولت التماسك .. أكمل قائلاً وهو يتأملها:

-واحدة كنت أعرفها فى القاهرة

وقع قلبها أرضاً .. شعرت بغضه فى حلقها .. حاولت قدر الإمكان التماسك .. قالت بسرعة قبل

أن تظهر العبرات فى عينيها:

ألف مبروك بعد اذنك

خرجت لتغادر المكتب .. ذهبت الى مكتبها .. جلست وهى تحاول استجماع شتاتها .. شعرت

بالألم يغزو قلبها .. لم تدرى بنفسها إلا وهى تحمل حقيبتها وتغادر المكتب من فورها

عادت "ياسمين" من عملها لتجد "ريهام" جالسه على سريرها فى حالة يرثى لها .. اقتربت

منها وجلست بجوارها قائله:

-مالك يا "ريهام" ايه اللى حصل ؟

أجهشت "ريهام" فى البكاء وألقت بنفسها فى حضن أختها قائله:

-كرم هخطب يا "ياسمين"

قالت "ياسمين" وهى تربت على ظهرها:

-وانتى بتعطى ليه ؟

رفعت "ريهام" رأسها لتنظر الى أختها .. نظرت "ياسمين" الى وجهها المبلل بالدموع ثم

أدركت ما يعتمل فى قلب أختها .. قالت "ريهام" بأسى ودموعها تتساقط على وجنتيها:

-أنا بحبه يا "ياسمين" .. بحب "كرم"

نظرت اليها "ياسمين" بأسى قائله:

-الله يهديكي يا "ريهام" .. ليه تعلقى نفسك كده وتتعبى قلبك .. أكيد كان اليوم ده هيجيبى .. ما

هو لازم يخطب مش هيفضل كده على طول .. انتى ليه تعلقى نفسك بواحد .. اديكي انتى اللى

تعبتي في الاخر
قالت لها "ريهام" بحزن:
-مش بايدي والله .. أنا معرفش اتعلقت بيه ازاي
ثم قالت بحزم:
-أنا مش هروح المكتب تاني .. خلاص كفايه كدة .. مش عايزة أشوفه بعد كدة
تنهدت "ياسمين" بحسره ونظرت الي "ريهام" قائله:
-ده فعلاً أحسن حل .. لان أكيد كل ما هتشوفيه هتتعبى
عانتها "ياسمين" قائله:
-ربنا يريح قلبك يا "ريهام"

كانت "ريهام" متوجهه الى المكتب لتأخذ متعلقاتها وتخبر "كرم" برغبتها في ترك العمل ..
عندما وجدت "هانى" قبالتها ..تظاهرت انها لا تراه لكنه أوقفها قائلاً:
-لو سمحتى ثوانى
توقفت ونظرت اليه بنفاد صير
فقال "هانى" ببرود:
-انتى وأختك اتعاملتوا معايا بإسلوب غريب جدا .. أكنى واحد جاى أشحت مش جاى أتقدم
ثم قال بترفع:
-أنا بس حبيت أقولك انى صرفت نظر عن الموضوع
قبل أن تفتح فمها للرد وجدت "كرم" خلفها يقول ل "هانى" بحنق:
-يلا يا ابنى من هنا معندناش بنات للجواز
نظر اليه كل من "ريهام" و "هانى" باندهاش .. فاقت "ريهام" من دهشتها لتقول لـ "كرم"
:
-وحضرتك ايه دخلك فى الموضوع ده
نظر "هانى" الى "كرم" قائلاً:
-أحب أعرفك يا بشمهندس "كرم" ان ده آخر يوم ليا فى المزرعة بصراحة مش حابب آجى
هنا تانى بعد كل المعاملة اللى شوفتها منكوا هنا
قال "كرم" بحبور:
-والله يا ابنى تبقى ريحتنا وريحت نفسك .. بس اوعى تقطع الجوابات .. ولا أقولك اقطعها
أحسن
رحل "هانى" وهو يتمم فى غضب .. نظرت "ريهام" الى "كرم" بغضب قائله:
-ايه اللى حضرتك عملته ده .. ازاي تدخل كده فى حاجه تخصنى وتقوله معندناش بنات للجواز
؟
نظر اليها "كرم" قائلاً:
-هو عاجبك ؟
صمتت ولم تجب .. ظهرت علامات الجديه على وجهه ونظر اليها مكرراً سؤاله مرة أخرى:
-الواد ده عاجبك ؟
نظرت اليه قائله وهى تحاول التماسك:
-ده شئ ميخصكش
نظر اليها بطريقة لم تعتادها منه .. احتارت فى تفسير معناها .. لكنها شعرت وكأن عينيه
تحتويانها فى صمت .. كرر السؤال للمرة الثالثة .. لكن هذه المرة بصوت أقرب الى الهمس:

-الواد دع عجبك ؟ .. عايزاه ؟
كانت ترغب فى عدم الرد عليه وتتركه وتذهب .. لكنها لا تدرى لما قالت:
-لأ

ظهر المرح فى عين "كرم" وسألها قائلاً:
-لأ ايه

أجابت وهى تحاول التحدث بجديه:

-لأ مش عاجبنى .. ولأ مش عايزاه

ابتسم "كرم" ابتسامه ذاب لها قلبها وقال بمرح:

-أصلاً لو كنتى قولتى غير كده كنت قطمت رقبتك

شعرت بقلبها يخفق بقوة .. حاولت التحدث بده قائله:

-وانت مالك انت يعجبني ولا ميعجبنيش .. واياه قطمت رقبتك دى

قال وهو محتفظاً بابتسامته:

-لسه مفهمتيش ؟

شعرت بأنفاسها وقد بدأت بالتسارع .. ترى هل ما تظنه صحيح .. هل "كرم" على وشك

هل هذا صحيح .. همت بأنه تتركه وتنصرف لكنه قال لها فجأه:

-أنا بحبك يا "ريهام"

نظرت اليه فى دهشة .. قلبها يخفق .. عقلها يدور .. بل الدنيا من حولها تدور .. لم تستوعب ..

لم تصدق .. قال لها بابتسامته المرحه:

-بصراحة من أول يوم شوفتك فيه فى المكتب وانتى لفتى انتباهى بشكل كبير .. وكل يوم

بعرفك بتعلق بيكي اكثر وبحترمك أكثر .. مكنتش متخيل انى ممكن ألقى واحده زي وشبههى

.. أنا حاسس اننا متشابهيين فى حاجات كتير جدا..

صمتت ولم تتحدث فأكمل قائلاً:

-كانت بس المشكلة اللى شاغله بالى هو فرق السن اللى بينى وبينك .. يعنى خايف انك تشوفى

دى حاجه تضايقتك .. خاصة بعد الواد الغتت ده ما تقدملك .. خفت بجد انك تختاريه ومبقتش

طابق أشوف وشه فى المزرعة دى وعايز أمشييه منها بأى طريقه

كانت "ريهام" تشعر بسعادة غامرة وهى تسمع تلك الكلمات من كرم" الذى حلمت به وهى

تعلم أنه حلم صعب المنال .. ظهرت تلك السعادة على وجهها لم تستطع مداراتها .. أكمل

مبتسماً:

-حركة الخطوبة دى كنت بس حابب أعرف رد فعلك .. كنت عايز أعرف حاجه زي كده

تضايقتك ولا لاء .. كان وشك فعلاً باين عليكى انك مضايقه ولما دخلت مكتبك ولقيتك مش

موجوده بصراحة فرحت أوى .. وده اللى شجعنى انى أتكلم معاكى دلوقتى

ثم نظر اليها وقال بقلق:

-انا مش غلطان .. صح .. يعنى .. انتى كمان ... صح ؟

تماسكت "ريهام" وأخفت بصعوبة ابتسامه الفرحة التى كادت أن تقفز الى شفيتها وقالت:

-بعد اذنك أنا مضطرة أمشى

قال "كرم" بلووعه:

-بتهرجى يا "ريهام" .. لأ بقولك ايه أنا مبحبش التوتر والقلق ده .. جاوبى على سؤالى .. أنا

حسيت صح مش كده ؟ .. يعنى انتى كمان حسه بحاجه نحيتى .. صح ؟

قالت له بجديه:

-لا والله .. عايزنى أقولك ايه يعنى

قال بمرح:

.. -طيب بلاش سؤال مباشر طالما صعب .. هسألك سؤال تانى خالص ملوش علاقه بالسؤال

الأول .. ها .. ملوش علاقة
 نظرت اليه مترقبه .. فقال وعيناه تلمع فى مرح وابتسامه خبيثه على شفتيه:
 - هو عم "عبد الحميد" فاضى اروح أتكلم معاه كلمتين كده ؟
 احمرت وجنتاها وقد فهمت معنى سؤاله لكنها تظاهرت بالجديه وقالت:
 -معرفة روح اسأله
 -يعني انتى شايفه هو فاضى ولا مشغول ؟
 ظهرت ابتسامه خفيفه على شفتيها وقالت وهى تتحاشى النظر اليه:
 -أظن فاضى
 اتسعت ابتسامه "كرم" قائلاً:
 -لأ أنا مش عايز أظن دى .. انا عايز رد أكيد .. فاضى ولا مشغول ؟
 اتسعت ابتسامتها قائله:
 -فاضى
 ثم تركته وغادرت مسرعة .. دخلت الى غرفتها أغلقت الباب ووقفت خلفه تتذكر ما قيل منذ
 قليل .. لا تصدق أن "كرم" اعترف أخيراً بحبه لها .. ويرغب أيضاً فى الزواج منها .. شعرت
 بسعادة طاغية فى قلبها .. أخرجت هاتفها واتصلت بـ "ياسمين" قائله وهى تقفز فرحاً:
 " -ياسمين" .. "كرم" قالى بحبك
 صاحت "ياسمين" بدهشة:
 -ايه .. بتقولى ايه
 ضحكت "ريهام" قائله:
 -بقولك "كرم" قالى بحبك
 -بتهزرى .. هو مش هيخطب
 -لأ طلع ابن اللذين بيعمل فيلم عليا .. "ياسمين" أنا فرحانه فرحانه فرحانه .. "كرم" قالى
 بحبك .. قالى "بحبك" يا "ياسمين"
 ضحكت "ياسمين" قائله:
 -برافو يا "كرم" أصلاً البنت كان فى عقلها برج واحد سليم ودلوقتى جيت حضرتك قضيت
 عليه
 قالت "ريهام" بمرح:
 -أقولك خبر كمان .. قالى انه هيتقدم ويطلبنى من بابا .. هو مقلهاش صراحة بس معنى كلامه
 كده
 صاحت "ياسمين" بفرح:
 -بجد .. بجد يا "ريهام" .. فرحتيني .. أنا مش مصدقه
 -أمال أنا اقول ايه .. بجد حسه انى بحلم .. "كرم" قالى بحبك .. كرم قالى "بحبك" .. ومش
 بس كده ده كمان هيتقدملى
 صمتت قليلاً ثم صرخت بفرح:
 " -ياسمين" "كرم" قالى بحبك وهيتقدملى
 " -ريهام" صوتك واصل من الأوضة لعندى هنا .. اهدى شوية .. الله يسامحك يا "كرم"
 " -ياسمين" عشان خاطرى خلصى بسرعة وتعالى عايزة أتكلم معاكى كتير .. عشان خاطرى
 متتأخريش
 -طيب يا حبيبتي هخلص وأجيلك على طول

كانت "ياسمين" سعيدة للغاية من أجل اختها ... كانت جالسه فى مكتبها عندما رأت امرأة
 تتقدم وتدخل الغرفة .. نظرت "ياسمين" لهذه المرأة الأنيقة بملابس محتشمة وابتسامتها على
 ثغرها .. فابتسمت لها "ياسمين" قائله:

- أهلا بحضرتك اتفضلنى
دخلت فوقفت "ياسمين" أمامها .. قالت "كريمة": "
-انتى اسمك ايه ؟
ابتسمت "ياسمين" قائله:
-أنا اسمى "ياسمين"
أومأت "كريمة" برأسها قائله:
-وأنا كريمة والدة "عمر"
اضطربت "ياسمين" من المفاجأة .. ولم تدرى ماذا تقول .. بعد برهه قالت "ياسمين": "
-اتفضلنى حضرتك
جلست "كريمة" على أحد المقاعد .. وجلست "ياسمين" على المقعد المجاور لها .. نظرت
اليها "كريمة" متفحصه .. شعرت "ياسمين" بالخجل فأطرقت برأسها .. ابتسمت "كريمة"
قائله:
-بصراحة أنا مصدومة شوية
خفق قلب "ياسمين" فهي ليست مستعدة أبداً لتكرار تجربتها مع عمته .. فقالت "كريمة": "
-أولاً "عمر" ما قاليش سنك فعشان كده كنت متخيلاكى أكبر من كده .. بس انتى شكلك بنوته
صغيره .. ده غير ان باين عليكي هادية وخجوله .. يعنى بصراحة صورة غير اللى كنت
رسامها فى خيالى
شعرت "ياسمين" بالضيق فهي لا تعرف هل هذا مدح أم ذم .. فقالت لها:
-اظاهر ان كل اللى ببشوفونى من عيلة البشمهندس "عمر" بيتصدموا
قالت "كريمة" وقد أنتبهت الى أن الفتاة مجروحه مما قالته "ثريا" سابقاً .. فقالت لها:
-أنا فضلت ان أنا اللى آجى .. لانى شايفه ان لازم حد مننا يعتذرلك عن الكلام والاساعه اللى
اتوجهت ليكي
نظرت اليها "ياسمين" باستغراب فأكملت "كريمة" قائله:
-بصى يا بنتى .. أنا أهم حاجه عندى ان ابنى يكون مبسوط ومرتاح .. وانه يختار بنت تعرف
تحافظ عليه .. "عمر" ابنى ده أنا بحبه حب مش قادرة أوصفها لك .. لانى مخلقتش غيره ..
فهو عندى بالدنيا .. ومفيش عندى حاجه أحب من انى أجوزه وأشوف ولاده بيتنططوا حواليا
ابتسمت "ياسمين" وقد شعرت بحنان و أمومة تلك المرأة الجالسه بجوارها .. أكملت
"كريمة" قائله:
-وأنا شايفه ان ابنى متعلق بيكي أوى .. صحيح معرفكيش من فترة كبيرة .. بس أنا أول مرة
أشوف "عمر" متعلق بواحد كده
شعرت "ياسمين" بالسعادة تغمر قريبا لكلمات "كريمة" .. أكملت "كريمة" قائله:
-الحاجه الوحيدة اللى "عمر" بيتماها دلوقتى هو انك تكونى زوجة ليه .. وأنا عرفت انك
رفضيته .. فحابه اننا نتكلم مع بعض .. زى أم وبنتها .. ده لو طبعا تحبى تعتبرينى زى ماما
شعرت "ياسمين" بحنان تلك المرأة يغمرها .. وشعرت بالفعل بأن قلبها مال اليها فقالت لها
بصدق:
-بجد كلام حضرتك وكون ان حضرتك تجيلى هنا دى حاجه كبيرة أوى عندى .. وأنا طبعا
بشرفنر انى أتكلم مع حضرتك كلام أم وبنتها
ابتسمت "كريمة" قائله:
-اتفقنا .. يباه قوليلى بأه وبصراحة شديدة انتى ليه رافضه "عمر" .. هل لكلام "ثريا" ولا فى
أسباب تانيه ؟
صمتت "ياسمين" قليلا ثم نظرت اليها قائله:
-أعتقد البشمهندس "عمر" قال لحضرتك عن ظروفى

أومات "كريمة" برأسها فأكملت "باسمين" قائله:

-أنا حسه ان فى فروق كتير بينى وبينه وده مخوفنى .. خايفه منقدرش نتفاهم مع بعض ..
خايفة ان الخلافات تكون جوهرية لدرجة انها تصدمنا بعد كده .. أنا مریت بتجربة قاسية أوى ..
وخايفه بجد انى أختار غلط مرة تانيه .. مش عايزة أتجرح .. أنا بطبعى مش متردده ..
وببقى عارفه أنا عايزة ايه .. بس يمكن التجربة اللي مریت بيها خلتنى خايفه .. خاصة وأنا
شايفه الفروق اللي بينه وبين البشمنهندس "عمر" .. مش بتكلم عن الفروق المادية بس ..
لكن فى الطباع .. وفى الجو اللي كل واحد فينا اتربي فيه .. خايفه يحصل صدام بينا فى يوم من
الأيام .. وعشان كده أنا متردده أوى
استمعت "كريمة" اليها .. ثم قالت:

-أولاً أن بحترم فيكي انك واحدة عاقلة مش متسرعة .. يعني بنات كتير غيرك كانوا شافوا
"عمر" فرصه بالنسبة لهم .. وما كانوا اترددوا أبدا .. بس ترددك ده دليل على انك انسانه
جاده وعاقلة وفاهمة الجواز صح .. وأنا معاكى ان ممكن كيون فى فعلا فروق بينكوا .. أما هل
الفروق دى ممكن تسبب صدام بينكوا ولا لاء دى حاجه انتوا الاتنين اللي تقدرؤا تقررؤا مع
بعض .. مش انتى لوحدهك .. ومش هو لوحده .. لازم تعدؤا تتكلمؤا مع بعض ونحطؤا النقط
فوق الحروف .. تعرفيه ايه اللي انتى خايفه منه .. وهو كمان اكيد عنده مخاوف يتكلم معاكى
فيها .. وتحلؤا الموضوع سوا .. وتقررؤا اذا كنتوا مناسبين لبعض فعلا ولا لاء .. لكن الرفض
بدون محاولة لفهم الشخص اللي أدامك ده أكبر غلط .. لانك ممكن بكده تضيعى على نفسك
فرصه انك تكونى سعيدة معاه
صمتت "ياسمين" وهى تستمع الى لكلمات "كريمة" الى اخترقت علقها واستقرت به .. اكملت
"كريمة" قائله:

-اللى أنا أقترحه عليكى .. وليكى طبعاً حرية الموافقة او الرفض .. هو ان تتتعلم خطوبة ..
وفترة الخطوبة اصلاً معمولة عشان الاتنين يعرفوا بعض ويدرسوا شخصية بعض .. ويقررؤا
هل كل واحد شايف التانى شريك حياته المناسب ولا لاء .. فرأى انكوا تاخذوا خطوة الخطوبة
.. وبعدين تقررؤا انتوا عايزين ايه

ابتسمت لها "ياسمين" قائله:

-بجد كلام حضرتك ريحنى كتير .. حسيت انك فهمانى فعلاً
ابتسمت "كريمة" فى حنان:

-وأنا عايزة أقولك انى ارتحتلك أوى .. وحسه ان "عمر" المرة دى اختار صح .. وأحبك
أظنك .. مش عشان أنا أمه .. بس "عمر" بجد راجل مش هتلاقى زيه .. وانتى بنفسك
هتكتشفى ده

قامت "كريمة" .. فوفقت "ياسمين" هى الأخرى .. قبلتها "كريمة" على وجنتيها قائله:
-ربنا يقدملكوا اللي فيه الخير يا بنتى .. أستأذن أنا
كان لتلك المقابلة أثر السحر على نفس "ياسمين" شعرت بالراحة الشديدة لكلام "كريمة"
وتفهمها لموقفها .. شعرت بالراحة والسكينة فى قلبها

عادت "كريمة" لتجد "عمر" فى استقبالها وعلامات اللهفة على وجهه قائلاً:

-ها .. ايه الأخبار

قالت "كريمة" بخبث:

-الحمد لله .. يلا أسيبك بأه عشان هطلع أنام شوية

وقف "عمر" أمامها قائلاً بمرح:

-لا ميدخلش عليا الكلام ده .. قرى واعترفى يا ماما باللى حصل بالتفصيل الممل

ضحكت "كريمة" قائلة:
 -طيب ممكن على الأقل أعد
 أفسح "عمر" الطريق أمامها ومد يده بطريقة مسرحية قائلاً:
 -طبعاً اتفضلى يا ست الكل
 جلست "كريمة" على الأريكة وجلس "عمر" بجانبها قائلاً بإهتمام:
 -ها رأيك فيها ايه ؟
 ابتسمت "كريمة": "
 -بصراحة عجبتنى
 ابتسم "عمر" وظهرت علامات السعادة على وجهها:
 -مش قولتلك هتحببها .. ها اتكلمتوا فى ايه .. وصلنوا لايه .. قالتلك كل الأسباب اللي مخليها
 ترفض ؟
 قالت "كريمة" بجديه:
 -بصى يا "عمر" أنا شافيه ان البنيت معاها حق تخاف وترفض .. البنيت عايشة فى مستوى
 غير اللى انت عايش فيها .. وانت بالنسبة لها واحد غريب عليها متعرفش لا أخلاقه ولا طباعه
 .. ده غير تجربتها اللى زودت خوفها ده
 فكر "عمر" قليلاً ثم قال:
 -طيب ما أنا حابب انى أقرب منها أكثر وأطمئنها من نحيتى
 -وده اللى أنا قولتھولها .. اقترحت انكوا تعملوا خطوبة .. وتحاولوا تفهموا بعض أكثر ..
 وتتكلموا مع بعض بصراحة
 قال "عمر" بلهفه:
 -ووافقت ؟
 ابتسمت "كريمة" قائلة:
 -أنا سبتھا تفكر .. بس احساسى بيقولى انها هتوافق .. الى حسيته يا "عمر" ان البنيت دى
 بتحبك .. هى بس محتاجة انها تطمئنك
 عانق "عمر" أمه قائلاً:
 -ربنا يخليكي ليا يا أمى .. بجد ريحتى قلبى
 نظرت اليه "كريمة" وقالت:
 -بس ايه ده يا "عمر" .. يعنى اختيار غير "نانسى" تماماً .. بصراحة لما شوفتها اتصدمت
 شوية
 قال "عمر" بجديه:
 -وده اللى جذبنى ليها .. حاسسها مختلفة .. محافظة على نفسها جداً .. تصورى حتى
 مبتسلمش عليا بايها .. لا أنا ولا غيري .. مبتسمحش لحد انه يتجاوز حدوده معاها ... وبتحط
 خطوط حمرا للى أدمها ومش مسموحه أبدا انه يعديها .. مبتسمحش لأى راجل انه يقرب منها
 مهما كان هو مين .. وده مخلينى هتجنن عليها
 -ربنا يجعلها من نصيبك يا "عمر"
 -أيوة يا أمى ادعيلى الدعوة دى

رن جرس الهاتف .. اخرجته "مصطفى" من جيبه ليجد رقماً غريباً رد فأتاه صوت فتاة قائلة:
 -البشْمهندس مصطفى معايا ؟
 -أيوة أنا مين معايا
 أنا واحدة متعرفهاش
 ابتسم "مصطفى" قائلاً:

الحلوة اللي أنا رسمهاله .. يعني بجد هتصدم أوى لو فى يوم قالى اقلعى حجابك .. أو لو قالى البسى زى ما بشوف البنات بتلبس .. بجد هتقتله أوى .. أنا مش قادرة أفهم لحد دلوقتى تفكيره .. انتى عارفه يا "سماح" اننا اتربينا من صغرنا ان الحجاب ده جزء من البنات مينفعلش تتخلى عنه أو تفرط فيه .. حاجه مهمة أوى فى حياتها .. خايفه أتصدم فى "عمر" .. وتكون الحاجة دى بالنسبة له مش مهمة ومحصله بعضها .. خايفه كل اللي أنا أكون شايفاه خطوط حمرا هو يشوفها خضرا .. ده غير اسلوبه مع البنات .. مستحيل أقبل ان جوزى يسلم بالايدي على بنت عمته او على اى واحد ويسبها تبوسه وتحضنه كمان .. مش ممكن أقبل ده أبداً .. خايفة يحصل صدام بينى وبينه .. ويقولى أنا كده واتربيت كده وعيشتى كده .. لان أنا مش ممكن هقبل كده .. خايفة يكون بعيد عن ربنا أوى .. أنا حساه فعلا بعيد .. بس خايفه يكون بعيد أوى .. بعيد البعد اللي أفضل فى انى أقربيه .. أنا لحد دلوقتى مش عارفه أفهمه .. خايفه يا "سماح" لو قررت فى يوم انى اسلم على صحابه وقرايبه الرجاله بايدي الألقى ان ده عادى عنده ومش فارق .. خايفه لو قولتله فى يوم انى عايزة ألبس لبس مفتوح او ضيق يفرح بكده او يقولى عادى ومش فارقه .. خايفه محسش انه راجل وخايف عليا ويبيغير عليا .. خايفه ميحسش انه غيران عليا يا "سماح" .. "خايفه أكون جذبه انتباهه بس عشان انا حاجه جديدة فى حياته .. بس بعد فترة يتعود عليها ويمل منها .. ويحن للبنات اللي يعرفهم .. خايفة أسيب قلبى يحبه ويتعلق بيه والآخر الأقيه هو اللي سبنى .. خايفة أوى يا "سماح" كانت "سماح" تنظر اليها وتستمع فى صمت .. أكملت "ياسمين" قائله:

- وفى نفس الوقت شوفت منه حاجات مطمئاني .. يعني مثلا عارف حدودى كويس ومش بيحاول يتعداها معايا .. ولما برفض حاجه بيبقى فاهم سبب رفضى .. شوفت اللي عمله مع العامل اللي اتصاب .. كان شجاع أوى وهو بيحاول ينقذ ايده .. ولما ساعد الست الغلبانة اللي طردوها .. ولما كان معايا وأنا بولد المهره .. وهو بيلبس الجلبية الفلاحى .. حسيته أد ايه طبيب ومش مغرور وحنين وقريب منى ومن طباعى قالت "ياسمين" مبتسمه:

- تعرفى ان بابا لما راح المستشفى اللي فيها العامل هو و "ريهام" أهل العامل قالوله ان "عمر" دفع كل مصاريف علاجه وكمان مرتبه قالهم هيوصلهم كل شهر -مكنتش أعرف .. "أيمن" ما قاليش

- بجد منتصوريش اللي عمله ده خلانى حسه بايه .. بجد عجبني أوى اللي عمله .. واحد غيره كان قال وأنا مالى .. بس هو كان فى الموقف ده راجل بجد .. حنيته دى بتجننى يا "سماح" .. أنا بحب أوى الراجل الحنين

ابتسمت "سماح" لصديقها فأكملت "ياسمين" بسعادة:

- أنا حسه انى بدأت أتعلق بيه أوى يا "سماح" .. وعشان كده نفسى فعلا أعرفه أكثر عشان أقدر أقرر صح .. أنا فعلا حسه ان كلام مامته صح .. وان المفروض نعمل خطوبة .. عشان نقدر نفهم بعض

هتفت "سماح" بفرح:

-يعني وافقتى؟

أوقفتها "ياسمين" بيدها قائله:

-لأ استنى ما قولتتى انى وافقت .. أنا قولت انى حسه ان ده المفروض يحصل .. بس لسه ما قولتتى أيوة

صاحت "سماح": "

-يا ستى قولى أيوة بأه

ضحكت "ياسمين" قائله بدلع:

-هستخير الأول .. وبعد ما هقول رأيي

رفعت "سماح" كفيها هاتفه:

-يارب ببقى أيوة يارب

عادت "ياسمين" من عند "سماح" ودخلت بوابة المزرعة لتسمع خلفها صوت سيارة
"عمر" .. التفتت .. خفق قلبها لرؤيته أكملت طريقها .. سار بسيارته مسرعاً وأوقفها أمام بيت
المزرعة ثم نزل والتفت ينتظرها .. كادت أن تكمل طريقها لكنه أوقفها قائلاً:

-ازيك يا "ياسمين"

قالت بصوت خافت:

-الحمد لله

ابتسم قائلاً:

-كنتى فين ؟

-كنت عند "سماح"

اتسعت ابتسامته ونظر اليها بخبث قائلاً:

-شكلى هبتدى أغير من "سماح"

احمرت وجنتاها ومشيت خطوتين قبل أن يناديها قائلاً:

"-ياسمين" أستنى

التفتت اليه وقلبها يخفق بشده .. سألتها باهتمام:

-فكرتى فى اللى ماما قالتها لك ؟

أومأت برأسها .. فقال:

-وقررتى ايه ؟ .. موافقه ؟

شعرت بالارتباك لكنها نظرت اليه قائله:

-هستخير وبعدين أقول قرارى

نظر فى عينيها بحنان قائلاً بصوت شجى:

-وأنا هستنى قرارك .. بس متتأخريش عليا .. مبقتش مستحمل بعدك ده .. كفايه تعذيب بأه ..

نفسى أحس أنك ليا بجد .. وايدك دي يبأه فيها دبلى .. والكل هنا يعرف أنك بتاعت "عمر" ..

بتاعته هو وبس.

شعرت بحنان عينيها يغمر قلبها .. وبكلماته تخترق أعماق روحها لتستقر بها .. أومأت برأسها

.. ثم التفتت لتغادر وعلى ثغرها ابتسامه عذبه ..

الفصل الثالث والثلاثون

كانت سعادة "عبد الحميد" غامرة عندما زاره "كرم" فى مخزن العلف قائلاً:
-يشرفنى انى اطلب من حضرتك ايد الانسه "ريهام"
قال له "عبد الحميد" فى سعادة غامرة:
-وأنا طبعاً يشرفنى انى أديك بنتى يا بشمهندس "كرم" .. بس لازم آخذ رأى "ريهام" الأول
أوما "كرم" برأسه قائلاً:
-طبعاً يا عم "عبد الحميد" خد وقتك ..بس ياريت بعد اذنك احنا مش محتاجين فترة خطوبة ..
يعني احنا بنشتغل مع بعض من فترة .. والأفضل يبقى كتب كتاب على طول
صمت "عبد الحميد" قليلاً ثم قال:
-فى العجلة الندامة يا ابنى .. خليها فترة خطوبة الأول حتى لو فترة صغيرة وبعد كده لما تحبوا
تكتبوا الكتاب مفيش مشكلة .. بس كل حاجه تيجى بالهداوه
أوما "كرم" برأسه قائلاً:
-خلاص زى ما تشوف يا عم "عبد الحميد" .. بس زى ما حضرتك قولت فترة خطوبة صغيرة
ابتسم "عبد الحميد" فى فرح قائلاً:
-على خيرة الله
ذهب "عبد الحميد" الى غرفة بناته .. وبشرهم بالخبر .. نظر الى "ريهام" قائلاً:
-البشمهندس "كرم" طلب ايدك منى يا "ريهام" يا بنتى .. قولتى ايه ؟
حاولت "ريهام" كتم فرحتها بصعوبة .. كانت تشعر بالرغبة فى القفز فى الهواء .. لكنها
تمالكت نفسها قائله بهدوء:
-وحضرتك قولتله ايه يا بابا ؟
-قولتله هسألك الأول وبعدين أرد عليه .. ها رأيك ايه
نظرت "ريهام" الى الأرض فى خجل وابتسامه واسعة مرسومة على شفتيها .. فتدخلت
"ياسمين" قائله:
-قوله موافقه يا بابا .. بس متقولوش دلوقتى سيبيه يومين كده
ضحك "عبد الحميد" قائلاً:
-والله الحريم دول عليهم حركات .. ما نريح الرجل ونقوله موافقه
قالت "ياسمين" بسرعة:
-لأ استنى يومين تلاته كده وبعدين قوله انها موافقه
خرج "عبد الحميد" وتعانق الأختان فى فرح .. قالت "ريهام":
-أنا مش مصدقة يا "ياسمين" حسه بجد انى بحلم .. أنا مش بحلم صح ؟
ضحكت "ياسمين" قائله:
-لأ مش بتحلمى .. فوقى بأه ده انتى ضربتى خالص
-مش ليا حق .. أنا فرحانه أوى .. هاين عليا أنزل دلوقتى أروحله المكتب وأقوله "كرم" أنا
موافقة يلا نتجوز
ضحكت "ياسمين" قائله:
-والله مجنونة وتعملها
صمتت "ياسمين" قليلاً ثم قالت:
-بس احنا لسه معرفناش هو ناوى يعيش هنا فى المنصورة ولا هيرجع القاهرة
قالت "ريهام" وقد انتبهت للأمر:
-فعلاً معاكى حق .. النقطة دى مش واضحة بالنسبة لى
-لازم نعرف النقطة دى

قالت "ريهام" بسرعة:
-أى ان كان مش هتفرق بالنسبة لى المهم انى أعيش مع "كرومتى"
ضحكت "ياسمين" قائله:
"كرومتك"؟ ... تصدقى كرهتيني فى اسمه
قالت "ريهام" بخبث:
-أه "كرومتى" .. زى ما "عمر" "عمورتك"
ابتسمت "ياسمين" فى خجل .. فقالت "ريهام" بلهفة:
-يا ستى حنى على الراجل بأه .. هتفضلى تقلائه لحد امتى .. الراجل خلاص سخن واستنوى
على الآخر .. فاضلة تكة ويشيط الحقيه قبل ما يشيط أبوس ايديكى
ضحكت "ياسمين" قائله:
-عليكى تعبيرات تودى فى داهية
قالت "ريهام" بخبث:
-بالله عليكى أما بتشوفيه ما بتحسيس ان قلبك ده من كتير الدق صوته واصل لأسوان
قالت "ياسمين" بخجل:
-أيوه بحس بكده
تنهدت "ريهام" قائله:
-طيب بأه ارحمى قلبك وقلبه .. خلينا نعمل خطوبتنا فى يوم واحد أنا وانتى
نظرت اليها "ياسمين" قليلاً فى صمت .. ثم قائله:
-ربنا يبسر
صاحت "ريهام" قائله:
"ياسمين" بجد انتى تشلى .. ربنا يكون فى عونك يا "عمر" .. لىك الجنة يا ابنى
قالت "ياسمين" بجديه:
"ريهام" متنسش انى مطلقة يعنى أى حاجه أعملها محسوبة عليا .. مش عايزة أتسرع ..
حاولى تفهميني
قالت "ريهام":
-والله فهماكى .. ومتخفيش "عمر" انسان كويس
-عرفتى منين بأه انه كويس
ابتسمت "ريهام" قائله بمرح:
-مش صاحب "كرومتى" لازم يبقى كويس
ثم نظرت لها بجديه قائله:
-استخيري وشوفى ربنا هيختارك ايه
أومأت "ياسمين" برأسها قائله:
-أنا بعمل كده فعلاً .. بستخير .. وراضة باللى ربنا يختار هولى

-يعنى خلاص أخيراً قررت انك تتجوز
هتف "أيمن" بهذه العبارة أثناء جلوسه مع "كرم" فى "عمر" فى حجرة المعيشة بمنزل
"عمر" .. قال "كرم" بمرح:
-أعمل ايه مكنتش عايز أتجوز أبداً .. بس جت اللى خدتنى على ملا وشى .. وقلبت حياتى من
فوقها لتحتها
ابتسم "عمر" قائلاً:
-أخيراً عشت وشوفت اليوم ده .. "كرم" قرر يتجوز أنا لسه لحد دلوقتى مش مصدق
قال "أيمن":

-لأومش أى بنت .. "ريهام" اللى هتطلع عليه القديم والجديد ان شاء الله
ضحك "عمر" قائلاً:

-يستاهل .. بصراحة هما الاتنين يستاهلوا بعض
قال "كرم": "

-آه غنوا أصاد بعض انتوا الاتنين
ابتسم "عمر" قائلاً بفرح:

-بجد والله فرحتك أوى يا "كرم"
قال "أيمن": "

-يلا شد حيلك انت كمان يا "عمر" .. وممكن تعلموا انتوا الاتنين خطوبتكو مع بعض
قال "عمر" بلهفه:

-ياريت بجد يا "أيمن"
قال "كرم": "

-لا اطمن .. أنا حاسس ان خلاص فاضل على الحلو زقه
صاح "عمر": "

-ما تحترم نفسك يا ابنى انت .. ايه حلو دى ؟
ضحك "كرم" قائلاً:

-خلاص يا باشا غلطة مطبعية
-لأ ابقى خد بالك بعد كده

-حاضر يا عم الحمش

أقبلت "كريمة" ومعها الخادمة حاملة صنية بها عصير وبعض أطباق الحلوى .. قالت
"كريمة" بسعادة:

-ألف مبروك يا "كرم" .. بجد فرحتك أوى .. ربنا يتملك على خير
قال "كرم" بمرح:

-شوفتى يا طنط .. أخرة صبرى آخذ أخت خطيبة "عمر" .. يعنى "عمر" ورايا ورايا حتى فى
جوازى مش عايز يعتقنى

ضحكت "كريمة" قائله:
-ربنا يخليكو لبعض

ثم نظرت الى ثلاثهم قائله:

-بجد يا ولاد صداقتكو دى عملة نادرة دلوقتى .. انتوا ربنا أنعم عليكم بنعمة كبيرة ناس كثير
أوى محرومة منها .. صداقتكو دى كنز بجد .. انتوا من سنين وانتوا مع بعض أكثر من

الاخوات .. واقفين جنب بعض فى الحزن قبل الفرح .. بجد انتوا فى نعمة بكيرة أوى حافظوا
عليها .. وعلموا ده لوالدكو وقربوهم من بعض عشان يكون بينهم الصداقة الجميلة اللى

بينكو دلوقتى .. واوعوا تبعدوا عن بعض أبداً مهما حصل .. سبحان الله الطيور على أشكالها
تقع وانتوا التلاته متتخيروش عن بعض .. ربا يعلم ان معزتك يا "كرم" انت و "أيمن" من

معزة "عمر" ابنى ويعتبركو ولادى زيه بالظبط
كان الأصدقاء الثلاثة ينظرون لها بتأثر فأقبل "عمر" عليها وقبل رأسها قائلاً:

-ربنا ما يحرمنى منك يا أمى ولا من نصايحك الغالية
خرجت الأم لتترك الأصدقاء الثلاثة ينعمون بصحبة بعضهم البعض

قال "مصطفى" لذلك الصوت الأثوى عبر الهاتف:

-لأ الفلوس هنتقسم على 3 مش 2 ؟

الصوت بضيق:

-ليه بأه 3

-عشان هجيب واحد محتاجه معايا فى المهمة دى

-واحد مين ان شاء الله .. بقولك ايه احنا مش عايزين عك

قال "مصطفى" بعصبيه:

-بقولك محتاجه معايا .. افرض حصلت أى ظروف أحتاج فيها لحد جمبى .. وطبعاً حضرتك

مش هتساعديني لو احتجتك

-أنا دورى فى الخطة دى معروف ومش هعمل أكثر من اللى اتفقنا عليه .. وكفاية ان أنا اللى

خطت لكل العملية دى

-وعشان كده محتاج واحد معايا وقت التنفيذ .. لأن وقت التنفيذ الله أعلم ايه اللى ممكن يحصل

..وكمان هو بيْفهم فى الحاجات دى كويس وأكد هيفيدنى كتير بدل ما الدنيا تتعك فوق دماغنا

-خلاص مفيش مشكلة بس طالما الفلوس هنتقسم على 3 بياها نطلب أكثر

-ازاى ؟

-يعنى بدل ما كنا هنطلب 2 مليون نطلب 3 وبكدة حصة كل واحد فينا تفضل زى ما هى

قال "مصطفى": "

-تمام كده

-بس قولى اللى هتجيبه ده واثق فيه ؟

-أيوه متقلقيش .. أمان

-طيب .. بس خلى بالك .. حركة واحدة غلط وهنروح فى ستين داهية

قال "مصطفى" بنفاذ صبر:

-قولتلك متخفيش

-امتى التنفيذ

قال "مصطفى" وهو يضيق عيناه:

-بكرة

توجهت "ياسمين" الى مكتب "عمر" لإعطائه ملف التقارير الاسبوعية .. فتحت الباب لتجد

والدته جالسه معه فى المكتب على أريكة جانبيه .. ابتسمت "كريمة" قائله:

-ازيك يا "ياسمين"

بادلتها "ياسمين" الابتسامه قائله:

-الحمد لله .. ازى صحة حضرتك

-بخير يا حبيبتي الحمد لله

ثم نهضت قائله:

-أسيبكوا بأه تشوفوا شغلوكوا

غادرت ثم أمسكت الباب وأغلقته خلفها .. توترت "ياسمين" .. ولدهشتها وجدت "عمر"

يتجه الى الباب ويفتحه مرة أخرى ثم يتقدم منها ويقف أمامها مبتسماً .. لاحت ابتسامه صغيره

على شفيتها و خفضت عينيها فى خجل قائله:

-اتفضل يا بشمهندس التقرير الاسبوعى .. الدكتور "حسن" راجعه ومضى عليه

أخذ منها الملف قائلاً:

-عارفة أنا نفسي فى ايه ؟

صمتت .. فأكمل بحنان قائلاً:

-نفسي أسمع "عمر" بدل بشمهندس

شعرت بالخجل فنظر إليها بدفء:

-تعرفى انك عمرك ما نطقتى اسمى أبداً .. حتى ما بتقوليليش بشمهندس "عمر" .. "بتقولى

بشمهندس بس .. نفسي أسمع منك "عمر" .. أكيد اسمى هيبقى له طعم تانى لما أسمع منه

قالت بسرعة لتتهرب من تأثير كلماته عليها:

-بعد أدنك

ثم غادرت بسرعة وخفقات قلبها تتعالى وابتسامه شفيتها تتسع .. حتى أن "ولاء" لاحظت

السعادة البادية على محياها فاقتربت منها قائله:

-خير .. مش عادتك يعنى الابتسامه اللي من الودن للودن

حاوت "ياسمين" اخفاء ابتسامتها قائله:

-عادى يعنى

ابتسمت "ولاء" قائله:

-لأ مش عادى .. لما أشوف والدة "عمر" جياالك المكتب وتعد معاكى وقت طويل يباه مش

عادى .. وانتي تبقى الفرحة مش سيعاكى يبقى مش عادى

نظرت إليها "ياسمين" وهى تشعر بالحيرة أخبرها .. أم لا تخبرها .. أخرجتها "ولاء" من

حيرتها قائله بابتسامه:

-من غير ما تقولى واضح جداً اللي بيحصل .. انتى بنت طيبة وتستاھلى كل خير

قالت "ياسمين" بخجل:

-أنا لسه موافقتش

قالت "ولاء" بنفس الابتسامه:

-أهم حاجه استخيري كويس واسألوا عليه كويس .. وأى حاجه تسمعها عنه ناقشيه فيها

وشوفى رده عليها ايه .. يعنى اللي أقصد أقولهلوك لما تعرفى عنه حاجه متكبريش دماغك

منها .. لأ لازم تعرفى أصل وفصل الحكاية منه .. عشان تبقى على نور من الأول .. وتكونى

متأكدة من أخلاق الرجال اللي هترتبى بيه

أومات "ياسمين" برأسها قائله:

-معاكى حق .. أى حاجه اشاعه أسمعها عنه لازم أتأكد هى صح ولا لا

-ربنا يتملك على خير يا "ياسمين" لو كان فيه خير ليكي

ابتسمت "ياسمين" قائله:

-تسلمي يا ولاء .. وعقبالك انتى كمان

جلست "كريمه" مع زوجها على شرفة غرفتهما قائله:

-بصراحة اتصدمت لما شوفتها .. لانها مختلفه عن "نانسي" .. وقولت الكلام ده ل "عمر"

قال "نور":

-بصراحة اللي اسمها "نانسي" دى أنا مكنتش مرتحلها خالص .. بس انتى عارفه انى

محبش أفرض رأيى على "عمر"

قالت "كريمه":

-البنت لبسها محتشم أوى و محجبة وهادية وخجولة و كمان عاقلة وذكية وحسيتها كمان طيبة

أوى

ضحك "نور" قائله:

-كل ده عرفتيه عنها من مقابلة واحدة

ابتسمت "كريمه":

-انت عارف انى بقدر أفهم الناس بسرعة .. والبنت فعلاً مريحه .. تعرف يا "نور" محستش
أبدأ انها واحدة كانت متجوزة قبل كده .. يعني تحسها بنوته صغيرة .. ولما اتكلمت عن
جوازتها الأولى وانها كانت تجربة قاسية عليها .. بصراحة صعبت عليا أوى .. حسيت ان البنت
دى اتظلمت كثير .. وشايله فى قلبها كثير .. وده سبب خوفها من الارتباط مرة ثانية

-حبتها يعني

-بصراحة أيوة .. لما أعدت واتكلمت معاها حستها انسانه ناضجة .. مش واحدة بتجرى ورا
المظاهر وخلص .. واحدة شايفه "عمر" عريس لقطة بالنسبة لها .. لآ البنت بتفكر فى كل
حاجه .. لأنها مش عايزة تختار غلط .. ومش مهتمة بالمظاهر .. أد ما هى مهتمة بشخصية
"عمر" وبأخلاقه .. البنت دى لو حبت "عمر" هتحبه من كل قلبها .. وهتحبه عشانه هو ..
عشان "عمر" .. مش عشان هو مين وابن مين

ثم أكملت قائله:

-وبعدين واضح انها مؤدبة ومتربية كويس .. مراعية حدودها فى الكلام معايا وبتتكلّم باحترام
وبأدب .. بعكس "نانسي" اللى لما كنت بحاول أنصحها عشان مصلحتها هى و "عمر" كانت
بتسمعى كلام ميصحش بنت متربية تقوله لواحد فى سن والدتها .. بصراحة "ياسمين"
دخلت دماغى

ابتسم "نور" قائلاً:

-فرحتيني بكلامك ده .. ومن كلامك عنها واضح انى هحبها أنا كمان
أكدت "كريمه" قائلاً:

-هى فعلاً تتحب .. حسه ان "عمر" المرة دى اختار صح

-طيب نتفق كده من الأول الكلمة كلمتى واللى هقوله يتنفذ بالحرف .. يا كده يا مش داخل
اللعبة

نطق "بسطوسي" هذه العبارة .. كان رجل طويل القامة عريض المنكبين له هيئة مرعبة
منفرة والشرر يتطاير من عينيه .. تشعر وأنت تنظر اليه بعدم الارتياح .. رد عليه "مصطفى"
قائلاً:

-ماشى يا "بسطوسي" اتفقنا .. بس بشرط مش عايز البنت تتأذى يعنى عمليه نضيفه من
غير نقطة دم

قال بصوت أجش:

-اتفقنا يا برنس .. امتى التنفيذ

-بكرة

-قشطة .. ونصيبي ؟

-مليون جنية زى ما اتفقنا

-حلو الكلام .. يلا باه تعالى اعد عشان نتفق على التفاصيل

قامت "ياسمين" فزعة من نومها مردده ثلاث مرات:

-أعوذ بالله من الشيطان الرجيم

استيقظت "ريهام" على صوتها قائله:

-خير فى ايه ؟

لم تستطع "ياسمين" التحدث فقامت "ريهام" وجلست الى جوارها تتفحصها قائله:

-مالك فى ايه ؟

قالت "ياسمين" بصوت مرتجف:

-معرفة حسيت ان فى حاجة طابقه على نفسى اوى

قالت لها "ريهام": "

-استعيذى بالله

أزاحت "ياسمين" الغطاء ونهضت .. سألتها "ريهام": "

-راحة فين

قالت "ياسمين" وهى تحاول استماع شتات نفسها:

-هقوم أتوضى وأصلى قيام باقى ساعة على الفجر .. توضأت "ياسمين" وصلت حتى أذان

الفجر .. كانت كلما شعرت بالخوف لجأت الى الصلاة التى تريح قلبها وتطمأنه .. أيقظت

"ريهام" لصلاة الفجر .. ثم عادت الى مصلاها ورددت أذكار الصباح التى تحافظ عليها كل يوم

وتذكرت حديث رسول الله صلى الله عليه وسلم: "ما من عبد يقول في صباح كل يوم ومساء كل

يوم: بسم الله الذي لا يضر مع اسمه شيء في الأرض ولا في السماء وهو السميع العليم ثلاث

مرات فيضره شيء ... " ثم أمسكت مصحفها وأخذت تقرأ فيه حتى الشروق

كان يوم عمل عادى بالنسبه الى "ياسمين" .. أنهت عملها وأوشكت على التوجه الى غرفتها

عندما وجدت رقماً غريباً يتصل بها ردت فوجدت من تقول:

-ازيك يا "ياسمين" أنا الدكتورة "مها"

شعرت "ياسمين" بالدهشة .. لماذا تتصل بها .. خاصة بعدما عملت "ياسمين" من "اسماح"

بدور "مها" فى قصة حريق مخزن العلف .. قالت "ياسمين" ببرود:

-خير يا دكتورة ؟

قالت "مها": "

-محتاجة أتكلم معاكى شوية

قالت "ياسمين" بنفس البرود:

-مفيش أى حاجه بينى وبين حضرتك نتكلم فيها .. مع السلامه

قالت "مها" بسرعة:

-الحاجة دى عن البشمةهندس "عمر"

توقفت "ياسمين" لتسمعها .. فأكملت "مها" قائلة:

-أنا مش هاخذ من وقتك أكثر من خمس دقائق بس

قالت "ياسمين": "

-اتفضلى سمعاكى

قالت "مها" على الفور:

-لأ مش هينفع فى التليفون الأفضل أكلمك وجهاً لوجه أنا واقفه أدام باب المزرعة من بره لو

سمحتى اطلعى نتكلم شوية لانى مش هينفع أدخل المزرعة بعد اللى حصل

صمتت "ياسمين" قليلاً فألحت عليها "مها" قائلة:

-مش هاخذ من وقتك أكثر من خمس دقائق .. بس بجد المعلومات اللى عندى مهمة جداً ولازم

تعرفيها .. أنا منتظراكى أدام البوابة .. سلام

أغلقت الخط وتركت "ياسمين" تتخبط من الحيرة .. أنهت "مها" المكالمة لتتصل بـ

"مصطفى" قائلة:

-أنا كدة عملت اللى عليا الدور عليك باه .. نفذ اللى مطلوب منك صح

قالت ذلك ثم أغلقت .. ترددت "ياسمين" فى الذهاب ثم أخيراً عزمتم أمرها وتوجهت الى

البوابة .. فتح لها الغفير وخرجت .. نظرت يمينا ويسارا فلم تجد أحداً .. سارت قليلا فى اتجاه

الأشجار التي تقع على أحد جانبي المزرعة .. لتجد فجأة من يطبق عليها من الخلف ويكلم فيها وأنفها بقطعة قماش .. وما هي إلا لحظات وفقدت "ياسمين" الوعي اثر المادة المخدرة الموضوعه فى القماش.

جرها الرجل فى اتجاه السيارة التى أخفاها فى شارع جانبي بجوار المزرعة ثم حملها ووضعها فى صندوق السيارة ودخل وجلس بجوار "مصطفى" وقال له:
-يلا بسرعة

انطلق "مصطفى" بالسيارة الى المكان الذى اتفقا عليها من قبل .. فقد مسح المنطقة المجاورة للمزرعة جيداً واختاراً أنسب مكان لاختفاء "ياسمين" به .. وصلوا الى المكان ونزل الرجل وحمل "ياسمين" الى الداخل ووضعها على الأرض وأخذ "مصطفى" يربط يديها خلف ظهرها وربط قدمها وكمم فمها ووضع عصابة على عينيها .. ثم أشار له "بسطويسي" بالخروج فخرجا معاً وأغلقا الباب ووقفوا بجانب السيارة .. قال له بسطويسي:
-زى ما اتفقتنا فتشها كويس وخذ منها موبايلها وأى حاجه معاها ومتخليهاش تشوف وشك ولا تسمع صوتك ..

ثم أعطاه قناع قماش للوجه وقال له:

-والبس دى كمان كل ما تيجي داخل عندها
قال له "مصطفى": "

-ألبسها ليه هى أصلا عينيها متغميه ومش شيفانى
صرخ فيه "بسطويسي" بغضب قائلاً:

-انت سمعت أنا قولت ايه .. اللى أقولك عليه يتنفذ بالحرف الواحد بدون ما تناقشنى فيه ..
سمعت

قال "مصطفى" بشئ من الخوف:
-ماشى

قال "بسطويسي" بلهجة أمره:

-يلا البسه وادخلها جوه .. وأنا هروح أعمل اللى اتفقتنا عليه

انطلق "بسطويسي" بالسيارة وأرتدى "مصطفى" القناع وفتح الباب ودخل .. اقترب من "ياسمين" التى ترقد على الأرض وجثا بجوارها وأزاح ربطة عينيها وفمها لينظر اليها بسخريه قائلاً بصوت خافت:

-قولتلك مش هعتقك

أخذ "مصطفى" يفك حجابها ويلقيه على الأرض .. راوده شيطانه للحظة للانتقام منها والثأر لكرامته ولرجولته .. لكنه وجدها تتحرك وقد بدأت فى الإفاقه فأسرع بربط عصابة عينيها وكمم فمها .. دقائق وقد بدأت "ياسمين" فى استعادة وعيها بالكامل .. حاولت التحرك و الوقوف .. فما كان من "مصطفى" إلا أن صفعها على وجهها صفعة قوية .. شعرت بالرعب والألم وجهشت فى بكاء شديد .. جلست ساكنة للحظات ثم حاولت القيام مرة أخرى فصفعها مرة أخرى بقوة .. سقطت على الأرض تبطى من شدة الخوف والألم الذى ألم وجهها .. جلست فى مكانها تبكى لا تفهم شيئاً .. لا تعى شيئاً .. خانفة من أن تتحرك فتتلقى لكمة أخرى على وجهها

سمع "عبد الحميد" طرقات متواليه على باب غرفته .. نهض ليفتح الباب فوجد "ريهام" تقول فى لوعه:

-بابا الحقنى ياسمين مش موجوده فى المزرعة ومش بترد على موبايلها
صاح "عبد الحميد" بفرع:

-يعين ايه مش موجودة فى المزرعة .. كلمتى "سماح"
قالت "ريهام" وهى تشعر بالفزع:
-أبوة كلمتها قالتلى مجتلهاش ومتكلموش أصلاً النهاردة .. أنا خايفه أوى .. مش من عاداتها
انها تختفى كده ومتردش على موبايلها
خرج "عبد الحميد" و "ريهام" وبحثنا عنها مرة أخرى فى مكان عملها وفى المزرعة كلها
وسألنا عنها كل من يقابلناه .. لكن لا أثر لـ "ياسمين" .. توجهنا الى مكتب "عمر" ليجداه وقد
غادر .. ونفس الكلام مع "كرم" و "عمر" .. قال "عبد الحميد":
-تعالى نروح بيت البشمهندس "عمر" يمكن يكون عارف عنها حاجه
توجهنا الى بيت المزرعة وطرقنا الباب .. فتحت الخادمة فطلب منها "عبد الحميد" أن يتحدث
الى البشمهندس "عمر" .. دخلت الخادمة ونادت "عمر" الذى كان يجلس مع والداه .. قام من
فوره وتوجه الى الباب وقال باهتمام:
-عم "عبد الحميد" .. اتفضل ادخل .. اتفضلى يا آنسه "ريهام"
قاطعها "عبد الحميد" قائلاً بلهفه:
-ماشوفتش "ياسمين" يا بشمهندس
نظر "عمر" اليه بحيره قائلاً:
-لأ مشوفتهاش النهاردة
أخذ "عبد الحميد" يضرب كفاً بكف قائلاً:
-لا حول ولا قوة الا بالله أمال راحت فين بس يا ربي
أجهشت "ريهام" فى البكاء بصوت خافت وحاولت الإتصال باختها مرة أخرى دون جدوى ..
قال "عمر" باهتمام:
-متخفش هي ممكن تكون عند "سماح" صحبتها أو هنا فى المزرعة
صاح "عبد الحميد" قائلاً:
-قلبنا عليها الدنيا هنا فى المزرعة .. و "سماح" بتقول مرحتلهاش النهاردة .. ومبتردش
على موبايلها .. أنا هتجنن البنث دى راحت فين بس
شعرت "عمر" بالقلق فخرج معهما قائلاً:
-تعالوا ندور عليها فى المزرعة تانى
ذهب "عمر" الى شجرته حديث تنفرد "ياسمين" بنفسها .. لم يجدها هناك .. بحثوا فى كل
مكان بالمزرعة دون أدنى أثر لها .. آخر من رآها كان الغفير الذى قال لـ "عمر":
-فتحتلها البوابة وخرجت ومجتش من ساعتها
قال له "عمر" بلهفه:
-ما قالتش راحه فين .. فى حد كان مستنيها بره ؟
قال الغير:
-والله ما أعرف يا بشمهندس مخدمتس بالى .. وهى ما قالتليش حاجه
كان الخوف قد تمكن من "عمر" .. كان يشعر الحيرة والخوف والإضطراب .. اتصل بـ
"أيمن" و "كرم" اللذان كانا فى مهمة بالمنصورة فعادا أدراجهما الى المزرعة مرة أخرى
تجمع الجميع فى بيت "عمر" الذى قال:
-هتكون راحت فين بس .. هي متعرفش أى حد هنا
قالت "ريهام" باكيه:
-هي أصلاً مبتروحش فى مكان من غير ما تقولى أنا أو بابا .. وكمان عمرها ما سابت
موبايلها كده ومتردش علينا .. أكيد حصلها حاجه
قفز قلب "عمر" من مكانه عند سماع تلك الكلمات .. اقترب "كرم" من "ريهام" قائلاً بحنان
:
" -ريهام" هدى نفسك شوية ان شاء الله هنلاقيها

أجهشت في البكاء مرة أخرى فأمسك كوب الماء الموضوع على الطاولة وأعطاه لها قائلاً:

-طب اشربي واهدى

أخذت منه الكوب ورشفت رشفتين ثم أعطته له .. قالت "كريمة" بحنان:

-اطمنى يا حبيبتي ان شاء الله هي بخير .. وشوية وهنلاقيها هنا

قال "نور": "

-طيب خلونا يا جماعة نفكر تفكير عملى .. مثلاً لا قدر الله لما خرجت من البوابة ممكن تكون

مشيت على الطريق وعربيه خبطتها وأكد خدوها على المستشفى بياها اللي نعمله دلوقتي اننا

نتصل بكل المستشفيات اللي فى المنصورة ونسأل عنها

أغمض "عمر" عيناه فى ألم وهو يشعر بالخوف الشديد قام من فوره فقال له والده:

-على فين

قال دون أن ينظر خلفه:

-رايح المكتب اتصل بكل المستشفيات اللي فى الدليل

اتصل "عمر" بجميع المستشفيات واقسام الطوارئ دون جدوى .. شعر بالحنق والغضب

الشديد .. والخوف والفرع فى آن واحد

أخذ مفتاح سيارته وتوجه الى الخارج .. أسرع "كرم" و "أيمن" خلفه .. قال له "أيمن": "

-على فين يا "عمر"

لم يجيبه "عمر" وفتح باب سيارته .. فأشار "أيمن" لـ "كرم" بالركوب فركبا الاثنان مع

"عمر" دون سؤاله .. انطلق "عمر" بسيارته يشق طريقه خارج المزرعة .. نظر اليه

"كرم" الجالس بجواره فوجد علامات التوتر على وجهه .. كان يسير بسيارته على غير هدى

فى المناطق حول المزرعة .. كانت عيناه تبحثان عنها فى لهفة .. قالت له "أيمن" الجالس فى

الخلف:

-متقلقش يا "عمر" ان شاء الله هنلاقيها

لم يجبه "عمر" .. بل لم يسمعه أصلاً .. كل ما كان يسيطر على تفكيره .. أين هي "ياسمين"

.. وماذا حدث لها .. أى بحاله جيده .. هل أصابها سوء .. كان قلبه ينزف فى لوعه .. ظل يبحث

ويبحث دون جدوى .. مرت ثلاث ساعات لم يتوقف فيها لخطه .. بحث كان يخرج من شارع

ليدخل فى آخر .. وعيناه تبحث على الجانبين فى لهفة .. قال له "كرم": "

-مفيش فايدة من اللي بتعمله ده

هتف "عمر" فى غضب:

-أمال عايزنى أعمل ايه .. أعد فى البيت حاطط ايدي على خدى وأنا مش عارف هي فين ولا

ايه اللي حصلها

هدنه "كرم" قائلاً:

-مش قصدى أضايقك يا "عمر" بس احنا بقالنا أكثر من 3 ساعات عمالين نلف ومفيش فايدة

قال "عمر" بضيق بالغ:

-طب أعمل ايه .. لو روحنا بلغنا هيقولولنا استنوا 24 ساعة .. اعمل ايه .. اعمل ايه

اقترح "أيمن": "

-طيب تعالوا نرجع المزرعة تانى وندور فيها تانى .. يمكن تكون مثلاً تعبت وهي أعده فى

مكان وأغمى عليها مثلاً .. تعالوا ندور تانى

صاح "عمر" بغضب:

-بقولك الغفير شافها وهي خارجه من المزرعة .. يعني هي مش هناك

سكت "كرم" و "أيمن" حتى لا ينفعل "عمر" أكثر من ذلك .. كان من الواضح أن الغضب قد

بلغ من همبلغه .. لذلك أثار الصمت .. رن هاتف "أيمن" فرد قائلاً:

-أيوه يا "سماح"

تعلقت به عينا "عمر" بلهفه فى المرآه .. قال "أيمن": "

-لأ مفيش جديد .. حاضر هعرفك .. سلام
قال "عمر" بلهفه:
-ايه

-مفيش بتسأل عرفنا حاجه ولا لاء
ضرب "عمر" بقبضته بقوة على مقود السيارة قائلاً:
-هتكون راحت فين بس

ظلت "ياسمين" تبكى وتبكي .. كانت تخشى أن تتحرك من مكانها فيضربها ذلك الرجل الذي لا تراه .. وأخيراً سمعت باب يفتح ثم وقع أقدام تقترب .. ثم تنصرف مرة أخرى .. شعرت بوجود أكثر من شخص معها .. ثم خرجوا وأغلقوا الباب خلفهم .. قال "مصطفى" لـ "بسطويسي":
-كله تمام خدت منها موبايلها ومعهاش أي حاجه تانية
مد يده بالموبايل الى "بسطويسي" الذي أخرج الشريحة وكسرها ثم هشم الموبايل تحت أقدامه
.. قال له "مصطفى" بدهشة:
-ليه عملت كده ؟

قال "بسطويسي" بسخرية:
-متعرفش ان الموبايلات ممكن يتتبعوا اشارتها ويعرفوا المكان اللي الموبايل موجود فيه
هتف "مصطفى":
-آه عشان كده خلطنا نسيب موبايلاتنا فى القاهرة

-أيوه
ابتسم "مصطفى" قائلاً:
-أحبيبي يا "بسطويسي" من غيرك كنت هضيع
قال "بسطويسي" بسخرية:
-صحيح انت بشمهندس ومعاك شهادة .. لكن الدنيا بتعلم أكثر من المدارس يا هندسه
ابتسم "مصطفى" قائلاً:
-ده انت اللي هندسه
ثم قال بجديه:
-قولى بأه هنعمل ايه بعد كده .. مش هنتصل بيهم
قال "بسطويسي":
-اتقل .. كله بأوانه

بعد ساعتين أخرتين من السير والبحث .. عاد "عمر" بسيارته الى المزرعة مرة أخرى .. فتح باب البيت ليقوم "عبد الحميد" مسرعاً قائلاً بلهفه:
-فى جديد يا بشمهندس ؟
هز "عمر" رأسه نفيماً .. فوضع "عبد الحميد" يده على رأسه قائلاً:
-بنتى ضاعت .. بنتى ضاعت
قال له "عمر" بصرامة:
-لأ مضعتش .. هنلاقيها .. "ياسمين" مضعتش هنلاقيها .. سليمة وكويسة

توجه "عمر" الى أقرب مقعد وتهالك عليه .. أسد رأسه بيديه وأغلق عينيه فى ألم .. اقتربت منه امه قائله بشفقه:
-منه امه قائله بشفقه:

-انت كويس يا "عمر"
أوما برأسه دون أن يتحدث .. مسحت أمه على شعره .. ثم التفتت الى "ريهام" قائلة:
-تعالى يا بنتى ارتاحى فوق .. انتى هلكتى نفسك من العياط
قالت "ريهام" بوهن:
-لأ شكراً يا طنط أنا هروح أوضتى عشان لو "ياسمين" رجعت
قالت "كريمه" بحنان:
-طيب يا بنتى وربنا يطمنا عليها .. لو فى جديد بلغونا ولو فى جديد هنبلغكوا..
ثم أعطت "ريهام" رقم هاتفها وأخذت رقم "ريهام"
غادرت "ريهام" مع "عبد الحميد" عاندان الى غرفة "ياسمين" ينتظرونها

ثم قامت وغادرت مع "عبد الحميد" الى غرفتهما .. لحظات ووجد "عمر" هاتفه يرن .. وجد
رقماً غريب رد ليجد رجلاً يقول جملة واحدة :
" -ياسمين" عندى لو شميت ريحة البوليس فى الموضوع هقتلها وأبعثك جثتها هدية لحد
عندك .. استنى منى تليفون بعد يومين
قال ذلك ثم أغلق وترك "عمر" فى حالة من الخوف والرعب والفرع .. والحيرة

سمعتة يضحك ضحكة ساخرة قائلاً:

-متخافيش مش هنعملك حاجه .. احنا بس مستضيفينك عندنا يومين لحد ما ناخذ فلوسنا
قالت بدهشة:

-فلوس ايه ؟

ثم فهمت الأمر .. انه خطف مقابل فديه .. فقالت فى ألم:

-لو فاكرا انى واحدة غنية واقدر أدفعلك فلوس بتقى غطان .. وأهلى كمان ميقدروش يدفعوا
فلوس عشان يخلصونى

قال بسخريه:

-عارف يا حلوة .. بس حبيب القلب معاه ويقدر يدفع
قالت بدهشة:

-حبيب القلب مين ؟

"-عمر" باشا "الألفى" .. مش برده هو حبيب القلب

امتقع وجه "ياسمين" .. اقترب الرجل منها حتى استنشقت رائحة أنفاسه الخبيثه فالتصقت
بالحائط أكثر وبدأت فى البكاء .. قال لها:

-متخافيش لو حبيبك متهورش احنا كمان مش هنتهور
هم بالإصراف .. فأوقفته قائله:

-لو سمحت

قال بصوت خشن:

-أفندم

قالت "ياسمين" بحرج:

-مممكن لو سمحت .. يعنى ... أدخل الحمام
ضحك بسخرية قائلاً:

-وماله

أمسكها من ذراعها ليووقفها مشت معها .. شعرت بأنه يدخلها غرفة فى داخل الغرفة التى كانت
فيها .. ثم قال لها:

-اتفضلى

صاحت بحنق:

-أفضل ازاي يعنى وايدي مربوطة ورجلى مربوطة وعيني مربوطة

ضحك ضحكة عايله أثارت حنقها ثم اقترب وفك وثاق يديها وعينيها .. التفتت لتتنظر اليه
فوجدته يضع قناعاً على وجهه .. انن فهو ليس هاو .. ويعرف جيداً ماذا يفعل .. وجدت نفسها
فى حمام صغير كل شئ ملون باللون الاسود ورماد ملقى على الأرض .. صاح الرجل فى غلظة
:

-يلا خلصيني

التفت اليه قائله:

-اخرج الأول

خرج وأغلق الباب .. تأكدت "ياسمين" من الباب المغلق .. ثم التفتت لتتفحص ما حولها .. كل
شئ محترق .. وكأن النار اندلعت فى هذا المكان من قبل .. لا يوجد شئ على الجدران .. ولا

يوجد شئ على الأرض سوى الرماد .. شعرت بالدهشة .. ما هذا المكان الغريب .. هل هى
قريبه من المزرعة .. أم يعيده عنها .. ماذا يفعل والدها الآن .. و "ريهام" .. بالتأكيد هم قلقون

للغاية عليها فقد باتت ليلتها خارج المنزل ولا يعلمون مكانها .. و "عمر" ماذا يفعل الآن .. هل
يبحث عنها ؟ .. هل يشعر بالخوف عليها ؟ .. تنهدت فى حسرة .. انتهت من قضاء حاجتها

وحاولت فتح الباب .. دخل الرجل ووقف خلفها ليعيد ربط يديها خلف ظهرها ألقت نظرة على
الغرفة التى باتت ليلتها فيها .. نفس الشئ جدران محترقه .. رماد على الأرض .. سرير

الحميد " فكان يمضى وقته فى الصلاة والدعاء وعيناه تتضرع الى الله عز وجل بأن يحفظ له ابنته ويردها اليه سالمه .. أما "عمر" فكان حاله يرثى لها .. كان ينام فى مكانه ليستيقظ فرعاً من أقل صوت منادياً اياها .. ظلت الكوابيس تراوه كلما أغمض عيناه .. كاد أن يجن .. لم يترك شبراً الا وبحث فيه عنها .. نزل الى المنصورة وأمضى الساعات فى البحث عن "ياسمين" فى شوارعها .. دون جدوى .. كان يعلم أن ما يفعله لن يثمر عن شئ .. فلا بد أن مختطفها يخفونها فى مكان مغلق .. لكنه لم يستطع أن يجلس هكذا مكتف اليدين .. شعر بالشوق والحنين اليها .. افتقد حبيبته القريبة البعيدة .. ها هو لا يعرف مكانها .. لا يعرفه ما يفعله هذا الرجل بها .. هل أذاها .. هل لحق بها سوء .. كاد أن يجن ويفقد عقله من كثرة التفكير .. وفى المساء كان الجميع جالس فى منزل "عمر" وكأن على رؤسهم الطير .. فى انتظار اتصال ذلك الرجل .. رن هاتف "عمر" ففرز "عبد الحميد" من مكانه ووضعت "ريهام" يدها على قلبها فى خوف .. تعلقت أعين الجميع بـ "عمر" الذى رد قائلاً:

-ألو-

قال الصوت:

3- مليون جنيه تحطهم فى 3 شنط هاند باج .. كل شنطه فيها مليون جنيه .. وبتصل بيك بكرة الصبح أقولك على مكان التسليم
قال "عمر" قبل أن يغلق الرجل الخط:
-عايز أتكلم مع "ياسمين"
صمت الرجل قليلاً ثم قال:
-دقيقة وبتصل تانى

أغلق "بسطويسي" وتوجه الى "ياسمين" شعرت بالخوف لاقترابه منها فك وثاق فمها .. ثم اتصل بـ "عمر" ووضع الهاتف على أذن "ياسمين" .. قال "عمر":
-ألو-

عرفته "ياسمين" .. فأجهشت فى البكاء .. صاح "عمر" بلووعه:
" -ياسمين"

صاح "عبد الحميد":

" -ياسمين" بنتى

قال "عمر" بلهفة:

" -ياسمين" ردى عليا .. انتى كويسة ؟

قالت من بين شهقاتها:

-أنا خايقة

سحب "بسطويسي" الهاتف وأعاد تكميم فمها .. ظل "عمر" يردد:

-ألو .. "ياسمين" .. ردى عليا .. ألو

خرج "بسطويسي" وأغلق الباب وقال لـ "عمر":

-سمعتها ؟

صاح "عمر" بصوت هادر وكان بحر غاضب ثائر:

-لو لمستها هقتلك وأشرب من دمك

قال "بسطويسي" بغلظة:

-نفذ اللى أنا بقولك عليه وأنا أرجعها لك صاغ سليم .. أدامك لحد بكرة تكون جهزت الفلوس ..

واستنى اتصال منى

قال ذلك ثم حطم الهاتف تحت قدميه وأخرج الشريحه وحطمها هى الأخرى

تعلقت أعين الجميع بـ "عمر" الذى قال بصوت مرتجف:

-كلمتى .. قالتى انها خايفه

صاح "عبد الحميد": "

-ربنا ينتقم منهم .. حسبي الله ونعم الوكيل

قالت "كريمه" بلهفه:

-وقالوك عايزين ايه يا "عمر"

قال بهدوء:

3-مليون

أجهشت "ريهام" فى البكاء فهى تعلم جيداً أن والدها لا يستطيع تأمين ألف واحد من هذا المبلغ

نظر اليها "كرم" واقترب منها قائلاً:

-متعيطيش يا "ريهام" .. ان شاء الله هترجع

قال له والده:

-وهتعمل ايه لوقتى؟

نظر اليه "عمر" بجديه قائلاً:

-هدفعهم طبعاً ..حتى لو طلب أكثر من كده انا مستعد ادفعهم

أقبل "عبد الحميد" عليه وهو يبكى قائلاً:

-الهى ربنا يكرمك يا ابنى وما يوقعك فى ضيقه أبداً

ربت "عمر" على كتفه قائلاً:

-متقلقش يا عم "عبد الحميد" .. ان شاء الله "ياسمين" هترجع سليمة

ثم خرج مسرعاً وهو يقول:

-لازم أرتب المبلغ وأجهزه .. لانه هيتصل بيا بكرة عشان يقولى مكان التسليم

كان "مصطفى" يجلس واجماً داخل السيارة .. دخل "بسطويسي" وجلس بجواره .. وقال اليه

:

-ايه مالك يا هندسه .. خايف ولا ايه

قال "مصطفى" بشرود:

-لأ مش كده ..بس بفكر

-فى ايه؟

التفت الى "بسطويسي" قائلاً:

-الراجل مستعد يدفع 3 مليون عشان خاطر البنيت اللى أعده جوه دى

-مش فاهم

قال "مصطفى" باستغراب:

-يعني ده واحد قدامه نسوان أشكال وألوان .. والبت دى مفياش أى حاجه مميزة ..بت عادية

زى أى واحدة .. ايه اللى يخليه يدفع فيها مبلغ زى ده

ابتسم بخسريه قائلاً:

-البت مش وحشة برده .. وبعدين كل واحد ومزاجه

-أنا ما قولتش وحشة .. قولت عاديه .. يعني ميدفعش فيها مبلغ زى ده .. ده لو جوزها كنا

قولنا ماشى .. لكن ده واحد مبيربطهوش بيها أى حاجه

قال "بسطويسي" بمزاح:

دخل "بسطويسي" وجذب "ياسمين" الذى تعالت صرخاتها المكتومة فصرخ "عمر: " -انت بتعمل ايه ؟ .. سيبها متلمسهاش
قال له "بسطويسي: "

-معلش بأه يا هندسة كان نفسي أسملهاك سليمة .. بس الظروف حكمت
ثم قال لـ "ياسمين" التى حاولت الأفلات من قبضته:
-لا خليكي حلوة عشان مزعلش منك
خرج وهو يدفعها بيده .. و"عمر" يصيح:

-والله لقتلك وأشرب من دمك لو عملت فيها حاجه .. سمعى .. "ياسمين" .. "ياسمين"
سار الرجلان معها يدفعها "بسطويسي" بيده .. ساروا بين الأشجار والزرع لا يخترق سكون
الليل الا صوت شهقات "ياسمين" .. ظلت تردد الشهادتين بقلبها وهى تعلم أن الموت قادم لا
محاله .. ظلت تستغفر وتدعو ربها ألا تتألم .. ظلت تفكر فى الموت .. كيف ستشعر به بعد
لحظات .. كيف تفارق روحها جسدها .. هل ستتألم .. هل ستصرخ .. هل ستقوى على الصراخ
.. أين سيكون مصيرها بعد الموت .. الجنة أم النار .. ظلت تسترجع شريط ذكرياتها .. وأعمالها
.. وأخطائها .. تمنى العودة للوراء .. لإصلاح تلك الأخطاء .. لكن .. الوقت أزف .. ولا عودة
الى الوراء .. بعد دقائق .. وربما لحظات .. ستلقى ربها وتقف بين يديه .. كان مرعوبة خانفه
.. ترى سيف ستكون ضمة قبرها التى لن ينجو منها أحد .. هل ستكون ضمة حانية كضمة الأم
لوليها .. أم ضمة تهشم معها جسدها وتختلط فيها عظامها .. شعرت بالخوف .. بل بالرعب ..
بل بالفزع .. ما مصير "عمر" .. "هل سيلقى نفس مصيرها .. هل سيقتلوه مثلها .. خافت عليه
.. أين سيكون مصيره .. جنة أم نار .. الى أن ستوصله أعماله .. كانت خانفه عليه .. وعلى
نفسها.

حاول "عمر" تحرير نفسه .. كادت يده أن تتمزق .. بل تمزق رسغه بالفعل وسال دمه .. كان
يجاهد ليخرج يده من قيدها .. لينقذ "ياسمين" .. حبيبته .. ونور عينه .. استطاع تحرير يده
والدماء تنزف منها .. أزاح عصبه عينه .. وأخذ يحاول تحرير قدمه كانت السلسلة مثبتة بحلقة
الى الأرض .. لن يستطع نزعها .. نظر حوله .. لا يوجد شئ .. الا الرماد .. ما هذا .. هذا
المكان .. انه يتذكره جيداً .. هذا المنزل القديم المحترق .. هذا المكان .. دخله من قبل .. يعرفه
.. تلك الغرفة الصغيرة .. هذا الفراش المحترق .. نعم انه يعرفه .. نعم هو نفسه .. أسرع
وأخرج هاتفاً صغيراً كان قد أخفاه فى حذائه .. فتحه واتصل بـ "كرم" قائلاً بلهفه:

-أيوة يا "كرم" أنا "عمر"

"-عمر" انت فين وايه اللي حصل

قال "عمر" بنفاد صبر:

-اسمعى كويس .. أنا فى مكان جنب المزرعة هو صفاك توصله ازاي .. اطلب البوليس
وتعللى على هناك بسرعة

أعطاه "عمر" وصف المكان .. ومن حسن حظه أن "كرم" و "أيمن" كانا قد عادا الى
المزرعة بعدما فقدها فى المنصورة .. ما هى الا دقائق .. ودخل "كرم" البيت المحترق ..
استطاع الاثنان تحرير "عمر" الذى قال بلهفه:

-اطلبوا البوليس بسرعة .. وكل واحد فيكوا يدور فى جهه .. الراجل اللى خطف "ياسمين"
خدها عشان يقتلها

انطلق "عمر" فى اتجاه الأشجار والذى ظن أنه الاتجاه الذى ذهب فيه الرجلان حيث الأرض
الشاسعة التى تخلو من البشر فى مثل هذا الوقت .. ظل يرقص وينادى بعلو صوته:

"-ياسمين" .. "ياسمين"

-ليه ؟ .. لقيتها
أوما "عمر" برأسه قانلاً:
-أبوة لقيتها .. بس خليك مكانك ثوانى

كانت "ياسمين" جالسه خلف الصخرة التى تستند عليها فلم يراها "كرم" .. عاد "عمر" اليها .. فنظرت اليه بأعين مندهشه وهو يخلع الجاكت الذى يرتديه ثم جثا على ركبتيه ليلبسها اياه فى رقه كأنها طفل صغير .. لم يظهر من جسدها الا بعض من ذراعها بسبب ذراع بلوزتها الممزق .. لكنه أخفى تلك الرقعات الصغيرة بالجاكيت الذى ألبسها اياه وأغلقه .. ثم ولدهشتها وجدته يخلع قميصه ثم يمسح على شعرها بيده يرتبه الى الخلف ويضعه بداخل الجاكت الذى ترتديه ثم يطوى قميصه نصفين ويضعه على شعرها المناسب ليخفيه تماما .. نظر فى عينيها برقه أذابت قلبها .. وانتقل الدفء من عينيها الى جسدها كله .. ابتسم لها ابتسامه عذبه وهمس قانلاً:
-بغير عليكي

ساعدها على النهوض .. حاولت قدر الإمكان أن تتبعد عنه وتسير بمفردها .. لكنها شعرت بدوار شديد فتهافت .. كانت لا تستطيع حتى الوقوف على قدميها ..حاول أن يحملها فقالت بوهن وبصوت مبجوح من كثيرة الصراخ والبكاء:
-لأ

قال "عمر" بحزم:
-انتى مش عارفه حتى تقفى على رجلك

حملها بين ذراعيه دون أى يابى لاعتراضها .. وسار بها وهو ينظر اليها .. أسندت رأسها على كتفه فى وهن .. كانت تشعر بجوع شديد مزق أحشائها وألم فى كل عظام جسدها الضعيف وبدوار يعصف برأسها .. لكن وسط كل تلك الآلام شعرت بالراحة وهى بين ذراعيه .. شعرت بالأمان وهو بجوارها وهى تعلم أنه لن يسمح لأحد بأن يؤذيها .. حاولت أن تقاوم وتبقى عينيها مفتوحتين .. لكنها لم تستطع كانت طيلة الأيام الماضية تخشى النوم .. فيصيبها أحد الرجلين بمكروه .. لكنها الآن لا تخشاه .. لأنها بين يدين تعرف أنهما ستحميانها .. أغمضت عينيها لتغرق فى سبات عميق أقرب الى غيبوبة

نظر اليها "عمر" فى حنان وهو سائر بها .. شعر بأنه يحمل قلبه بين ذراعيه .. كان سعيداً ورأسها موضوع فوق قلبه .. وهى سليمة .. لم يصبها سوء .. وعادت اليه .. ولن يتركها تفلت منه أبداً .. أدخلها سيارة "كرم" وجلس بجوارها .. انطلق "كرم" بالسيارة فى طريقه الى المستشفى .. نظر "كرم" اليهما فى المرآه قانلاً:
-هى كويسه ؟

أوما "عمر" برأسه .. وأخذ ينظر الى وجه حبيبته النانمه فى حضنه .. قانلاً بقلق:
-أنا مش عارف هى نايمة ولا أغمى عليها .. بس هى بتتنفس

قال "كرم": "

-ربع ساعة بالكثير وهتكون فى المستشفى .. متقلقش هو أكيد ده بسبب تعب اليومين اللى فاتوا كفايه الرعب اللى شافته

نظر اليها "عمر" مرة أخرى فى حنان .. لف ذراعيه جيداً حولها وكأنه لا يريد قيد شعره أن تفصله عنها .. أزاح قميصه قليلاً عن شعرها ليطلع عليه قلبه حانيه هامساً:

-حبيبتى .. مش هسمحك تبعدى عنى أبداً
أغمض عينيه عن كل ما يراه ليشعر فقط بحبيبته التى بين أحضانه .. بأنفاسها الساخنه التى
تلفح وجنته .. وصوت تنفسها المنتظم .. ودقات قلبها التى يشعر بها على صدره.

الفصل الخامس والثلاثون

أوقف "كرم" سيارته أمام إحدى المستشفيات الخاصة .. نزل "عمر" من السيارة وهو يحمل "ياسمين" ويلقى نظرة عليها بين لحظة وأخرى .. توجه إلى مكتب الإستقبال فأدخلوهم أحد الغرف .. وضعها "عمر" على السرير برفق .. اقتربت منها الممرضة فتراجع "عمر" قليلاً للخلف ينظر إلى "ياسمين" بقلق .. قامت الممرضة بتمديدتها وتغطيتها وقالت:

-ثوانى هروح أنادى للدكتور

التفت "عمر" إلى "كرم" قائلاً:

-روح أنت يا "كرم" اتصل بـ "أيمن" وشوف وصل لايه مع البوليس .. وروح هات والدها وأختها من المزرعة ..

أوما "كرم" برأسه وهم بالخروج .. لكن "عمر" أوقفه قائلاً:

-معلش يا "كرم" عارف انى تاعبك معايا وشاغلك بمشاكلى

قال "كرم" بسرعة:

-عيب عليك يا "عمر" هو احنا مش اخوات ولا ايه .. أنا لو كنت مكانك عارف انك هتعمل

عشاني أكثر من اللي أنا بعمله

ربت "عمر" على كتفه شاكرأ اياه .. خرج "كرم" فالتفت "عمر" إلى "ياسمين" الممدده على

الفراش .. اقترب منها ومسح بظهر أصابعه على وجنتها .. لحظات وعادت الممرضة بصحبة

الطبيب .. وقف الطبيب مكان "عمر" الذى رجع قليلا إلى الوراء وهو يتابع ما يحدث .. التفت

الطبيب إلى "عمر" قائلاً:

-ايه اللي حصلها بالطببط

قال "عمر" بحزن:

-كانت مخطوفه التلات أيام اللي فاتوا .. ولما لاقيتها كانت كويسه .. وفجأة نامت .. أنا معرفش

هى نامت ولا هى أغمى عليها .. جبتها وجيت بها على هنا على طول

أوما الطبيب برأسه .. ثم التفت إلى "ياسمين" .. فتح سوسته الجاكيت الذى ألبسها اياه

"عمر" ثم شرع فى فك أزرار بلوزتها حتى يدخل سماعته الطبيه لتفحص تنفسها .. شعر

"عمر" بالإختناق وبالنييران تشتعل بداخله وهو يرى أصابع الطبيب تفتح أزرار ملابسها واحد

تلو الآخر .. اقترب منه فجأة وأمسكه ذراعه بحزم قائلاً:

-لو سمحت .. مفيش دكتورة فى المستشفى دى ؟

التفت إليه الطبيب قائلاً بدهشة:

-أيوة فى

قال "عمر" بحزم:

-طيب لو سمحت خلى الدكتورة هى اللي تفحصها

نظر اليه الطبيب بحده قائلاً:

-وايه المشكله يعنى لو كشفت عليها أنا

قال "عمر" ببرود:

-لا .. عايز دكتورة .. يا إما هاخدها مستشفى تانيه

نظر اليه الطبيب بحنق .. ثم أمر الممرضة بإحضار الطبيبة المناوبة وغادر الغرفة .. اقترب

"عمر" منها مرة أخرى .. مسح بأصابعه حبات العرق التى تكونت على جبينها وهو ينظر

ليها فى حنان .. لحظات وحضرتك الطبيبة .. رجع "عمر" للخلف ليفسح لها المجال .. أشاح

"عمر" بعينيه عما كشفته الطبيبة من جسدها .. أنهت الطبيبة فحصها ثم التفتت إلى الممرضة

وطلبت تعليق محلول لها .. وأعطتها بعض التعليمات الأخرى .. نظر "عمر" الى الطبيبة قائلاً
بقلق:

- هي كويسه ؟

أومات الطبيبة برأسها قائله:

-أبوة متقلقش .. هي بس واضح انها مرهقة أوى .. وكمان عندها هبوط وضغطها واطى ..
متقلقش هنعلقها محاليل وهتبقى كويسة ان شاء الله .. هي محتاجه راحه مش أكثر
قال "عمر" بلهفه:

-يعني هتفوق امتى

ابتسمت قائله:

-انت جوزها

هز "عمر" رأسه نفيًا:

-لأ خطيبها

-متقلقش زى ما قولتلك هي محتاجه راحه .. وهتفوق امتى على حسب .. هي من الواضح انها
محتاجه للنوم أكثر من أى حاجه تانية .. ممكن تفوق على بكره وتبقى كويسه ان شاء الله

شكر "عمر" الطبيبة التى غادرت بعد أن أعادت التعليمات على الممرضة مرة أخرى .. أنهت
الممرضة تعليق المحلول .. وحقنت به الأدوية التى وصفتها الطبيبه .. وأزاحت قميص "عمر"
من على رأسها وأعطته اياه فارتداه .. ثم خرجت من الغرفة وأغلقت الباب خلفها .. اقترب
"عمر" من فراشها وجلس بجوارها .. يتأملها وهي نائمة .. شعر بحنان جارف تجاهها ..
أرادها أن تستيقظ وتفتح عينيها ليطمئن أنها بخير .. لكم اشتاق لرؤية عينيها .. أمسك كفها
الموضوع به الكانيولا ووضع بين كفيه .. تحسس بأصابع يده الأخرى العروق التى ظهرت
حول الكانيولا .. كان يبدو عليها الضعف الشديد .. رق قلبه لها .. لكم قاست وتعذبت فى الأيام
الماضية .. بل وقبل ذلك أيضاً .. أراد أن يعوضها عن كل ما قاست .. وكل ما عانتها من قبل ..
ظل يتحسس كفها ويتأملها حتى سمع طرقات على الباب نهض وما كاد يصل الى الباب حتى
فتح والداها الباب وبصحبته "ريهام" .. "أقبل الاثنان عليها فى لهفة .. قال والداها فى هلع:
-بنتى حبيبتى .. "ياسمين" .. ايه اللى حصلها؟

طمأنه "عمر":

-متقلقش هي كويسه .. الدكتورة قالت انها نايمه من التعب وممكن تصحى على بكره
جلست "ريهام" بجوارها تبكى فى صمت .. ثم خرجت من الغرفة .. التفت "عبد الحميد" الى
"عمر" قائلاً:

-ايه اللى حصل بالطبط

تنهد "عمر" فى حسرة قائلاً:

-لسه معرفش أنا خدتها وجيت على هنا على طول .. وسبت "أيمن" هناك مع البوليس

عادت "ريهام" حاملة معها بونيه للرأس .. ألبستها اياه لتخفى شعرها المنساب ..نظر
"عمر" الى "ريهام" مبتسماً .. ثم خرج من الغرفة ليجد كل من "كريم" و "أيمن" .. اتجه
اليه "أيمن" قائلاً:

-ها ايه الأخبار ؟

أوماً "عمر" برأسه وقال بوهن:

-كويسه الحمد لله .. قولى انت عملت ايه

قال "أيمن":

-قبضوا على واحد من الاتنين .. والثانى هرب بس بيدوروا عليه

سأله "عمر":

- عرفوا هما مين ؟
هز "أيمن" برأسه نفياً ثم قال:
-لا لسه هما خدوه على القسم عشان يبدأوا التحقيق .. وعلى فكرة الفلوس معايا فى العربية ..
وكمان جهز نفسك عشان تروح القسم لأن أكيد هيطلبوا أقوالك .. وكمان أقوال "ياسمين"
قال "عمر":
-بكرة ان شاء الله هروح القسم .. لكن النهاردة مش هقدر أمشى من المستشفى واسيبها ..
وكمان هتصل بالأستاذ "شوقى" يجيلى الصبح ان شاء الله .. لازم اللى عمل كده ياخذ جزاءه ..
مش هرتاح الا لما يتسجنوا هما الاتنين
قال "كرم" مطمئناً اياه:
-متخفش ان شاء الله هيتسجنوا .. القضية لبساهم لبساهم

رن هاتف "عمر" فرد قائلاً:
-أيوة يا ماما
قالت "كريمة" بلهفه:
-أيوة يا "عمر" طمنى على "ياسمين"
-بخير يا ماما الحمد لله .. هى نايمه دلوقتى والدكتورة طمنتنى عليها
قالت بارتياح:
-الحمد لله .. بكرة ان شاء الله أنا وباباك هنجى نزورها
-ان شاء الله يا ماما
-هتبات عندك ولا هترجع
-لأ هبات مش هقدر أسيبها فى المستشفى وأجى
-باباها وأختها عندك مش كده ؟
-أيوة
-طيب يا حبيبي لو احتجت حاجة كلمنى .. وعلى فكرة حسابى معاك بعدين عشان روحت
لوحدك لمجرم زى ده من غير ما تعرفنى
-ماما نتكلم بعدين فى الموضوع ده
-ماشى يا "عمر" .. وخلي بالك من نفسك .. وابقى طمنى عليها
-ماشى يا ماما مع السلامة
-مع السلامة

قضت "ريهام" ليلتها بجوار أختها .. أما "عبد الحميد" و "عمر" جلسا على مقاعد الإنتظار
خارج الغرفة .. كان "عمر" على تواصل طيلة الليل مع "كرم" و "أيمن" اللذان يحضران
التحقيقات بقسم الشرطة وبالمكان الذى تم اختطافها فيه
فى الصباح .. ذهب "عبد الحميد" لإحضار قهوة له ولـ "عمر" .. فجأة فتحت "ريهام" باب
الغرفة ونظرت الى "عمر" قائله:
-بابا فين ؟

قال "عمر" بلهفه:
-ثوانى وراجع .. هى فاقت ؟
أومات برأسها إيجاباً وقالت:
-أيوة .. هروح أنادى للدكتور
دخل "عمر" ليجد "ياسمين" وقد فتحت عينيها تنظر من نافذة الغرفة .. اقترب منها .. أحست
بوجوده .. نظرت اليه .. تلاقت نظراتهما فى صمت .. كان "عمر" ينظر اليها بشوق ولهفه
وحنان و .. حب .. أما هى فكانت تتذكر ما فعله من أجلها الليلة الماضية .. كيف خاطر بحياته

.. كيف قدم ماله .. كيف حماها .. كيف أنقذها .. شعرت بقلبيها يخفق لهذا الرجل الواقف أمامها .. وجدته يقترب أكثر .. جلس بجوارها .. فانتبهت وأشاحت بوجهها قائلة بجرج بصوت خافت ومبحوح من أثر تعب الليلة الماضية:

-لو سمحت مينفعش كده

تجاهل ما قالت .. نظر اليها بحنان قائلاً:

-انتي كويسه .. كنتي خايف عليكي أوى

أعادت ما قالت بجرج أكبر وهي تحاول أن تبتعد عنه:

-لو سمحت بجد مينفعش كده

قام من مكانه ووقف بجوارها ونظر اليها وابتسم بخبث قائلاً:

-ايه المشكلة يعني ما انتي كنتي فى حضنى امبارح

احمرت وجنتاها بشدة ونظرت اليه نظرة صارمه .. ضحك "عمر" قائلاً:

-لأ كده اطمنت عليكي .. الدم رجع ينور وشك تانى

صمت برهه ثم قال وهو ينظر اليها نظرة متوعده:

-اعملى حسابك .. أنا مش هقدر أستحمل الوضع ده كثير .. أنا سبتك تدلعي بما فيه الكفايه ..

بس خلاص صبرى نفذ

نظرت اليه باستغراب قائلة:

-يعني ايه ؟

لمعت عيناه بشوق قائلاً بابتسامه عذبه:

-يعني خلاص معدتش قادر أبعد عنك لحظة .. لولا انك تعبانه والظروف اللي انتي فيها أنا كنت

جيت المأذون وكتبت عليكي حالاً

خففت عينها وتلون وجهها مرة أخرى .. تأملها مبتسماً .. لحظات ودخل "عبد الحميد"

واقترب منها قائلاً:

"-ياسمين" .. عامله ايه دلوقتي

ابتسمت له قائلة:

-الحمد لله يا بابا .. اطمن

مسح على رأسها وجلس بجوارها مردداً:

-الحمد لله والشكر لله .. الحمد لله والشكر لله

حضرت الطبيبة وطمأنتهم على حالها ثم دعت لها بالشفاء وخرجت .. حضرت "ريهام" ومعها

طرحه وساعدت "ياسمين" على ارتدائها .. سألتها "عمر" باهتمام:

-احكيلى اللي حصل بالظبط يا "ياسمين"

تنهدت "ياسمين" ثم قصت عليهم كل شئ بدءاً من مكالمة "مها" .. وحتى وجدها "عمر" ..

صاح "عمر" بحنق:

-يعني اللي اسمه "مصطفى" ده كان واحد من اللي خطفوكى

أومأت برأسها وقالت بمراره:

-أيوة .. وعشان كده كانوا عايزين يقتلوني .. لانى عرفته من صوته

قل "عبد الحميد" بغضب:

-لا حول ولا قوة الا بالله .. ده طلع بجد شيطان .. يارب يقبضوا عليه ويعدموه عشان نخلص

منه

نظر "عمر" الى علامات الألم على وجهها .. احتار فى تفسيرها .. جاءت الشرطة لأخذ أقوالها

وأقوال "عمر" .. خرج عم "عبد الحميد" و "ريهام" واستمع الظابط لرواية "ياسمين" ..

كانت تقص عليه ما حدث بالتفصيل وهو يقطعها بالأسنله ..حتى سألتها:

-وازاى عرفتى انه طليقتك .. انتي قولتى انهم كانوا مغميين عنكي ومكنش حد فيهم بيتكلم

أدامك

قالت بارتباك:
- هو اتكلم فى مرة فسمعت صوته وعرفته
سألها الطابط:
- اتكلم قالك ايه ؟
توترت أكثر ثم قالت بصوت خافت:
- شتمنى
- ليه ؟
صمتت قليلاً وهى تتجنب النظر الى "عمر" الذى يراقبها باهتمام .. ثم قالت:
- عشان زقيته برجلي ووجعته
قال الطابط:
- ليه هو حاول يتهجم عليكى ؟

أومات برأسها وهى تنظر الى أسفل .. انفجرت الدماء فى وجه "عمر" واشتعل غضباً .. فأكمل الطابط قائلاً:
- على العموم احنا مسكنا شريكه .. وجرى البحث عن طليقتك .. وكمان جنبنا اللى اسمها الدكتور "مها" أنكرت كل حاجة فى الأول خاصة ان الخط اللى كلمتك منه مش خطها ومش باسمها .. بس لما شدينا عليها اعترفت خاصه لما أوهمناها ان عندنا أدلة ضدها .. وان شاء الله قريب هنمسك طليقتك هو كمان

أومات برأسها فى صمت .. أعطاهما المحضر لتمضى عليه هى و"عمر" .. انصرف الطابط ومن بصحبته .. فالتفت اليها "عمر" قائلاً بحزم:
- متقلقيش لو معرفوش يوصلوله أنا هلاقيه وأخليه يندم على اليوم اللى اتولد فيه
نظر والى التصميم على وجهه .. فأكمل قائلاً:
- أنا هعرفه ازاي يتعرض لمراتى
خفق قلبها لكلمته .. نظرت اليه مندهشة فوجدته ينظر اليها بحنان مبتسماً:
- أيوة مراتى

دخلت "ريهام" وأعقبها والدهما .. بعد فترة جاءت "كريمه" و "نور" و "سماح" لزيارتها والإطمئنان عليها .. سعدت "ياسمين" للغاية بتلك الزيارة وبالشفاف كل من تحبهم حولها.

فى نهاية اليوم سمحت الطبيبة لـ "ياسمين" بالمغادرة .. عاد الجميع الى المزرعة .. بقيت "سماح" مع صديقتها فى غرفتها فى حين كان "أيمن" و "كريم" فى منزل "عمر" .. جلست "سماح" بجوار "ياسمين" على السرير قائلة:
- قلقتيكى عليكى .. كنت حسه انى هموت من الرعب
ابتسمت "ياسمين" فقالت "ريهام":
- كنت حسه انى عايشة فيلم رعب .. أختى مخطوفه واللى خطفها طالب فديه .. حاجه ولا فى الأحلام .. دايماً بقرأ الحوادث دى فى الجرايد بس عمرى ما تخيلت انها تحصل معانا
قالت "ياسمين":
- الحمد لله انها جت على أد كده
قامت "ريهام" قائلة:

- هروح أظمن على بابا .. اليومين اللى فاتوا الضغط على عليه أوى
شعرت "ياسمين" بالأسف .. لأنها سبب تعب والدها .. نظرت اليها "سماح" قائلة:

-أكيد التجربة كانت صعبة عليكي أوى
تنهدت "ياسمين" بأسى قائله:
-جداً .. كنت مرعوبة .. مكنتش فى الأول عارفه هما عايزين منى ايه .. ولا هما مين .. وبعد
ما عرفت اترعبت أكثر
ثم قالت بآلم:
-أكثر حاجه أمتنى .. لما اكتشفت ان "مصطفى" واحد منهم .. بجد مكنتش متخيله ان
الانسان ده جواه السواد ده كله
قالت "سماح" بتقزز:
-بجد حسبي الله ونعم الوكيل فيه .. ربنا ينتقمك منه
قالت "ياسمين" بصوت متألم:
-تخيلى لو كنت لسه مراته لحد دلوقتى .. كان زمانى كرهت نفسى .. الحمد لله انى خلصت منه
-الحمد لله .. فعلاً ربنا خلصك منه
ساد الصمت قليلاً .. ثم قالت "سماح" مبتسمه:
" -أيمن" قالى ان "عمر" كان هيموت من خوفه عليكي .. أول ما طلبوا الفدية مترددش انه
يدفعها .. كان أهم حاجه عنده انك ترجعى سليمه
ابتسمت "ياسمين" فى خجل قائله:
-عمرى ما هنسى اللى عمله معايا .. كان خايف عليا أكثر من خوفه على نفسه .. كان شجاع
جداً وهو بيوواجههم وواقف أدامى يحمينى ..لما سمعت صوته فى الأوضه أول ما دخلوه اطمنت
أوى .. حسيت ان مجرد صوته بيطمنى .. ولما خدوني عشان يقتلونى .. كنت حسه انى خايفه
عليه .. وأعدت أفكر هياذوه ولا لأ
ثم استطردت قائله بتأثر:
-تعرفى يا "سماح" انه لما لقى هدمى اتقطعت و شعرى مكشوف قلع الجاكيث والقميص
بتوعه و غطى جسمى وشعرى بيهم
ابتسمت "سماح" .. فأكملت "ياسمين": "
-متتصوريش أنا كنت حسه بيايه .. فأكرة آخر مرة كنت عندك لما قولتلك انى مش عارفه
طباعه وخايفه يخلىني اقلع الحجاب او يلبسنى مكشوف او ميغرش عليا .. لما عمل كده حسيت
ان مخاوفى دى راحت .. أنا عارفه انه عمل كده غيره .. يعنى مش عشان حلال وحرام .. بس
الغيره اللى عنده دى بتديني أمل ان جواه حاجه كويسه .. هو بس ملقاش اللى يوجهه .. عارفه
مخلاش حتى "كرم" يقرب منى ويشوفنى وأنا فى الحالة دى
أكملت مبتسمه:
-تعرفى ان الممرضة اللى كانت معايا قالتلى خطيبك ده بيحبك أوى وبيغير عليكي أوى ..
استغربت .. لقيتها بتقولى انه مرضاش يخلى الدكتور يكشف عليا وأصر انهم يجيبولى دكتور
.. وقالهم لو مجبتولهاش دكتوراة أنا هخدها مستشفى تانيه ..متتصوريش لما قالتلى كده أنا
حسيت بيايه .. بجد على فى نظرى أوى أوى .. وحسيته راجل بجد
صمتت قليلاً ثم قالت وابتسامة جميلة فى عينيها وعلى شفثيها :
-أنا بحبه أوى يا "سماح"
ضحكت "سماح" قائله:
-الله أكبر .. بركاتك يا "عمر" .. كان لازم تتخطفى يعنى عشان نسمع الإعتراف ده
ضحكت "ياسمين" فى خجل قائله:
-أنا كنت شكه بس خلاص دلوقتى اتأكدت .. أنا فعلاً بحبه يا "سماح" .. واللى حصل ده كله
خلانى أشوفه راجل بجد .. وحسه انه بشوية توجيه ممكن حاجات كتير فى حياته تتغير
ابتسمت "سماح" قائله بخبث:

-طبعاً عشانك يا قمر ممكن كل حاجه فى حياته تتغير
عادت "ريهام" لتتظر اليهما قائله فى مرح:
-ايه مش تضحكونا معاكوا .. والا الاكتاب والعياط لـ "ريهام" .. والابتسامه اللي من الودن
للودن لـ "سماح"
قالت "سماح" بمرح:
-أخيراً أحتك اعترفت وقالت : بحبه يا "سماح"
زغرطت "ريهام" قائله:
-أخيراً .. يا فرحة قلبك يا "عمر" يا ابن طنط "كريمة" .. أخيراً نلت الرضا السامى و
"ياسمين" بذات نفسها قالت انها بتحبك
قالت "ياسمين" بدلع :
-بصراحة بعد اللي عمله دخل مزاجى
قالت "ريهام" فى مرح:
-دخل مزاجك بس .. ده المفروض يدخل عقلك وقلبك وشرابينك وكل حته فيكي .. يعني
المفروض لو عملناك تحليل شامل نلاقى "عمر" جواكى عمال ينتشر وتوغل ويتسرب
ويستمر ويستمر ويستمر
ضحكت "سماح" .. نظرت اليهما "ياسمين" مبتسمه:
-انتوا في ايه مالكوا .. ياريتنى مكنتش فتحت بقى أنا غلطانه أصلاً
"ريهام" بمرح:
-لأ أبوس ايدك .. احنا طلعت عيننا عشان ناخذ منك الإعتراف ده .. اوعى ترجعى فى كلامك ..
خلى الدنيا تمشى حلو بأه .. ونعمل خطوبتى وخطوبتك فى يوم واحد
ابتسمت "سماح" وقالت:
-حد كان يصدق ان احنا التلاته ناخذ 3 صحاب
ابتسمت "ياسمين":
-لأ بصراحة عمرى ما كنت أتخيل
"ريهام" مبتسمه:
-ولا أنا .. سبحان الله
ثم نظرت الى "ياسمين" قائله:
-أنا من أول يوم وأنا بقولك انى حسه انى البلد دى وشها حلو علينا وهنطلع منها بفردتين ..
ادينا خدنا أحلى فردتين فى البلد
لم تتمالك "سماح" و "ياسمين" نفسيهما من الضحك .. قالت "سماح":
-أه لو يسمع "كرم" موضوع الفردتين دول مكنش عتقك يا "ريهام"
نظرت "سماح" اليهما قائله:
-احم احم فى خير كده عايزة أقولكووا عليه
نظر اليها كل من "ريهام" و "ياسمين" .. فابتسمت قائله:
-أنا حامل
صاحت الفتاتان فى فرح .. قالت "ياسمين":
-بجد يا "سماح" .. ألف ألف مبروك
قالت "ريهام" فى سعادة:
-مبروك يا "سماح" ربنا يتمم حملك على خير يارب
قالت ضاحكة:
-الله يبارك فيكووا .. أنا عرفت فى اليوم اللي "ياسمين" اتخطفت فيه .. والحمد لله أهى رجعت
وسطينا تانى قولت أبشركوا بالخبر ده
قالت "ياسمين" بسعادة:

-بجد ده أحلى خبر سمعته .. ياه بقالى فترة طويلة مفرحتش كده .. يعني هبقى أخيراً خالتو
عانتها "سماح" قائله:
-طبعاً يا "ياسمين" انتى أكثر من أختى

صاح "كرم" بمرح:
-وأخيراً هنشوف ابن واحد مننا .. أنا كنت بدأت أفقد الأمل خلاص
قال "عمر" لـ "أيمن" بسعاده:
-ألف ألف مبروك يا "أيمن" .. بجد فرحتك أوى
قال "أيمن" مبتسماً:
-ربنا يكرمك يا "عمر" .. يلا اتجدعنوا انتوا كمان خلونا نفرح بيكوا بأه بدل أعدتكو كده ..
بأه شكلكوا وحش
ضحك "عمر" .. صمت قليلاً ثم قال:
-أنا عايز أكلم أبوها تانى .. بس خايف يفتكر انى يستغل الموقف
قال "أيمن":
-لأ الموضوع مفيهوش استغلال فرص ولا حاجة .. يعني ده جواز
قال "عمر" بقلق:
-خايف يفتكر انى بضغط عليهم عشان يعني اللى عملته مع "ياسمين"
قال "كرم" مؤكداً:
-لأ محدش هيظن كده .. المهم "ياسمين" نفسها انت مالى ايدك منها المرة دى ولا هترفض
زى المرة اللى فاتت
فكر "عمر" قليلاً ثم قال:
-بصراحة مش مالى ايدي أوى
ثم ابتسم بخبث قائلاً:
-بس برده ايدي مش فاضيه
قال "كرم" بمرح:
-يبأه على خيرة الله .. توكل على الله وكلم أبوها تانى
ابتسم "عمر" قائلاً:
-بس المرة دى أنا مش هتكلم فى خطوبة
صاح "كرم" قائلاً:
-الله .. اشمعنى انت .. أنا كمان مش عايز خطوبة
قال "أيمن" بمرح:
-الله الله أهو هو ده الكلام .. يلا عشان نخلص منكو انتوا الجوز مرة واحدة

اتصل "أيمن" بـ "سماح" ونزلت من عند صديقتها ليعودا الى منزلها .. سألته عن تطورات
التحقيقات فأجابها قائلاً:
" -بسطويسي" و "مها" اتقبض عليهم .. والبوايس بيدور على "مصطفى" متخفيش أيام
ويتقبض عليه ان شاء الله
قالت "سماح" بحنق:
-ربنا ينتقم من اللى اسمه "مصطفى" ده .. ده هيكون عبرة ان شاء الله ولسه عقابه عند ربنا
.. ده بجد انسان ظالم أوى

نامت "ريهام" .. وظلت "ياسمين" ساهره .. تفكر فى كل ما حدث لها .. وفيما قاسته منذ وفاة

والدتها رحمها الله .. ثم وصلت بتفكيرها الى "عمر" .. عندما تذكرته ابتسمت .. نعم لقد أحبته .. دخل قلبها رغم الأسوار العالية التي بنتها حوله .. ملك مشاعرها وكل كيائها .. برجولته وغيرته وخوفه عليها .. التفتت الى هاتفها لتراه يضىء فى صمت .. نظرت فوجدت رقماً لا تعرفه .. تعجبت من الذى يتصل بها فى هذا الوقت .. ظنت بأنه ربما يكون "مصطفى" .. شعرت بالخوف .. لم ترد .. اتصل مرة أخرى .. غلبها الفضول ففتحت الخط دون أن ترد .. ولدهشتها سمعت صوت "عمر" يقول:

-ازيك يا "ياسمين"

صمتت ولم تجب .. كانت مندهشة من اتصاله بها .. أكمل "عمر" بصوت حانى:

-كنت قلقان عليكى وحبيب بس أسمع صوتك

صمت قليلاً ثم قال:

-وحشتيني أوى

خرجت "ياسمين" من صمتها قائلة:

-أنا أسفة مضطرة أقفل

قال بصوت دافئ:

-ماشى .. أنا بس كنت حابب أسمع صوتك .. ممكن أطلب منك طلب

صمتت .. فأكمل قائلاً:

-أنا واقف تحت البلكونه .. ممكن بس تبصيلي .. وحشتيني الساعتين دول .. عايز بس أشوفك

شعرت بسعادة غامرة .. لكنها قالت بخفوت:

-أنا أسفه مش هينفع

طال صمته ثم تنهد قائلاً :

-طيب خلى بالك من نفسك .. لو احتجتى أى حاجه ده رقمى سيفيه عندك .. تصبى على خير

يا حبيبتي

خفق قلبها بشدة عندما سمعت منه "حبيبتي" .. أغلقت .. وقامت تفتح باب الشرفة بهدوء .. وقفت خلف الستارة .. رآته بالفعل .. كان ينظر بإتجاه الشرفة .. وقف قليلاً ثم انصرف عائداً الى بيته .. تابعته "ياسمين" بعينها والابتسامه على شفيتها

فى اليوم التالى ظلت "ياسمين" حبيسة غرفتها .. التزمت بتعليمات الطبيبة براحة وعدم إرهاق نفسها .. فى منتصف النهار .. رن هاتفها لتجد رسالة من "عمر" فتحتها لتجد مكتوب فيها:

وحشتيني .. على قدر ما فى المنام تأتيني

وحشتيني .. على قدر ما فى الأحلام تزوريني

وحشتيني .. على قدر الحب الذى بيه وهبتيني

ومنه حرمتيني .. واليه ارجعتيني .. وحشتيني

حبيبتي ببعدك لا تزيديني .. فأنت بداخلى وفى تكويني.

شعرت بسعادة لذيذة تجتاح كل كيائها .. تسالت الابتسامه الى شفيتها .. ضمت هاتفها الى صدرها تعانقه .. نظرت الى كلماته مرة أخرى .. قرأتها مرات ومرات .. والابتسامه لا تفارق شفيتها .. وقلبها لا تهدأ سرعة ضرباته.

بعد المغرب .. قال "نور" لـ "كريمة" و "عمر":

-ما تيجوا يا جماعة نخرج شوية .. نتعشى بره فى أى مكان

قالت "كريمه" بسعادة:

-والله فكرة .. حتى تغيير جو .. قولت ايه يا "عمر"

فكر "عمر" قليلاً ثم قال:

-لأروحوا انتوا يا ماما

قالت "كريمه" تحته:

-وتعد لوحديك فى البيت ليه تعالى معنا تغير جو .. الواحد أعصابه تعبت اليومين اللى فاتوا
-لأمعش يا ماما روحوا انتوا .. وكمان عندي شغل كثير متراكم عليا .. الأيام اللى فاتت انتوا
عارفين أنا مكنتش بهتم بالشغل خالص .. وفى حاجه كثير لازم تخلص
-خلاص يا حبيبتي ربنا يعينك .. على العموم لو غيرت رأيك كلمنا
خرج والداه وركبا السيارة وانطلقا الى المنصورة .. ذهب "عمر" الى مكتبه .. ليبدأ عمله ..
كان ينظر الى هاتفه كل فتره .. وكأنه ينتظر اتصالاً أو رسالة منها .. يعلم بأنها لن تفعل ذلك ..
لكنه بقى متأملاً

شعرت "ياسمين" بالملل .. فنزلت لتتمشى قليلاً فى المزرعة .. ظلت تمشى لساعات وسط
الطبيعة الخلابة .. لم تجرب السير فى المزرعة ليلاً .. وجدت له مذاقاً خاصاً .. والنسمات
المنعشة أفادتتها كثيراً .. أخذتها قدماها قرب بيت "عمر" ألقت نظرة على البيت وابتسمت ..
أخرجت هاتفها وأعدت قراءة الرسالة مرة أخرى .. ثم أكملت طريقها .. عندما همت بالعودة ..
نظرت لتجد قرب البوابة عند الأسلاك الشائكة .. رجل يحاول اقتحام المكان والتسلل من بين
الأسلاك .. دب الخوف فى أوصالها .. شعرت الرعب .. خافت أن تتقدم أكثر فيراها الرجل ..
دققت النظر تحت ضوء القمر .. لتجد أن للرجل هيئة كهينة "مصطفى" .. لم تستطع رؤية
ملامح وجهه جيداً بسبب الظلام .. لكن كان نفس الهيئة والجسم .. كان قد اقترب بالفعل من
الدخول من بين الأسلاك .. فرعت .. خافت أن تجرى فى اتجاه حجرة الغفير فيراها "مصطفى"
ويسرع بالإمساك بها .. شعرت بأن تفكيرها قد شل من الخوف .. جرت فى الإتجاه الآخر .. ثم
وجدت نفسها تلقائياً تصعد الدرجات الى بيت المزرعة .. أخذت تطرق الباب بسرعة منادية:
"عمر" .. "عمر"

تجمعت الدموع فى عينيها وهى تطرق الباب بقوة .. وتنظر يمينا ويساراً خشية من أن يلحق
"مصطفى" بها .. ويمسكها وينتقم منها .. فهى الشاهدة الوحيدة عليه .. "عمر" لم يرى
وجهه .. ولم يتعرف صوته أحد غيرها .. وهى تعلم أنه لن يتردد لحظة فى قتلها اذا سنحت له
الفرصة .. لينقذ نفسه من السجن .. طرقت الباب بهلع وأخيراً فتح "عمر" .. نظر إليها بلهفة
قائلاً:

"ياسمين" مالك فى ايه؟

قالت "ياسمين" بصوت مرتجف وبأنفاس متقطعه:

"مصطفى"

سألها بهلع:

-هو فين؟ .. عمك حاجه؟

ابتلعت ريقها وقالت بأعين دامعه:

-شوفته بيجاول يدخل من السلك اللى جنب البوابة

جذبها "عمر" من ذراعها بقوة وأدخلها البيت وقال بحزم:

-خليكي هنا واقفلى الباب كويس من جوه ومتفتحيش لحد غيرى

أغلق الباب خلفه .. فتأكدت من غلقه جيداً .. ثم توجهت الى احدى النوافذ القريبه تستطلع الأمر
منها .. رأت "عمر" يسير باتجاه البوابة .. خافت عليه بشدة .. خافت أن يهاجمه "مصطفى"

.. خافت أن يكون "مصطفى" حاملاً للسلاح ويتهور ويطلق النار على "عمر" .. شعرت بالخوف والفرع .. لبيتها لم تأتي اليه .. لبيتها لم تفحه في الأمر وجرت باتجاه البوابة الى حيث غرفة الغفير .. وقفت في نافذة أخرى فلم ترى شيئاً .. اختفى "عمر" من أمام ناظريها وأعاققتها الأشجار عن متابعة ما يحدث .. تساقطت العبرات على وجنتيها .. هي آمنة في الداخل .. وهو في الخارج تحت رحمة هذا المجرم .. أخرجت هاتفها وحاولت أن تتصل به .. رن الهاتف ثم سمعت طرقات على الباب .. انتفضت .. أغلقت الهاتف وتوجهت الى الباب .. سمعت الطرقات مرة أخرى .. قالت بصوت مرتجف:

-مين ؟
أتاها صوته:

-افتحي يا "ياسمين" أنا "عمر"

شعرت بالخوف .. ماذا لو كان "مصطفى" معه .. ماذا لو كان يهدده .. قالت بشك بصوت مضطرب:

-انت لوحذك ولا "مصطفى" معاك ؟

صمت قليلاً ثم أتاها صوته في حنان:

-متخفيش أنا لوحدي .. "مصطفى" مش موجود متخفيش

مازالت تشعر بالخوف .. قالت له في حيرة وألم:

-طيب ما ممكن يكون "مصطفى" بيهديك بالسلاح دلوقتي عشان تقولى انه مش معاك وأفتح الباب وهو يدخل

طال صمته .. ثم أتاها صوته الدافئ وهو يقول:

-لو فعلاً ده حصل و "مصطفى" أو غيره هددني عشان أديكي الأمان وتفتحي الباب ..فأنا

أفضل انه يقتلني ولا انه يطول شعره منك .. مش ممكن أسمح لحد انه يأذيكي يا "ياسمين" .. حتى لو فيها موتى أنا

شعرت بكلماته الصادقة تخترق قلبها وتستقر به .. فتحت الباب ببطء .. ابتسم ونظر اليها وعينيته تغمرانها بحنانه .. لكم تحب تلك العينين والرسائل التي ترسلانها اليها .. رسائل حب وعشق صامته ..

سألته بقلق:

-لقيت "مصطفى" ؟

طمأنها قائلاً:

-متخفيش مش هو

قالت باستغراب:

-أمال مين

-ده عامل شغال هنا في المزرعة فضل يخبط على البوابة بس الغفير نام ومسمعوش .. فحاول يدخل من بين الأسلاك

أومأت "ياسمين" برأسها وشعرت بالحمق لأنها أزعجته بدون داعي .. تقدمت لتخرج فوجدت وقف أمام الباب ليمنع خروجها .. نظرت اليه بدهشه .. فنظر اليها بخبث قائلاً:

-تعلمى ايه لو حبستك هنا

شعرت بالخجل فخفضت بصرها وقالت:

-لو سمحت عديني

قال بمرح وعينا تلمعان بخبث:

-لأ مش هعديكي .. وهحبسك هنا لحد ما تستسلمي تماماً

وفجأة دخلت سيارة والده الى المزرعة .. اضطربت "ياسمين" بشدة ونظرت الى "عمر" باعتبار فلو كان سمح لها بالذهاب لما كانت ستتعرض لهذا الموقف .. ابتسم لها "عمر" وهو يراقب علامات الارتباك على وجهها .. نزل والده ووالدته من السيارة ليروا "عمر" واقف

على باب المنزل من الخارج و "ياسمين" واقفة على الباب من الدخلى.. شعرت بالخجل الشديد من هذا المأذق الذى وجدت نفسها فيه .. اقتربت "كريمة" منها قائلة بابتسامه:
-ازيك يا "ياسمين" حمدالله على سلامتک يا حبيبتي
قالت "ياسمين" بتوتر:

-الله يسلمك

تقدم والد "عمر" وسلم عليها هو الآخر .. كانت تتمنى أن تنشق الأرض وتبلعها أصحاب البيت واقفون على الباب من الخارج وهى تقف من الداخل .. لا تدرى كيف تشرح ما حدث .. أنقذها "عمر" قائلاً:

"-ياسمين" كانت بتتمشى واتخضت لما شافت راجل بيحاول يدخل من الأسلاك اللى جمب البوابة جتلى عشان أشوف مين اللى بيحاول يدخل ودخلتها البيت لحد ما أرجع
قالت له أمه باهتمام:
-وظلع مين ؟

-عامل من اللى ساكنين فى سكن العمال ..الغفير كان نام ومسمعش خبطه على البوابة
قال "نور" موجهاً حديثه الى "ياسمين": "

-متخفيش يا "ياسمين" محدش يقدر يدخل المزرعة هنا .. أكيد ظليقتك هيخاف بيحي هنا
شعر "عمر" بالحنق عندما سمع لفظ "ظليقتك" .. كان يحاول قدر الإمكان تناسى بأنها متزوجه من قبل .. لأن هذا الأمر .. يؤلمه أشد ألم .. أفسحت "ياسمين" الطريق ليمر والداه .. دخلوا الى المنزل .. حاولت الخروج فسد "عمر" الباب بجسده مرة أخرى وابتسم بخبت ..
صاحت بضيق:

-لو سمحت مينفعش كده .. كفايه اللى حصل .. لو كنت خلتنى أمشى مكنش زمانى اتحطيت فى الموقف ده .. لو سمحت عديني

قال "عمر" بمرح دون أن يتخلى عن ابتسامته:

-فعلاً معاكى حق شكلنا بأه بايخ أوى .. وكمان أنا ليا سمعه لازم أحافظ عليها
اقترب برأسه منها ونظر فى عينيها قائلاً:

-لازم تصلحى غلطتك وتتجوزيني

حاولت كتم ابتسامتها بصعوبة وقالت بجديه:

-لو سمحت عديني

هتف وهو يتظاهر بالجديه:

-وسمعتى اللى ضاعت على اديكي .. وأهلى اللى شافونى واقف معاكى على عتبة بيتنا ..

خلاص كده مفيش بنت هترضى تبص فى وشى .. لازم تتجوزيني وتسترى عليا يا "ياسمين"
لاحت ابتسامه صغيره على شفيتها لكنها أخفتها سريعاً وهتفت بجديه:

-خليني أمشى يا إما هنادى لطنط "كريمة" وأقولها انك مش راضى تعديني
قال بتحدى:

-نادى طنط "كريمة" بتاعتك وأنا أقولها على اللى عملتية فى العربية
قالت بدهشة:

-انا .. عملت ايه ؟

نظر اليها بخبت وهو يقول:

-كل ما أحاول أبعدك عنى .. تقوليلى لا يا "عمر" متسبنيش وفضلتى لازقه فى حضنى طول الطريق مش عارف أتحرك منك

احمرت جنتاها بشدة وهتفت قائلة:

-والله ما حصل .. أنا معملتش كده

قال بتحدى:

-لأ عملتى كدة و "كرم" شاهد كمان

صاحت بضيق:

-بطل تهريج أنا معملتش كده .. صحيح أنا مش فاكرة اللي حصل بس أكيد معملتش اللي انت بتقوله ده

قال وهو يتظاهر بجديه:

-بصى يا بنت الناس .. يا تو عديني انك تصلحي غلظتك وتتجوزيني يا اما مش هطلعك من البيت وهجيب المأذن وأكتب عليكي بالعافية .. ها قولتلى ايه .. تختارى ايه ؟
قالت بجديه:

-عديني لو سمحت

قال بتحدى:

-خلاص انتى حرة انتى اللي اخترتى

ثم هم بالدخول فابتعدت .. كاد أن يغلق الباب فقالت بسرعة:

-خلاص .. خرجنى

لمعت عيناه وابتسم قائلاً:

-يعني خلاص هتتجوزيني ؟

تحاشت النظر فى عينيه وتضرجت وجنتاها خجلاً .. فحثها قائلاً:

-ها .. مش هفضل مستنى كده كتير .. هتتجوزيني ؟

ابتسمت دون أن تنظر اليه .. فنظر اليه بحب قائلاً بهمس:

-كفاية الإبتسامه الحلوة دى .. هعتبرها بدل كلمة موافقة

قالت بصوت خافت وهى لا تستطيع أن ترفع عينها فى عينيه:

-ممكن لو سمحت تعديني

أوما برأسه قائلاً وعيناه تغوصان فى بحر عينها :

-ماشى هعديكي بس عايزك تعرفى حاجه .. مش هسيبك سمعانى .. أنا خلاص لا عاد ينفعنى

خطوبة ولا كتب كتاب .. أنا هكلم باباكي ونحدد معاد الفرح .. لأنى مش هقدر أصبر أكثر من

كده .. عايزك فى حضنى فى أقرب وقت .. عايز أفتح عيني كل يوم عليكي وأغمضها عليكي ..

انتى حته منى وبعديكى عنى تاعبنى .. ومعدتش قادر أستحمل بعدك ده .. لازم نبقى مع بعض بأه

.. أنا تعبان من غيرك يا حبيبتى .. حبيبك محتاجلك أوى .. ومشتاقلك أوى .. وبيتعذب من

غيرك .. حسي بيه .. ومتبقيش قاسيه عليه

ازداد احمرار وجهها .. لم تستطع حتى النظر اليه .. أفسح لها الطريق .. فخرجت مسرعه ..

وعيناه تتابعانها .. تحسست وجنتاها لتجد الحرارة تنبعث منهما .. عادت الى غرفتها وعلى

شفتيها ابتسامة تشى بسعادة لم تشعر بها من قبل .. وقلبها قد جن وأخذ يخفق فى جنون ..

وضعت يدها على صدرها لعلها تبطئ من سرعة دقاته .. ها هى أحلامها أوشكت أن تصبح

حقيقة.

فى اليوم التالى تحدث "عمر" ووالداه و "كرم" الى "عبد الحميد" واتفقوا جميعاً على كتب

كتاب الأختين بعد ثلاثة أيام فى نفس اليوم .. كانت سعادة الرجلين غامرة .. وكذلك

الفتاتين.

الفصل السادس والثلاثون

عمت أجواء البهجة فى المزرعة بعدما تم اعلان يوم كتب كتاب كل من "عمر" و "كرم" .. كان الجميع فرح لهذين الرجلين وهاتين الفتاتين .. فالجميع مشهود له الطيبة وحسن الخلق .. وان وجد داخل البعض مزيج من الغيرة والحسد .. فالكل يعلم ان الفتاتين تعملان فى المزرعة وأنهما من أسرة بسيطة .. ولا يميزهن جمال صارخ .. يخطف عقول الرجال .. فأثار ذلك بعض مشاعر الغيرة والحسد لدى الفتيات العاملات بالمزرعة .. كانت "ياسمين" فى منتهى السعادة تعد مع أختها ومع "كريمه" و "سماح" ترتيبات هذا اليوم .. قرروا أن يتم الإحتفال بهذا اليوم فى المزرعة .. التى شهدت ميلاد حبهم .. كان "عمر" يكاد لا يصدق نفسه من فرط السعادة .. فهأهى أخيراً حبيبته ستصبح زوجته .. وكذلك "كرم" و "ريهام" كانا سعيدين للغاية .. قام "نور" بدعوة أخته "ثرثيا" وابنها "علاء" و ابنتها "ايناس" ..

لكنها رفضت الحضور بعدما حدث فى آخر زيارة لها فى المزرعة .. فمازالت غاضبة من "عمر" لأنه وقف أمامها من أجل حبيبته وأهلها .. كان "عمر" يشعر بالإرتياح لعدم حضور عمته .. لأنه كان يخشى أن تفعل هى أو ابنتها ما يعكر صفو هذا اليوم .. ذهبت الفتاتان مع "كريمه" و "سماح" لاختيار الفساتين لهذه المناسبة .. أما الرجلين فهاتما مع "أيمن" و "نور" و "عبد الحميد" .. بتنظيم كل شئ .. ليخرج اليوم فى أبهى صورة .. قرروا أن تكون الحفلة صغيرة عائلية . على أن يعقبها العرس بفترة صغيرة ويكون احتفالاً كبيراً فى القاهرة .. قالت "ريهام" ل "ياسمين" فى غرفتهما:

- الحمد لله اطمنت ان أنا وانتى هنعيش مع بعض فى القاهرة .. كنت خائفة "كرم" يقرر نعيش فى القاهرة و "عمر" يقرر انكوا تعيشوا هنا
ابتسمت "ياسمين" قائلاً:

" -عمر" قال ان مكاننا الأساسى هتكون فيلة أهله فى القاهرة .. بس ده ميمنعش اننا هنجي هنا المزرعة وقت ما نحب .. بصراحة أنا بحب المكان ده أوى ومتعلقة بيه أوى .. أصلاً مش عارفه ممكن أعيش ازاي فى مكان تانى غير هنا
ابتسمت "ريهام" قائله:

-أما أنا بأه لازم أرجع لان خلاص امتحاناتى على الأبواب
ضحكت "ياسمين" قائلاً:

-حلو أوى يعنى هتقضى شهر العسل فى المذاكرة والإمتحانات
قالت "ريهام" بمرح:

-أه بس لازم "كرم" يعوضنى ونسافر زيك انتى و "عمر" .. صحيح ما قولتيش هتسافروا
فمين ؟

قالت "ياسمين" بسعادة:

-مش عارفه مامته ما قالتلش .. قالتلى انه عملهاى مفاجأة
-ان شاء الله تبقى أحلى مفاجأة

قالت "ياسمين" بشئ من الحزن:

-صعبان عليا بابا هنسيبه هنا لوحده

-نعمل ايه يا "ياسمين" هو اللى مش راضى يرجع معانا .. حب الشغل هنا والعيشة هنا وبأه له صحاب هنا .. ومش حابب يبعد عن المزرعة

طمأنتها "ريهام" قائله:

-وبعدين زى ما انتى قولتى اكيد هتيجى هنا انتى و"عمر" .. وهنبقى نيجى معاكوا أنا و
"كرم"

أومات "ياسمين" برأسها قائله:

-ان شاء الله

صفقت "ريهام" بمرح:

-بصى بأه احنا مش عايزين نفكر فى أى حاجه تضايقتنا .. عايزين نفكر فى الحفلة وبس .. وان بعد أقل من 3 أيام هبقى أنا مدام "ريهام" .. وانتى مدام "ياسمين"

قالت "ياسمين" بنبرة حزينة:

-أنا أصلاً مدام .. ولا نسييتى

ضحكت "ريهام" وقالت بخبث:

-لا مش مدام .. أنا وانتى عارفين اللى فيها .. مش متخيله صدمة "عمر" لما يعرف .. أكيد هتبقى أحلى صدمه فى حياته

ابتسمت "ياسمين" بسعادة .. فأكملت "ريهام":

-الراجل هيتجنن عليكى وهو فاكرك انك اتجوزتى .. أمال لو عرف هيعمل ايه .. أطلقت "ياسمين" ضحكات مرحة اشتاقت لمساع صداها فى أذنيها طويلاً

فى الصباح ذهبت "ياسمين" و "ريهام" مع "كريمه" فى السيارة لشراء بعض الأغراض .. وعند عودتهم توقفت السيارة أمام بيت المزرعة .. أصرت "كريمة" على الفتاتين الدخول معها والجلوس قليلاً .. دخلت الفتاتين .. فرأت "ياسمين" بيت المزرعة لأول مرة .. فالمره السابقة كانت فى حالة خوف ولم تراه جيداً .. كان بيتاً مريحاً له طابع كلاسيكى .. ولكنه يتميز أيضاً بالبساطه .. بعث فى نفسها الراحة .. وأحبته .. كما أحببت المزرعة .. رأت على أحد الجدران صوراً معلقة لرجال ونساء .. تضايقت "ياسمين" قليلاً فهى تعلم أن الملائكة لا تدخل بيتاً به صوراً .. وقفت أمام احدى الصورة .. كانت صورة لرجل له هيبه لا تخطئها العين .. كانت شاردة عندما اقتربت منها "كريمه" قائله:

-ده والد زوجى .. جد "عمر" .. كانت روحه فى "عمر" .. هو اللى حبيه فى المزرعة وفى الزراعة .. عشان كده "عمر" قرر انه يدخل كلية الزراعة .. وحضر فيها وخذ الماجستير والدكتوراه كمان

نظرت اليها "ياسمين" بدهشة .. فهذه هى المرة الأولى التى تسمع فيها تلك المعلومات عن "عمر" .. شعرت بأنها مازالت لا تعرف ذلك الرجل جيداً .. الرجل الذى ستصبح زوجته .. بعد أقل من يومين .. جلس ثلاثتهم يحتسون أقداح من الشاى الساخن .. جلست "كريمه" بجوار "ياسمين" وابتسمت:

-حبيبتى أنا مبسوطه أوى انك أخيراً قدرتى تاخدى قرارك .. صدقيني "عمر" ابنى مفيش زيه .. مش عشان هو ابنى .. بس بجد عمرك ما هتلاقى حد يخاف عليكى ويبقى حنين عليكى زيه .. أكثر صفة بعشها فى جوزى هى حنيتيه .. و"عمر" ورث حنية أبوه .. ربنا يسعدكوا انتوا الاتنين لان انتى كمان باين عليكى طيبه وحنينه

ابتسمت "ياسمين" قائله:

-بجد أنا فرحانه ان بينى وبين حضرتك علاقة كويسة .. كنت دايماً بتمنى ان أنا وحماتى نكون متفقين مع بعض

اتسعت ابتسامه "كريمة" قائلاً:

-أنا بأه مش عايزة أكون حماتك .. عايزاكى تعتبريني مكان ماما الله يرحمها .. ينفع ؟

اغروقت عينا "ياسمين" بالدموع ونظرت اليها قائله:

-أكيد طبعاً

-خلاص يبقى من النهاردة انتى و "ريهام" تقولولى يا ماما "كريمه" .. لانى بعتبر "كرم" كمان ابنى

ابتسمت "ريهام" قائله:

-أكيد .. دى حاجة تفرحنى

نظرت اليهما "كريمة" قائلاً:

-أنا كان نفسي أخلف بنات بس ربنا ما أردش .. بعد ما ولدت "عمر" ربنا ما أرادليش الخلفة مرة تانية وأنا اكتفيت بيه وحمدت ربنا على النعمة اللى رزقنى بيها مع انى كان نفسي أخلف كمان بنت .. بس الحمد لله ربنا عوضنى بيكوا انتوا الاتنين فجأة دخل "عمر" الى المنزل ليجد "ياسمين" و "ريهام" .. اتسعت ابتسامته .. واقترب منها قائلاً:

-ازيك يا "ياسمين" .. ايه النور ده

ابتسمت بخجل قائلاً:

-الحمد لله

ثم نظر الى "ريهام" قائلاً:

-ازيك يا "ريهام" أخبارك ايه

-الحمد لله

قالت "كريمة": "

-مكنوش راضيين يدخلوا .. مع ان خلاص احنا بقينا عيلة واحدة

نظر "عمر" الى "ياسمين" بتحدى قائلاً بابتسامه:

-هى مش هتقتنع إلا لما القسيمة تبقى فى ايدى .. هانت كلها يومين .. وكل حاجه بعد كدة

هتبقى زى ما أنا عايز

صمتت قليلاً ثم نظرت اليه قائله:

-شغل سي السيد وأمينه يعنى

انفجر "عمر" ضاحكاً .. ثم نظر اليها قائلاً:

-متخفيش أنا مش ديكتاتور .. لو كنت عايز أمر ومراتى تنفذ وخلاص .. كنت اتجوزت أى

واحدة مكنتش هتفرق .. لكن أنا عايز واحدة تشاركنى حياتى وأشاركها حياتها .. زى الطيارة ..

ليها كابتن ومساعد كابتن .. لا ينفع الكابتن من غير المساعد ولا ينفع المساعد من غير الكابتن

ثم نظر اليها بحنان قائلاً بمرح:

-ماشى يا مساعد ؟

قالت بخفوت مطرقه برأسها والابتسامه على ثغرها:

-ماشى يا كابتن

اتسعت ابتسامته .. والتمعت عيناه بنظره حب وشوق .. فهربت بعينيها الى "ريهام" و

"كريمة" اللتان تتابعانها بابتسامه صامته .. فشعرت بالخل .. وقف "عمر" أمامها ليحجب

عنها الرؤية .. رفعت نظرها اليه مندهشة فقال لها:

-جهزى نفسك النهاردة انتى و "ريهام" عشان هنروح كلما نجيب شبكتكوا انتوا الاتنين ..

احنا اتفقنا مع عم "عبد الحميد" .. وان شاء الله كلنا هنروح سوا ..

أومأت برأسها فى خجل .. ظل واقف أمامها يراقب تعبيرات وجهها والحمرة التى تملأه ..

ضحكت أمه ونظرت اليه قائله:

-بطل غلاسه هى بتتكسف

قال لأمه فى مرح:

-انا عملت حاجه أنا ببصلها بس

ازداد خجل "ياسمين" .. فقالت أمه:

" -عمر" بجد .. متضايقهاش

نهضت "ياسمين" وتحاشت الاقتراب منه .. وقالت لـ "كريمة": "

-احنا هنمشى بأه عشان ورانا حاجات كتير بنجهزها ..
قامت "ريهام" من فورها .. وقالت "كريمه" مبتسمه:
-خلاص يا حبيبتي أشوفكوا بالليل ان شاء الله
خرجت "ياسمين" و "ريهام" من المنزل .. لحظات وخرج "عمر" ورائها منادياً اياها:
" -ياسمين"

توقفت .. أقبل عليها ووقف أمامها قائلاً:
-استنى عايز أقولك حاجه
ثم نظر لـ "ريهام" قائلاً :
" -ريهام" ممكن ثواني
ابتعدت "ريهام" قليلاً .. نظرت اليه "ياسمين" بحرج قائله:
-خير ؟

نظر اليها وأخرج من جيبه علبة قطيفة صغيرة .. نظرت اليه باستغراب .. فتحتها لتجد سلسلة
صغيرة بها قلادة على شكل قلب وبداخل القلب محفور اسمه "عمر .." نظر اليها قائلاً بحنان:
-السلسلة دي تلبسيها ومش عايزك تقلعيها أبداً مهما حصل

ثم أخرج ميداليه وأراها القلب الصغير الذى يشبه القلب فى السلسلة لكن القلب الذى معه يحمل
اسمها "ياسمين" .. ابتسم لها قائلاً:
-انا كمان مش هشيل القلب ده مهما حصل .. انتى معاكى قلبي وأنا معايا قلبك .. اتفقنا
أومات برأسها وأخذت منه العلبة .. قبل أن تغادر همس لها بشغف قائلاً:
-كلها يومين وتبقى بتاعتى بجد .. ومعدتيش هتعرفى تهربي مني
صعدت الفتاتان الى غرفتهما .. أخذت "ياسمين" تتفحص القلب مبتسمه .. ثم التفتت الى
"ريهام" قائله:

-أنا خايفه يا "ريهام" أوى
-خايفه ليه

قالت "ياسمين" بوجوم:
-خايفه الحب اللي أنا شيفاه من "عمر" ده يتغير بعد الجواز
هتفت "ريهام": "

-يا سنى هتقدرى البلا قبل وقوعه ليه .. ما الراجل لذيد وزى الفل أهو
قالت "ياسمين" بلهفه:

-أنا مش عايزاه يتغير يا "ريهام"
-ده فى ايدك على فكرة
قالت "ياسمين" بثقه:

-صح معاكى حق .. أنا طول عمري بقول ان ده فى ايد الزوجة .. هى اللي تقدر تخلى زوجها
متعلق بيها .. وبيحبها .. وميقدرش يستغنى عنها
ثم ابتسمت قائله:

-بحبه أوى يا "ريهام" .. ومش قادرة أصدق ان أخيراً الدنيا هتمشى زى ما أنا عايزة

فى المساء ذهب الجميع لاختيار الشبكة .. "عمر" ووالداه .. "كرم" .. "أيمن" .. "سماح"
.. "عبد الحميد" .. "ريهام" .. "ياسمين" .. كانت سعادتهم غامرة بتلك المناسبة .. وأكثر من
دمعت عيناه فرحاً هو "عبد الحميد" الذى لم يصدق زواج ابنتاه وفى يوم واحد .. من رجلين
تتنامها الكثير من الفتيات .. شعر بأن الله أهدها بهدية كبيرة جداً .. سجد شكراً لله بعد عودته
.. وظل يحمده ويشكره على ما أعطاه هو وبناته .. فى اليوم التالى .. وجدت "ياسمين" ..
"ولاء" تتصل بها لتخبرها بوجود رجل يسأل عنها فى مكان عملها .. استغربت "ياسمين"

بشدة .. قالت "ولاء": "

- راجل كبير فلاح .. من القرية بتاعتنا .. مصر جداً انه يتكلم معاكى .. ولما قولتله اتكلم مع البشمهندس "عمر" اتخض وقالى أبوس ايديكى متجيبيلهووش سيرة .. أنا عايز الست "ياسمين"

قالت "ياسمين" بدهشة:

- عايز ايه ده أنا مش فاهمة

- بقولك معرفش مش راضى يقولى واعد جوه فى المكتب .. شوفى أقوله ايه أمشييه ولا ايه ؟

صمتت "ياسمين" قليلاً ثم فكرت بصوت عالى:

- يمكن واحد شاف حادثة الخطف بتاعتى وعارف مكان "مصطفى" ثم قالت:

- استنى يا "ولاء" أنا نازلله خليه أعد فى المكتب

ارتدت "ياسمين" ملابسها وهى تدعو الله أن يرشدها الرجل الى مكان "مصطفى" الذى مازال هارباً حتى الآن .. دخلت المكتب لتجد رجلاً كما وصفته "ولاء" .. "كبير فى السن .. فلاح بسيط .. خرجت من المكتب مرة أخرى وذهبت الى "ولاء" قائله:

"- ولاء" تعالى معايا مش عايزة أعد معاه فى المكتب لوحدى

ذهبت معها "ولاء" دخلت الفتاتان فقالت "ولاء" للرجل:

- هى دى الدكتورة "ياسمين" يا حاج

قام الرجل وهو ينظر الى "ياسمين" بشك ثم قال:

- انتى الدكتورة "ياسمين" اللى هتجوز البشمهندس "عمر"

قالت "ياسمين" بترقب:

- أيوة أنا

نظر الرجل الى "ولاء" ثم الى "ياسمين" قائلاً:

- عايز أكلمك على انفراد يا ست الدكتورة

قالت "ياسمين" بحزم:

- أسفة .. حضرتك قول اللى عايز تقولهولى .. الدكتورة "ولاء" مش هتمشى

ظهر على الرجل التردد ثم سألها:

- يعنى انتى واثقة فيها ؟

تبادلت الفتاتان نظرات الحيرة ثم نظرت اليه "ياسمين" قائله:

- أيوة واثقة فيها .. اتفضل اتكلم .. خير عايزينى فى ايه ؟

صمت الرجل قليلاً ثم قال:

- بصى يا دكتورة .. أنا راجل غلبان وبجرى على أكل عيشي .. وعندى بنات فى سنك كدة .. واللى مرضهوش لبناتى مرضهوش لبنات الناس

كانت "ياسمين" و "ولاء" يستمعان اليه فى اهتمام فأكمل قائلاً:

- الراجل اللى انتى هتجوزيه ده واحد عايش فى الحرام

بهتت "ياسمين" وفتحت فمها فى دهشة .. كيف يجرؤ هذا الرجل على أن يتحدث عن "عمر" بهذا الشكل .. كانت "ولاء" تنظر اليه باهتمام وقالت:

- يعنى ايه وضح كلامك

تنهد الرجل قائلاً:

- من كام شهر كان فى المزرعة غفير اسمه "عويس" كان شغال هنا هو والجماعه بتوعه

تبادلت "ياسمين" نظرة مع "ولاء" وقد تذكرت تلك الإشاعة التى أخبرتها بها "ولاء" من قبل .. فأكمل الرجل:

"- عويس" والجماعة بتوعه اختفوا ومحدش يعرف هما راحوا فين ولا ايه اللى مشاهم

صمت قليلاً ثم قال:

-بس أنا عارف هما مشوا ليه

كان التوت قد وصل الى ذروته فى نفس "ياسمين" فقالت له بحده:

-قول اللى انت عايز تقوله مرة واحدة لو سمحت

أكمل الرجل:

-فى يوم وأنا ماشى فى البلد وراجع بيتي متأخر .. اليوم ده فاكهه كويس لأنه يوم فرح ابن أخويا فى القرية اللى جمبنا .. قابلت "عويس" واخذ فى وشه وطالع يجرى حاولت أوقفه وأنادى عليه لكن مرضيش يقف وفضل يجرى .. مشيت فى طريقي لقيت نار قايدة فى بيت مهجور فى القرية .. البيت ده مطرف ومفيش حواليه غير الشجر .. وأنا بيتي قريب منه .. جريت أشوف النار اللى قايدة .. لقيت جوه البيت راجل وست .. واقفين على الباب ومش عارفين يخرجوا والنار واكله البيت كله .. لقيت جردل على الأرض فضلت أملاه مايه من التربة وأحاول أطفى بيها النار اللى ماسكه فى الباب عشان يعرفوا يخرجوا .. الوقت كان متأخر والمنطقة مكنش فيها صريخ ابن يومين .. محدش ساعدهم غيري .. الراجل نط وسط النار اللى قايدة فى الباب وشد الست معاه وطلعها .. أول ما الست خرجت عرفتها على طول .. "صفية" مرات "عويس" .. ولما بصيت للراجل عرفته هو كمان

صمت الرجل فسألته "ياسمين":

-مين الراجل؟

قال الرجل بتردد:

-البشمهندس "عمر"

نظرت اليه "ياسمين" بدهشة .. تحاول استيعاب ما قال .. صمتت ثم قالت بحده:

-وايه يعنى اللى انت بتقوله .. ما يمكن كان هو وهى فى البيت لأى سبب تانى .. و"عويس"

كان معاهم .. و"عمر" بعته مشوار .. أى حاجه يعنى ليه ظنيت فيهم ظن وحش؟

قال الرجل بثقه:

-اسمعينى وبعدين احكى يا دكتورة

أكمل الرجل قائلاً:

-لما عرفت "صفية" قولت لها ايه اللى حصل يا "صفية" واياه اللى ولع فى البيت وليه "عويس" كان بيجرى كأن حد بيجرى وراه .. ساعتها بصتلى "صفية" وهى مرعوبة وقالتى هو "عويس" كان هنا .. قولت لها أيوة شوفته بيجرى وحاولت أوقفه مسمعليش .. لقيتها أعدت على الأرض وفضلت تلطم على وشها وتقول "جوزى عرف انى بخونه وهيفضحنى ويفضح أهلى يبأه هو اللى ولع فى البيت" .. وفضلت تلطم وتندب لحد ما البشمهندس "عمر" قالها "خلاص بطلى عياط عشان نعرف نشوف حل فى المصيبة دى" .. ولقيته ببصلى ويقولى "اللى حصل ده مش عايز أى حد يسمع عنه كلمه" وخرج فلوس من جيبه وادهالى وأكد عليا انى أستتر على اللى حصل ومجيش سيرة لحد عشان الفضايح اللى هتحصل لو حد عرف بالموضوع خاصة ان أهل "صفية" لو عرفوا هيقتلوها ومش هيسبواها .. وجات المطافى بعد ما البشمهندس "عمر" كلمهم وطفوا الحريقة اللى كانت فى البيت وكمان البشمهندس طلب عربية اسعاف لانه مكنش هيعرف يروح المستشفى لوحده كانت ايدي مكسورة والايد التانيه طالتها النار

قفز قلب "ياسمين" من مكانه وهى تتذكر الحرق الموجود على يد "عمر" .. أكمل الرجل:

-يعد ما كل حاجه هديت .. بأت الناس تسأل فين "عويس" و"صفية" .. بس لحد دلوقتى

محدش يعرف عنهم حاجه .. وآخر مرة شوفت "صفية" كان لما ركبت عربية الاسعاف مع

البشمهندس "عمر" بعد كدة مشفتهاش لاهى ولا جوزها

كانت "ياسمين" تحت تأثير صدمة شديدة لا تعرف كيف تشعر أو ماذا تقول أو ماذا تصدق ..

قال الرجل:

كثير

قالت "ولاء" شارحه:

-انتي مش عارفه نظام المستشفيات فى المنصورة .. بصى يا ستى نظام الطوارئ عندنا ماشى بجدول .. يعنى معروف يوم السبت فى مستشفى كذا ويوم الأحد فى مستشفى كذا هكذا طول أيام الاسبوع .. والراجل اللي كان هنا من شويه قال انه فاكتر اليوم كويس لانه يوم جواز ابن أخوه .. احنا نعرف منه اليوم ونشوف فى الجدول بتاع المستشفيات .. الطوارئ فى اليوم ده كانت فى انهى مستشفى .. وأنا أعرف دكاترة كتير فى مستشفيات كتير فى المنصورة يارب تطلع مستشفى أكون عارفه حد فيها ونقدر نوصل لسجلات الاستقبال فى اليوم ده

قالت "ياسمين" بلهفه:

-بس الراجل مشى هنوصله تانى ازاي

قالت "ولاء": "

-متقلقيش انتى ناسيه ان أنا كمان من نفس البلد الراجل ده انا عارفاه وعارفه بيته

قالت "ياسمين" باهتمام:

-طالما عارفه بيته يباه أكيد تعرفى البيت اللي بيتكلم عنه مش كده ؟ .. لأنه قال انه قريب من

بيته

أومات "ولاء" برأسها قائله:

-أيوة عارفه البيت اللي يقصده

قامت "ياسمين" قائله:

-طيب يلا بينا نروح من الراجل نعرف منه تاريخ الحادثة وبالمره نعدى على البيت ده عايزة

أشوفه

خرجت "ولاء" مع "ياسمين" وذهبتا الى منزل الرجل وعرفتا منه تاريخ تلك الواقعة .. صدمت "ياسمين" بعدما رأت المنزل المحترق .. تعرفته .. هو نفس البيت الذى أختطفته فيه ..

يا الله .. هل لـ "عمر" علاقة بخطفها .. نفضت تلك الفكرة السخيفه من رأسها .. وأخذت

تستغفر ربها حتى لا يتملك الشيطان منها ويسم أفكارها .. التفتت الى "ولاء" قائله:

"-ولاء" أنا هستنى الأخبار على نار .. بكرة كتب كتابى يا "ولاء" لازم أعرف الحقيقه

النهارده .. أو بكرة بالكثير

طمأنتها "ولاء" قائله:

-متخفيش أنا هنزل حالاً على المنصورة وهتابك بالتليفون

قالت "ياسمين" بأسى:

-منتظره اتصالك.

عادت "ياسمين" الى المزرعة وهى تشعر بأن الأرض تميد بها .. تهالكت فوق سريرها ..

ألقت برأسها على وسادتها .. أغمضت عينيها لتسقط منها عبره حائرة .. أخذت تدعو الله أن

يكون الرجل مخطئاً .. وأنه رأى شخصاً يشبه "عمر" .. "دعت الله أن يكون الأمر قد اختلط

عليه .. لا يمكن أن تُصدم فى حبيبها .. ثانى رجل يدخل حياتها .. لا يمكن أن تُصدم فيه هو

الأخر .. ظلت تفكر فى "عمر" .. أخلاقه .. موافقه معها .. نعم هو شخص جريء .. بل جريء

ل للغاية .. لكن هل من المعقول أن يصل به الأمر لـ ... لم تستطع حتى أن تردد تلك الكلمة حتى

مع نفسها .. نفضت تلك الأفكار من رأسها .. قالت لنفسها .. لن أظلمه .. سأنتظر حتى أتأكد ..

انا واثقه أن الرجل مخطئ .. الوقت كان ليلاً .. لقد رأى مع المرأة رجلاً آخر غير "عمر" ..

قامت وتوضأت وصلت .. وأمسكت مصحفها .. بيد مرتجفة .. وقلب قلق .. أخذت تقرأ فى كتاب

الله لعلها تُهدئ من نفسها .. مدت يدها الى رقبتها وأمسكت بيدها القلب .. الذى يحمل اسم

"عمر" .. "ضمته بقوة بين أصابعها .. ظلت تقرأ فى المصحف بأعين دامعه .. لم تترك القلب

لحظة من يدها .. رن الهاتف فردت فى وجل:

-أيوة يا "ولاء"

-أيوة يا "ياسمين"
-وصلتى لحاجه
-أيوة .. عرفت المستشفى اللى كانت فيها الطوارئ يوم الحادثة .. والحمد لله طلعت أعرف 3
دكاترة هناك .. أكيد حد فيهم هيساعدنى .. أنا كلمت واحدة منهم ولسه اتنين
قالت "ياسمين" بلهفه:
"-ولاء" لازم أعرف قبل بكرة
-متقلقيش والله .. أنا بحاول أوصل للورق ده بأقصى سرعة .. متقلقيش لما أوصل لحاجه
هكلمك .. بس صعب أوى أوصل لحاجة النهاردة .. بس بكرة الصبح ان شاء الله هرجع تانى
على المستشفى وهطمك متقلقيش

فى صباح اليوم التالى لم تتحمل "ياسمين" التوتر الذى كانت تشعر به .. نزلت تتمشى فى
المزرعة .. أما "ريهام" فكانت فى غرفتها ترتب أغراض هذا اليوم .. عندما رن هاتفها .. رقم
لا تعرفه ردت قائلة:
-السلام عليكم
-وعليكم السلام
عرفت صوته على الفور .. قال "كرم":
-ازيك يا "ريهام"
قالت بصوت خافت:
-الحمدلله .. جبت رفقى منين
ضحك قائلاً:
-ايه مش عايزانى أعرف رقم مراتى ولا ايه
قالت بخجل:
-لسه مبقتش مراتك .. أنا هقفل .. سلام
قال بلهفه:
-استنى بس .. ما خلاص كلها ساعات ونكتب كتابنا
ابتسمت بخبث قائلة:
-لما نبقى نكتبه .. انا هقفل
-طيب يارب صبرنى ..طيب مش هتقوليلى أى كلمة حلوة تصبرنى الكام ساعة دول
ابتسمت قائلة:
-أنا هقفل يا "كرم"
-ماشى بس عايز أعرفك انى كلمت باباكي واتفقت معاه اننا بعد ما نكتب الكتاب هنعدي نحتفل
معاهم شوية وبعدها نخرج نحتفل لوحدها عشان أعرف استفرد بيكي .. قصدى عشان أعرف
اتكلم معاكى .. أتكلم بس .. اوعى تفهميني صح
كتمت "ريهام" ضحكتها بيدها قائلة:
-مع السلامه يا "كرم"

أخذت "ياسمين" تتمشى فى المزرعة .. رن هاتفها أخرجه فى لهفه .. لكنها تضايقت عندما
وجدت "ريهام" المتصله:
-السلام عليكم أيوة يا "ريهام"

-و عليكم السلام .. انتى فىن يا عروسة ؟

قالت "ياسمين" بتوتر:

-مفيش بتمشى شوية

قالت "ريهام" بحدده:

-ده وقت تمشيه .. خلاص الكوافيرة جايه فى الطريق ولازم عند ماما "كريمه" انتى عارفه ان

الكوافيرة هتجيلنا عندها

قالت "ياسمين" بنفاذ صبر:

-روحي انتى وأنا هحصلك يا "ريهام"

قالت "ريهام" بقلق:

-فى حاجه يا "ياسمين" ؟ شوفتك مش عاجبنى

-لا مفيش حاجه .. روى انتى وأنا هحصلك .. يلا سلام

أغلقت قبل أن تتحدث "ريهام" مرة أخرى .. لحظات ووجدت "ولاء" تتصل بها .. ردت بلهفه

:

-أيوة يا "ولاء" .. بتصل بيكي موبايلك مقول

-لا دى شبكة يا "ياسمين" .. أنا على الطريق راجعه على المزرعة

-عملتى ايه فى المستشفى .. وصلتى لحاجه ؟

-استنيتى فى المكتب هجيلك على هناك

-طيب طمنيتى يا "ولاء"

-عشر دقائق وهكون عندك يا "ياسمين" استنيتى فى المكتب

أسرعت "ياسمين" بالذهاب الى مكتب .. جلست على الأريكة فى توتر .. أخرجت السلسلة ..

نظرت اسم اسم "عمر" المنقوش على القلب .. وحضنته بين أصابعها .. أغمضت عينيها

وظلت تدعو ربها .. وتستغفر .. فتحت "ولاء" الباب وأغلقت خلفها .. هبت "ياسمين" واقفه

وقالت بلهفه:

-خير طمنيتى وصلتى لحاجه

رأت نظرت الأسى فى أعين "ولاء" .. فقالت بحدده:

"-ولاء" ردى عليا

تنهدت "ولاء" وأخرجت من حقيبتها ورقتين أعطتهما الى "ياسمين" قائله:

-دى بيانات الحالات اللى استقبلتها المستشفى اللى كان فيها قسم الطوارئ شغال فى اليوم ده

أخذت "ياسمين" الورق بيد مرتجفة .. نظرت الى "ولاء" بأعين دامعه وقالت بصوت مرتجف

:

-موجود فيها اسمه ؟ ... موجود اسم "عمر" ؟

نظرت اليها "ولاء" دون أن تجيب .. فتحت "ياسمين" الورق وقرأت بيانات الحاليتين

الوحيديتين فى هذا اليوم .. "صفية الدمرداش" .. و... "عمر الألفى" .. سقطت منهارة على

الأريكة تنظر الى الورقة غير مصدقة فقالت "ولاء" شارحه:

-تقرير الحاليتين هتلاقيهم مكتوب عندك .. جم المستشفى مصابين بحروق .. الست كان فى

حروق متفرقة فى ايديها ورجليها وباقي جسمها حروق من الدرجة الثانية .. وأعدت اسبوع

فى المستشفى وبعدها كتبولها على خروج ..

ثم قالت بتردد:

-الحالة الثانية حالة "عمر" وجه معاها فى نفس الحادثة وفى نفس التوقيت واصابته كانت

حرق فى ايده اليمين ومشى فى نفس اليوم

تساقطت العبرات من أعين "ياسمين" وهى مازالت ممسكة بالورق فى يدها تنظر اليها بأعين

دامعه .. صمتت .. طال صمتها .. ثم قالت:

-يعني "عمر" فعلا اللي كان مع الست دى فى البيت .. والراجل مغلظش .. هو فعلاً اللي كان معاها

ثم نظرت الى "ولاء" قائله:

-يعني "عمر" .. و الست دى .. كانوا.....

لم تستطع اكمال جملتها وانفجرت باكية .. جلست "ولاء" بجوارها وأخذتها فى حضنها وتنهدت قائله:

-حبيبتي احمدى ربنا انك اكتشفتى الموضوع ده قبل كتب الكتاب .. أنا عارفه انه صعب عليكى .. معلىش ربنا يصبرك ويبرد نارك

هبت "ياسمين" واقفة وقالت من بين شهقاتها:

-لو سمحتى يا "ولاء" مش عايزة حد يعرف حاجه عن الموضوع ده وقت "ولاء" قائله:

-أكيد .. متخافيش

خرجت "ياسمين" .. لا تدرى أين تذهب .. كانت تشعر بالإختناق .. وكان شيئاً يجثم فوق صدرها .. ذهبت الى حيث شجرتها .. جلست على الجذع .. انفجرت فى بكاء مرير لم تستطع السيطرة عليه .. شعرت بأن قلبها هو الذى يبكي .. هو الذى ينزف .. تساقطت عبراتها لتختلط بتراب المزرعة .. تذكرت أول مرة جلست فيها على هذا الجذع .. كانت تشعر الفرحة .. والراحة .. والسكينة .. فى هذا المكان .. لكن الآن .. ضاقت الأرض بها .. لم تعد تحتمل البقاء هنا .. لم تعد تشعر بالراحة .. أو السكينة .. بل تشعر بالخيانة .. والغدر .. والألم .. تشعر بأن قلبها قد تمزق أشلاءً من شدة الألم .. تشعر بأن عقلها قد شل من كثرة الصدمات التى تعرضت لها .. لماذا يحدث لها ذلك .. لماذا لا تتم لها فرحة .. وكان الحياة تستكثر عليها فرحتها .. بكت ألمها .. بكت حبها .. الذى فقدته قبل أن تحصل عليه .. تعبت عينيها من كثرة البكاء .. تعب قلبها كثراً وامتلاً ألماً

ناجت ربيها .. الى متى يا رب .. الى متى .. لم أعد أستطيع التحمل .. تعبت .. متى سأرتاح .. صبرت الى أن تعب الصبر من صبري .. لا أعترض على قضاءك .. لكنى تعبت .. أشعر بأن نفسي ممزقه لأشلاء .. أشعر بطعنات الألم منغرسه فى كل جوارحى .. لن أتحمل العيش معه .. لن أقبل العيش مع رجل زانى .. هو كمصطفى .. لا فرق بينهما .. كلاهما زانى .. كلاهما ارتكب أكبر الفواحش .. كلاهما ينتهك حرمتك .. كلاهما لا يبالي بغضبك .. كلاهما يعصيك .. ويتباهى بعصيانتك .. لن أعيش معه .. حبه فى قلبي انقلب الى كره واحتقار .. لن أقبل العيش مع زانى .. حتى لو كنت أحبه .. لأن من خانك يوماً .. سيخوننى ألف يوم .. شعرت بالقشعريرة تسرى فى جسدها عندما تذكرت أنها كانت ستصبح زوجته اليوم .. حمدت الله أن أنجاها منه

رن هاتفها .. كانت "سماح" وصلت الى بيت المزرعة ولم تجدها .. وصفت لها "ياسمين" مكانها عند الشجرة .. أتت "سماح" لتجد صديقتها فى أسوأ حال .. قالت بهلع:

"-ياسمين" .. مالك .. بتعيطى ليه

بدأت "ياسمين" فى البكاء مرة أخرى وألقت نفسها فى حضن صديقتها التى ربتت على ظهرها قائله:

-حبيبتي قوليلى مالك .. ايه اللي حصل .. "مصطفى" كلمك ؟

رفعت "ياسمين" رأسها ونظرت الى "سماح" قائله:

-لأ

قالت "سماح" بلهفه:

-أمال ايه اللي حصل بتعيطى ليه

قالت "ياسمين" من بين شهادتها:

"-عمر" زنى بواحدة متجوزة

هتفت "سماح" فى عدم تصديق:

-ايه .. بتقولى ايه ؟

قالت "ياسمين" بصوت مرتجف:

-أنا متأكده .. اتأكدت بنفسى .. اتكلمت مع الشاهد الى شافه واتعرف عليه واللى عمر دفعه

رشوة عشان ميتكلمش .. وشوفت الدليل بعيني .. مش دليل واحد دول اتنين .. "عمر" زنى

بواحدة متجوزة

قصت عليها "ياسمين" كل ما حدث بالتفصيل .. ساد الصمت طويلاً .. ثم قالت "سماح":

-أنا مكنتش أتوقع كده منه أبداً .. أيوة عارفه ان فى حياته تجاوزات كتير .. وكان فيه حاجات

غلط كتير جداً بينه وبين خطيبته .. بس متصورتش انه ممكن يعمل حاجه زى كده

قالت "ياسمين" بمرارة:

-قولتلك قبل كده .. اللى يعمل الغلطة الصغيرة بدون ذرة ندم .. يعمل الغلطة الكبيرة

نظرت اليها "سماح" بأسى قائله:

-هتعملى ايه دلوقتى ؟

قالت "ياسمين" باحتقار وهى تمسح دموعها بأصابعها:

-هرجعله شبكته .. أنا مش ممكن أتجوز راجل زانى

دمعت عيناها مرة أخرى وهى تقول بألم:

-ده أسوأ من "مصطفى" يا "سماح" .. الست كانت متجوزة .. وهو عارف انها متجوزة

جهشت فى البكاء مرة أخرى .. حاولت "سماح" تهدئتها .. مضى الوقت .. حتى هدأت

واستعادت رباطة جأشها .. ثم همت بالانصراف .. قالت لها "سماح":

-على فين ؟

ردت "ياسمين" بحزم:

-راحة أخلص منه وأمسحه تماماً من حياتى

مشيت بسرعة فى طريقها الى بيت المزرعة .. اتصلت بـ "عمر" الذى رد عليها قائلاً بصوت

حانى:

-حبيبتى .. كأنك حسه بيا .. كان نفسى أسمع صوتك

قالت بحزم:

-انت فين ؟

ضحك "عمر" قائلاً:

-ايه هنبدى من أولها .. مش بدرى شويه على السؤال ده .. عامة أنا فى مكتبى اللى فى البيت

.. حبيبتى فين باه ؟

ردت بحدة:

-أنا جياك

ثم أغلقت .. شعر "عمر" بالقلق .. نهض من مكانه ليستقبلها على الباب .. نظر الى وجهها و

عيونها الباكية .. ثم قال بلهفه:

-حبيبتى انتى كنتى بتعيطى

وقفت "ياسمين" تنظر الى عينيه وهى تقول فى نفسها .. ازاي قدرت تخدعنى .. ازاي مكنتش

شايه السواد اللى جواك .. بالظبط زى ما "مصطفى" خدعنى .. ومكنتش قادرة أشوف السواد

اللى جواه .. بكرهكوا انتوا الاتنين .. انتوا الاتنين زى بعض .. كرر "عمر" سؤاله باهتمام:

-حبيبتى .. مالك .. ايه اللى مضايقتك

نظرت اليه بحدته قائله بصوت هادر:

-أنا أسفة غيرت رأى .. مش هقدر أتجوزك

نظر اليها بدهشة قائلاً:

-بتقولى ايه؟

"ياسمين" بقسوة:

-مش عايزاك

صمت "عمر" وهو يحاول استيعاب ما تقول .. ثم قال:

-بتقولى ايه؟

"ياسمين" بنفس القسوة:

-بقولك مش عايزاك .. مش عايزاك

"عمر" بحدده:

-ليه هو كان لعب عيال .. كتب كتابنا النهاردة

قالت "ياسمين" ببرود:

-مفيش كتب كتاب .. ومفيش جواز

شعر "عمر" بالغضب يزداد بداخله .. فما كان منه إلا أن مسك كلتا ذراعيها وقربها منه بشدة

ونظر اليها قائلاً بغضب:

-انتى بتلعبى بيا يا "ياسمين" .. يعنى ايه مش عايزاك؟

حاولت أن تفلت نفسها منه لكنه كان يطبق على ذراعيها بشدة .. حاولت أن تبتعد عنه فلم

تستطع .. هتف بحدده:

-انطقى يعنى ايه اللي انتى بتقوليه ده

قربها منه للغاية .. فتلامس جسدهما .. شهقت "ياسمين" بالبكاء والعبرات الساخنة تتساقط

من عينيها ونظرت له قائله:

-عشان أنا وانت مننفعش لبعض .. انت واحد كل حياتك حرام .. كل تصرفاتك حرام .. قربك

منى بالشكل ده حرام .. مسكك ليا بالطريقة دى حرام .. لمسك ليا كده حرام .. بس انت واحد ما

بيفرقش معاك الحرام

ثم أغمضت عينيها وأخفضت رأسها فى ألم وهى مازالت تبكى .. نظر "عمر" اليها .. يحاول فهم ما تقول .. يحاول استيعاب ما يحدث .. أبعدا عنه قليلاً .. وترك ذراعيها .. فابتعدت عنه ورجعت للخلف بسرعة .. أخذت تمسح بكفيها على ذراعيها وكأنها لا تطيق لمستته .. شعرت اتجاهه بالاحتقار .. شعرت بالفشعريرة من مجرد لمسها اياه .. ولقربها منه .. لكم تتمنى أن تبتعد عنه .. أكبر مسافة ممكنه .. لا تريد أن تراه .. أو تقترب منه بعد اليوم .. تريد أن تبتعد عنه بأقصى سرعة .. بقدر ما أحبته .. بقدر ما سقط من نظرها الآن .. هم "عمر" بالتحدث معها مرة أخرى .. وفجأة قاطعه دخول والده قائلاً:

-الحق يا "عمر" .. عم "عبد الحميد" وقع فجأة وحاولت أفوقه مش راضى يفوق ..

صرخت "ياسمين":

-بابا

هرع "عمر" ووالده و "ياسمين" الى الخارج حيث "عبد الحميد" ملفى على الأرض .. أخذت

"ياسمين" تحاول تحسس نبضه وهى تبكى:

-بابا .. بابا مالك .. بابا رد عليا

حمل "عمر" ووالده .. "عبد الحميد" الى السيارة وركبت معهم "ياسمين" وانطلقوا الى

المستشفى .. كانت "ياسمين" منهارة على الكرسي بجوار الغرفة والأطباء يفحصونه فى

الداخل .. وقف "عمر" أمامها بأسى:

لا يدري ماذا حدث لها وكيف انقلبت عليه فى لحظات .. كان يريد أن يأخذها فى حضنه ويخفف

عنها ولكنه يعلم بأنها بالتأكيد سترفض ذلك .. خرج الطبيب .. وأنبأهم بأن حالته الصحية

حرجه .. بسبب ارتفاع ضغط الدم لديه .. بالإضافة الى مشاكل فى عضلة القلب .. انهارت

"ياسمين" مرة أخرى باكيه وظلت تردد " اللهم اجرني في مصيبتى واخلف لى خيراً منها " ..
منع الطبيب الزيارة الى أن تستقر حالته الصحية .. بعد قرابة الساعة أتت "ريهام" الى
المستشفى بصحبة "كرم" و "أيمن" و "سماح" و "كريمه" .. تعانقت الأختان واختلطت
دموعهما .. انتظروا حتى المساء ومازال الطبيب يمنع الزيارة .. عاد الجميع الى منازلهم فيما
عدا "ياسمين" و "ريهام" .. وبالطبع "عمر" و "كرم" ..
كانت الفتاتان فى حالة انهيار تام .. حاولت "ياسمين" التماسك من أجل أختها .. لكن خوفها
على أبيها ملأ قلبها .. ظل "عمر" يراقبها والألم يعتصر قلبه .. اقتبر منها وجلس بجوارها
قائلاً بحنان:

"-ياسمين" هدى نفسك شوية .. ان شاء الله هيبقى كويس
نظرت اليه "ياسمين" بنظرة حادة .. ثم قامت ووقفت بجوار باب غرفة والدها وأسندت رأسها
عليه وأغمضت عينيها لتسقط منها عبرة حزينة مكلومه
فى اليوم التالى .. سمح الطبيب بزيارة خفيفة نظراً لخطورة حالته الصحية وعدم استقرارها ..
دخلت الفتاتان .. حاولت "ياسمين" تمالك نفسها قدر الإمكان حتى تثبت الطمأنينه فى نفس
والدها ووقفت بجوار سريره مبتسمة بصعوبه ومسحت على رأسه قائلاً:

-بابا حبيبى عامل ايه دلوقتى

قال بصوت أجش:

-الحمد لله .. نعمه وفضل من ربنا

سقطت عبره من عين "ريهام" فنظرت اليها "ياسمين" نظره محذره .. قالت "ريهام" وهى
تقف على الجانب الآخر من الفراش:

-حمدالله على سلامتكم يا بابا

قالت "ياسمين" وهى تحاول رسم ابتسامه على شفيتها:

-الدكتور طمنا عليك وقالى يومين وهتبقى كويس أوى وهتخرج من هنا على طول

أغمض "عبد الحميد" عينيه للحظة ثم قال بصوت خافت:

-انا حاسس ان خلاص نهايتى قربت

بكت "ياسمين" قائله:

-بابا متقولش كده .. ان شاء الله هتبقى كويس .. أنا و "ريهام" محتاجينك .. بابا أنا محتجاك

أوى

نظر اليها قائلاً:

-أنا عايز أطمئن عليكوا يا بنتى قبل ما أموت .. ياريت كان حصلى اللى حصل ده بعد كتب كتابك

انتى وأختك .. لكن ربنا أكيد له حكمة ان ده يحصل قبل كتب الكتاب .. الحمد لله على كل حال ..

انت يارب عارف اللى فيه الصالح

نظرت اليه "ريهام" بأعين دامعة وقالت:

-ان شاء الله يا بابا هتقوملنا بالسلامة .. هو بس شوية تعب وهتبقى كويس

أمسك "عبد الحميد" كف "ياسمين" بيد .. وكف "ريهام" فى يده الأخرى وقال:

-لو فعلاً عايزين تريحو قلب أبوكوا .. نادولى "عمر" و "كرم" ووافقوا على اللى أنا هقوله

ليهم ..

نظرت "ياسمين" و "ريهام" الى بعضهما البعض .. قالت "ياسمين": "

-نوافق على ايه يا بابا؟

قال "عبد الحميد" وهو مازال ممسكاً بكفهما ويجاهد ليخرج صوته المتعب:

-بتحبونى وعايزين تريحو قلبى ولا لأ

-أكيد يا بابا

-طبعاً يا بابا

نظر الى "ريهام" قائلاً:

-روحي نادى لـ "عمر" و "كرم"
ذهبت "ريهام" وفعلت كما طلب والدها .. ثم عادت الى مكانها ممسكه كف والدها ..وقف
"عمر" و "كرم" بجوار "ياسمين" .. نظرت "ياسمين" لتجد "عمر" بجانبها .. شعرت
بالقشعريرة تسرى مرة أخرى فى جسدها .. يالله .. لكم تكره قربه منها .. أنزوت بجسدها
مبتعدة عنه .. وكأنه مرض خبيث تخشى أن يصيبها بلمسه منه .. نظر "عبد الحميد" الى
الرجلين قائلاً:

-أنا خلاص .. حاسس ان دى نهايتي .. وكل أملى فى الدنيا دى انى أظمن على بناتى قبل ما
أموت .. وأسيب كل واحدة فيهم فى عصمة راجل يحميها ويكون جمبها طول العمر
بكت الفتاتان فى صمت .. قال "كرم":
-ربنا يدريك الصحة يا عم "عبد الحميد" وتعيش وتجوز بناتك
نظر الى "كرم" قائلاً:

-انت شارى بنتى "ريهام" يا بشمهندس "كرم"
نظر "كرم" الى "ريهام" ثم قال فى دهشة:
-طبعاً يا عم "عبد الحميد" انت عندك شك فى كدة
ثم نظر "عبد الحميد" الى "عمر" قائلاً:
-وانت يا بشمهندس "عمر" شارى بنتى "ياسمين" ؟
التفت "عمر" الى "ياسمين" الواقفة بجواره .. صمت .. طال صمته .. ثم قال بصوت خافت:
-أبوة شاريتها

قال "عبد الحميد" وهو ينظر الى الأعين المتعلقة به:
-يبقى تجيبوا المأذون وتكتبوا الكتاب دلوقتى حالاً
نظرت اليه "ياسمين" بدهشة قائلة:
-بابا حضرتك بتقول ايه
صاحت "ريهام":

-بابا ازاي يعنى .. وحضرتك تعبان كده
سعل "عبد الحميد" بشدة .. أتت الممرضة وطلبت من الجميع الخروج .. شد "عبد الحميد"
كفيه على كفى بداته قائلاً بصوت خرج بصعوبة:
-محدث هيجرح من هنا .. وانتوا لو بتحبونى وعاييزين تريحو قلبى هتنفذوا اللى أنا طلبته
التفت الى "عمر" و "كرم" قائلاً:
-قولتوا ايه .. شاريين بناتى ولا لا
قال "كرم":

-أكيد طبعاً ومعديش مانع أبداً انى أكتب الكتاب هنا لو ده هيرحك يا عم "عبد الحميد"
نظر "عبد الحميد" الى "عمر" منتظراً رأيه .. قال "عمر" بثقه:
-وأنا كمان شاريتها وشاريتها أوى .. ومعديش مانع انى أكتب عليها هنا .. دلوقتى
وقفت "ياسمين" تتابع ما يحدث وكأنها تمثال .. بدون أن تُظهر أى تعبيرات على وجهها ..
بدون أى رد فعل .. ذهبت "ريهام" بصحبة "كرم" و "عمر" لاحضار الأوراق المطلوبة
والتي كان قد تم تحضيرها بالفعل .. وقفت "ياسمين" بجوار والدها .. كالتمثال .. عينيها تسبح
فى فضاء الغرفة .. شعرت بأنه تفكيرها قد سُئِلَ .. ومشاعرها قد تجمدت .. لم تشعر الا بشئ
واحد .. كف والدها التى تمسك بيدها فى اصرار .. دخل الطبيب لفحص "عبد الحميد" مرة
أخرى .. ثم نظر الى "ياسمين" بشئ من الأسف وخرج من الغرفة .. بعد ساعة حضر الجميع
.. تابعت "ياسمين" ما يحدث بأعين لا ترى .. وبأذن لا تسمع .. تشعر بأنها ترى مشهداً مكرراً
.. شعرت بأنها عاشت هذا المشهد من قبل .. لكن أين .. ومتى .. وكيف .. أفاقت على كلمة
واحدة نطق بها "عمر":
-قبلت زواجها

عندها تذكرت أين ومتى عاشت هذا المشهد .. انه هو نفس المشهد .. ونفس الإحساس ..
ونفس نبضة قلبها الحزينه .. للمرة الثانية .. تتزوج برجل لا تريده.
بعد ساعتين خرج الطبيب من الغرفة ونظر للجميع بأسف قائلاً : البقاء لله.

الفصل السابع والثلاثون

خيم الحزن على المزرعة .. التي أصبحت مرتعاً للأحزان .. افتقدت الفتاتان أباهما بشدة .. ساعد الجميع فى إجراءات الجنازة والدفن .. دُفن فى القاهرة فى المقابر التى دُفنت فيها زوجته .. مرت الأيام على الفتاتان ببطء شديد .. وكان عقارب الساعة قد أصابها عطل .. فتوقفت أو كادت .. كانت "كريمه" تشفق على حالهما كثيراً .. كانت تزورهما فى غرفتهما .. التى أصرا على المكوث فيها .. وترسل لهما الطعام مع الخادمة كل يوم .. وقف "كريم" بجوار "ريهام" فى محنتها .. كان دائم الإتصال بها والإطمئنان على حالها .. أما "عمر" فلم تتوقف اتصالاته لـ "ياسمين" التى لم تجب على أى منها .. حتى اضطرت الى غلق هاتفها ..

كان "عمر" يشعر بالحيرة .. لماذا انقلبت عليه فجأة .. هل هو التوتر الذى يسبق الزواج .. هل عادت الى مخافها مرة أخرى .. لماذا لا تعطيه وتعطى لنفسها فرصة .. هل تجربتها المريرة ستظل تقف حائلاً بينهما .. كاد أن يجن من كثرة التفكير .. لم يجد حلاً إلا فى التحدث مع والدته .. عليها تريح قلبه .. قال "عمر": "

-أنا بس نفسي أعرف ليه هى قالتلى كده .. كلمتها وجعتنى أوى .. عارفه يعني ايه حبيبتي ويم كتب كتابنا تقولى (مش عايزاك) .. وكده بدون أسباب استمعت أمه الى حديثه كاملاً .. وعن تفاصيل آخر لقاء له مع "ياسمين" صبيحة يوم كتب الكتاب .. ثم قالت فى هدوء:

-بص يا "عمر" .. كثير بنات بتخاف لما الموضوع بيدخل فى الجد .. يعني بتخاف انها تكون اختارت غلط .. بتخاف انها لسه مش عارفه كويس الراجل اللى هى هتبقى مراته .. تعرف آخر مرة كانت "ياسمين" عندنا هنا .. قبل كتب الكتاب بيومين .. جت سيرة الماجستير والدكتوراه بتوعك .. لقيتها مندهشة .. يعني حتى مكنتش تعرف عنك المعلومة البسيطة دى .. هى فعلاً يا "عمر" لسه البنات متعرفش حاجات كثير عنك .. وده أكيد مخوفها .. دى مخاوف أى بنت عادية .. ما بالك بأه بواحدة مطلقة .. وكانت متجوزة واحد أستغفر الله زى طليقها ده راجل معدوش ضمير .. متخيل حجم المخاوف اللى جواها عاملة ازاي .. خاصة ان والدها قال ان طليقها ده مكنش باين عليه كل اللى عمله ده وكان باين عليه واحد محترم وابن ناس .. اللى عايزة أقوله ان رغم انى مش معاها فى انها تهرب زى ما بتهرب دايماً .. ولازم تواجه كل اللى مخاوفها .. بس برده مقدره ان البنات ممكن تكون مخاوفها سيطرت عليها لدرجة خلت تفكيرها يتشل .. لدرجة خلتها مترددة وبتفكر فى الحاجة ألف مرة .. وكتر التفكير ييفتح مجال للشيطان انه يدخل ويوسوس براحته تنهد "عمر" قائلاً:

-يعني أنا أعمل ايه دلوقتي ؟

-بص يا حبيبى .. دلوقتي هى بتمر بحالة نفسية صعبة بسبب موت والدها .. وبسبب جوازها المفاجئ بعد ما جتلك وقالتك ان الجواز ملغى .. فكل اللى مطلبو منك هو انك تفضل جمبها فى أزمتها .. وتتحملها لحد ما تخرج منها .. على فكرة يا "عمر" الست بتقدر أوى الراجل اللى يقف جمبها وتحسن انه سند ليها .. الست لما بتلاقى راجل بيحبها وخايف عليها وواقف جمبها حتى وقت الخلاف بينهم لازم غصب عنها تعشق التراب اللى بيمشى عليه .. "ياسمين" خلاص بأه مراتك .. وانت جوزها .. وكمان البنات ملهش أى حد غير أختها الأصغر منها .. يعني انت كل عيلتها دلوقتي يا "عمر" "

أوما "عمر" برأسه وقد شعر بالراحة للحديث مع أمه .. فقد أجابت على الأسئلة التى كانت تعتمل داخل عقله وقلبه .. قرر أن يقف بجوار حبيبته فى محنتها .. ولن يتخلى عنها أبداً.

حاول أن يتصل بـ "ياسمين" مرة أخرى .. لكن هاتفها مازال مغلقاً .. فخرج من منزله وتوجه الى غرفتها فى سكن العمال .. طرق الباب .. بعد فترة .. فتحت "ريهام" مرتدية اسدال الصلاة .. نظرت اليه باستغراباً .. فقال لها:
-ازيك يا "ريهام" أخبارك ايه ؟
-كويسه الحمد لله
-"ياسمين" موجودة ؟
أومات برأسا .. فقال:
-طيب لو سمحتى قوليلها انى عايزها
دخلت "ريهام" .. دقيقتين وخرجت "ياسمين" مرتدية اسدال الصلاة هى الأخرى .. نظر اليها يملى عينيه بروياها التى حُرِمَ منها لأيام .. كانت ضعيفة ذابله .. دامعة العينين .. رق قلبه لحالها .. اقترب منها قائلاً بحنان:
-حبيبتي انتى كويسه ؟

أومات برأسها وتحاشت النظر اليه .. رفع يده ليمرر ظهر أصابعه على وجنتها قائلاً:
-أفله تليفونك ليه .. وليه مبترديش عليا
أبعدت وجهها عن أصابعه .. فسحب يده وظل ينظر اليها فى صمت .. وهى مازالت تتحاشا النظر الى وجهه .. طال الصمت بينهما .. نظر اليها قائلاً:
-ماشى هسيبك براحتك .. بس لو سمحتى افتحى تليفونك عشان لما أحب أظمن عليكى .. بديل ما كل شوية تلاقيني جايلك هنا .. أنا سبتك الكام يوم اللى فاتوا برحتك .. بس قدرى انى قلقان عليكى وحابب أسمع صوتك وأظمن عليكى

صمت برهه ثم قال:
-ماشى يا "ياسمين"
أومات برأسها .. فقال:
-لو احتجتى حاجه كلمينى
غادر "عمر" وعادت الى سريرها تلقى بنفسها عليه .. اعطت "ريهام" ظهرها حتى لا ترى العبرات التى تتساقط من عينيها فى صمت .. سألت دموعها .. لماذا تسقطين يا دموعى ..
أبسبب موت أبى .. الرجل الوحيد الذى أثق به فى هذه الدنيا .. أم تسقطين بسبب حالى وما يحدث لى .. كفى يا دموعى عن السقوط .. لم أعد أحتمل حرارتك على وجهى .. ألا تجفين أبداً ..
لماذا تذكريني دائماً بطعمك المالح فى فمى .. أريد أن أنسى طعمك يا دموعى .. لماذا تذكريني بكِ دائماً وتخرجين من عيناى بكل اصرار وكأنك تتحديني .. وكأنك تتعنين أن تؤلميني .. لماذا يا دموعى لا ترحمينى!..

أقتربت منها "ريهام" وجلست بجوارها على الفراش .. التفتت "ياسمين" اليها وجلست ..
قالت "ريهام" بأسى:
-وحشنى أوى يا "ياسمين"
أغرورقت عينا "ياسمين" بالدموع قائله:
-وأنا كمان وحشنى أوى
ثم قالت:
-عايزين نعمل صدقة جارية ليه
أومات "ريهام" برأسها قائله:
-زى ايه ؟

-مش عارفه لسه بفكر .. بس عايزين نعمله أكثر من حاجه عشان ثوابه يكون أكبر
ثم تساقطت عبرة من عينيها وهي تقول بصوت مرتجف:
-الإنسان لما بيموت .. الحاجة الوحيدة اللي بيستمر ياخذ عليها ثواب هي ان ولاده يدعوله
ويعملوله صدقة جارية .. وعايزين نعمل لماما كمان
أومأت "ريهام" برأسها وأسندتها على كتف أختها قائله:
-ماشى أنا هديكي كل الفلوس اللي أنا محوشاها من مرتبي وانتي شوفى هتعملى بيها ايه
قالت "ياسمين": "
-لأ مش هاخدكم كلهم .. احنا لسه منعرفش احنا هنعيش ازاي .. خلاص كدة معاش بابا الله
يرحمه اتقطع عننا لاننا اتجوزنا .. يعني ملناش أى مصدر رزق نعيش منه الا شغلنا هنا ..
وأمرنا دلوقتي اتلخبطت
رفعت "ريهام" رأسها ونظرت اليها قائله:
-ايه اللي هيحصل دلوقتي يا "ياسمين" .. أقصد بعد ما كل واحدة فينا اتكتب كتابها .. وبعدين
.. ايه اللي هيحصل .. طبعا الفرحة لازم يتأجل .. بس هل هنفضل نشغل عندهم زى ما احنا ..
ولا لأ .. ولو مشتغلناش هنصرف على نفسنا منين
نظرت "ياسمين" الى "ريهام" قائله:
-ربنا موجوده .. مش هيسبنا .. اطمنى يا "ريهام" .. ربنا قادر بيعت لنا الحل لكل مشاكلنا
فتحت "ياسمين" أحد الأدراج بجانبها وأخرجت مصحفاً وفتحته وأسندت ظهرها الى الوسادة
خلفها وبدأت فى القراءة .. رجعت "ريهام" بظهرها للخلف وأسندت رأسها على كتف أختها
تستمع الى تلاوتها.

فى اليوم التالى .. خرجت "ريهام" من الحمام لتجد أختها ترتدى ملابسها فسألته:
-انتي خارجه ؟
قالت "ياسمين" شارحه:
-أيوة .. هروح أشوف موضوع الصدقة الجارية اللي اتكلمنا عنه امبارح
-أجى معاكى
-لا يا حبيبتي مفيش داعى خليكى
خرجت "ياسمين" .. توجهت الى الطريق المؤدى للبوابه .. كان "عمر" يقف أمام البوابه
يتحدث الى رجل داخل سيارته .. نظر الى "ياسمين" فتجاهلت نظراته .. أنهى "عمر" كلامه
مع الرجل الذى انطلق بسيارته خارج المزرعة ثم توجه اليها يقطع طريقها قائلاً:
" -ياسمين" .. راحه فين؟
نظرت اليه .. يالله .. لكم تؤلمنى رؤيته .. وتذكرنى بكل ما أريد نسيانه .. أعاده سؤاله:
-راحه فين يا "ياسمين" .. قالت بهدوء:
-نازله المنصورة
-تعملى ايه فى المنصورة
قالت بشئ من نفاذ الصبر:
-هشترى شوية حاجات
قال وهو يهم بالإنصراف:
-طيب ثوانى هجيب العربية وأجى
قالت بسرعة:
-مفيش داعى .. أنا هروح لوحدى
نظر اليها بحنان قائلاً:

-ازاي يعني اسيب مراتى تركب فى المواصلات وأنا موجود
خفق قلبه عندما سمعت منه كلمة (مراتى) .. تلك الكلمة التى تحاول أن تتناساها .. لكنها
واقع .. وأمر مفروغ منه .. لم تعد تستطيع الهرب .. عاد "عمر" و أحضر سيارته أوقفها
أمام "ياسمين" وفتح لها الباب .. شعرت بإحساس غريب .. هو مزيج من خوف وحيرة وتردد
.. للمرة الأولى تركب سيارة رجل غريب بمفردها .. ذكرت نفسها .. ليس غريباً يا "ياسمين"
.. بل هو زوجك .. زوجك الذى فرض عليكِ فرضاً .. زوجك رغم أنك .. اهربي منه فى
عقلك كما تريدين .. لكنك لن تستطيعي الهرب من الواقع أبداً.
ترددت لحظات فى الركوب .. نظر اليها "عمر" يراقب ملامح التردد على وجهها .. ركبت
بجواره .. بجوار زوجها .. شعرت بالرهبة .. تنهدت وحاولت السيطرة على خفقات قلبها ..
هى حتى لا تعلم مما هى خانفه .. سار "عمر" فى طريقه الى المنصورة .. يلقى نظرة عليها
كل فترة .. نظر اليها قائلاً:

-عايزه تروحي فين ؟

صمتت لتفكر .. ثم قالت:

-عايزة أروح أى مكتبة اسلامية

قال باستغراب:

-مكتبة اسلامية

أومات برأسها فقال:

-ليه ؟

قالت بهدوء:

-عايزة أشتري مصاحب عشان أحطها فى المسجد اللى فى القرية .. صدقة جارية لبابا وماما

الله يرحمهم

شعر "عمر" بحنان جارف تجاهها .. لاحت ابتسامه على شفثيه .. ونظر الى يدها الموضوعه
بجانبيها على المقعد .. مد يده ليحتضن كفها .. فنزعت يدها بسرعة .. وكتفت ذراعيها أمام
صدرها .. تضايق "عمر" .. لكنه أخفى ضيقه .. مراعاة لمشاعرها وللظروف التى تمر بها ..
توقف أمام المكتبة .. نزل معها .. وواختارت ما تريد .. وعندما همت بفتح حقيبتها وجدت
"عمر" يسبقها ويخرج محفظته .. فقالت بسرعة:

-لأ أنا اللى هدفع

نظر اليها "عمر" نظرة محذرة .. نظرة صارمة .. دون أن يتكلم .. كم اخافتها نظرتة فألجمت
لسانها .. يا لهاتين العينين .. هما قادرتان على غمرها بالحنان تارة .. وعلى اخافتها تارة
أخرى .. دفع "عمر" المبلغ للرجل وحمل المصاحف ووضعها فى صندوق السيارة .. وتوجه
الى باب "ياسمين" وفتحه لها .. ركبت "ياسمين" .. وركب "عمر" وانطلق فى طريقه .. ساد
الصمت .. قطعتة "ياسمين" وهى تخرج .. المال من حقيبتها وتعهده .. ثم تعطيه له فى حده
قائله بحزم:

-اتفضل

ألقى "عمر" نظرة على المال ثم عليها .. صمت للحظات بدون رد فعل .. ومازالت يدها ممدودة
بالمال .. ثم .. أخذه منها ووضعها بإهمال على تابلوه السيارة .. نظرت أمامها .. قال "عمر"
بهدوء لكن بحزم:

-تانى مرة لما أكون معاكى فى مكان .. أوعى تفتحى شنطتك وتحاولى انك تحاسبى .. أنا راجل
مش قفص جوافة

قالت "بهدوء:

-الحاجة دى بتاعتى وأنا اللى لازم أدفع تمنها

قال بحزم دون أن ينظر اليها:

-ده يبقى بينى وبينك .. مش أدام الناس
ثم نظر اليها قائلاً:
-اتفقنا؟

نظر اليه .. تلاقت نظراتهما .. هى تحاول قراءة عينيه وهو يحاول قراءة عينيها .. أو مات
برأسها ثم عادت لتتنظر أمامها فسألها:
-عايزة تروحي مكان تانى؟
قالت بتردد:

-لو مش هعطلك .. عايزه أروح أى دار أيتام هنا
فكر "عمر" قليلاً ثم قال:
-ماشى

ثم نظر اليها وابتسم ابتسامه عذبه قائلاً:
-حبيبتي تأمر وأنا أنفذ
اختلج قلبها لابتسامته الجذابه .. وكلماته الرقيقة .. فأشاحت بوجهها .. وذكرت نفسها بكل ما
علمته عنه .. وبكل ما تكرهه فيه.

سمعت "ريهام" طرقات على الباب فقامت لتفتح ظناً منها أنها "ياسمين" .. لكنها وجدت
"كرم" أمامها .. ابتسم لها قائلاً:
-وحشتيني جيت أشوفك

ابتسمت "ريهام" بخجل وقالت:
-احنا كنا لسه أفلين مع بعض من شوية
قال فى مرح:
-انتى فاكرة ان صوتك كفاية يعني .. ده أنا لما بتكلم معاكى فى التليفون بحس انك بتوحشيني
أكثر

سألها بخفوت:

"-ياسمين" جوه؟

-لأ .. خرجت راحت المنصورة

ابتسم "كرم" قائلاً:

-كويس

ولدهشتها وجدته يدفعها ويدخل ويغلق الباب .. قالت بدهشة:

"-كرم" انت بتعمل ايه

قال بجديه:

-عايز أتكلم مع مراتى .. ايه فيها حاجه

أشارت الى الباب المغلق قائله:

-بس مش كدة .. مينفعش كده

ضحك قائلاً:

-يا بنتى انتى مراتى

جذبها من ذراعيه ليضمها الى صدره .. فدفعته عنها قائله بخجل:

-انت بتهرج على فكرة

ابتسم قائلاً:

-أموت فيك وانت مكسوف كده .. طيب أنا بس عايز أتكلم معاكى فى موضوع

قالت بتوتر:

-طيب اتكلم بسرعة

نظر اليها بجديه قائلاً:

-حبه جد بأه عشان فى موضوع مهم فعلاً عايز أكلمك فيه
رأت ملامح الجدية على وجهه فشعرت بالقلق وقالت:
-خير؟

قال "كرم" بجديه:

-أنا خلاص معدش ينفع أستنى هنا أكثر من كده .. الشغل كتير فى القاهرة وفى حاجات لازم
أعملها بنفسى .. يعنى لازم أرجع القاهرة فى أقرب وقت

صمتت "ريهام" قليلاً لا تدرى ما تقول فأكمل "كرم":

-لازم تيجي معايا القاهرة يا "ريهام" .. يعنى أقصد تعيشي معايا .. تبقى دخله يعنى
نظرت اليه وقالت بدهشة:

-انت بتقول ايه يا "كرم" .. ازاي أعمل فرح وأبويا لسه ميت؟
قال "كرم" بسرعة:

-مش لازم نعمل فرح .. بس أنا مضطر أرجع القاهرة ومش عايز أسيبك هنا .. عايزك معايا يا
حببتى .. وبعدين انتى ناسية الإمتحانات بتاعتك .. انتى نفسك لازم ترجعى القاهرة عشان
امتحاناتك

فكرت "ريهام" بتمعن ثم قالت:

-وازاي أسيب "ياسمين" لوحدها؟

"-ياسمين" مش لوحدها .. جوزها هنا .. "عمر" .. وكمان طنط "كريمة" هنا
أخذت تفكر .. ثم قالت له فى حيرة:

-مش هقدر أمشى من هنا يا "كرم" إلا بعد ما أطمئن ان "ياسمين" هى كمان هتبقى مع
"عمر" فى بيته .. ومش هتعد هنا لوحدها

قال "كرم" مطمئناً:

-متقلقيش أنا واثق ان "عمر" هو كمان هيعجل بموضوع الدخلة .. عشان الوضع كدة مش
مضبوط .. يعنى مينفعش تعدوا انتوا الاتنين لوحذكوا .. وفى سكن عمال طالعه نازله .. وكل
واحدة متجوزة راجل يسد عين الشمس
نظرت اليه قائله:

-خلاص .. شوف انت "عمر" ناوى على ايه .. بس أنا مش همشى من هنا طول ما
"ياسمين" أعده .. مش ممكن هسيب أختى لوحدها .. وفى ظروفنا دى .. احنا خلاص بقينا

لوحدنا وملناش الا بعض

اقترب منها "كرم" ومسحها على وجنتها فى حنان قائلاً:

-وأنا روحت فين .. انتى مش لوحذك يا "ريهام" .. أنا معاكى .. ومش عايز تفتلقى من حاجه
طول ما أنا معاكى

ابتسمت بخجل وقالت:

-عارفه يا "كرم" .. تعرف انت اللى كنت بتصبرنى الأيام اللى فاتت .. كنت بفرح لما كنت
بتكلمنى كل شوية وبتظمن عليا .. خلتنى أحس ان مش لوحدى

ابتسم قائلاً:

-طبعاً مش لوحذك

حاولت جذبها من ذراعها مرة أخرى الى حضنه .. فدفعته عنها بخجل .. تركها قائلاً بمرح:
-ماشى برحتك .. بكرة تبقى فى بيتى يا جميل .. أنا وانت وتالتنا الشيطان

ضحكت "ريهام" وقالت وهى تكتم ضحكاتها:

"-كرم" اطلع بره

ابتسم قائلاً:

-ماشى .. هطلع .. ليك يوم يا جميل
ثم نظر اليها بفرحة قائلاً:
-بس عارفه كويس انى جيت .. على الأقل شوفت ضحكك الحلوة دى
نظرت اليه بحب وقالت مبتسمة:
-ربنا يخليك ليا يا "كرم"
نظر اليها بحنان .. ثم فتح الباب وقبل أن يخرج .. التفت بسرعة ليطلع قبلة سريعه على
وجنتها ثم خرج مسرعاً وهو يضحك .. قالت "ريهام" بغیظ بصوت منخفض:
-ماشى يا "كرم"

دخلت "ياسمين" الى دار الأيتام بصحبة "عمر" .. توجهوا الى مكتب المديرية وتبرعت
"ياسمين" بمبلغ لمساعدة الأطفال .. كصدقة جارية لوالدها ووالدتها رحمهما الله .. كان
"عمر" يراقبها بعينين حنونتين وهى تتحدث مع المديرية .. رق قلبه لتلك الفتاة التى أمامه
والتي كلما رآها شعر بقلبه كعصفور صغير يرفرف بجناحيه داخل صدره .. شعر بسعادة غريبة
تسري فى كيانه كله وهو ينظر اليها والى أفعالها الطيبة .. حانت التفاتة منها وتلاقت أعينهما
.. كانت نظرتة شغوفه حنونه تشى بحب واضح لا يمكن أن تخطئ فى تفسيره .. أشاحت
بوجهها فى خجل .. أخذتهم المديرية الى حجرة بعض الأطفال وأخذت تتحدث عن المجهودات
التي تبذلها الدار لعلاج أولئك الأطفال الذين فقدوا زويهم .. نظرت "ياسمين" الى الأطفال
البريئة التى تلعب فى مرح .. تفرقت عيناها بالعبرات .. حمدت ربها أن أمد فى عمر أبويها
حتى ربوها وكبورها هى وأختها

أما هؤلاء الأطفال المساكين معظم لم يروا زويهم .. وتربوا بدونهم .. وسيكبرون بدونهم ..
شعرت بالعبرات تندفع من عينيها كالشلال وهى تنقل بصرها من طفل لآخر وضعت كفها على
فمها لتكتم شهقات صغيرة كادت أن تفلت منها .. نظر اليها "عمر" و خفق قلبه .. رفع ذراعه
وأحاط كتفيها وقربها منه .. و .. قبل رأسها .. انتبعت "ياسمين" لقربها منه .. فرفعت عينيها
الدامعتين اليه فى خجل لتصطدم بنظرة حنان فى عينيها .. ثم تبتعد عنه .. مسحت دموعها ..
اقترب "عمر" من أحد الأطفال .. كان طفلاً صغيراً فى الثالثة من عمره .. يمسك لعبة مكونه
من جزئين فشل فى تركيبهما فأخذ يبكى .. أمسك "عمر" منه اللعبة وركبها و ابتسم الى
الصغير وأعطاه اياها ومسح على شعره .. وقف مرة أخرى بجوار "ياسمين" ينظر للطفل
الذى يلعب بلعبته فى مرح .. نظرت اليه "ياسمين" قائله:
-تعرف انك خدت ثواب كبير أوى باللى انت عملته ده
التفت اليها بدهشة قائله:

-عملت ايه ؟

قالت شارحه:

-مسحت على راس طفل يتيم .. اللمسه دى ثوابها كبير

نظر اليها بشغف قائلاً بصوت هامس:

-كويس يعنى معايا كنز حسنات .. مش هشيل ايدي من عليه أبداً
احمرت وجنتاها وتحاشت النظر اليه .. قبل انصرافهم توقف "عمر" وأخرج دفتر شيكاته
وكتب شيكاً وأعطاه الى مديرة الدار .. لم تعرف "ياسمين" الرقم المكتوب لكنها رأت علامات
الفرحة على وجه المرأة ونظرت اليه قائله:

-ربنا يباركك يا ابنى ويحفظك من كل سوء .. ده أكبر مبلغ حد يتبرع بيه من يوم ما افتحنا
الدار ..

أخذت "ياسمين" تنظر اليه وهى تتسائل فى نفسها .. ترى أفعل هذا لينال أجراً .. أم ليفكر

عن ذنباً .. التفت "عمر" اليها فوجدها تنظر اليه نظرة غريبة أخفتها سريعاً .. انها زيارتهم
و ركبوا السيارة .. نظر "عمر" اليها مبتسماً:

-تحبي تروحي فين تاني؟

-شكراً .. أنا كده خلصت اللي كنت عايزه أعمله .. لو راجع المزرعة وصلني في طريقك لو
سمحت

رفع حاجبيه بتحدى قائلاً:

-ولو مش راجع؟

قالت بارتباك:

-مفيش مشكلة ممكن توصلني الموقف وأنا هركب عربية توصلني المزرعة
نظر الي ساعته قائلاً:

-في الوقت ده .. الساعة 9 .. تركبي عربية لوحدك وتمشى على طريق سفر
ازداد ارتباكها وقالت:

-أنا مش هكون لوحدى في العربية .. معايا ركاب .. وكمان أنا مضطرة يعني مفيش أدامي حل
تاني

أمسك وجهها بكفه وجعلها تلتفت اليه .. اقترب منها لتتلاقا نظراتهما .. قال لها:

"-ياسمين" أنا جوزك .. فاهمة .. جوزك .. متتعلميش معايا كأني راجل غريب .. انتي دلوقتي
مراتي ومسؤله مني .. ياريت تفهمي ده كويس

صمتت .. وأبعدت وجهها عن يده .. اعتدل في مقعده وانطلق في طريقه .. توقف أمام احدي
المطاعم والتفت اليها قائلاً بابتسامه:

-أنا جعت .. ممكن ننزل ناكل مع بعض وبعدين نرجع المزرعة
اعتذرت قائله:

-معلش أنا أسفه أنا عايزة أرجع المزرعة عشان سايبه "ريهام" لوحتها

صمت .. وانطلق في طريقه الى المزرعة .. أوقف السيارة أمام سكن العمال .. التفتت اليه
"ياسمين" قائله:

-ممكن لو سمحت تفتحلي الشنطة عشان آخذ المصاحف
قال لها "عمر":

-لأ خليهم في العربية وبكرة هوصلهم بنفسي لمسجد القرية

علمت أنها لو اعترضت لن تجدى منه رجا .. فاستسلمت ونزلت من السيارة .. نزل "عمر"
هو الآخر والتف حول السيارة .. نظرت اليه قائله:

-شكراً

همت بالإنصراف فوقف أمامها .. نظر اليها قائلاً:

-على فكرة الوضع ده مش هينفع يستمر كثير
نظرت اليه بعدم فهم .. قائله:

-يعني ايه؟

قال بهدوء:

-يعني مش هسيب مراتي عايشه لوحتها في سكن العمال
قالت له بحده:

-أنا مش لوحدى أنا معايا "ريهام"

"-ريهام" هتسافر القاهرة مع جوزها يا "ياسمين"
نظرت اليه بدهشة فأكمل قائلاً:

"-كرم" مضطر يرجع القاهرة عشان الشغل .. وقالى انه عايز مراته معاه
ثم نظر اليها نظرة ذات معنى:

-زى ما أنا عايز مراتي معايا

كانت "ياسمين" تشعر بالغضب يشتغل بداخلها .. غضب وحنق و قلة حيله .. أهذه هي نهاية المطاف .. ستصبح زوجة فعليه لهذا لهذا الزانى .. ارتجف قلبها عندما ترددت الكلمة بداخلها .. يا لها من كلمة بغیضة مقررزه .. لا تحتمل النطق بها .. فكيف ستحتمل من قام بها .. نظرت اليه وقالت بحزم:

-مفیش مشكلة "ريهام" تسافر مع "كرم" وأنا أفضل هنا فى السكن
قال "عمر" بحده:

-قولتلك مش هسيب مراتى عايشة لوحدتها فى سكن العمال يا "ياسمين" .. الوضع ده غير مقبول بالنسبه لى .. لازم تعرفى انك دلوقتى مراتى .. ولما حقوق عليكى شعرت بغصة فى حلقها .. شعرت وكأنها تختنق .. تجمعت العبرات فى عينيها .. صاحت وعيناها تشتعلان غضباً وكرهاً:
-انت ايه معندكش احساس .. على الأقل استنى لحد ما أفوق من صدمتى فى موت أبويا وبعدين ابقى اطلب منى حقوقك

صمت "عمر" .. طال صمته وهو يتطلع اليها .. الى تعبيرات وجهها الغاضبة .. الى الألم والدموع فى عينيها .. ثم اقترب منها .. رجعت الى الخلف محاولة الابتعاد عنه لتصطدم بالسيارة خلفها .. اقترب أكثر وقال بصرامة وقوة:
-انا لما قولت حقوقى .. قصدك حقى فى ان مراتى تكون جمبي ..وتعيش معايا فى نفس البيت .. ما قصدتش غير كده

غزت حمرة الخجل وجهها .. فأكمل "عمر" وفى عينية نظرة حاده:

-انا مش "مصطفى" يا "ياسمين"
ارتجف قلبها .. أكمل بغضب مكتوم:

-أنا مش حيوان زيه

أخفضت نظرها وقد شعرت بالخجل لأنها أخطأت تفسير كلماته .. زفر "عمر" ليهدئ من نفسه .. نظرت اليه "ياسمين" قائله:

-أنا أسفه

نظر اليها "عمر" قائلاً بهدوء:

-أنا عذرك لأنك لسه معرفتنيش يا "ياسمين" .. بس صدقيني أنا مش ممكن أبداً أعمل حاجة تجرحك

رأبت "ياسمين" الصدق فى عينية .. وسمعتة فى صوته .. ابتسم لها .. ابتسمت له فى خجل .. خفضت بصرها .. لترتطم نظراتها بالحرق على يده .. شعرت بغصه فى حلقها .. رفعت نظرها اليه .. حائرة .. مترددة .. متألّمة .. ابتلعت ريقها وقالت بصوت حاولت أن يبدو طبيعياً:
-الحرق اللى فى ايدك ده من ايه ؟

شعر "عمر" بالسعادة .. فهذه هي المرة الأولى التى تسأله عن شئ يخصه .. قال لها:
-شكله مضايقتك ؟

قالت بارتباك:

-لأ .. مش كده .. أنا .. أنا بس بسأل عادى .. من زمان الحرق ده ؟
ظهر الضيق على وجهه .. ثم قال:

-لأ مش من زمان أوى .. وموضوع مش حابب أفتكره
خفق قلبها بشدة .. قالت تحاول معرفة اجابه لسؤالها:

-حصل هنا فى المزرعة ؟ .. ولا فى القاهرة ؟

نظرت اليه تراقب تعبيرات وجهه .. نظر اليها .. بدا متردداً .. ثم قال:
-حقيقى يا "ياسمين" مش حابب أتكلم فى الموضوع ده

أقرب منها وأمسك يدها قائلاً:

-خلينا نتكلم عننا أحسن

سحبت "ياسمين" يدها من يده وقالت ببرود:

-أنا اتأخرت على "ريهام" .. بعد اذنك

ثم غادرت الى غرفتها .. استقبلتها "ريهام" قائلة:

-عملتى ايه

قالت "ياسمين" وهى شارده:

-كويس

-هو ايه اللي كويس .. عملتى ايه اشتريتي ايه للصدقه بتاعة بابا وماما

التفتت "ياسمين" اليها وقالت بنفاذ صبر:

"-ريهام" أرجوكى سبيني دلوقتى .. مش قادرة أتكلم فى أى حاجة

دخلت "ياسمين" الحمام ووقفت تنظر الى نفسها فى المرآة .. لماذا تهرب من اجابة سؤالها ..

لماذا ظهرت علامات الضيق على وجهه عندما ذكرت ذلك الحرق .. كل الشواهد تؤكد ما

توصلت اليه بنفسها .. نعم هو مذنب .. نظرت الى نفهسا بسخريه .. ماذا توقعتى أن يجيبك ..

أيقول لك لقد ارتكبت جريمة شنعاء وكان جزائي أن أصيب يدي .. أكنتى تظنين بأنه سيعترف

لك بماضيه .. هذا الماضى الأسود الذى بنى بينك وبينه آلاف الأسوار العالية .. بالتأكيد سيكذب

.. بالتأكيد سينكر .. من يرتكب جريمة بشعة مثل الزنى .. سيكون الكذب لعبة سهله بالنسبه له

.. أغمضت عيناها فى ألم .. انتظرتها "ريهام" حتى خرجت .. ثم قالت:

"-ياسمين" .. "كرم" جالى النهاردة .. وقالى انه مضطر يسافر القاهرة عشان شغله .. و...

صمتت قليلاً ثم قالت:

-وعايزنى أسافر معاه .. يعنى طبعا مش هنعمل فرح عشان بابا الله يرحمه .. بس هو عايز

خلاص نتجوز ونعيش مع بعض

صمتت "ياسمين" ولم تجب .. فأكملت "ريهام":

-أنا قولتله مش هينفع .. إلا بعد ما أظمن على "ياسمين"

قالت "ياسمين" بدهشة:

-تطمنى عليا ازاي يعنى

-يعنى نشوف "عمر" ناوى على ايه .. هو مكلمكيش فى حاجه

زفرت "ياسمين" بضيق .. ثم قالت:

"-ريهام" ملكيش دعوة بيا .. سافرى مع "كرم" .. وأنا مش صغيرة عشان معرفش أعيش

لوحدى

قالت "ريهام" بحزم:

-مستحيل .. مش هسافر مع "كرم" إلا لما انتى تروحي بيتك

قالت "ياسمين" بأسى:

-بيتى ؟

أومأت "ريهام" برأسها قائلة:

-أيوة بيتك .. بيت "عمر"

قالت "ياسمين" بضيق وهى تتوجه الى فراشها:

-خلينا نتكلم بكرة يا "ريهام" .. أنا تعبانه دلوقتى وعايزة أنام

قضت "ياسمين" ليلتها والكوابيس تؤرق مضجعها .. أفاقت على احدى كوابيسها تصرخ ..

استيقظت "ريهام" على صوتها .. ذهبت وجلست بجوارها لتجد "ياسمين" جالسها تبكى ..

قالت "ريهام" بلهفه:

"-ياسمين" ايه اللى حصل .. حلمتى حلم وحش ؟
 قالت "ياسمين" من بين شهقاتها:
 -مش طيقاه .. مش طيقه أشوفه .. ولا طيقه أسمع صوته .. ولا طيقه انه يلمنى
 قالت "ريهام" بدهوة:
 -مين ؟ .. "عمر" .. ؟
 -أيوه
 -ليه يا "ياسمين" .. ايه اللى حصل بينكوا .. انتوا اتخانفتوا
 قالت "ياسمين" بألم:
 -من غير ما يحصل حاجه .. أنا مش طيقاه وخلص
 أخذتها "ريهام" فى حضنها لتهدئها .. فى الصباح ذهبت "ريهام" الى مكتب "كرم" .. "دخلت
 وأغلقت الباب خلفها .. قام فوراً واتجه اليها قائلاً بمرح:
 -والله وبقينا نقفل الباب
 ابتسمت "ريهام" قائله بلؤم:
 -لو عايزنى أفتحه معديش مانع
 ابتسم قائلاً:
 -لأ خليه مقفول أحسن نستهوئ
 قالت "ريهام" بجديه:
 " -كرم" .. مش هينفع أسافر معاك .. أنا اتكلمت مع "ياسمين" وهى مش حبه تروح بيت
 "عمر" دلوقتى
 قال "كرم" باستغراب:
 -ليه مش حبه
 هتفت بحده:
 -ايه اللى ليه مش حبه .. مش حبه وخلص انا ايش عرفنى
 قال "كرم" بضيق:
 -يعني هسافر لوحدى .. أنا فى بلد ومراتى فى بلد
 نظرت اليه "ريهام" بأسف قائله:
 -معلش يا "كرم" مش بايدي .. بس مقدرش أسيب أختى لوحدها
 تنهد "كرم" قائلاً:
 -خلص بس مش هنعدها فى سكن العمال .. هأجر شقة فى المنصورة وتعدوا فيها انتوا
 الاتنين .. لحد ما نشوف الموضوع هيرسى على ايه
 قالت "ريهام":
 -معلش يا "كرم" عارفه انك مضايق .. بس قدر ان دى أختى ومينفعش أسيبها
 أوماً "كرم" برأسه قائلاً:
 -مقدر يا حبيبتي .. ولا يهكم .. وعامة أنا واثق ان "عمر" مش هيتحمل الوضع ده كثير ..
 "عمر" غيور جداً ومش هيسيبها عايشة فى المنصورة لوحدها بعد ما بقت مراته
 صمت قليلاً ثم قال:
 -وامتحاناتك هتعملى فيها ايه
 قالت شارحه:
 -ما أنا هفضل هنا لحد معاد امتحاناتى .. ويارب ساعتها تكون "ياسمين" فى بيتها .. عشان
 أعرف أسافر وأنا مطمئنه

-انتى بتهرجى يا "ريهام"

قالت "ريهام" بجديه:

-لأ مش بهرج ده اللي حصل واللى اتفقت عليه مع "كرم"

قالت "ياسمين" بغضب:

-يا بنتى وانتي مالك ومالى .. سافرى ما جوزك وعيشي حياتك بأه .. وملكيش دعوة بيا
-ازاى يعني مليش دعوة بيكى .. ما هو انتى لو تريحيني وتقوليلي ليه مش عايزة الدخلة
دلوقتي كنت ارتحت .. انتى عارفه ان وضعنا صعب .. ومفيش حل غير كده
شعرت "ياسمين" بالإختناق .. أخذت نفساً عميقاً .. بدت متردده .. ثم قالت:

-خلاص

-خلاص ايه ؟

قالت بشئ من الأسى:

-خلاص موافقه .. كدة كدة التأجيل مش هيفيد بحاجه

قالت "ريهام" بقلق:

-نفسي أفهم ايه اللي تاعبك .. ليه مش مبسوطه

اغرورقت عيناها بالدموع وقالت:

-مفيش .. بس لسه ما فوقتش من صدمة وفاة بابا الله يرحمه

قالت "ريهام" بأسى:

-الله يرحمه هو و ماما

-اللهم آمين

اتفق الجميع على اليوم الموعود .. ستسافر "ريهام" مع "كرم" .. وتنتقل "ياسمين" الى
بيت المزرعة .. وأصرت "كريمه" و "نور" على العودة الى القاهرة مع العروسين .. ليتابع
"نور" أعماله التى تراكمت من بعد عطلته الطويلة فى المزرعة .. أتى اليوم الموعود ..
كانت "ريهام" تستعد فى غرفتها وتجهز حقائبها عندما سمعت طرقات على الباب .. فتحت
لتجد "كرم" .. ابتسم لها فى سعادة قائلاً:

-مممكن الجميل يسمحلى أدخل

ابتسمت وأفسحت لها الطريق .. دهشت عندما وجدته يعطيها باقى ورد كان يخفيها خلف ظهره

.. أخذتها منه مبتسمه .. قال لها فى رقه:

-أحلى ورد لأحلى وردة فى المزرعة

ابتسمت "ريهام" فى سعادة .. ولدهشتها وجدتها يحمل حقيبة كبيرة من الأرض كان قد
وضعها بجوار الباب .. ثم دخل ووضعها على السرير .. نظرت اليه فى دهشة وهى تغلق الباب
.. ثم اقتربت قائله:

-ايه ده

فتح "كرم" سوستة الحقيبة وأخرج منها فستان زفاف فانق الروعة والجمال .. نظرت اليه

"ريهام" بإنبهار .. ثم نظرت الى "كرم" قائله:

-ايه ده

ابتسم "كرم" قائلاً:

-احنا اتفقنا ان مفيش فرح .. بس مش معنى كدة ان مفيش فستان فرح

اغرورقت عيناها بدموع السعادة واقتربت لتلمس الفستان والتطريز فى فرحه .. سألتها "كرم"

:

-عجبك ؟

قالت بحماس:

-جداً يا "كرم" .. جداً .. شكله حلو أوى

اتسعت ابتسامه "كرم" وهى ينظر الى سعادتها البادية على وجهها .. قالت "ريهام" بلهفة:
-بس خايقة ميطلعش مقاسى
ضحك "كرم" قائلاً:
-لا متخفيش هيطلع مضبوط عليكي بالمللى
-ازاى يعنى .. وانت عرفت مقاسى منين
غمز بعينه قائلاً:
-استعنت بصديق .. أختك جبتلى فستان من دولابك وختهم يعملوا الفستان بنفس المقاسات ..
يعنى ان شاء الله هيطلع مضبوط عليكي
ترك الفستان على السرير واقترب منها وقبل جبينها قائلاً:
-مبروك عليكي يا أحلى عروسة
ابتسمت "ريهام" فى سعادة
أخرج "كرم" من الحقيبة علبة الشبكة وأبسها اياها قطعة قطعة واستغرق وقتاً طويلاً حتى
قالت "ريهام":
" -كرم" كل ده بتلبسنى السلسلة ؟
-بحب الاتقان يا "ريهام"
ضحكت وهى تنظر اليه قائله:
-مش وقت اتقان يا "كرم" الكوافيرة على وصول

أدارها "كرم" وأبسها دبلتها وأبسته دبلته .. أمسك كفها ورفعها ليقبله قائلاً:
-مبروك يا أحلى عروسة فى الدنيا
ابتسمت بخجل قائله:
-الله يبارك فيك
قال بخبث:
-بقولك ايه متلغى معاد الكوافيرة وتعالى ألبسك السلسلة تانى
دفعته بإتجاه الباب قائله:
-يلا يا "كرم" من غير مطرود

خرج وابتسم لها وأرسل قبله فى الهواء .. فضحكت ولوحت له بيدها ثم أغلقت الباب .. خرجت
"ريهام" فى أبهى حله بفستانها الأبيض وحجابها الأبيض .. وقفت "ياسمين" أمامها تنظر
اليها قائله:
-انا حسه انى فرحانه أوى .. طالعه زى القمر يا "ريهام" .. ما شاء الله
التفتت اليها "ريهام":
-حبيبتي يا "ياسمين" .. كان نفسي أوى بابا وماما يكونوا معنا اليوم ده
كادت العبرات أن تتدافع الى عين "ياسمين" لكنها سيطرت على عواطفها قائله بصوت
مرتجف:
-ربنا يجمعنا بيهم فى الجنة

خرجت "ريهام" ونزلت ليستقبلها عريسها .. وهمس لها:
-زى القمر .. ممكن أبوس
قالت بجدية وهى تنظر للناس حولها:
-لو عملت كدة هتبقى ليلتك مش فايتة يا "كرم"
ضحك "كرم" قائلاً:
-لا الطيب أحسن

عانق "كرم" صديقيه يودعهما قائلاً:
-فى أقرب وقت تجولى القاهرة ان شاء الله ونتجمع كلنا مع بعض .. اتفقنا
قالت "عمر" مبتسماً:
-اتفقنا

قال "أيمن" بسعادة:
-ألف مليون مبروك يا "كرم"

عانقت "ياسمين" "ريهام" عناق طويل .. كانت هذه هى المرة الأولى التى تفترق فيه الفتاتان
عن بعضهما البعض .. غرورقت عيناها بالدموع .. قالت "سماح":
" -ريهام" بطلى عياط بأه
قالت "ريهام" بتأثر:
-هتوحشيني أوى يا "ياسمين" .. وانتى يا "سماح" هتوحشونى أوى
اقتربت منهم "كريمه" قائله:

-حبيبتي متقلقيش كلها فترة صغيرة و "ياسمين" و "عمر" هينزلوا القاهرة ان شاء الله
شعرت "ياسمين" بالإضطراب .. كانت طيلة الأيام الماضية تتجاهل وضعها .. صممت على ألا
تفكر فى شئ إلا فى أختها ومستقبلها .. أما الآن فهى مضطرة أن تواجه كل ما كانت تهرب منه
.. رحل العروسان وخلفهما سيارة "نور" و "كريمة" .. و "أيمن" و "سماح" أدراجهما
فى اتجاه بيتهما .. لتبقى "ياسمين" واقفه مع "عمر" أمام بوابة المزرعة
طال الصمت بينهما .. شعرت بالتوتر .. نظر إليها قائلاً:
-متقلقيش .. "كرم" أخويا وصاحبى .. مش هتلاقى أحسن منه لـ "ريهام" .. انا واثق انه
يحبها و هيحافظ عليها

أخطأ "عمر" فى تفسير سبب قلقها وتوترها .. لم تكن "ياسمين" قلقه على "ريهام" بل قلقه
على نفسها .. أمسكها "عمر" من ذراعها ونظر إليها بحب قائلاً:
-مش يلا احنا كمان على بيتنا
خفق قلبها لكلمة (بيتنا) .. تساءلت فى نفسها .. ترى أهو بيتى حقاً .. هل من الممكن أن أعتبره
يوماً بيتى .. هل من الممكن يوماً أن أتقبل وضعى كزوجة لهذا الرجل .. قالت بتوتر:
-هروح الأوضة الأول ألم حاجتى فى الشنطة
ابتسم قائلاً:
-تحبى أساعدك
-لا

-طيب تحبى أبعت معاكى واحدة تساعدك
-لا .. أنا أصلا حاجتى مش كثير

أسرعت لتهرب من أمامه وعادت الى غرفتها .. أغلقت الباب وجلست على فراشها .. لكم
تتمنى أن تستيقظ الآن فتجد أن كل هذا مجرد حلم وسينتهى .. لا .. يكفى هروباً هذا ليس بحلم
.. افيقى يا "ياسمين" .. واجهى واقعك .. جمعت كل أغراضها .. وجلست على فراشها .. لا
تعرف ماذا تنتظر .. وماذا تنوى أن تفعل .. اتصلت "سماح" .. ردت "ياسمين" بلهفه:
" -سماح"

" -ياسمين" انتى كويسه
-أيوة كويسة

-شكلك مكنش مضبوط النهاردة
" -سماح" انتى قولتى لـ "أيمن" حاجه
-لا طبعا انتى حلفتينى ما أقولش

تنهدت "ياسمين" قائلة:

-أبوة متقوليش

ثم قالت بأسى:

"-سماح" أنا تعبانه أوى .. ومحتارة أوى .. أنا تعبانه أوى يا "سماح"

قالت "سماح" بحسرة:

"-ياسمين" لو مش عايزة تتجوزيه.....

قاطعتها "ياسمين" بمراراه:

-انا خلاص اتجوزته يا "سماح" .. عايزانى أطلق للمرة الثانية .. وبعدين .. هعمل ايه ..

هروح فين .. وبعدين أنا خايفه أوى .. لانى عارفه انى لو طلبت الطلاق من غير سبب قوى دى

حاجه عقابها كبير أوى عند ربنا .. عقابها ان الجنة تتحرم عليا .. وأنا مش عارفه هل السبب

اللى عندى ده كافي انى أطلق ولا لأ .. مش عارفه محتارة وحسه انى ضايعه .. حسه انى حتى

مش عارفه أحس .. كل اللى حساه .. ان جوايا ألم وخوف .. أنا مش قادرة أتعامل معاه كزوج ..

مش قادره أتخيل ده

صمتت قليلا ثم قالت:

-ساعات بحس انى بحبه .. وبحس انى مطمئة أوى وأنا معاه .. وبحس انى مش عايزة أبعد

عنه .. بس لما بفتكر اللى عمله بحس انى مش طايقاه .. بحس انى خايفه منه .. بحس انى

قرفانه منه .. بحس انى عايزة أبعد عنه .. حسه انى مش ممكن أبداً هقدر أسامحه .. مش

ممكن أبداً أتقبل جوازي من واحد عمل جريمة بشعة كده .. مش ممكن أفضل أحافظ على نفسي

طول عمرى عشان فى الآخر أتجوز واحد زانى .. أنا حسه بحاجتين عكس بعض والحاجتين

دول بيدمرونى كل حاجه فيهم بتشدنى نحييتها .. لحد ما حسه انى خلاص بتقطع من جوه

قالت "سماح": "

-احنا محتاجين نعد ما بعض يا "ياسمين" مش هينفع كلام فى التليفون ولازم الموضوع ده

نعرف أصله وفصله .. ومحتاجه أسمع منك كل التفاصيل عشان نقدر نفكر مع بعض

قالت "ياسمين" بإستسلام:

-ماشى وأنا فى أقرب وقت هجيلك .. لانى فعلا محتاجه أتكلم معاكى

أغلقت "ياسمين" مع صديقتها وتمددت على سريرها .. تركت لعبراتها العنان .. تلك العبرات

التي كانت تحبسهم منذ أيام .. حتى لا تتأثر "ريهام" بها وبحالتها .. قالت فى نفسها .. يارب

الحاجه الوحيدة اللى مصبرانى .. هي انى عارفه ان كل حاجه فى حياتى هي من اختيارك انت ..

يارب انت عالم الخير فين .. وأنا فعلاً محتارة .. يارب ساعدنى .. يارب ريح قلبى .. يارب

خرجنى من حيرتى .. وقوينى على نفسي .. يارب أنا بحسن الظن بيك .. يارب أنا واثقة انك

هتختارلى الخير .. أنا راضية بكل اللى انتى تختاره .. يارب ريح قلبى .. أنا حسه انى ضعيفة

أوى .. حسه انى وحيدة أوى .. مليش غيرك يارب ..

لم تشعر بالوقت وهي نائمة ممدده على فراشها .. غفلت .. استيقظت على طرقات الباب ..

نهضت مفزوعه .. قامت لتفتح .. وجدت "عمر" امامها .. قال لها بحنان :

-كنت واثق انك نمتى .. كان باين عليكى الارهاق النهاردة

حاولت استجماع أفكارها ثم قالت:

-معلش نمت غصب عنى

ابتسم لها قائلاً:

-ولا يهملك يا حبيبتي .. عارف انك عايزة تنامى .. بس مش حابب انك تنامى هنا لوحذك وبيتك

على بعد خطوتين منك

شعرت بالإضطراب .. دخل "عمر" دون دعوة وأمسك بحقيبها قائلاً:

-ليكي حاجه تانيه هنا

-لأ

-طيب يلا

نزلت "ياسمين" معه تسير فى اتجاه بيت المزرعة وهى تشعر بأن الشئ الوحيد الذى تتمناه الآن هو .. الهرب.

دخلت "ريهام" بيتها الجديد .. وقفت تنظر اليه فى بهجة .. التفتت تنظر الى "كرم" .. الى زوجها الذى يبتسم لها فى سعادة .. نظرت اليه نظره بثت فيها سعادتها وفرحها وشوقها وخجلها...

دخلت "ياسمين" الى بيتها الجديد .. البيت الذى دخلته مرات قليله من قبل .. وها هو وقد أصبح بيتها .. استدارت لتنظر الى الرجل الواقف خلفها بعدما أغلق عليهما باب بيتها .. تبأ لتلك المشاهد التى تتكرر باستمرار .. نفس المشهد .. نفس الاحساس .. نفس خفقات قلبها المتسارعة .. نفس الحزن .. نفس التوتر .. نفس الرغبة فى الهرب .. نفس الإحساس بالضياع .. لكن شئ واحد هو المختلف .. نظراتها .. لم تكن هذه المرة تنظر الى زوجها بنظرات تحمل الخوف فقط .. بل حملت نظراتها أيضاً الكثير من الألم.

الفصل الثامن والثلاثون

دخلت "ياسمين" الى بيتها الجديد .. البيت الذى دخلته مرات قليلة من قبل .. وها هو وقد أصبح بيتها .. استدارت لتتنظر الى الرجل الواقف خلفها بعدما أغلق عليهما باب بيتهما .. تباً لتلك المشاهد التى تتكرر باستمرار .. نفس المشهد .. نفس الاحساس .. نفس خفقات قلبها المتسارعة .. نفس الحزن .. نفس التوتر .. نفس الرغبة فى الهرب .. نفس الإحساس بالضيق .. لكن شئ واحد هو المختلف .. نظراتها .. لم تكن هذه المرة تنظر الى زوجها بنظرات تحمل الخوف فقط .. بل حملت نظراتها أيضاً الكثير من الألم.

اقترب منها "عمر" ببطء .. كانت تشعر بشعور مختلط .. كانت متوترة .. شاردة .. اقتراب منها ووقف أمامها .. ابتسم لها .. لم تبادلته الابتسام .. نظرت الى الباب خلفه تود الهرب .. لكنها تعلم ألا مجال للهروب .. كان "عمر" يراقب الانفعالات على وجهها .. ونظرات عينيها الفارغة .. توترها .. اضطرابها .. والأهم حزنها .. ابتسم لها قائلاً:
-نورتى بيتك

لم تجب .. بدا عليها التعب والإرهاق .. كانت كعصفور صغير كُسر جناحيه .. فلم يعد يقوى على الطيران .. أمسك يدها بيده فأجفلت .. واضطربت .. صعد بها السلالم وتوقف امام احدى الغرف .. شعرت يقلبها يدق بشدة .. فتح الباب .. لم تدخل ولم تنظر حتى الى الغرفة .. أشاحت بوجهها .. وهى تحاول اخفاء تعبيرات الألم الموجودة على وجهها .. يارب ماذا أفعل .. هل أرضى بالأمر الواقع .. وأنا يتيمة وحيدة ضعيفة .. أم أثور على هذه الزيجة التى أرفضها .. ماذا أفعل .. تأملها "عمر" قائلاً:

-ياه .. كل ده جواكى
نظرت اليه فى دهشة .. مستفهمه عن معنى ما قال .. فقال برقه:
-انتى ليه خايفه منى ؟ .. ايه غيرك من نحيتى ؟ .. نظراتك بقت غريبة .. أكنى جرحتك .. أو هجرحك .. ليه بتبصلي كده .. ليه مش مبسوطه انك معايا ؟
صمتت "ياسمين" ولم تجب .. فأكمل:

-أنا عارف ان ممكن يكون موت والدك مآثر عليكى .. وكمان عارف انك شوفتى فى حياتك كثير .. بس مش عايزك تخافى طول ما انتى معايا .. لانى بحبك أوى يا "ياسمين" ومش ممكن أسمح لاي حاجه انها تضايكك أو تأذيكي
نظرت اليه .. التمس الصدق فى كلامه .. ليس لديها ذرة شك فى حبه لها .. هى تعلم أنه يحبها .. بل يعشقها .. لكن مشاعرها هى المضطربة .. غير مستقرة .. اقتراب منها فجفلت .. أمسك برأسها وقبل جبينها قائلاً:

-يلا ادخلى
شعرت بالخوف .. نظرت الى غرفة النوم فى وجل .. حبست أنفاسها .. اقتراب منها مرة أخرى وقبلها فى جبينها وقال بحنان:

-دى أوضتك انتى
رفعت عينيها اليه فى دهشة وقالت:
-أوضتى أنا ؟

ابتسم وأشار الى الغرفة المجاورة قائلاً:

-ودى أوضتى

لم تصدق "ياسمين" ما تسمع .. ماذا يقصد .. أخرجها من حيرتها وهو ينظر الى عينيها المندهشة بحنان وقال:

-أنا مقدر كل اللى انتى فيه .. ومستعد استناكى الوقت اللى تحبيه .. أنا عارف ان جوازنا جه

بسرعة بالنسبة لك
نظرت اليه غير مصدقه ما تسمعه .. فقال لها بحنان:
-أنا بحبك جداً يا "ياسمين" .. و قولتك قبل كده مش ممكن أجبرك على حاجة واضح جداً
عليكي انك مش عايزاها
نظرت اليه "ياسمين" وكأنها تتعرف عليه لأول مرة .. ابتسم لها .. فبادلته ابتسامه خجوله ..
استغربت .. كيف نجح في ازاله التوتر بداخلها .. كيف أشعرها بالراحة وبالأمان .. أشار الى
الغرفة برأسه قائلاً بحنان:
-يلا ادخلي .. غيري هدومك وانزلي عشان نتعشى سوا
قالت بحرج:
-معلش أنا اسفه بس بجد تعبانه ومحتاجه أنام
قال "عمر" ياهتمام:
-طيب أجبك الأكل في اوضتك
قالت بسرعة:
-لأ .. شكراً .. بس أنا بجد جعانه نوم
تأمل "عمر" وجهها المتعب ثم قال بحنان:
-ماشى يا حبيبتي ولا يهكم .. ادخلي نامى .. تصبى على خير
ثم انحنى ليطلع قبله دافئه على وجنتها التي احمرت من الخجل .. دخلت الغرفة .. كانت غرفة
جميلة .. جيدة الأثاث .. لها طابع كلاسيكى كما هو الحال فى الأسفل .. أخذت دشاً وتوضأت
وصلت .. وارتدت بيجامتها ثم دخلت الى فراشها واستسلمت للنوم ..

بعد عدة ساعات من النوم شعرت "ياسمين" بحركة غريبه فتحت عينيها فجأة لتجد "عمر"
واقف بجوارها .. شعرت بالفرع .. طمأنها قائلاً:
-متخفيش أنا دخلت بس أطمئن عليكي .. لقيتك مش متغطية كويس فعدلت الغطا
نظرت الى الغطاء الملتف حولها جيداً .. همت بالجلوس لكنه أوقفها قائلاً:
-لأ متقوميش .. كملى نوم .. أنا خارج
نظرت الى الساعة بجوارها قائله بصوت ناعس:
-أنا كده كده لازم أصحى عشان باقى نص ساعة على الفجر
نظر اليها بحنان قائلاً:
-مش مهم .. صليه لما تقومى الصبح
رمقته "ياسمين" بنظرة حاده .. وشعرت بانقباض فى قلبها .. ثم قالت دون أن تنظر اليه:
-لأ هصلى الفجر فى معاده
صمت "عمر" .. ظلت جالساه فى الفراش .. تتمنى انصرافه حتى تستطيع النهوض .. خجلت
أن يراها بالبيجاما .. استدار "عمر" وفتح الباب وانصرف .. كانت تشعر بالضيق لهذه البداية
الغير موفقه بينهما .. فهي لم تترك صلاة الفجر يوماً .. إلا فى حالات مرضها الشديد .. لكنها
ظلت ومنذ نعومة أظافرهما معتادة على أداء الصلاة فى وقتها وهذا شأن البيت كله .. وكانت
تشعر بالبركة فى يومها عندما تستيقظ وتصلى الفجر وتظل تدعو الله و تقرأ وردها وأذكارها
حتى الشروق .. نظرت الى نفسها فى المرآة وابتسمت بسخرية قائله .. وماذا توقعتى غير ذلك
منه يا "ياسمين" .. هل توقعتى أن يهتم بالمحافظة على الصلوات فى وقتها!

توضأت وصلت و أنهت أذكارها .. لم ترغب فى النوم مرة أخرى .. وعندما أشرق نور الصباح
خرجت الى شرفة غرفتها تستنشق تلك النسيمات المنعشه .. كانت غرفتها تطل على الحديقة

الخلفية والتي اقل ما يقال عنها أنها رائعة .. تسلل عبير الأزهار المنعش اليها .. فأغمضت عينيها لتستمع بتلك الرائحة الخلابه .. سمعت طرقات على باب غرفتها دخلت وفتحت الباب لتجد "عمر" واقفاً أمامها .. ابتسم قائلاً:

-لمحت النور من تحت بابك عرفت انك صاحبه وفتاحه البلكونه .. يلا عشان نفطر سوا همت بالخروج فاعترض طريقها وأشار الى الاسدال الذى ترتديه قائلاً:
-هتفطرى كده

نظرت الى الاسدال ثم قالت:

-أنا كنت لايساه لانى كنت واقفه فى البلكونه
ابتسم قائلاً:

-متخفيش أنا ادينك أوضه بتطل على الجنيهه اللى ورا ودى محدش بيدخلها مفتاحها معايا أومات برأسها .. فقال:

-هستناكى تحت

خلعت اسدالها .. وارتدت عباءة للبيت محتشمة .. جمعت شعرها للخلف .. كانت تشعر بالخجل من رؤياه اياها بدون حجاب .. ثم تذكرت أنه بالفعل رآها هكذا من قبل .. ابتسمت وهى تتذكر حنانه ورقته ولهفته عليها يوم أن خطفت .. هى تعلم جيداً بأنه يحبها .. لا تشك لحظة فى ذلك .. فتحت باب الغرفة .. وشعرت وكأنها غريباً يتلمس طريقه فى مكان يجعله .. نزلت الدرج .. وبمجرد أن وصلت لنهايته وجدت "عمر" يخرج من احدى الغرف ثم يمسك يدها ويجذبها .. أجلسها على طاولة الطعام وجلس بجوارها .. نظرت الى كل الطعام المعد بدهشة قائله:

-ايه ده كله

ابتسم قائلاً:

-أول مرة ناكل مع بعض .. وبعدين انتى متعشتيش امبارح
ابتسمت قائله:

-على أساس انى هاكل كل الأكل ده يعنى .. أنا أصلاً أكلتى ضعيفه أوى

وضع كفه على كفها الموضوع على الطاولة .. فأضطربت .. وسحبت يدها .. لم يعر ذلك انتباها وأكمل مبتسماً:

-لا .. لازم تهتمى بأكلك .. وتبطلى أكل العصافير بتاعك

شرعا فى تناول الطعام .. كانت "ياسمين" تنظر لما حولها تتعرف على المكان .. وقع نظرها على الحرق فى يده .. فأشاحت وجهها عن يده .. حاولت أن تتناسى الأمر لكن هيهات .. لاحظ "عمر" اضطرابها وتوقفها عن الأكل فقال:

-فى حاجه .. الأكل مش عاجبك

قالت بسرعة:

-لا بالعكس..

هنا حضرت الخادمة لتضع أمامهم ابريق الماء .. نظرت اليها "ياسمين" من رأسها على أغمص قدميها .. كانت فتاه جميلة ذو ملامح هادئة ترتدى جلباب فلاحى وعصبه على رأسها .. نظرت الى "عمر" مبتسمه وقالت:

-تؤمر بحاجة تانى يا بشمهندس

هز "عمر" رأسه دون أن ينظر اليها وقال:

-لا شكراً

خرجت الخادمة .. وظلت "ياسمين" ساهمه .. نظرت الى "عمر" قائله:

-هى البنيت دى بتشتغل هنا؟

-أيوة

بدا عليها التردد .. كان "عمر" يرد بلامبالاة وكأن الأمر لا يمثل له أى أهمية .. فنظرت اليه وقالت:

-يعني انت وهى عايشين فى البيت ده لوحذكوا ؟
نظر اليها "عمر" وبدا مستغرباً سؤالها ثم قال:
-أيوة

ترددت قليلاً ثم قالت:

-هى جديدة هنا ؟

-لأ شغاله هنا من شهور

-كان فى واحدة شغاله قبلها ؟

بدا شاردأ ثم قال بضيق:

-أيوة كان فى قبلها "صفية"

شعرت "ياسمين" بالغضب يتصاعد بداخلها .. وتوقفت عن الأكل .. نظر اليها "عمر" بدهشه
قائلاً:

-مالك .. مش بتاكلى ليه

حاولت تمالك أعصابها وقالت بهدوء:

-مفيش شبع

تفرس فى وجهها .. ثم قال:

-شكلك مضايق .. ايه اللى ضايقتك

نظرة اليه نظرة حادة .. ثم قالت وهى تنهض:

-بعد اذنك أنا طالعاه أوضتى

تركته .. ودخلت غرفتها .. جلست على السرير وعينيها تشعان بغضب مكتوم .. بحثت عن

هاتفها واتصلت بـ "سماح" التى قالت بدهشة:

-فى عروسة تتصل بصحبتها يوم صباحيتها على الصبح كده

قالت "ياسمين" بحدده:

-لا أنا عروسة .. ولا دى صبحيتي

قالت "سماح" مستفهمه:

-ايه اللى حصل شديتوا مع بعض

قالت "ياسمين" بحزن:

-أنا كنت واثقة اننا مننفعش لبعض .. كان قلبي حاسس .. احنا عمرنا أبداً ما هنقدر نفهم بعض

.. ولا نعيش بإسلوب بعض

-طيب اهدى وفهميني اللى حصل

صمتت "ياسمين" قليلاً .. كادت أن تقص عليها أمر الخادمة التى تبنت ليها فى نفس البيت مع

"عمر" بمفردهما .. وهو لا يرى بأساً فى ذلك .. ويرى الأمر عادى جداً .. لكنها أحجمت وقالت

بصوت خافت:

-مش هقدر أحكيلك يا "سماح" .. مهما كان هو جوزى دلوقتى .. ومينفعش اتكلم عنه وحش

مع حد

قالت "سماح": "

-خلاص براحتك .. طيب نتكلم فى المشكلة القديمة اللى أنا عارفها .. موضوع الحريق ومرات

الغفير .. انتى حسه بإيه دلوقتى بخصوص الموضوع ده

قالت "ياسمين" بحيرة:

-مش عارفه

قالت "سماح": "

"-ياسمين" ليه متحطيش احتمال ان البنات اللى اسمها "ولاء" دى بتحاول توقع بينك وبين

"عمر" عشان تمنع جوازتكوا

قالت "ياسمين" بحيره:

-وهى ايه مصلحتها فى كده .. هتستفاد ايه لما تمنع جوازنا
-تستفاد انها تخرب عليكي يا "ياسمين" .. مش هي كانت بتحب "عمر" .. ممكن اوى تكون
غارت منك وعملت الفيلم ده عليكي عشان متجوزيش حبيبها" .. ياسمين "مش كل الناس
طيبة زيك .. فى ناس مؤذية جداً وعائشة على أذية الناس .. زى "مصطفى" .. وزى اللى
اسمه "بسطويسي" ده .. زى "مها" .. مش كل الناس طيبة وتعرف ربنا يا "ياسمين"
صمتت "ياسمين" تفكر قليلاً ثم قالت:
-والورق اللى جابتهولى من المستشفى والراجل اللى شهد
قالت "سماح:"

-سهل اوى لو ليها حد معرفة فى المستشفى تخليه يضربلها الورق أو هي بنفسها تاخذ منه
ورقة فاضية وتضرب التقرير .. مش هي دكتورة يعني تعرف كويس عن اصابات الحروق ..
وتكتب تقرير مية مية وتديهولك على انه التقرير اللى جابته من الاستقبال .. أما بالنسبة للراجل
.. ممكن يكون اتلخبط بين "عمر" وبين واحد تانى .. أو هي قالتله انه يقول ان الراجل اللى
كان مع مرات الغفير يبقى "عمر" .. لكن "عمر" ملوش علاقة بالموضوع أصلاً
قالت "ياسمين:"

-طيب والحرق اللى فى ايده .. واللى مرضاش يقولى سببه ؟
-ممكن يكون اتحرق من أى حاجه مش شرط نفس الحريقة دى .. يعني ممكن اصلاً يكون
الحرق ده فى ايده من قبل موضوع حرق البيت .. و"لاء" استغلت الحرق اللى فى ايده عشان
تقتعك انه له دور فى حكاية مرات الغفير
فكرت "ياسمين" فى كلام "سماح" قليلاً ثم قالت:
-لازم أتأكد بنفسى
-ازاى ؟

قالت "ياسمين" فجأة:
-متعرفيش محامى كويس هنا ؟
-محامى؟! .. عايزاه ليه
-تعرفى بس ولا متعرفيش
-أعرف محامية كويسة .. مرات صاحب "أيمن" عرفنى عليها وهى ست كويسة اوى
وشاطرة

قالت "ياسمين" بلهفة:
-كويس اوى .. أنا عايزاكي تخلى المحامية دى تحاول توصل للورق اللى فى المستشفى وأنا
هديكى اسم المستشفى واليوم اللى حصلت فيه الحريقه .. وهى محامية يعني أكيد لها طرق
توصل بيها للورق ده كمستندات أكيد بتحتاجها فى القضايا بتاعتها .. وشوفى أتعابها وأنا
هدفعها لها
قالت "سماح" بشك:

-مش عارفه .. طيب ما تواجهى "عمر"
قالت "ياسمين" بياس وسخرية:
-أواجهه أقوله ايه ؟ .. أقوله انت زانيت بمرات الغفير اللى كان بيشتغل عندك ..وهو طبعاً
هيقولى أيوة .. ويخرب بيته بايده .. ويهد جوازه بنفسه .. وهو عارف وواتق انى لو عرفت
حاجه زى كدة مستحيل أكمل معاه !! .. أكيد طبعاً هينكر يا "سماح" .. انتى مشفتيش
"مصطفى" لما والدى كان بيواجهه بخيانتته .. فضل يحلف بالله انه مظلوم وان البننت بتفتري
عليه .. لحد ما بابا قاله على المحادثة اللى شوفتها بينه وبين البننت دى ساعتها مقدرش ينكر
..لان كان فى معايا دليل.. أنا لو روحت واجهت "عمر" وكان فعلاً هو مذنب ..أكيد هينكر ..
ومش بعيد يخفى الشاهد زى ما خفى مرات الغفير .. وساعتها عمرى ما هعرف أوصل للحقيقة
أبدأ .. وهعيش طول عمرى شاكاه فيه

قالت "سماح":
-طيب خلاص هكلم المحامية
-بس خليها تعجل الموضوع يا "سماح" عايزة أعرف فى أقرب وقت الورق اللي نسخته معايا
ده حقيقى ولا مزور
-حاضر .. بس أنا واثقة انه مزور
قالت "ياسمين" بلهفه:
-ياريت يا "سماح" .. ياريت يكون مزور
سمعت طرقات على الباب فأنهت الاتصال مع "سماح" .. فتحت لتجد "عمر" .. قال لها بهدوء
:

-مممكن أدخل
ترددت .. لكنها أفسحت لها الطريق .. دخل وأغلق الباب خلفه .. جذبها من يدها وأجلسها
بجواره على السرير .. شعرت بالتوتر .. رفع وجهها لتنظر اليه ثم قال:
-بصى يا "ياسمين" .. ده أول يوم جواز لنا وعايزين نتفق على حاجات معينه .. عشان لسه
أدانا طريق طويل مع بعض
استمعت له "ياسمين" بكل حواسها .. أكمل:
-انتى فى حاجة ضايقتك واحنا بنفطر .. ولما سألتك اتهربتى .. وطلعتى أوضتك .. اللي عايزين
نتفق عليه .. هو ان اللي يضايق من التانى فى حاجة لازم يصارحه بيها .. لكنه لو سكت وكنتم
فى قلبه الأمور هتتعد مش هتتصلح .. لازم يكون فى بينا وضوح .. بيوت كتير بتتخرب بسبب
كده .. يعنى كل واحد شايل من التانى فى نفسه وساكت .. مع انه لو اتكلم ممكن أوى المشكلة
تتحل بسهولة
صمت قليلاً ثم قال:

-اتفقتا .. اللي هيضايق من التانى فى حاجة يصارحه بيها على طول ؟
أومات برأسها .. فسألها:
-ايه اللي ضايقتك واحنا بنفطر ؟
طال صمتها وهى تحاول تخير الكلمات المناسبة .. وهو لم يتعجلها .. بل انتظر ردها .. وأخيراً
قالت:

-أعداك فى البيت لو احدهك مع واحدة حتى لو كانت الخدمة .. مش شايف ان دى حاجة غلط ؟
بدا وكأنه يفكر فى كلامها .. ثم قال:
-أنا معظم اليوم بره البيت .. وهى مبشوفهاش الا وقت ما بتحطلى الأكل .. أو وقت ما يكون
عايز أطلب منها حاجة .. البنت دى غلبانه ويتيمه .. وملهاش حد فى البلد وعشان كدة خليتها
تعد فى أوضة جمب المطبخ ..
قالت "ياسمين" بهدوء:

-حتى لو كان الوضع زى ما انت بتقول .. مينفحش تعيش معاك فى البيت وانت لوحدك
ابتسم قائلاً:

-خلاص مبقتش لوحدى
لم تبتسم .. فقال بجديه:
-أنا مكنتش شايف الموضوع زى ما انتى شيفاه .. أنا اتعاملت مع الأمر ده بطريقة عمليه ..
مش أكثر من كده

ثم اقترب منها وقال بخبث:
-هو حبيبي بيغير عليا ولا ايه ؟
شعرت بالخجل لإقترابه منها فوقفت .. فوقف هو الآخر وقال:
-لو تحبى أمشيها وأجيب بدالها واحدة كبيرة فى السن مفيش مشكلة
نظرت اليه قائله:

-مش عايزة اكون السبب فى قطع عيشها
طمأنها قائلاً:

-مش هتكونى السبب فى قطع عيشها ولا حاجه .. هخليها تشتغل مع البنات اللى بيشتغلوا فى
الأرض و أديها أوضة فى سكن العمال
سعدت "ياسمين" لهذا الإقتراح .. وسعدت أكثر لأنه اهتم بما يضايقها .. ابتسمت له .. فقال
بمرح:

-أخيراً الدنيا نورت .. كنتى مضلماها عليا على الصبح
قالت بخجل:

-معلش أنا لسه مش متعودة على الوضع الجديد .. وفى حاجات كتير أنا مستغرابها ومش
متعودة عليها

اقترب منها وأمسك كتفيها .. لم تبتعد هذه المرة .. نظر الى عينيها بحب قائلاً:
-وأنا نفسي تتعودى بسرعة على وضعك الجديد
أفلتت نفسها من يده فابتسم .. ثم قال بتحدى:

-طيب لو قولتلك دلوقتى أنا مش حابب الوضع ده وعايزك معايا فى أوضتى وجوزنا يبقى
حقيقي هتعملى ايه

قالت "ياسمين" دون تردد ودون أن تنظر اليه:

-انت دلوقتى جوزى وأنا مضطرة أعمل اللى انت عايزه
سألها "عمر" :

-حتى لو كان الى أنا عايزه انتى مش عايزاه ؟
فألت بجدية:

-أيوه لان انت دلوقتى جنتى ونارى .. والمفروض انى أطيعك طالما مش بتطلب منى حاجة
تغضب ربنا

ابتسم يطمئنهما قائلاً:

-وأنا مش هعمل حاجه انتى مش عايزاها
ثم قال:

-طيب ممكن ننزل بأه نكمل فطارنا

نزلا معاً وتناولت معه الفطار هذه المرة وهى تشعر بارتياح أكبر.

بعد الفطار أخذها "عمر" ليريها أرجاء المنزل .. واتفق مع الخادمة أمامها على عملها الجديد
.. كانت "ياسمين" سعيدة وهى ترى زوجها يفعل ذلك لإرضائها .. انبهرت بكل شئ فى البيت
الكبير .. وحكا لها "عمر" قليلاً عن تاريخ عائلته .. وعن جدوده .. وكيف وصلوا من
الحضيض الى القمة .. كانت "ياسمين" مبهورة بما تسمع وأعجبت للغاية بتاريخ كفاح جدوده
.. وبدا "عمر" معتزاً بجدوده وهو يتحدث عنهم .. لمست جانباً جديداً فى زوجها .. وفرحت أن
الحديث قريبا منه خطوة أخرى

دخلت غرفتها تلك الليلة وهى تشعر براحة أكبر من الليلة الماضية .. رأت حقيبتها التى مازالت
لم تفرغها موضوعه على الأرض بجوار السرير .. فحملتها ووضعتها على السرير وفتحتها ..
أخرجت ملابسها وفتحت الدولاب لتضعه فيه لكنها شهقت فى دهشة .. وجدت فستان عرس
أبيض اللون .. مرصع ومطرز .. كان شكله يخطف الأبصار .. تركت ما بيدها وتلمسته كان
ناعماً للغاية .. أخرجته من الدولاب ونظرت اليه فى دهشة .. كم حلمت بارتداء هذا الفستان
الذى حرمت نفسها منه فى زواجها الأولى .. لأنها لم تكن تشعر ببهجة العرس .. وضعته مرة
أخرى فى الدولاب وأنهت أفراغ حقيبتها ثم استسلمت للنوم وابتسامة صغيرة مرسومة على
ثغرها

فى اليوم التالى اتصلت "كريمه" بـ "عمر" الذى استيقظ من نومه على صوت جرس الهاتف
قالت:

-مبروك يا حبيبي عليك انت وعروستك

-الله يبارك فيكي يا ماما

-فين "ياسمين" اديهاى اكلها

توتر قليلا ثم قال:

-هى مش جمبي دلوقتى .. شوية وهخليها تكلمك

-طيب يا حبيبي .. أنا بس كنت عايزة أقولك اعملوا حسابكوا انى هعملكوا حفلة كبيرة هعزم

فيها صحابنا وحابينا .. شوفوا انتوا المعاد اللى يناسبكوا

قال "عمر" بدھشة:

-حفلة ليه

-ايه اللى حفلة ليه ؟ .. انت تسمع اللى أن بقولك عليه مش كفاية جوزت ابنى الوحيد سكتي

-خلاص يا ماما زى ما تحبي .. بس مش دلوقتى يعني سبينا شوية كده

-أنا قولت ان انتوا اللى هتحددوا المعاد اللى يناسبكوا .. بس متأخروش عايزينها بسرعة

عشان كل اللى يعرف انك اتجوز يزعل مننا .. ويفتكر اننا عملنا فرح ومعزمنهوش

-حاضر يا ماما هشوف "ياسمين" ونحدد معاد

خرج "عمر" من غرفته واتجه الى غرفة "ياسمين" .. طرق الباب كثيراً ولم تجب ..فتح

الباب فلم يجدها فى غرفتها .. نزل لم يجدها فى المنزل .. أخبرته الخادمة الجديدة والتي كانت

سيدة فى العقد الخامس من العمر أنها قالت انها تتمشى قليلا فى المزرعة .. سعد "عمر"

وارتدى ملابسها وخرج .. علم أنه سيجدها هناك .. عند شجرته .. وكان مصيباً .. رأته فابتسمت

.. اقترب منها بابتسامه قائلاً:

-عرفت انى هلاقىكي هنا

أشارت الى الشجرة قائله:

-دى خلاص بقت شجرتى

قال بمرح:

-نعم ؟ .. دى شجرتى أنا .. شجرتك منين

قالت بمرح ممثال:

-أيوة شجرتى عندك شجر كثير فى المزرعة .. لكن دى حبيتها من أول ما جيت المزرعة

ومش بحب أعد الا فى ضلها

جلس بجوارها على الجذع وقال:

-على فكرة بأه أنا اللى زرعت الشجرة دى

قالت بعدم تصديق:

-يا سلام .. بجد؟

-أيوة والله أنا اللى زرعتها .. اتأكدتى بأه انها بتاعتى ؟

قالت بعند مازحه:

-مليش دعوة برده دى شجرتى

-طيب وأنا مستعد أخليكي تشاركيني فيها .. زى ما بتشاركيني حياتي

ابتسمت ونظرت اليه قائله:

-انا شوفت فى دولابي فستان .. فستان فرح

-أيوة ده فستانك ..

ابتسمت قائله:

-وعرفت مقاسي منين ؟
-من فستان "ريهام" اللي ادبتيه ل "كرم" .. انتي وأختك نفس الطول ونفس الوزن تقريباً ..
لو مش مطبوظ عليكى قوليلي وأنا أجيب واحدة تعدلوهوك
قالت بصوت خافت:

-ما قستوش

قال بهمس:

-وأنا مشتاق أوى انك تلبسيه وأشوفه عليكى

أكمل هامساً:

-أنا بحبك أوى

تسارعت ضربات قلبها مرة أخرى .. اقترب منها أكثر .. فجأة رن جرس هاتفها ليقطع سحر تلك اللحظة .. نهضت من على الجذع والاحمرار يغزو وجهها وقالت بسرعة دون أن تنظر اليه :

-دى "ريهام" هروح أكلمها من البيت

مشت فى اتجاه المنزل وهى تحاول تنظيم ضربات قلبها .. ردت على أختها:

"-سمسة" حبيبتي صباح الخير

-صباح النور يا "ريهام"

-ايه أخبارك النهاردة

-تمام الحمد لله

-مال صوتك .. متوترة كدة ليه .. اخانقتوا ولا حاجة

ابتسمت "ياسمين" قائله بصوت مضطرب:

-لأ .. لأ .. متخانقناش .. عادى يعني

ضحكت "ريهام" قائله:

-عيني عليكى بارده

"-ريهام" بطلى

-طيب أنا حبيت أطمئن بس مكننش أعرف انى بتصل فى وقت مش مناسب

"ياسمين" بغضب:

"-ريهام" لو مبطلتيش هقفل

استمرت "ريهام" فى الضحك قائله:

-أنا اللي هقفل أنا مش فضيالك .. يلا سلام

توجهت "ياسمين" الى المطبخ .. لتعد مع الخادمة طعام الغداء .. أرادت أن تطبخ بيدها ..
لترى رأسه فى طعامها .. عاد "عمر" ليحدها فى المطبخ نظر اليها بخبث وغمز يعينه ..
احمرت وجنتاها مرة أخرى وتجاهلت النظر اليه .. فقال:

-بتعملى ايه

-بحضر الغدا

أقترب منه مبتسماً:

-يعني هتأكليني من ايدك النهاردة

أومأت برأسها مبتسمة .. فابتسمت الخادمة وخرجت من المطبخ .. فنظر اليها "عمر" وهى

تغادر ثم التفت الى "ياسمين" قائلاً بمرح:

-ست ذووووق مفيش بعد كده

سألته:

-ليه ؟
طبع قلبه على وجنتها قانلاً:
-عشان سابتنى أستفرد بيكي براحتى فى المطبخ
حاول معانفتها فهربت منه وقالت:
-لو سمحت اطلع بره .. خليني أركز
-هو انا يعني مشنتت تركيزك
-أيوة مشنتت تركيزى
-طيب هخرج .. ماما هناك وانتى هنا .. وأنا اللي كنت بتريق على بابا لما ماما تطرده من
المطبخ .. طلعت مراتى زى أمى
ابتسمت قائله بتحدى:
-بره لو سمحت
قال بلهجة مسرحيه:
-أوامر معاليك يا باشا
خرج .. عادت الخادمة .. فشعرت "ياسمين" بالخجل من نظراتها .. فتمتمت:
-ربنا يخليكوا لبعض .. ويحبكوا فى بعض كمان وكمان
وجدت نفسها تردد بقلبها : آمين

-يعني ابن أخويا يتجوز وأنا آخر من يعلم
هتفت "ثرىا" بتلك العبارة بغضب فقال "نور" يهدئها:
-الموضوع جه بسرعة يا "ثرىا" .. ووالد البنت توفى يعنى مكنش ينفع يتعمل فرح
أكملت "ثرىا" بغضب وكأنها لم ستمتع اليه:
-يعني عشان هى مطلقة ما يتعملش فرح .. طيب ذنبه ايه "عمر" ودى أول مرة يتجوز فيها
.. ذنبه ايه يتجوز من غير فرح
قالت "كريمه": "
-أنا قولتله اننا هنعمله حفلة كبيرة لما يرجعوا ان شاء الله ونعزم الناس كلها
قالت "ثرىا" بحده:
-بعد ما دخلوا خلاص هنعمل حفلة .. ما كان من الأول .. ولا الهانم كانت متسريعه على الجواز
.. ايه مش قادرة تستنى لما دمعتها على باباها تنشف .. ايه ملها ملهوفة على الجواز كده
قال "نور" بنفاذ صبر:
-يا "ثرىا" قولتلك 100 مرة ان "عمر" هو اللي أصر على الدخلة وان مراته تبقى فى بيته
ثم نهض قانلاً:
-انا قايم اشوف شغلى عن اذنكوا
كان يعلم بأن الحوار مع أخته وهى غاضبه هو ضرب من العبث .. قالت "ايناس" بحقد:
-بكرة يزهب منها ويعرف انه عمل أكبر غلظه فى حياته .. ويطلقها زى ما اللي قبله طلقها

أصرت "ياسمين" على أن تعد طاولة الطعام بنفسها .. أنهت اعدادها وطرقت باب المكتب ..
كانت تنتظر أن يآذن لها "عمر" بالدخول لكنها وجدته يفتح الباب بنفسه مبتسماً .. ابتسمت له
قانلاً:
-السفرة جاهزة

توجهها الى غرفة الطعام وجلسا معاً .. نظرت اليه لتراقب تعبيرات وجهه .. نظر بسعادة الى كل ما أعدته وقال بدهشة:

-انتي ساعدتي في كل الأكل ده

قالت بمرح:

-قصدك هي اللي ساعدتني

نظر اليها بإعجاب قائلاً:

-ده طلعت مراتي شاطرة أوى و أنا معرفش .. أنا قولت أخرك صنية المكرونة بالبشاميل ضحكت قائله:

-آه اللي خدتها من بيت صاحبك وانت نازل

ضحك قائلاً:

-على فكرة ماما كلت منها معايا وعجبتها جداً .. رغم ان ماما مبيعجبهاش بسهولة أكل حد ابتسمت بسعادة وقالت:

-كويس يعني ماما "كريمه" عجبها أكلى

قال وقد تذكر فجأة:

-صحيح كلمتك النهاردة وسألت عنك .. بس كنت لسه صاحى من النوم وقولتلك انك هتكلميها

-خلاص بعد الغدا هكلما ان شاء الله

قال "عمر" بلهفه:

-طيب يلا لاني واقع من الجوع وريحة الأكل فتحت نفسي على الآخر

راقبته "ياسمين" بسعادة وهو يأكل من طعامها بنهم ويشيد به

استيقظت "ياسمين" في اليوم التالي قبل أذان الفجر كالعادة .. توضأت وصلت قيام وانتظرت الفجر .. وقفت في الشرفه .. تراقب الحديقة في الليل .. ابتسمت وهي تتذكر مداعبات "عمر" ومرحه معها .. بعد الفطار جلسا يحتسيان الشاي في الشرفه .. كانت "ياسمين" شارده فسألها "عمر":

-بتفكرى في ايه

انتبهت من شرودها على سؤاله فقالت بتأثر:

"-ريهام" وحشتنى أوى .. طول عمرنا واحنا مع بعض وعمرنا ما افترقنا أبداً

راقب "عمر" تعبيرات وجهها الحزينه ثم قال فجأة:

-تحبي نروح لـ "سماح" و "أيمن" النهاردة

نظرت اليه في دهشة غير مصدقه وقالت:

-بجد ؟ .. ينفع نروحلهم النهاردة

ابتسم وقرب كرسيه منها قائلاً:

-أبوة طبعاً ينفع .. أنا عارف ان "سماح" هي أقرب صاحبه ليكي .. وانك بتعتبريها زى

"ريهام" أختك .. أكيد لما تشوف فيها هتخفف عنك شويه بعد "ريهام"

نظرت اليه "ياسمين" بنظرة امتنان وسعادة ممزوجة بـ .. الحسب .. بادلها نظرتها قائلاً بلهفه

:

-لو كنت أعرف ان اقتراحي هيلكي تبصلي كده .. كنت اقترحتة عليكى من زمان

انتبهت "ياسمين" فأشاحت بوجهها بخجل .. فقال "عمر" مؤنباً نفسه بمرح:

-ياريتنى مكنتش اتكلمت .. أهو دايماً كده أقطع اللحظة الحلوة بالكلام اللي ملوش لازمه ده

نظرت اليه ضاحكة .. كانت تشعر بأنها استطاعت في اليومين الماضيين أن تقترب منه أكثر ..

وتتألف معه أكثر .. وهذا الأمر أسعدها للغاية .. كانت تشعر بالراحة والسكينة وهي معه .. كان

قلبها يخفق بجنون كلما اقترب منها .. نظرت اليه وهو يتحدث الى هاتفه وهي تبسم بسعادة

وتشعر بان قلبها سار ينبض بحبه

ارتدت ملابسها وخرجت مع "عمر" .. وتوجهها الى بيت "أيمن" و "سماح" .. توقف
بالسيارة أما البيت وقبل أن تنزل أمسك يدها قائلاً:
" -ياسمين" .. مش عايزين نطول أوى .. ماشى .. عشان حابب نخرج سوا ونتعشى بره
ابتسمت له وأومات برأسها .. جلست الفتاتان فى غرفة أغلقت "سماح" الباب ثم نظرت
لعلامات السعادة على وجه صديقتها وقالت بسعاده:
-ايه اللي أنا شيفاه ده .. عيني عليكي بارده
ضحكت "ياسمين" قائله:
-انتى هتعملى زى "ريهام"
ابتسمت "سماح" .. ثم اختفت ابتسامتها وكأنها تذكرت شيئاً .. قالت "ياسمين":
-ايه مالك ؟
قالت "سماح" محاولة الاتباسم مرة أخرى:
-لأ مفيش حاجة
قالت "ياسمين" بقلق:
-النونو كويس ؟
مسحت "سماح" على بطنها وابتسمت قائله:
-اها كويس الحمد لله
-امال مالك .. وشك اتغير فجأة
بدا على "سماح" بعض التردد ثم قالت:
-لأ متاخدش فى بالك
تفرست "ياسمين" فى صديقتها ثم قالت:
" -سماح" أنا عارفاكى كويس أوى .. فى حاجه انتى مخبياها عنى
تنهدت "سماح" وقالت:
-يا بنتى متوهميش نفسك .. أنا بس حسيت بالتعب شوية
قالت "ياسمين" فجأة:
-كلمتى المحامية
نظرت "سماح" الى صديقتها وصمتت .. حثتها "ياسمين" قائله:
" -سماح" ردى عليا .. كلمتى المحامية صحبتك
قالت "سماح" باستسلام:
-أيوه
-ووصلت لحاجة ؟
بدا عليها التردد مرة أخرى ثم قالت:
-أيوه
قالت "ياسمين" بحده:
" -سماح" قوليلى بلاش تعب الأعصاب ده
قامت "سماح" وخرجت .. ثم عادت بورقتين وأعطتهم لـ "ياسمين" .. نظرت "ياسمين" الى
الورق فى يدها .. هو نفسه الورق الذى أعطتها "ولاء" نسخه منه
قالت "سماح":
-قالتلى ان الورق موجود فعلا فى ملفات المستشفى وجبتلى النسخة دى .. وكمان ورق متابعة
الحالتين شافته بنفسها
كانت "ياسمين" تنظر الى الورق بأعين متجمده .. أكملت "سماح" بأسى:
-أنا كنت ناويه اتصل بيكي وأقولك على الله وصلته .. بس لما شوفتك داخله عليا فرحانه
وبابن عليكي انك مبسوطه اترددت أقولك

نظرت اليها "ياسمين" وهى تغالب دموعها قائله:

-ليه اترددتى تقولىلى..

نظرت "ياسمين" الى الورق الذى بيدها .. وقد تجمعت الدموع بعينيها وقالت بصوت مرتجف

:

-الورق ده ميثبتش حاجه .. يعني .. عادى .. "عمر" كان ماشى .. ولقى الحريقه .. وحاول

يساعد الست انها تخرج .. والراجل شافه وافكره كان معاها فى البيت .. لكن "عمر" ملوش

دعوة بالبيت ده .. وملوش دعوة بالقصة دى

ثم اكملت بلحماس وبشفتين مرتجفتين:

"-عمر" بيحب يساعد الناس .. انتى ناسيه اللى عمله مع العامل اللى ايده اتحشرت فى الماكنة

.. هو على طول بيحب يساعد الناس .. هو حاول يساعدها .. بس مش أكثر من كده

ثم نظرت الى "سماح" بعينين دامعتين قائله:

-صح؟

نظرت "سماح" الى نظرة الرجاء فى عين صديقتها والتي ترجوها الى موافقتها على كلامها

حتى لو بالكذب .. ورغم الشك الذى كان يساور "سماح" الى أنها استجابت للرجاء فى أعين

صديقتها الدامعه وقالت:

-صح .. أكيد الموضوع زى ما انتى قولتى

أومات "ياسمين" برأسها وهى تحاول أن تغالب دموعها ونظرت الى الورق ثم مزقته .. ثم

نظرت الى صديقتها قائله بحزم:

-خلاص الموضوع ده اتقفل ومش هيتفتح تانى

-ماشى

حاولت "سماح" التحدث فى أمور مختلفة مع "ياسمين" التى جاهدت بدورها للإندماج مع

"سماح" وتناسى الموضوع تماماً

خرجت "ياسمين" مع "عمر" وركبا السيارة .. نظر اليها يراقب انفعالاتها قائلاً:

-حبيبتى فى حاجه ضايقتك

رسمت ابتسامة على شفيتها ونظرت ايه قائله:

-لا أبداً

-كنت فاكرك هتكونى مبسوفة لما تشوفى "سماح"

-أنا فعلاً مبسوفة .. مبسوفة أوى

ابتسم قائلاً:

-حبيبتى تحب تروح فىين؟

قالت مبتسمة:

-انا معرفش أماكن فى المنصورة .. ومخرجتش فيها قبل كده .. يدوبك باجى لـ "سماح" بس

أوقف "عمر" سيارته على النيل ونزل الإثنان معاً ينعمان بنسمات الليل المنعشة .. ابتسمت

"ياسمين" تراقب القمر فوقهما .. شعرت بالخجل عندما ارتطمت بنظرات "عمر" المتفحصة

وقالت:

-انت على طول بتبصلى كده

-أيوة وهفضل أبصلك كده

قالت بمرح:

-عادى كل الرجالة بتقول كدة فى الأول وبعد فترة من الجواز بيتحولوا للنسخة المصريه

المعتمده للزوج المصري

ضحك "عمر" حتى دمعت عيناه وقال:

-والله ده فى ايد حضرتك .. لو متحولتيش للنسخة المصريه المعتمده للزوجة المصرية فأنا

أكيد مش هتحول

ابتسمت قائله:

-قصدك ايه باه يا بشمهندس بالنسخة المعتمدة للزوجة المصرية

قال بمرح:

-قصدى باه انك تتحولى لكائن هلامى غير معلوم تفاصيله وتضاريسه بوضوح

ضحكت "ياسمين" بشدة فأكمل قائلاً:

-وأفتح باب البيت ألقى بتصرخي صرخة طرزان وبتجرى ورا الولاد

ازدادت ضحكاتهما فأكمل:

-والكبيرة باه ألقىكي ناسيه اسمى وبتندهيلى وتقوليلى بابا زى ما الولاد هيقولولى .. ساعتها

هروح شايلك انتى وهما و.....

نظرت اليه بتحدى .. فابتسم وأشار لقلبه قائلاً:

-وأحطكوا جوه قلبي

قالت متظاهره بالجديه:

-خلاص وأنا موافقة .. أنا مش هتحول مقابل ان انت كمان متتحولش

اقترب بوجهه منها بشدة قائلاً:

-اتفقتنا

ذهبا معاً لتناول الطعام فى أحد المطاعم الهادئة المطلّة على النيل .. كانت "ياسمين" تشعر بسعادة بالغة وهى جالسه بجوار زوجها .. ترك هاتفه و ميدالية مفاتيحه على الطاولة وذهب الى حمام .. أمسكت الميداليه وتفحصتها .. ابتسمت عندما وجدت القلب الذى يحمل اسمها .. نظرت حولها وأعدت الميداليه مكانها بسرعة قبل أن يعود .. عاد "عمر" ليجدها مبتسمه و احد الرجال على الطاولة المجاورة ينظر اليها ..شعر بغيرة شديده .. تابعته "ياسمين" بدهشة وهو يذهب ويقف أمام الرجل قائلاً:

-فى حاجه ؟

التفت الرجل اليه قائلاً:

-فى ايه حضرتك

ارتفع صوت "عمر" قليلا وقال بغضب:

-أصلك بتبص لمراتى أوى .. فحببت أعرف يعنى فى حاجه ؟

شعر الرجل بالحرَج وقال:

-انا مبصتلهاش

كانت أعين "عمر" تشعان غضباً ورمق الرجل بنظره صارمة ثم توجه الى طاولتهم وجذب

"ياسمين" من يدها وجلسوا على طاولة أخرى بعيدة عن هذا الرجل .. طال الصمت بينهما ..

ثم فتح "عمر" المنيو قائلاً بهدوء:

-تحبي تاكلى ايه

نظرت اليه تحاول معرفة ما يفكر فيه .. وجدت نفسها تقول بتلقانيه:

-أنا مبصتلهاش على فكرة .. ومكنتش واخده بالى انه بببصلى أصلاً

نظر "عمر" اليها لتتلاقى نظراتهما .. مرت لحظات .. ثم أمسك كفيها بين كفيه قائلاً بهدوء:

-هو انا قولت انك بصتيله

قالت شارحه:

-لأبس أنا خفت تكون افتكرت كده

ابتسم قائلاً:

"-ياسمين" انا عارف كويس أنا متجوز مين

زاد من ضغط كفيه على كفها فابتسمت له فى حجل وقد أسعدها ثقته بها .. طلبا الطعام .. ظلا

يتحدثان معاً .. حتى أخذهم الحديث حول قضية الاختطاف .. قال "عمر" بضيق:

-مش هرتاح إلا لما يمسكوه
أكدت "ياسمين" قائله:

-أكد هيمسكوه ان شاء الله
ثم قالت بقلق:

-بس خايفة ميقدروش يثبتوا التهمة عليهم
قال "عمر" بثقه:

-لأ هيقدروا يثبتوها ان شاء الله .. وأصلاً هما أغبية جداً كانوا مكمينك ومغميين عينيكي على
أساس متتعرفيش عليهم .. لكن كانوا بيتعاملوا من غير جوانتى .. يعني بصماتهم ماليه البيت
قالت "ياسمين" وهى تفكر:

-بس مش ممكن يوصلوا للبيت ده ويمسحوا بصماتهم
قال "عمر" شارحاً:

-البويس رفع البصمات خلاص .. يعنى حتى لو مسحوها هى خلاص اتثبتت فى المحضر ..
وكم ان البيت أنا أفلته كويس وغيرت الباب لباب حديد يعنى محدش يقدر يدخله
انتبهت "ياسمين" لكلماته وقالت باستغراب:

-ازاى يعنى غيرت الباب وأفلت البيت .. وصحاب البيت لما يرجعوا أكيد هيعملوك مشاكل
عشان غيرت باب بيتهم
قال "عمر" وهو يكمل طعامه:

-لأ محدش هيعملى مشاكل
بلعت ريقها وقالت بقلق:

-ازاى تضمن انهم مش هيعملوك مشاكل
صمت قليلاً .. وبدا وكأنه يفكر .. ثم نظر اليها ليفجر قنبلة فى وجهها:

-لأن انا صاحب البيت

شعرت بقلبها وقد توقف عن الخفقان .. وبرئتها وقد شلت على الحركة .. لحظات .. ثم عادت
أجهزتها للعمل مرة أخرى لكن بصورة جنونية .. قالت بصوت حاولت أن يبدو طبيعياً:
-يعنى البيت ده بتاعك ؟ .. ملكك ؟

رد بهدوء وهو يبدو شاردأ:

-أيوه ملكى .. بس مبروحوش كتير .. روحته كام مرة بس

راقبت وجهه لترى عليه تعبيرات غريبة كمن يتذكر شيئاً يضايقه .. ثم هذ رأسه وكأنه يحاول
نفض تلك الذكرى من رأسه .. استأذنت لتذهب الى الحمام .. دخلت الى الحمام وهى ترتعش ..
وقفت أمام المرآه تنظر الى وجهها المضطرب .. ونظراتها الشاردة المتوترة .. بيته .. ملكه ..

هو صاحب البيت .. البيت الذى زنت فيه زوجة الغفير مع رجل .. ظننت أن "عمر" ليس له
علاقة بالبيت وما حدث فيه .. لكنه صاحب البيت .. ومالكة .. لماذا يشتري رجلاً مثله مثل هذا
البيت الموجود على أطراف القرية والذى لا يحتوى إلا على فراش ودولاب وبضع الأواني

البسيطة .. ماذا يفعل رجلاً مثله فى هذا البيت الذى قال انه زاره مرات .. لم يذهب اليه الا
لسبب واحد .. لكى يلتقى فيه بعشيقته بعيداً عن أعين زوجها .. وبعيداً عن أعين الخدم .. لكم
تمنت أن يكون برنياً .. لكم حاولت تناسى تلك الحادثة وتجاهلها وكأنها شيئاً لم يكن .. لكنه

أثبت لها .. أنه هو نفسه الرجل الذى زنى بزوجة الغفير فى هذا البيت المحترق .. نظرت الى
نفسها فى المرآه لتتسقط من عينيها دموع حزينة .. يعقبها شلالاً من الدموع الصامتة.

الفصل التاسع والثلاثون

-أبوة ملكى .. بس مبروحوش كثير .. روحته كام مرة بس راقبت وجهه لترى عليه تعبيرات غريبة كمن يتذكر شيئاً يضايقه .. ثم هذ رأسه وكأنه يحاول نفخ تلك الذكرى من رأسه .. استأذنت لتذهب الى الحمام .. دخلت الى الحمام وهى ترتعش .. وقفت أمام المرآه تنظر الى وجهها المضطرب .. ونظراتها الشاردة المتوترة .. بيته .. ملكه .. هو صاحب البيت .. البيت الذى زنت فيه زوجة الغفير مع رجل .. ظنت أن "عمر" ليس له علاقة بالبيت وما حدث فيه .. لكنه صاحب البيت .. ومالكه .. لماذا يشتري رجلاً مثله مثل هذا البيت الموجود على أطراف القرية والذى لا يحتوى إلا على فراش ودولاب وبضع الأواني البسيطة ..

ماذا يفعل رجلاً مثله فى هذا البيت الذى قال انه زاره مرات .. لم يذهب اليه الا لسبب واحد .. لكى يلتقى فيه بعشيقته بعيداً عن أعين زوجها .. وبعيداً عن أعين الخدم .. لكم تمنى أن يكون برئياً .. لكم حاولت تناسى تلك الحادثة وتجاهلها وكأنها شيئاً لم يكن .. لكنه أثبت لها .. أنه هو نفسه الرجل الذى زنى بزوجة الغفير فى هذا البيت المحترق .. نظرت الى نفسها فى المرآه لتقسط من عينيها دمعة حزينة .. يعقبها شلالاً من الدموع الصامتة

شعرت "ياسمين" وكأن الدنيا قد توقفت من حولها ولا يوجد سوى تلك الحقيقة المره .. وقفت تنظر فى المرآه وهى متألمه مجروحه حائرة لا تدري ماذا تفعل .. وكيف تتصرف .. أتواجهه .. أتسامحه .. أتبتعد عنه .. لا تدري ماذا ستفعل .. ليست واثقه من أى شئ .. الشئ الوحيد الذى تثق به .. هو أن زوجها الجالس فى الخارج أجرم فى حقه نفسه وفى حقها وفى حق ربه بجريمة بشعة للغاية .. كفكت دموعها وغسلت وجهها وعادت الى الطاولة .. تفرس فيها "عمر" .. ثم قال باهتمام:

-مالك يا "ياسمين"
قالت بصوت مبجوح:

-مفيش

قال بحزم:

-لأ فى .. انتى كنتى بتعيطى صح ؟

لم تستطع التأكيد أو الإنكار .. صمتت .. أمسك يدها بين يديه الاثنين واقترب منها قائلاً:

-حبيبتي ادعيه ربنا يرحمه هو وماما

نظرت اليه .. لبتك تعلم سبب دموعى يا "عمر" .. ليس أبى سببها .. بل أنت .. أنت من قهرنى وجرحنى .. قالت "ياسمين" وقد بدا عليها الضيق:

-معلش ممكن نمشى .. عايزة أروح

ركبا السيارة .. وظلت صامته طوال الطريق .. و"عمر" لم يحاول مضايقتها بالحديث .. لكنه ظل يلتفت اليها .. ويتفرس فيها وفى تعبيرات وجهها الحزين .. ووصلا الى البيت صعدا معاً .. توقفا أمام باب غرفتها .. اقترب منها "عمر" وقبل جبينها ثم قال:

-تصبحى على خير يا حبيبتي .. لو مجالكيش نوم واحتجتى تتكلمى أنا سهران فى المكتب

دخلت "ياسمين" غرفتها وألقت بنفسها على الفراش بملابسها وانفجرت فى بكاء صامت ..

بكاء يبكى فيه قلبها قبل عينيها .. لم تدري كم جلست تبكى .. لكنها لم تتوقف الا عندما لم يعد

لديها القدرة على البكاء .. قامت بتناقل وتوضأت وصلت .. بكت كثيراً فى سجودها وهى

تتضرع الى الله عز وجل أن ينير لها طريقها .. ويلهمها حسن التصرف .. أنهت صلاتها

وجلست على فراشها تفكر .. هى الآن تشعر بأن "عمر" بالفعل مذنب بهذا الجرم .. وأنه أخطأ مع تلك المرأة .. وترى "ياسمين" الآن انه ليس لديها الا طريقين اثنين لا ثالث لهما .. ويجب

عليها أن تختار أحدهما .. الطريق الأول هو أن تواجهه ثم تنفصل عنه وتبتعد عنه تماماً ..
الطريق الثاني أن تخفى ما عرفته ..وتسامحه .. وتغفر له ما فعل .. لكن السؤال الآن .. هل
حبها له كافي لأن يغفر تلك الغلطة .. هل حبها له كافي لأن ترمى هذا الأمر خلف ظهرها وألا
تفكر فيه مرة أخرى .. هل حبها له كافي لأن تساعد على التغيير للأفضل وتأخذ بيده وتجعله
يسير معها في طريقها .. أم أن حبها له أضعف من أن يتحمل تلك الغلطة التي سبقت معرفته
بها .. وقلبها لن يستطيع أن يغفر له أبداً .. هي تعلم أن الحب كلمة لها معاني كثيرة .. من بين
تلك المعاني .. التسامح .. وغفران الزلات .. وكلما كان الحب أكبر .. كلما كان التسامح أكبر ..
وكلما كان الاحتواء أعمق .. فهل حبها بالفعل كبير ؟ وقوى .. ؟ .. حتى يقف في وجه تلك
العاصفة التي تحاصره من جميع الجهات ..؟

مكثت في غرفتها الى ما بعد الظهر .. كانت تحاول أن تتحاشي الاجتماع به .. خرجت من
غرفتها ومرت بجوار باب غرفته المغلق فأسرعت السير حتى نزلت الدرج .. ليس من المعقول
أن يظل "عمر" نائماً لهذا الوقت فليس هذا من عادته .. لكنها لا تجد أثراً له في المنزل ..
ذهبت الى الخادمة في المطبخ وسألتها عنه فقالت انها لا تعرف مكانه .. حضرت له الفطار في
الصباح ولم يطلب منها شيئاً آخر .. على قدر ما كنت تشعر بالراحة لعدم رؤياه حتى لا تتذكر
ألمها منه .. على قدر ما كانت تشعر بالقلق عليه .. غلبها قلقها .. اتصلت به .. رد عليها قائلاً:

-صباح الخير يا حبيبة قلبي

-السلام عليكم .. صباح النور

-وعليكم السلام

-انت فين .. صحيت لقيتك مش موجود

-أتاها صوته الدافئ:

-وحشتك ؟

-خفق قلبها .. وصمتت .. فقالت:

-مستخسرته حتى تقوليها لي

-لم ترد .. فأكمل:

-اما أنا فمش بستخسر فيكي حاجه .. وحشتيني .. وبتوحشيني على طول .. ولولا الشغل اللي
في ايدي كنت طرت لحد عندك

أغمضت عينيها وقد ألمتها كلماته .. ألمها حبه الكبير لها .. وهي لا تستطيع أن تبادله حباً بحب
.. أرادت أن تسأله ان كان في مكتبه أم خارج المزرعة .. لكنها وجدت نفسها تسأله سؤال آخر
تماماً:

"-عمر" .. انت بتحبني بجد ؟

لم تسمع صوتاً .. بل انقطع الخط .. تركت الهاتف من يدها .. وأنبت نفسها على سؤالها .. تمننت
أن يكون الخط قد انقطع قبل أن يستمع الى سؤالها .. والذي لا تعلم لماذا سألته أصلاً .. جلست
تقرأ احدى المجلات عندما سمعت صوت الباب يُفتح ووقفت لتجد "عمر" يدخل ويقف أمامها ..
قالت باستغراب:

"-عمر"

كانت نظراته تحمل كل معاني الحب والشوق واللهفة .. قال:

-جيت عشان أرد أرد على سؤالك

تبادلا النظرات لبرهه ثم جذبها الى حضنه .. استسلمت فترة لأحضانة .. ثم حاولت ابعاده عنها
.. رفع رأسه ونظر اليها مبتسماً .. قال بصوت حاني:

-عرفتي اجابة سؤالك ؟

احمرت وجنتاها وأخفضت بصرها .. حاول رفع وجهها بكفه .. فوقع نظرها على الحرق ..
فشعرت بغصه في حلقها .. سألته بصوت مضطرب قليلاً:

-من ايه الحرق ده؟
نظر "عمر" اليها يتفرس فيها قائلاً:
-دى تانى مرة تسأليني عنه
"ياسمين" وهى تحاول أن يبدو صوتها طبيعياً :
-فضول مش أكثر
قال "عمر" بحزم :
-مش هقولك
نظرت اليه قائله :
-ليه ؟
صمت .. طال صمته .. بدا عليه الضيق .. وأخيراً قال :
-لأنك بعيدة عنى بما فيه الكفايه .. ولو عرفتى هتبعدى أكثر
ارتجف قلبها لكلماته التى تؤكد ما عرفته .. أو مأت برأسها وحاولت رسم بسمه على شفيتها
قائله:
-يلا عشان متأخرش على شغلك .. وأنا هستناك على الغدا
سألها باهتمام:
-فطرتى
-لأ لسه
قال بحزم:
-حالاً .. تفطرى حالاً
-حاضر
ابتسم قائلاً:
-قولها تانى
-ايه هى ؟
-حاضر
ابتسمت قائله:
-حاضر
-مش هتأخر عليكي .. لو احتجتى حاجة كلميني
ابتسمت له حتى انصرف .. ثم اختفت الابتسامه من شفيتها لتحل محلها عبره فى عينيها.

جلست "سماح" مع "أيمن" فى شرفة منزلهما .. بدا على "سماح" التفكير .. قالت لـ
"أيمن":
" -أيمن" عايزة أسألك سؤال
-خير
بدا عليها وكأنها تحاول تخير كلماتها بعنايه .. ثم سألته:
-هو الحرق اللي فى ايد "عمر" .. قديم ولا جديد
التفت اليها ورفع حاجبه قائلاً:
-نعم ؟ .. وانتى ايه دخلك بالموضوع ده
اضطربت قليلاً ثم قالت:
-عادى يعنى .. فضول .. "ياسمين" كانت عايزة تعرف
نظر الى عينيها بحزم قائلاً:
-مراته عايزة تعرف يبقى تسأله .. لكن انتى متسألين سؤال زى ده عن واحد صحبى

قالت تحاول تلطيف الجو:

-ده سؤال عادى يا "أيمن" يعني مش سؤال شخصى
قال بحزم:

-لأ مش عادى .. متسألش اى حاجه عن أى راجل .. حتى لو كان صحبى .. انت ايه دخلك
بالحرق اللى فى ايده .. وكمان بتسأليني أنا
ابتسمت قائله:

-هو انت بتغير ؟

نظر اليها بعتاب قائلاً:

-يعني مش عارفه ان أنا بغير .. بغير من مجرد كلامك عن راجل تانى .. وسؤالك عن حاجه
تخصه

ضحكت قائله:

-خلاص يا عم مكنش سؤال ده

فى المساء دخلت "ياسمين" الى غرفتها .. استأذنت من "عمر" لتنام مبكره عن كل يوم .. فى
الحقيقة لم ترغب فى النوم .. بل كانت ترغب فى الإنفراد بنفسها .. والتفكير .. لم تصل حتى
الآن الى قرار .. لا تعرف ماذا تختار .. لا تعرف سوى شئ واحد .. أنها كل يوم تزداد قرباً منه
وتعلقاً به .. فإن كانت ستأخذ قرار الانفصال عليها ان تأخذه الآن .. لأن كل يوم يمر عليها معه
..بل كل لحظه .. تربطها به أكثر .. سقطت عبره من عينيها .. لم تكن تلك العبرة حزينه كباقي
العبرات .. بل عبرة شوق .. شوق لزوجها الذى لا يفصلها عنه سوى جدار .. لكم تتمنى ان
تلقى بنفسها بين أحضانه .. وتخبره بكل ما يحزنها .. كان حنوناً للغاية .. وهذا جعلها متعطشه
للمزيد من هذا الحنان ..دعت ربها أن يكون قد تاب بالفعل .. تمنى أن تشعر بذلك .. بتوبته ..
وبصدقها .. ويعزمه على عدم تكرار ما فعل .. عندها ربما تتمكن من مسامحته ..ربما تتمكن
من نسيان ما حدث .. تنهدت ونهضت لتغير ملابسها .. كانت شاردة .. تعاملت مع سوسته
العباءة بعنف حتى كسرتها .. زفرت فى ضيق .. حاولت فتحها فلم تستطع كانت قوية للغاية ..
نظرت للقطعة المقطوعة فى يدها بضيق .. خرجت ونزلت الدرج لتقابل "عمر" وهو صاعد
الى غرفته .. قال لها:

-انتى لسه منمتيش

قالت بارتباك:

-أيوة .. هنام دلوقتى

سألها بعتاب:

-طالما كنتى سهرانه مجبتيش أعدتى معايا ليه

صمتت لم تجد ما تقول .. قال بضيق:

-براحتك .. تصبى على خير

صعد الى غرفته .. نزلت وذهبت الى المطبخ للبحث عن الخادمة .. لم تجدها .. نظرت الى باب
غرفتها المغلق .. ترى هل نامت أم لا .. كادت أن تطرق عليها الباب لكنها أشفقت عليها أن
توقظها بعد يوم متعب من أجل سوسته العباءة ..صعدت فى ضيق الى غرفتها وظلت تحاول
فتحها دون جدوى .. حاولت البحث عن مقص فلم تجد .. خرجت لتتنزل للبحث عن مقص .. لم
يكن أمامها حل الا قص العباءة .. قابلت "عمر" مرة أخرى وهو يدخل غرفته ويحمل كوب من
الشاي .. قال باستغراب:

-مالك فى ايه ؟

قالت باضطراب:

-مفيش
همت بأن تنزل الدرج لكنها التفتت اليه لتقول:
-مفيش عندك مقص ؟
قال باستغراب:
-اه عندي .. عايزاه ليه
قالت بنفاذ صبر:
-عايزاه وخلص
ابتسم وقال:
-مش هجيهولك الا اذا قولتلي عايزاه ليه
قالت بضيق:
-قولتك عايزاه وخلص
-كنت بهرج معاكى .. لا مفيش مقص
زفرت بضيق .. نظر اليها .. حزمت امرها وقالت بسرعة وكأنها تخشى أن تتراجع:
" -عمر " ممكن تفتحلي السوسته
لمعت عيناه بخبث .. فقالت بتوتر:
-اتكسرت وبقالى ساعة مش عارفه اغير هدومى .. نزلت لقيت الست اللى بتشتغل هنا نايمة
وصعبت عليا أصحياها
قال بهدوء:
-وأنا روحت فين ؟
دخل غرفته وضع كوب الشاي ثم خرج والتف حولها .. التفتت تنظر اليه وقالت بجديه:
-افتحها فتحه صغيره وأنا هكملها
ضحك قائلاً:
-ماشى حاضر
رفع يده فالتفتت مرة أخرى تنظر اليه محذره:
-حته صغيره
كتم ضحكته بصعوبه وهتف:
-اللى يسمع كده يقول انك جايبه واحد من الشارع يفتحك السوسته .. صبرنى يارب
طال انتظارها .. قالت:
-ها خلصت
-لأ لسه .. انتى قفلتيها ازاي .. قفلتيها على القماش .. وكمان قطمتيها
قالت بنفاذ صبر وهي تحاول ان تبتعد:
-خلص مش مشكله هقصها
لم يسمح لها بالابتعاد وقال:
-استنى هحاول تانى
أثناء محاولته .. وقع نظره على السلسله فى عنقها .. لمسها بيده وأخرجها .. التفتت تنظر اليه
.. ابتسم عندما رأى القلب معلق فى نهاية السلسله .. نظر اليها بحب قائلاً:
-لبساها من يوم ما اديتهاك ؟
أومات برسها قائله:
-أيوه
ظل ممسكاً بالقلب وهو ينظر اليها .. شعرت بالتوتر حاولت أن تبتعد .. لكنه كان يطبق على
السلسله بقوة .. نظرت اليه .. غاصت فى بحر عيناه اللتان تحتويانها فى صمت .. اقترب منها
أكثر .. ولدهشتها لم تعترض .. شجعه هدونها على الاستمرار .. لاحت لها صورة أفرعتها ..
صورة زوجها فى احضان امرأة أخرى .. وألقى الشيطان بأسنله مقرز فى عقلها .. تُرى هل

كان يقبل تلك المرأة بالطريقة التي يقبلها بها .. هل كان شغوفاً بتلك المرأة مثلما تراه شغوفاً بها الآن .. كم استمرت علاقتهما .. هل كان يحبها أم كانت مجرد علاقة عابرة .. فتحت عينيها لعل تلك الصورة تختفى .. لكن هيهات .. فالصورة لم تكن في عينيها .. بل في عقلها .. شعرت بالقشعريرة تسرى في جسدها وهي تتخيل زوجها في أحضان أخرى .. أخرى متزوجة تخون زوجها معه .. أبى الشيطان الا وأن يبث سمومه في قلبها .. انتفضت .. وانزوت بنفسها تحاول أن تبتعد عن يده .. انتفض قلبه لانتفاضتها .. نظر اليها نظر دهشة ممزوجة بالألم والغضب .. ثم قال:

-لدرجة دي مش طيقانى ؟

نظرت اليه بألم قائله:

-أنا أسفه

ابتعد عنها وقال فى غضب:

-قولى انك مش قادرة تنسيه .. مش قادرة تنسى "مصطفى"

شعرت بكلماته وكأنها خنجر يطعن قلبها المكسوم .. التفت ونزلت الدرج بسرعة .. وتوجه الى مكتبه ثم سمعت صوت الباب يغلق بقوة .. عادت الى غرفتها وجلست على فراشها .. كانت حزينة حائرة متألّمة .. ترغب فى مسامحته .. لكن الأمر شاق عليها .. كيف تمنع عقلها من التفكير فيما فعل .. مضت أكثر من ساعة جالسه مستغرقة فى التفكير .. أكثر ما ألمها هو أنه غضب منها .. تعلم جيداً أنها لا يجب أن تنام وزوجها غاضب عليها .. تعلم جيداً أن من تمنع نفسها عن زوجها بغير عذر تظل الملائكة تلغنها حتى تصبح .. ارتجفت لقساوة تلك الكلمات التى تعرفها جيداً

فتحت باب الغرفة وخرجت تبحث عنه .. لم يكن ما يحركها هو خوفها من لعن الملائكة فحسب .. بل حبها له .. وحزنها لأنها أغضبتة .. نظرت الى باب غرفته المفتوح .. وكوب الشاي الذى برد .. علمت أنه فى المكتب لم يخرج .. نزلت ببطء .. طرقت باب المكتب بهدوء .. لم تسمع صوتاً يدعوها للدخول .. وقفت .. ترددت .. لكنها أخيراً عزمتم أمرها وفتحت الباب .. أطلقت برأسها لتجد "عمر" جالساً على احدى الأرائك وبیده ألبوم صور .. رفع رأسه ليلقى عليها نظرة لا مبالية وكأن وجودها لا يعنيه ثم عاد ليقطب صفحات الألبوم .. دخلت "ياسمين" وأغلقت الباب خلفها .. جلست على الأريكة التى يجلس عليها لكنها تركت بينهما مسافة .. لم تعرف ماذا تقول .. هرب منها الكلام .. كانت تشعر بأحاسيس كثيرة متناقضة .. كان مازالت يطالع الألبوم فى يده .. قالت دون ان تنظر اليه:

-أنا مبفكرش أبداً فى "مصطفى"

نظر اليها بغضب وحده .. نظرت اليه وأكملت:

-أنا أصلاً مكنتش بحبه يا "عمر" .. عمرى ما حبيته أبداً

رقت نظراته قليلاً فأكملت:

-أنا مكنتش أعرفه قبل الخطوبة .. هو شافنى واتقدملى .. كانت أول مرة أشوفه يوم ما

اتقدملى .. واتخطبنا على طول .. واتجوزنا على طول

ترك الألبوم من يده واعتدل فى جلسته .. ساد الصمت لفترة .. ثم قطعه قائلاً:

-يعنى عمرك ما حسيتى بحاجة ناحيته

هزت رأسها بقوة قائله:

-لأ

تفرس فيها قائلاً:

-ولا مرة ؟

قالت بثقه:

-ولا مرة

أكملت قائله:

-لما بفتكره مش بفتكره على انه جوزى خالص .. بفتكره على انه واحد غريب .. عمري ما

قدرت أفهمه .. ولا عايزه أفهمه

أوما برأسه وقد فهم ما قالت .. قال بهدوء:

-أنا اسف على اللي قولته

قالت بأسى:

-وأنا اسفة على اللي عملته

نظر اليها بصمت فأكملت قائله:

"-عمر" .. أنا كنت طول عمري فى حالى .. عمر ما كان ليا علاقات بحد .. حتى صحابي أيام الكلية كانوا معدودين على الصواب .. لانى مش برضى أصحاب أى حد .. مبصحبش غير البنت اللي بثق فيها وبحس انها شبهى .. ومفيش منهم غير "سماح" هى اللي علاقتنا متقطعتش من أيام الجامعة ..

نظرت اليه بألم وحيرة قائله:

-يعني اللي عايزة أفهمهولك .. انى معديش خبرة فى أى حاجه .. وحسه ان فى حاجات كثير

أول مرة أتعرضلها .. ومش قادرة أحكم على مشاعري صح .. حتى أفكارى حساها مشوشة

اقترب منها وجذبها الى حضنه .. ثم قال:

-أنا أسف انى اتسرعت

رفعت رأسها لتنظر الى عينيه قائله:

-لأ انت متسرعتش .. بس فى حاجات كثير جوايا محتاجه أظبطها الأول

أمسك كفيها بيده وقال:

-طيب ليه ما تتكلميش معايا فى الحاجات اللي جواكى دى .. ونظبطها سوا

ابتسمت قائله:

-اوعدك .. انى هحاول أعمل اللي انت بتقوله .. وانى فعلا أقولك على كل اللي جوايا .. أنا بس

محتاجة وقت

تبملت عيناها بالدموع ونظرت اليه برجاء قائله بصوت أوشك على البكاء:

-المهم بس انت متزعلش منى .. أنا مش عايزاك تزعل منى يا "عمر" .. انا عارفه انى تعباك

معايا .. بس حاول تفهمنى ومتزعلش منى

أمسك وجهها وقبل جبينها قائلاً بجديه:

-طيب ممكن تبطل عياط .. مش عايز أشوف دموع فى عنيكى أبداً .. وأنا مش زعلان منك ..

ومش ممكن أزعل منك .. الحاجة الوحيدة اللي تزعلنى منك هى بعدك عنى .. لكن طالما انتى

معايا خلاص .. هصبر لحد ما انتى اللي تقولىلى أنا بحبك يا "عمر"

ابتسمت له .. وقالت وهى تنظر الى عينيه:

-انت حنين أوى على فكرة

ابتسم لها .. فأكملت:

-وطيب أوى .. ومريح أوى .. وراجل أوى .. وشهم أوى ..

اقترب برأسه منها حتى أسند رأسه على جبينها قائلاً:

-طيب اسكتى بأه بدل ما تشوفيني مجنون أوى

تلاقت أعينهما وابتسامتهما .. اعتدلت فى جلستها قائله:

-بما انها جلسه مصارحه فأحب أسألك سؤال

أجاب مبتسماً:

-اسألنى

قالت بهدوء:

-يعني انا عارفه انك كنت خاطب قبل كده
صمتت لتراقب تعبيرات وجهه الساكنه .. ثم أكملت:
-يعني اللي سمعته انها كانت مختلفة عنى .. حتى ماما "كريمه" قالتلى كده
أوما برأسه دون أن يتكلم .. فأكملت:

-ليه؟

-ايه اللي ليه؟

-ليه اخترتها؟

صمت وبدا عليه التفكير .. ثم نظر اليها قائلاً:

-اخترتها لانى كنت فاكرا انى ممكن أغيرها .. بس هى كانت بعيده أوى أوى عنى ..بعيده بعد
صعب انى أقربه .. خطوبتى ليها كانت من اكثر الحاجات اللى ندمت عليها فى حياتي
تفرست "ياسمين" فى وجهه تراقب تعبيراته وقالت:
-فى حاجات كتير ندمت عليها؟

بدا ليه التفكير ثم قال:

-مش كتير أوى .. بس أى انسان عنده غلطات قاتله أكيد بيندم عليها
شعرت بالألم يغزو قلبها .. اقتربت منه .. اندهش عندما وجدها تمسك يده بيدها .. نظر اليها
فقال بحنان:

-المهم اننا نندم فعلاً على الغلطة دى ونستغفر ربنا كتير عشان يغفرهالنا .. ومنكررش أبداً
تانى مهما حصل

قال بهدوء:

-صح كلامك مطبوط

-سألته بلهفه:

-يعني انت ندمت على الغلطات دى

أوما برأسه:

-أيوة ندمت

ابتسمت .. شعرت بالراحة تسرى فى كيانها .. قالت له بحماس وبأعين دامعه:
-ان شاء الله ربنا هيغفرلك .. اللى بيتوب بجد ربنا بيغفرله ويمسح الذنب ده من صحيفته يوم
القيامة

رق قلبه وهو يرى دموعها المتساقطه .. مسحها بأصابعه ونظر اليها بحنان جارف وقال
بصوت مرتجف:

-انتى حبيبتي بجد .. أنا بحبك أوى .. عمرى ما تخيلت ان واحده تعيط من خوفها عليا بسبب
ذنوبى .. انتى حنينه أوى يا "ياسمين" .. أنا بحبك أوى

استيقظت "ياسمين" من نومها على صوت جرس الهاتف الذى تضبطه على صلاة الفجر ..
نهضت لتجد نفسها فى غرفتها ومدثرة بغطائها .. كيف صعدت الى هنا .. ابتسمت وهى تتخيل
نفسها محموله بين ذراعى "عمر" .. نهضت من فراشها وتوضأت .. ذهبت الى غرفته
وطرقت الباب .. وقت طويلاً .. أخيراً فتح الباب وهو ناعس العينين قائلاً بمرح:
-فى واحدة محترمة تخبط على باب أوضة جوزها الفجر
ضحكت وقالت:

-أه عشان تصحيه يصلى الفجر

ابتسم وهو يفتح عينيه بصعوبه قائلاً:

-ماشى هعديها المرة دى ..
نظر الى ما كانت ترتديه ثم قال بخبث:
- هو انتى لسه مفتحتيش السوسته
ابتسمت بخجل قائله:
-لا ولا لاقيه مقص
قال وكأنه يفكر:
-ممممم طيب وهنعمل ايه فى المشكلة دى
-عادى بكرة هسأل الست اللى بتشتغل هنا على مقص
نظر اليها قائلاً:
-طيب تعالى أحاول تانى
قالت بسرعة:
-لا
ضحك بشدة قائلاً:
-يا بنتى هحاول أفتحلك السوسته
قالت باسمه:
-لا هتصرف أنا
قال بعند:
-طيب محدش فتحالك غيري
اقترب منها ولفها .. ديقه وكانت المشكلة قد حُلت .. فالتفتت بسرعة قائله:
-خلاص كفاية .. هكمل أنا
اتسعت ابتسامته ونظر اليها وعيناه تلمعان من البهجه .. قالت بإهتمام:
-متساش تصلى قبل ما تنام .. تصبح على خير
تابعها بنظره قائله:
-وانتى من أهل الخير يا حبيبتي
دخلت وأغلقت الباب و ابتسمت بسعادة وقد أيقنت أنها أصبحت تحب زوجها بشدة .. بل
تعشقه بجنون..

فى الصباح سمعت طرقات على باب غرفتها .. نهضت وفتحت الباب لتجد الخادمة تخبرها بأن
"عمر" ينتظرها فى الأسفل لتفطر معه
دخلت الحمام وأخذت دشاً .. احتارت فيما ترتدى .. هل ترتدى عباءة كما هى عادتها .. أم ..
اختارت فستان طويل .. مثل الدريل .. بنصف كم .. لم تربط شعرها للخلف هذه المرة بل تركته
حرراً .. كان لديها شعر أسود اللون فاحماً .. ذو مظهر صحى جذاب .. به موجات تعطيه انسيابيه
رائعه .. وضعت أيضاً حكلاً .. ووبرفيوم تحبه .. نظرت الى نفسها فى المرآه .. ثم نزلت .. دخلت
غرفة الطعام وهى تشعر بالخجل من التغيير الذى أحدثته فى نفسها .. نظر "عمر" اليها متأملاً
لا يرفع عيناه عنها حتى جلست قائله:
-صباح الخير
ابتسم وقال:
-صباح النور .. هو احنا ملنا حلوين أوى النهاردة كده
ابتسمت بخجل و قالت:
-يلا عشان نفطر عشان متأخرش على شغلك
اقترب منها هامساً:

-انا مستعد ألغى الشغل خالص على فكرة
ضحكت .. سعد "عمر" للغاية من التغيير فى مظهرها أولا .. ومن ابتسامتها العذبة التى ظلت
محتفظة بها طيلة جلوسها .. فى المساء انشغلت "ياسمين" بسقى الزرع فى الشرفة فى حجرة
المعيشة .. اقترب منها "عمر" قائلاً:

-انا طالع انام .. هتسهرى

التفتت قائله:

-لأ .. هسقى الزرع ده بس وأطلع انام
قبل خدما قائلاً:

-تصبحى على خير

هم بالانصراف ثم التفت قائلاً:

-متسيش تصحيني الفجر

ابتسمت له .. فصعد الى غرفته .. بعدما أنهت "ياسمين" عملها صعدت هى الأخرى الى
غرفتها .. اقتربت من فراشها لتجد على وسادتها ورقة وزهرة ياسمين .. أمسكت الزهرة
واستنشقت عبيرها المنعش .. وفتحت الورقة والابتسامه على ثغرها .. لتجد "عمر" كاتباً فيها
:

كم هي صعبة تلك الليالي

التي أحاول أن أصل فيها إليك

أصل إلى شرايينك

إلى قلبك

كم هي شاقة تلك الليالي

كم هي صعبة تلك اللحظات

التي أبحث فيها عن صدرك ليضم رأسي

خفق قلبها واضطربت نبضاته .. أشعرتها تلك الكلمات كم هى قاسيه على حبيبها .. على زوجها
.. ارتجفت أصابعها التى تمسك بالورقة .. قرأتها مرة أخرى وقد تأثرت بها بشدة .. تركت
الورقة والزهرة وتوجهت الى غرفته .. طرقت الباب .. لحظات قليلة وفتحه .. نظر اليها ..
وعلامات التأثر على وجهها .. قالت بصوت مضطرب:

-أنا آسفة

قبل جبينها قائلاً وبسمة حانية على ثغره:

-ولا يهكم يا حبيبتي

الفصل الأربعون

نظر اليها "عمر" نظره صارمة باردة خالية من أى شعور وقال بصوت هادر:
- احنا لازم نتطلق يا "ياسمين"
صدمت عندما سمعت تلك الكلمة التى فكرت فيها مراراً .. لكن عندما خرجت من فمه علمت كم
هى كلمة مريرة .. تجمعت الدموع فى عينيها وهى تنظر اليه بحسرة وألم.

(فلاش باك قبل يومين)

فى الصباح تقابل الاثنان على طاولة الطعام .. جاءه اتصال من "كريمه" قائله:
- اعمل حسابك اننا منتظرينكوا النهاردة .. "علاء" جه من السفر .. وعمتك زعلانه منك جداً
عشان مستقبلتوش
قال "عمر" بنفاد صبر:
- هى عمتمو مش عارفه ان أنا عريس ولا ايه
قالت "كريمه" بهدوء:
- ما هنا بيتكوا برده يا "عمر" وانتوا ليكوا فى الفيلا جناح خاص بيكوا يعنى أكنكوا عايشين
لوحدكوا برده .. ومنتساش انك اتجوزت من غير ما هى تكون موجودة .. معلش يا حبيبي
تعالى بس طيب خاطرها بكلمتين ولو عايزين تسافروا تانى سافروا .. بس بعد الحفلة اللى
هنعملهاكوا ان شاء الله
- امتى الحفلة دى
- بعد 10 أيام بالظبط ان شاء الله
- ماشى خلاص هتكلم مع "ياسمين" وان شاء الله هكلمك أكد عليكى يا ماما
أنهى "عمر" مكالمته والتفت الى "ياسمين" قائلاً:
- ماما عيزانا نزل القاهرة عشان عمتمو وكمان ابن عمتمو جه من السفر .. ده غير الحفلة اللى
قولتلك انها عايزه تعملها لنا .. ايه رأيك ؟
قالت "ياسمين":
- مفيش مشكلة .. نساfer النهاردة لو تحب
ابتسم قائلاً:
- حابب كمان أوريكى المكان اللى هنعيش فيه .. وبعدين ممكن بعد الحفلة نساfer أى مكان انتى
تختاريه .. قولتى ايه
ابتسمت قائله:
- تمام .. اتفقنا
أنهيا طعامهما وأخذها "عمر" الى المنصورة .. لشراء ملابس جديدة وبعض الأغراض لها ..
رغم اعتراضها لكنه أصر توقف بسيارته أمام احد المولات قائلاً:
- مش عايزك تعملى فرق بينى وبينك دلوقتى انتى مراتى وملزمة منى .. بلاش الحساسيه
الزايده دى يا "ياسمين" لو سمحتى
قالت بخرج:
- مش حساسيه ولا حاجه بس أنا عندى لبس كتير
- وايه المشكله .. وبعدين انتى عروسه .. ولازم تلبسى جديد
قالت بخرج وضيق:
- المفروض انا اللى أشتري لنفسي .. وبعدين أنا عندى هدم كتير بتاعة جهازى سيباها فى

القاهرة لما نروح هناك....
ققاطها "عمر" بغضب مكبوت:
-الهدوم دى تولعى فيها .. ترميها .. تتبرعى بيها .. لكن مش عايزك تلبسيها أبداً
نظرت اليه وقد فهمت سبب غضبه .. غيرته .. فقالت:
-خلاص مفيش مشكلة هتبرع بيهم
قال وقد هدأ قليلاً:
-طيب يلا عشان نخلص بسرعة ونرجع نجهز الشنط عشان منسافرش متأخر

ركبت "ياسمين" فى السيارة وانتظرت "عمر" الذى يحضر الشنط من البيت .. التفتت فوجدته
وقد أحضر شيئاً يبدو كفستان طويل مغلف .. ركب بجوارها فقالت له:
-ايه اللي انتى حطيتاه فى الشنطة دة ؟
ابتسم وقال:
-فستان فرحك
قالت بدهشة:
-بس يا "عمر" الفستان مكشوف خالص مستحيل ألبسه أدام حد ولا حتى هعرف ألبسه أدام
ستات
نظر فى عينيها واقترب منها قائلاً:
-مش هتلبسيه أدام حد .. هتلبسيه ليا أنا
ابتسم كل منهما للآخر وانطلق فى طريقه الى القاهرة .. ذكرته "ياسمين" قائله:
-متناساش تقول دعاء السفر
صمت "عمر" قليلاً ثم نظر اليها قائلاً:
-انتى حفظاه ؟
-أيوه
-طيب قوليه وأنا هقوله وراكى

وصلا الى القاهرة بعد ثلاث ساعات .. عبر "عمر" بسيارته بوابة الفيلا .. شعرت "ياسمين"
بالإنبهار .. نعم كانت تعلم مدى ثراء زوجها وأهله .. لكن الأمر فاق تصورها .. شعرت
بالإضطراب والرهبة .. ألقت نظرة على زوجها الذى يقود بهدوء لا يدرى شيئاً عما يدور
بداخلها .. نزلت من السيارة لتلقى نظرة على الفيلا من الخارج وعلى الحديقة المحيطة بها ..
قطبت جبينها وهى تشعر بمشاعر كثيرة مختلطة .. أمسك "عمر" بيدها وتفرس فيها قائلاً:
-فى حاجة ضايقتك
قالت بسرعة:
-لا أبداً
-أمال مكشرة ليه ؟
حاولت الابتسام:
-لأ مش مكشرة ولا حاجه .. يمكن بس تعبت شوية من السفر
قال بحنان:
-متقلقيش هنسلم عليهم ونطلع أوضتنا ترتاحى شويه
دخل الفيلا .. فإزداد انبهارها واضطرابها .. كانت رائعة التصميم .. شعرت بضآلتها وسط كل
هذا الترف .. وهذا الشعور ضايقها للغاية .. حاولت ازالة تعبير الضيق من وجهها ..
استقبلتهما "كريمه" بالترحاب قائله:

-حمدالله على السلامة نورتوا القاهرة
عانقتها "ياسمين" .. كم تحب هذه المرأة الطيبة .. كانت تشعر معها بالراحة وكأنها تعرفها
منذ زمن .. قالت "ياسمين":
-الله يسلمك يا ماما .. أخبار حضرتك ايه
-بخير يا حبيبتي الحمد لله .. يلا يا "عمر" خد مراتك تغيروا هدمكوا وترتاحوا شوية على ما
باباك وعملتك ييجوا ونجهز السفرة
صعدت "ياسمين" مع "عمر" وهى تنظر الى كل ما حولها برهبة .. أمسك "عمر" بيدها
فإطمنت قليلاً .. التفت اليها قائلاً بحنان:
-الجناح بتاعنا ده محدش هيدخله غيرنا يعنى تقدرى تعتبريه مملكتك الصغيرة .. مملكتى أنا
وانتى وبس
أدخلها "عمر" وتركها تتفحص ما حولها بعينيهما ثم سألها قائلاً:
-ها عجبك ؟
أومات برأسها قائله:
-طبعا عجبني
خطرت فى بالها سؤال فقالت:
-انت جهزت كل دة امتى
صمت قليلاً وبدا متردداً ثم قال:
-أنا كنت مجهز كل حاجه من زمان .. يعنى...
صمت .. ففهمت .. جهزه من أجل خطيبته الأولى .. شعرت ببعض الضيق .. لاحظ "عمر" ذلك
فقال بسرعة:
-لو تحبى تغير كل الأثاث وكل الديكور معنديش مشكلة .. أحنا جوازنا جه بسرعة وملحقتش
أجى هنا وأغيرلك كل حاجه
قالت له بصوت خافت:
-انت اللى اخترت الديكور والعفش ولا اخترتوه سوا ؟
قال بسرعة:
-لأ أنا اللى اخترته .. حتى هى مشافتوش
شعرت بالارتياح فإبتسمت له قائله:
-خلاص طالما ذوقك مفيش مشكلة
-متأكدة
-أبوة متأكدة

أخذت "ياسمين" دشاً وارتدت ملابسها .. واستعدت مع "عمر" للنزول للأسفل .. نزلا ليجدا
مدام "ثرى" قد وصلت بصحبة ابنها "علاء" و ابنتها "ايناس" .. كان الترحيب بها بارداً
جافاً .. وهى أيضاً لم تظهر الحماس فى السلام عليهم .. لكنها فوجئت بايناس تندفع اتجاه
"عمر" قائلاً:
" -عمر" حبيبى وحشتنى أوى
أشاحت "ياسمين" بوجهها وهى ترى تلك المرأة مقبلة الى أحضان زوجها .. لكنها دهشت
عندما سمعت "عمر" يقول:
-ميصحش كده يا "ايناس"
التفتت "ياسمين" لتجده ممسكاً بذراعيها يبعدها عنه
وقفت "ايناس" قائله بغیظ:
-ما طول عمرنا بنسلم على بعض كده
قال بحزم:

-معدش ينفع

أقلت "ايناس" نظرة حقد على "ياسمين" فتجاهلتها "ياسمين" تماما

جلس الجميع الى طاولة الطعام .. ضايقها جلوس "علاء" فى مواجهتها .. وذلك بسبب تفرسه فيها .. وشعرت بالحرج من أن تطلب من "عمر" تغيير مكان جلوسها .. فالجميع يراقب حركاتها وسكناتها .. لم تستطع تناول شئ أمام نظرات هذا الرجل المتفصحه .. لم تشترك معهم فى الحديث لكنها كانت تجيب اذا ما وجه اليها "نور" أو "كريمه" سؤالاً .. قال "علاء" فجأة :

-انت مكلتيش حاجه من ساعة ما أعدتى .. عماله بس تلعبى بالمعلقة فى طبقك

شعرت بالضيق من كلماته التى تشى بمراقبته لها كما كانت تشعر .. شعر "عمر" كذلك

بالضيق .. أكمل "علاء" موجهاً كلامه اليها:

-على فكرة احنا زمايل مهنة واحدة .. أنا كمان دكتور بيطرى .. بس مليش فى شغل الفيلد زيك لم تتكلم .. ولم تنظر اليه .. قالت "ايناس" بخبث وحقد وهى ترمقها بنظرات غير مريحه:

-شتان ما بينك وبين "نانسى" يا "ياسمين" .. انتى مشوفتيش "نانسى" قبل كده صح ؟ ..

كانت مزه وزى القمر

نظر اليها "عمر" بصرامة .. شعرت "ياسمين" بالتوتر والضيق .. قال "عمر" بحزم:

-ايه لزمة الكلام ده يا "ايناس" ؟

قالت ببرود:

-عادى يا "عمر"

قال بغضب:

-لأ مش عادى .. السيرة دى مش عايزها تتفتح تانى

شعرت "ياسمين" بمزيج من الغضب والحرج .. وما زاد الطين بله .. أن "علاء" نظر اليها

بجراحة وقال:

-هو "عمر" اختياره المره دى مختلف .. بس بصراحه يدخل المزاج

هنا هب "عمر" واقفاً وأزاح الكرسي بعنف .. كان "علاء" لا يترك فرصة إلا ويستفز فيها

"عمر" .. بسبب شعوره تجاهه بالغيره منذ الصغر .. وكان قد فعل بالمثل مع "نانسى" التى

أعجبها اطراءه .. أما "ياسمين" فرد فعلها كان مختلفاً .. ظهر على وجهها علامات الغضب

والضيق .. التفت "عمر" الى "علاء" قائلاً:

-لما تبقى تعرف تتكلم باحترام مع مراتى هبقى أعد معاك على سفرة واحدة

وأمسك "ياسمين" من يدها وجذبها وصعدا الى غرفتهما .. قال "علاء" بغرور:

-ماله ده حد جه جمبه

قال "نور" بغضب:

-انت مش شايف ان اللى انت عملته ده ميصحش يا "علاء" .. يعنى ايه تقولها كده .. وانت

عارف ابن خالك غير أد ايه

قالت "علاء" بحنق:

-هو اللى معقد زيادة عن اللزوم .. أنا قولت كلمة عادية ومكنش قصدى بيها حاجه

نهضت "كريمة" وذهب المطبخ لتطلب من الخدم ارسال الطعام الى "عمر" و "ياسمين"

بالأعلى .. نظرت "ياسمين" الى "عمر" الغاضب .. اقتربت منه وحاولت امتصاص غضبه

قائله:

-متضايقش نفسك يا "عمر"

نظر اليها وجذبها من يدها وأجلسها بجواره على الأريكة وقبل جبينها قائلاً:

-انا اللى آسف انى عرضتك لكلامه ده .. وانتى أعتك أدامه على السفره .. معلى غلطة ومش هتتكرر

اقتربت أكثر من زوجها وابتسمت وقالت:

-عارف .. أنا بحب غيرتك دى أوى

التفت اليها وقد اختفت علامات الغضب من وجهه لتحل محلها نظرات حب وشغف فى عينيه وقال:

-يعنى غيرتى دى مش بتضايقك ولا بتخنقك

قالت مؤكدة:

-بالعكس .. أنا أحب ان جوزى يبقى غيور عليا كدة

أوشك على تقبيلها عندما سمع طرقات على الباب .. وجد الخادمة وقد أحضرت الطاعم .. التفت الى "ياسمين" قائلاً:

-حماتك مهنش عليها ننام جعين

قالت بمرح:

-ماما "كريمه" دى مفيش زيها

سألها باهتمام:

-يعنى حبيبتها

قالت بحماس:

-جداً .. بجد حبيبتها أوى .. بحس انها طيبة أوى وحنينه .. بحس فيها كتير من ماما الله

يرحمها

-الله يرحمها .. يعنى مش مضايقه اننا هنعيش معاها هنا

قالت "ياسمين" بثقة:

-لأ طبعاً .. انت بتعمل كده عشان تبر أهلك ودى حاجه تفرحنى جدا .. وكمان أنا وماما

"كريمه" متفاهمين مع بعض جدا وان شاء الله مش هتحصل بينا أى مشاكل .. وأكد ست زيها أنا هتعلم منها كتير

نظر اليها بتقدير واعجاب وقبل جبينها .. تناولا طعامهما ودخلت الحمام لتجهز نفسها للنوم ..

احترت فيما ترتدى .. وفى النهاية اختارت بيجاما وردية اللون .. خرجت لتتبعها نظرات

"عمر" النائم على فراشه .. حاولت تجنب نظراته واقتربت من الفراش ووقفت أمامه متوترة .. فضحك "عمر" قائلاً بخبث :

-هنا مفيش الا أوضة واحدة لينا احنا الاتنين

ابتسمت بخجل وأزاحت "ياسمين" الغطاء ونامت على الطرف وأولته ظهرها .. اقترب منها

وقبل وجنتها وهمس فى أذنها:

-تصبحى على خير يا حبيبتي

-وانت من أهل الخير

استيقظت على آذان الفجر .. والتفتت الى "عمر" توقظه بهدوء:

"-عمر" اصحى .. الفجر أذن

قال وهو يغالب النعاس:

-سببني النهاردة يا "ياسمين" مش هقدر أقوم

التفتت اليه وأزاحت الغطاء وقالت بعند:

-لأ مش هسيبك .. قوم بلا بلاش كسل

فتح عينيه بصعوبة قائلاً:

-هصليه لما أصحى

قالت بحزم:

-لما تصحي هيبقى اسمه صبح مش فجر
قام متكاسلاً ثم نظر اليها وقال:

-ده انتى لحوحه

قامت وقالت مبتسمه:

-يلا الصلاة

توضاً الاثنان وصليا معاً .. أنهى "عمر" صلاته وعاد الى فراشه .. أما "ياسمين" فأحضرت
مصحفها وجلست على سجادة الصلاة تقرأ وردّها .. نداها "عمر: "

"-ياسمين"

قطعت القراءة قائله:

-أيوة يا "عمر"

-بتعملى ايه

-بقرا فى المصحف

-طيب تعالى اقرى هنا

قامت ودخلت الى الفراش وجلست تقرأ فى مصحفها .. ظل "عمر" ينظر اليها وهى تقرأ
بشفتيها .. قاطعها قائلاً:

-انتى متعودة تقرى كل يوم ؟

التفتت قائله:

-أيوة بقراً وردى .. بحدد كل يوم جزء وبقراه قبل ما أنام أو بعد ما أصلى الفجر

عادت لتكمل القراءة .. ظل ينظر اليها .. قاطعها مرة أخرى قائلاً:

-مممكن تقرى بصوت عالى

نظرت اليه واستغربت طلبه .. لكنها فعلت وقرأت بصوت شجى للغاية .. بل تكن قرانتها عذبه
فقط بل كانت مجودة أيضاً .. فأضافت القراءة الصحيحة للحروف الى صوتها المزيد من العذوبه
.. اقترب "عمر" منها وأسند رأسه الى ذراعها ونظر معها الى المصحف وهو يستمع اليها
حتى انتهت .. نظر اليها قائلاً:

-انتى بتقرى حلو أوى .. وصوتك كمان حلو أوى

ابتسمت لاظراؤه .. فسألها باهتمام:

-انتى ازاي بتقرى كده

-أنا كنت بروح المسجد من وأنا صغيرة واتعلمت التجويد وعشان كده بعرف أقرأ فى المصحف

صح

نظر اليها فى اعجاب قائلاً:

-سهل ولا صعب ؟ يعنى اقصد سهل انك تشرحيه لحد ولا لازم حد متخصص يشرحه

قالت بحماس:

-أكيد الأفضل ان حد متخصص يشرحه .. بس أنا عارفه كل الأحكام ودرستها

صمتت تراقب وجهه ثم قالت:

-تحب أشرحها لك

ابتسم وقال:

-تقدرى تخلىنى أقرأ زيك

قالت بحماس:

-ايوة طبعا اقدر .. ايه رايك كل يوم اشرحك حاجة ونطبقها سوا

قال بحماس مماثل:

-اتفقنا

تبادلا الابتسام .. فقال بحنان :
-بكرة عايز أشوفك بالفيستا الأبيض .. اتفقنا
قالت مبتسمة:
-اتفقنا

فى الصباح استيقظت "ياسمين" متأخره على غير عادتها .. لم تجد "عمر" بجوارها .. نهضت وأخذت دشاً وارتدت ملابسها وحجابها ونزلت كانت تبدو الفيلا فارغة ..وقفت فى منتصف الردهة الواسعة بالأسفل وهى تنظر الى ما حولها برهبه .. مازلت لا تستطيع استيعاب أن هذا المكان هو منزلها وبيتها .. شعرت بالتوتر والاضطراب .. حتى أنها لا تتذكر مكان غرفة الطعام أو غرفة المعيشة .. كانت تبدو كالمصانعة .. أتاها صوت "كريمه" من خلفها قائلاً:
-أنا كمان أول مرة آجى فيها الفيلا دى كنت حسه زيك كده

التفتت "ياسمين" لتبتسم لها .. فأكملت "كريمه": "
-تعالى معيا المطبخ لو ده مش هيضايقتك .. أنا كمان لسه مفطرتش تعالى نطفر سوا وأقولك
بعض أسرارى المطبخه
ابتسمت "ياسمين" وتبعتها .. كانت تبدو كإمرأة بسيطة .. تعاملت فى المطبخ وكأنها تدخله آلاف المرات .. لم تكن تراها كإمرأة من طبقة ارسنقراطية .. كما قالت من قبل تشعر بأنها أقرب الى والدتها .. لاحظت "كريمه" نظراتها فقالت لها:

-على فكرة فى حاجه متعرفيهاش عنى .. والحاجه دى هى اللى مخليه "ثريا" مبتحنيش .. يعنى عشان لو لاحظتلى أى خلاف بينا تكونى فاهمة السبب .. وأنا من جهتى بحاول على أد ما أقدر محتكش بيها او أعمل حاجه تضايقها
جلست بجوارها على الطاولة وقالت:

-أنا زيك يا "ياسمين" من أسرة بسيطة .. مش مولوده وفى بقى معلقة ذهب يعنى شعرت "ياسمين" بالدهشة من هذا التصريح فأكملت "كريمه": "
-بس انا كانت ظروفى أصعب منك شوية .. أنا كنت عايشة فى القرية اللى فيها المزرعة .. ومكنش ليا غير أب مات وسبنى فى الدنيا دى لوحدى .. اشتغلت فى بيت المزرعة...
صمت قليلاً ثم قالت:
-كنت بشتغل خدامه

اتسعت عينا "ياسمين" من الدهشة .. فلم تتخيل أن تلك المرأة الجميلة والأنيقة التى تجلس بجوارها كانت خادمة فى بيت المزرعة .. اكملت "كريمه": "
-كنت بشتغل عند جد "عمر" وجدته .. ومن هنا اتعرفت على "نور" جوزى .. ماتعرفيش ايه اللى حصل .. بس هو النصيب انه اختارنى دون عن أى بنت تانية .. حبيناً بعض جداً .. واتجوزنا .. ومش هقولك على المشاكل اللى واجهتنا فى الأول من معاملة أهله السيئة .. بس بعد ولادة "عمر" كل شئ اتغير وحمايا اللى هو جد "عمر" حبه جداً ورضى أخيراً عنه وعن وعن ابنه .. وكمان حمايتى قلبها رق
صمتت قليلاً ثم اكملت:

-مفيش الا "ثريا" هى اللى مكنتش متقبله جوزى من أخوها .. وعشان كده كانت بتحارب جوازك من "عمر" .. انتى صحيح وضعك أحسن منى بكتير .. بس هى دايماً بتحب المظاهر .. وعشان كده مش قادرة تفهم انك زوجة ممتازة لـ "عمر" .. وانه اختار صح
سعدت "ياسمين" للغاية لهذا الإطراء الذى سمعته من أم زوجها .. أكملت "كريمه": "
-أنا عارفه انك حسه دلوقتى انك غريبه بس متقلقيش بكرة تتعودى على عيشتنا وتحسى انه بيتك

ابتسمت "ياسمين" وقالت بتأثر:
-بجد حضرتك طيبة أوى .. حسه انك فهمانى وحسه بيا .. وده من أول يوم اتكلمنا فيه مع
بعض لما حضرتك جتيلي المكتب .. من يومها وأنا حسه بكده
قالت "كريمه" مبتسمه:
-وأنا كمان من اليوم ده وأنا حبيتك أوى .. معرفش يمكن عشان شوفت نفسي فيكي
صمت برهه ثم قالت بتردد:
-بصراحة الحاجة الوحيدة اللي كانت مضايقتنى هي موضوع جوازك الأولانى .. يعني أى أم
تتمنى ان ابنها يتجوز بنوته مسبقلهاش الجواز .. بس تمسك "عمر" بيكي و اعجابي
بشخصيتك .. خلونى اتغاضى عن الأمر ده
صمتت "ياسمين" .. بدا عليها التفكير .. فقالت "كريمه":
-اوعى يكون كلامى ضايقتك .. أنا بس حسيت اننا قربنا من بعض فحبيت أفتحك قلبى ونتكلم
بصراحة
نظرت "ياسمين" اليها قائله بشئ من الخجل:
-لأ مضايقتش وأنا حبه ان أنا وحضرتك العلاقة بينا تكون كويسة كدة .. وأنا حسه فعلاً ان
حضرتك طيبة وحنينة ومعوضاتى عن ماما الله يرحمها .. بس فى حاجه بس أحب أقولها لك
عشان أطمئنك شوية
-خير يا حبيبتي
قالت بتوتر:
-يعني بخصوص جوازى الأولانى .. يعني .. أنا متجوزتش .. يعني هو ملمسنيش
نظرت اليها "كريمه" بدهشة ثم قالت:
-ازاى .. "عمر" قال انكوا اتجوزتوا شهر تقريباً
-أيوة .. هو أعد معايا خمس أيام بس وبعدين سافر .. وأنا كنت ... يعني.. المعاد مكنش
مناسب ليا
اتسعت ابتسامه "كريمه" ووقفت تأخذها فى حضنها وقالت بحماس:
-حبيبتي .. متتصوريش أنا فرحت ازاى بكلامك ده .. وفرحت أكثر عشان "عمر"
ابتسمت "ياسمين" للسعادة البادية على وجه "كريمه" وحمدت الله أن وفق بينها وبين أم
زوجها .. جلست المرأتان مرة أخرى وتناولوا الفطار معاً وهما منسجمتان فى الحديث .. حتى
قالت "ياسمين":
-مممكن أسأل حضرتك سؤال يا ماما
-اسألى يا حبيبتي
-هو الحرق اللي فى ايد "عمر" ده قديم ولا جديد
قالت "كريمه" وهى شارده:
-لأ جديد من يوم ما سافر المزرعة آخر مرة .. سألته عليه بس كان رده غريب أوى
قالت "ياسمين" باهتمام:
-رد قال ايه ؟
-ردت "كريمه" باستغراب:
-رد وقالى انه عقاب من ربنا
-لاح الحزن على وجه "ياسمين" فأكملت "كريمه":
-معرفش كان يقصد ايه .. وساعتها انشغلنا بالأحداث اللي حصلت فى المزرعة ومسألتوش
تانى
نظرت "كريمه" الى "ياسمين" التى شردت وقالت باهتمام:
-ليه فى حاجه ؟
قالت "ياسمين" بسرعة:

-لا أبداً أنا بسأل بس .. فضول مش أكثر
تنهدت "ياسمين" وهى تحاول طرد الأفكار السوداء من رأسها.

كانت "ياسمين" تتمشى فى الحديثة أثناء انشغال "عمر" فى الحديث مع والده فى المكتب
عندما اقترب منها "علاء" .. فجفلت لرؤيته همت بمغادرة المكان لكنه أوقفها قائلاً:
-ايه رايحه فين .. خليكي نتكلم شوية
قالت دون أن تنظر اليه:
-عن اذنك

همت بأن تنصرف فاعترض طريقها مرة أخرى قائلاً:
-شكلك خايفه من "عمر" .. معلىش هو ابن خالى كده معقد وبيعقدها على الناس اللي حواليه
شعرت "ياسمين" بالغضب لتحذثه بهذه الطريقة عن "عمر" فقالت له:
-لأ جوزى مش معقد ولو سمحت عديني
أفسح لها الطريق وقال بلهجة ساخرة:
-اتفضلى

مشت فى طريقها بسرعة فالتفت بـ "عمر" الذى أقبل اتجاهها وقفت أمامه .. ألقى نظرة على
"علاء" الذى يغادر .. ثم عليها وقال:
-فى حاجه يا "ياسمين"
قالت بتوتر:

-لأ مفيش حاجه
ألقى على "علاء" نظرة أخرى ثم قال:
-حد ضايقتك
نظرت لها قائله:

-لأ محدش ضايقتي يا "عمر" .. متقلقتش
تنهد "عمر" وقال بضيق:

"-ياسمين" .. لو "علاء" حاول يكلمك مترديش عليه .. هو كدة طول عمره يشوف ايه اللي
بيضايقتي ويعمله .. وهو عارف انى بغير عليكي وعشان كده بيتعمد يستظرف ويستخف دمه
ابتسمت ونظرت له بحب قائله:
-متقلقتش مش هديله فرصة يتكلم معايا
كانت تشعر بالسعادة كلما لمست غيرة "عمر" عليها

جاءت "كريمه" وجهت حديثها اليهما قائله:
-يلا بينا عشان نعد مع بعض ونتكلم فى تفاصيل الحفلة

بعد الغداء صعدت "ياسمين" الى غرفتها لتغير ملابسها .. فتحت دولابها ونظرت الى فستان
العرس بسعادة .. ذلك الفستان الذى تنوى ارتدائه تلك الليلة .. ارتدت ملابسها وحجابها كم
تمنت رحيل "علاء" لتسطيع الجلوس معهم بدون حجاب .. أثناء اتمامها على ملابسها وجدت
"عمر" يدخل الغرفة فالتفتت اليه قائله بمرح:

-جيت أغير هدومي ونازلة لماما "كريمه" فى المطبخ قالتلى هتعلمنى طريقه أكله انت بتحبتها
بدا "عمر" واجماً .. فاخفتت ابتسامتها واقتربت منها قائله:
-فى حاجه يا "عمر"
قطب جبينه قائلاً:

-انتي سألتى ماما عن الحرق اللي فى ايدي ؟

اختلج قلبها وقالت بصوت خافت:

-أبوة

-ليه ؟ .. ليه مصرة تسألني عن سبب الحرق

بلعت ريقها وقالت:

-هي ماما قالتك ايه

-قالتلى الحرق اللي فى ايدك من ايه .. قولتلها اشمعنى ايه اللي فكرت بيه دلوقتي .. قالتلى

"ياسمين" سألتنى عنه النهارده

كانت "ياسمين" تهرب من تلك المواجهه .. بل لا تريدها على الإطلاق .. لم تكن تريد لزوجها

أن يعلم بما عرفته عنه .. حتى يظل متأكداً من أن صورته لم تتغير فى عينيها .. لكن ها هي

المواجهه حانت ولا مفر .. كانت تلك الذكرى تؤلمها .. ولا تعرف كيف تتخير كلماتها .. سألها

"عمر:"

-انتي ليه مهتمة بموضوع الحرق يا "ياسمين"

أخذت نفس "عميق" وتحاشرت النظر الى عينيه ووجه وقالت:

-أنا عرفت كل حاجه عن البيت المحروق وعن علاقتك بصفية مرات الغفير

ساد الصمت طويلاً بينهما .. كانت تتحاشى النظر الى وجهه .. لكن الصمت طال .. فرفعت

نظرها اليه لترتطم بتعبيرات وجهه المتجمده .. سألها بصوت رخيم:

-عرفتي ايه بالظبط ؟

شعرت بغصة فى حلقها وبنار فى قلبها .. قطبت جبينها وقالت بصوت لا يكاد يسمع:

-عرفت انك كنت على علاقه بيها وجوزها عرف وحرقت البيت وانت وهى جواه .. وان الراجل

اللى انقذكوا ادبته فلوس عشان يتستر عليكوا..

نظرت اليه مرة أخرى .. مازال وجهه خالى من أى تعبير .. سألها بهدوء:

-عرفتي منين كل ده

-الراجل جالى قبل كتبت الكتاب بيوم وقالى الكلام ده .. وأنا اتأكدت ان اسمك واسمها موجود

فى ملفات المستشفى فى يوم الحادثة

قال ببرود:

-عشان كده قولتيلي يوم كتب الكتاب انك مش عايزانى

وأمأت برأسها إيجاباً .. ساد الصمت مرة أخرى .. رفعت رأسها تنظر اليه قائله بصوت مرتجف

:

-أنا سامحتك يا "عمر" .. وبحاول أنسى اللي انت عملته .. لانى حسه انك اتغيرت .. وانك

بقيت انسان كويس .. أنا سامحتك

صمت .. لم يتحدث .. لم يتحرك .. اقتربت منه لتلمس ذراعه قائله:

"-عمر"

ولدهشتها نفض ذراعه ليبعده عن يدها .. وأخيراً ظهرت تغيرت تعبيرات وجهه المتجمدة ..

ولكن لدهشتها تحولت الى غضب هادر .. لم ترى عينيه تشعان بهذا الغضب من قبل .. قال

بصوت هادر:

-يعني طول الوقت ده وانتي عايشه معايا وفاكرة انى واحد سافل

نظرت الى غضبه بدهشة وحيرة .. فأكمل بغضب:

-عايشة معايا فى بيت واحد وانتي فاكرة انى كنت على علاقة بواحدة متجوزة .. ومش كده

وبس .. جوزها بيشغل عندى .. وكمان دفعت رشوى عشان أتستر على علاقتى بيها

اقترب منها وامسك بذراعه بقوة حتى ألتها قائلاً:

-مش كده يا "ياسمين" .. هى دى الصورة اللي انتى راسماها ليا .. ان أنا واحد منحنط وحقير

بالشكل ده ..هه ردى

كانت قبضة يده تؤلمها بشدة قالت بألم:

"عمر" دراعى

انتبه لقبضته فترك ذراعها .. فركت ذراعها بيدها وهى تنظر اليه نظرة حيرة ودهشة .. كانت مازالت نظراته غاضبة نارية .. صاحت قائله:

-انا عارفه كويس اللي حصل يا "عمر" وأنا اتأكدت بنفسى من سجلات المستشفى ..ومن

كلامك انت شخصياً .. من اجاباتك على كل اللي ببسالك عن الحرق ده ..وانا قولتلك انى

سمحتك .. فمفيش داعى تكذب عليا وتفهمنى انك برئ

بدا وكان غضبه تضاعف وازداد احمرار وجهه غضباً قال بصرامة وحزم:

-اللى حصل كالتالى عايزة تصدقى صدقى مش عايزة انتى حره .. الست دى فعلا كان بتخون

جوزها بس مش معايا .. مع مهندس كان شغال فى المزرعة قبل "أيمن" .. واستمرت علاقتهم

حتى بعد ما مشى من المزرعة وكانوا بيتقابلوا فى البيت القديم

هتفت بغضب:

-البيت اللي هو ملكك

-أيوه ملكى .. وهو معنى انه ملكى يبأه أنا اللي كنت معاها فيه

رفعت حاجبيها وقالت بصرامة:

-ايه اللي يخلى واحد زيك يشتري بيت قديم زى ده .. بيت مهجور .. ومبهدل .. ومفيش فيه اى

حاجه تصلح ان الواحد يعيش فيه .. ايه اللي يخليك تشتريه

قال بصرمة ببرود:

-عشان أمى

نظرت اليه بدهشة فأكمل قائلاً:

-ده بيت أمى القديم اللي كانت عايشة فيه مع أهلها .. لما اهلها ماتوا باعت البيت وجات عاشت

فى بيت المزرعة واشتغلت فيه .. كان البيت ده بيمثل ليها ذكريات جميلة مع اهلها وكان نفسها

تحفظ بيه بس مكانش صحابه الجداد راضيين يبيبعوه لحد من 6 شهور جالى صاحب البيت

وباعهولى واشتريته عشانها

نظرت اليه "ياسمين" بأعين متحجرة وشلت الصدمة لسانها

أكمل بقسوة وبصوت هادر:

-مش انا اللي كنت معاها فى البيت يا مدام .. انا كنت راجع من عند "أيمن" من المنصورة

وشوفت النار قايده فى البيت .. وقفت العربية على الطريق وجريت ناحية البيت لقيتها جوه

ومش عارفه تخرج .. بعد ما الراجل اللي كان معاها سبها وهرب .. دخلت أحاول اخرجها بس

كانت ايدي متجبسه وقتها معرفتش أشيلها وهى كانت خايفة تخرج فى النار لان النار كانت

محاوطة البيت كله .. لحد ما الراجل اللي جالك .. شقنا وجه يساعدا .. وهى لما عرفت ان

الراجل شاف جوزها انه عرفت انه عرف بخيانتها وانه هو اللي حرق البيت .. اول ما

سمعتها بتقول كده ادام الراجل طلعت فلوس واديتها له عشان يتستر عليها هيا مش عليا انا

شعرت وكان قلبها قد توقف عن الخفقان .. أكمل بنفس القسوة:

-ولما روحنا المستشفى حكنتلى على كل حاجة وعن علاقتها بالبشمهندس "محمد" .. خرجت

من المستشفى فى نفس اليوم وروحت لـ "محمد" بيته .. واتخانقت معاه .. واترجانى انى

اتستر عليه عشان مراته وولاده لان مراته لو عرفت والخبر وصلها أكيد هتطلق منه .. وعيط

أدامى وأقسملى انها غلطة ومش هتتكرر وان هى اللي أغوته وخلانى أقسمله انى متكلمش فى

الموضوع مع حد .. وعشان كده مجبتش سيره لحد

تجمعت الدموع فى عينيها وهى تشعر بدوار بسبب صدمتها مما تسمع .. فأكمل بغضب مكتوم:

-بعد ما صفة طلعت من المستشفى خافت ترجع لاهلها عشان جوزها ميعرفش انها لسه

عايشه ويرجع يقتلها .. اديتلها فلوس وقولتلها تسافر اى بلد تانية تعيش فيها

قالت بصوت مرتجف مضطرب مبجوح وبأعين حائرة:

-ليه قولتلى انى لو عرفت سبب الحرق هبعد عنك وليه قولت لمامتك انه عقاب ربنا

زفر بقوة ثم قال بغضب:

-لانى كنت عارف انها مش مظبوطة .. وكانت تصرفاتها مش عجبانى ومع ذلك سكت وسبتها .. لو كنت من الاول مشتتها هى وجوزها مكنتش قدرت توصل ل "محمد" ومكنتش علاقتها بيه استمرت لحد دلوقتى .. ومكنش حصل ده كله أجمها بكلامه .. لم تستطع أن تتحدث .. نظرت اليه واقتربت منه .. لكنه ابتعد عنها ورجع الى الخلف وفى عينيه نظرة قاسية وقال:
-من أول يوم جواز قولتك لازم نبقى صرحا مع بعض .. واللى مضايق من التانى فى حاجه يقولها

نظرت الى الأرض وقطبت جبينها وقد شعرت بحجم ذنبها .. فأكمل قائلاً:
-لكن انتى عمرك ما كنتى صريحه معايا .. وعمرك ما وثقتى فيا .. وعمرك ما عرفتيني صح ثم قال:

-وعمرك ما حبتيني

نظرت اليه فى ألم نظر اليها "عمر" نظره صارمة باردة خالية من أى شعور وقال بصوت هادر:

-احنا لازم نتطلق يا "ياسمين"

صدمت عندما سمعت تلك الكلمة التى فكرت فيها مراراً .. لكن عندما خرجت من فمه علمت كم هى كلمة مريرة .. تجمعت الدموع مرة أخرى فى عينيها وهى تنظر اليه بحسرة وألم. تجمدت فى مكانها وأخذت العبرات تتساقط من عينيها .. بدت نظراته وقد لانت للحظة .. لكنه عاد ونظر بصرامه وقال:

-هنستنى لحد ما الحفلة تخلص ونرجع المزرعة وبعدين ننفضل

قال ذلك وتركها وحدها فى الغرفة تكاد قدماها تحملانها بصعوبة من هول الصدمة.

الفصل الحادى والأربعون ((الأخير))

نزلت "ياسمين" بعد ساعة .. تبحث عن "عمر" .. لم تجد له أثراً فى الفيلا .. فقالت لها "كريمه:"

-قالى انه هيخرج وهيرجع متأخر ما أستناهوش على العشا .. هو ما قالكيش رايح فين ؟
قالت "ياسمين" بسرعة:

-أصل هو خرج من الأوضة قبل ما نتكلم مع بعض .. أنا كنت طالعه أغير هدومى
خرجت "ياسمين" لتتمشى فى الحديقة .. اختلت بنفسها على أحد المقاعد وتركزت لعبراتها
العنان .. كانت تشعر بندم كبير بداخلها .. ندمت لأنها ظلمته .. وندمت لأنها لم تثق به .. وندمت
لأنها لم تواجهه من البداية بما تعرف .. ندمت لأنها تركت شكوكها ووساوسها تتلاعب بها
وتتحكم بها .. ندمت لأنه أشعرها بأنها لا تحبه ..

أجهشت فى بكاء صامت .. كيف يقول بأنها لا تحبه .. فحبه متغلل داخل قلبها .. أخرجت هاتفها
من جيبها ومسحت عبراتها بظهر يدها واتصلت به .. لم يرد .. أعادت اتصالها عشرات المرات
.. ونفس النتيجة لم يرد .. شعرت بأنها قد أضاعته من يدها .. أخذت تتساءل هل سيطلقها فعلاً
.. هل كرهها .. هل سيهون عليه فراقها .. ألن يسامحها يوماً .. كيف ستحتمل العيش بدونه ..
لن تستطيع التحمل .. حل المساء .. ظلت ساهرة فى غرفتها .. واقفة فى الشرفة .. تنتظر
حضوره .. حتى رأت سيارته تقف أمام الباب .. انتظرت ان يصعد الى الغرفة لكنه لم يصعد ..
طال وقت انتظارها .. حتى فتح باب الغرفة أخيراً وجدها واقفه أمام باب الشرفة فى انتظاره ..
غلق الباب وفتح الدولاب يبحث عن بيجامه يرتديها .. اقتربت منه قائله:
" -عمر "

لم يجب .. دخل الحمام .. جلست على طرف فراشها تنتظر خروجه .. خرج وتوجه الى الفراش
وحمل أحد المخدات و أحد الأغطية وفرشه على الأرض بجوار السرير ونام عليه وأولاهها
ظهره .. فهمت بأن الخطب جلل .. صعدت الى الفراش وتدفرت بالغطاء وظلت تنظر الى زوجها
النائم بجوارها على الأرض والذى يوليها ظهره .. تساقطت العبرات من عينيها وبللت وسادتها
.. لكم تشناق الى حضنه الدافئ وكلماته الحانية .. ظلت العبرات تبلل وسادتها فى صمت
وعيونها معلقة به .. تقلبت فى فراشها وكأنها تنام على جمر .. جلست وهى تنظر اليه فى أسى
.. حتى غلبها النعاس .

استيقظت على آذان الفجر .. نظرت الى مكان زوجها النائم توجهت اليه ونادته بهدوء:

" -عمر " .. "عمر" .. اصحى

استيقظ ونظر اليها فقالت مبتسمة:

-يلا عشان تصلى الفجر

نهض وتوضأ وعاد ليحدها فى انتظاره لتصلى معه جماعة مثل كل يوم .. صلى بها .. حاولت
التحدث معه:

" -عمر " .. ممكن نتكلم

قال بخشونه:

-لأ

ثم توجه الى مكان نومه ونام .. ونامت هى وعيونها معلقة به .. فى الصباح استيقظت على
صوت غلق الدولاب .. وجدته وقد ارتدى ملابسه .. اعتذلت بسرعة فى فراشها قائله:

" -عمر "

لم يجيبها توجه الى باب الغرفة فأسرعت ونهضت من فراشها وأمسكت ذراعها قائله بأسى:
-استنى .. "عمر" .. أنا أسفة .. أنا أسفة أوى .. أنا عارفه انى ظلمتك أوى .. "عمر" مش

هقدر أعيش بعيد عنك

لم ينظر اليها .. فأكملت بألم وبصوت مرتجف وعينين دامعتين:
-لو انت عايز تطلقتي عشان تعاقبنى .. أنا موافقة يا "عمر" .. عاقبنى .. وطلقتي ..
تساقطت عبراتها وهي ترجوه:
-بس ردى تانى يا "عمر" .. عشان خاطرى ردى تانى

صمت ولم يجب .. بل ولم يلتفت اليها .. وفتح باب الغرفة وخرج .. ووقفت لا تدري ماذا تفعل
وعلامات الألم مرسومة على وجهها .. رن جرس هاتفها .. فأتاها صوت "ريهام" قائله:
-حبيبتي يا "ياسمين" .. احنا جاينلكوا النهاردة أنا و "كرم" .. حماتك اتصلت الصبح
وعزمتنا على الغدا
قالت "ياسمين" بوجوم:

-لو انتى مكنتيش جيتي النهاردة كنت انا هجيك لانك وحشاني اوى اوى
-مش اكر منى يا "ياسمين" .. احنا قولنا نسيبكوا تراتحوا اليومين اللى فاتوا .. بس خلاص
كدة لازم أشوفك

-خلاص يا حبيبتي منتظراكى ان شاء الله
تناول الجميع طعام الافطار معاً .. وقالت "كريمه":
-على فكرة "ثريا" كمان هتيجي النهاردة .. وكمان "ايناس" و "علاء"
تضايقت "ياسمين" عندما سمعت باسمها .. وتذكرت ما قالته المرة الماضية عن الفرق بينها
وبين خطيبة "عمر" القديمة .. وعندما قالت انها حب "عمر" فى الطفولة والمراهقة ..
شعرت بنيران الغيرة تشتغل فى قلبها .. نظرت الى زوجها الجالس بجوارها دون أن يعيرها
أدنى اهتمام .. كانت حزينه واجمه فسألها "نور":
-مالك يا "ياسمين" فى حاجه مضايقاكى
قالت بسرعة:

-لا يا عمو .. يمكن بس متأثره شوية انى هشوف "ريهام" لانها وحشتنى اوى
ابتسمت "كريمه" قائله:
-ربنا يخليكوا لبعض

جلست "نادين" فى حديقة فيلتها تحتسى كوباً من الشاي .. التفتت فرأت "نانسي" وهي توقف
سيرتها وتنزل منها فنادتها قائلاً:
" -نانسي" تعالى شوية
جاءت "نانسي" وقالت:

-خير

-تعالى اعدى

-لا قولى اللى عايزاه بسرعة عشان عايزة أنام

صاحت "نادين" بغضب:

-طبعاً رجعه الظهر من بره وطول الليل سهرانه كالعادة

قالت بتأفف:

-أوف انتى ناديتيلى عشان تسمعينى المحاضرة دى .. فكك .. أنا مصدعة وعايزة أنام

التفتت لترحل فقالت "نادين":

-عرفتى ان "عمر" هنا هو مراته

التفتت الى أمها بحده قائله:

-انتى عايزة تحرقى دمي يعني

ابتسمت أمها بتشفى وقالت:

- عرفت الفلاحه تخطفه منك وتتجوزه

قالت "نانسي" بحده:

-عرفتى منين انهم هنا

"-جيهان" ما انتى عارفه انها صاحبة "ثرىا" عرفت منها

ثم قالت بسخرية:

-لأ وايه .. حاجه كدة لوكل .. تصورى مرضتتش تخلى "عمر" يسلم على "ايناس"

-ازاى يعنى

-الهانم بتغير باين .. ولا ده عبط متعرفيش

رفعت "نانسي" حاجبها بخبث وقالت بحقد:

-بتغير .. جميل

التفتت لتدخل الفيلا فقالت "نادين" بحده:

-انت لحد امتى هتفضلى سارحه مع اللى اسمه " عماد" ده .. يا بنتى طول ما انتى مدوقاه

العسل ومقدماله كل حاجه على طبق من فضه عمره ما هيفكر يتجوزك

صاحت "نانسي" بغضب:

-ملكيش دعوة بيا حياتى وأنا حرة فيها .. متركزيش معايا .. ركزى مع جوزك النسوانجى

أحسن

تركتها لتدخل الفيلا .. وملامح "نادين" تختلط فيها الحسرة بالألم.

التف لجميع حول طاولة الطعام .. "نور" .. "كريمة" .. "ثرىا" .. "علاء" .. "ايناس" ..

"عمر" .. "ياسمين" .. "كرم" .. "ريهام" .. اندمج الجميع فى الضحك والمزاح ماعدا اثنان

بدا عليهما الوجود .. "عمر" بدا وكأنه غير مهتم بالحديث الدائر .. أما "ياسمين" فبدت

حزينه تتطلع الى "عمر" بين الحين والآخر وتراقب تعبيرات وجهه لتتبين فيما يفكر .. لم

يوجه اليها حرفاً واحداً .. كان يمسك الملعقة بيد .. ويده الأخرى وضعها على قدمه .. نظرت

الى الجميع لتجدهم مشغولون بالحديث .. و .. مدت يدها ولمست كف يده .. توقف "عمر" عن

تناول الطعام ونظر الى يدها التى تمسك بيده .. ثم أبعد يده عنها ووضعها فوق المائدة ..

شعرت "ياسمين" بالألم يغزو قلبها .. نهضت واعتذرت من الجميع متعلله بصداع أصابها ..

كادت أن تتوجه الى غرفتها لكنها شعرت بالإختناق وارادت السير فى الهواء الطلق .. خرجت

من الفيلا وتمشت فى الحديقة .. تبعتها "ريهام" قائله:

"-ياسمين" قومتى ليه

حاولت "ياسمين" الابتسام قائله:

-مفيش حسيت انى مصدعة شوية .. وكمان شبع

-فى حاجه مضايقاكى

-لا أبداً .. بس لسه مش متعودة على الوضع هنا

-عانقتها "ريهام" قائله:

-حبيبتى يا "ياسمين" وحشتينى اوى .. أنتى الحاجة الوحيدة اللى بتصبرنى على فراق ماما

وبابا الله يرحمهم

تأثرت "ياسمين" بكلامها وبكت . قالت "ريهام" وهى دامعة العينين:

-أنا كمان وحشونى اوى .. بس ان شاء الله ربنا يجمعنا بيهم فى الجنة .. ربنا يخليكى ليا يا

"ياسمين"

قالت لها "ياسمين" بعينين دامعتين:

-ويخليكى ليا يا "ريهام"

انتهى اليوم ورحلت "ريهام" و "كرم" .. وبقيت "ثرىا" وأبنائها لاكمال السهرة .. استأذنتهم

"ياسمين" وصعدت الى غرفتها .. كانت تشعر بألم حاد فى بطنها ..دخلت الحمام لتخرج متأففة:
-ده وقته

ارتدت ملابسها وصعدت الى الفراش وتدفرت وهى تتلوى من الألم .. شعرت بالحرج من الذهاب الى "كريمة" لتبحث لها عن دواء .. كما أنها لم تكن تقوى على الحركة .. بعد قرابة النصف ساعة .. وجدت "عمر" يفتح باب الغرفة .. أرادت أن تقوم للتحدث معه .. لكنها لم تستطع من الألم ..نظر "عمر" اليها ليجدها مغمضة العينين مقبضة الجبين وتضم الغطاء بقوة الى صدرها ويبدو على ملامحها الألم .. اقترب منها قائلاً:
-انتى كويسه ؟

فتحت عينيها وهى لا تصدق أنه اخيراً تحدث معها .. ودت لو قامت تتحدث معه لكنها لم تستطع .. قالت بصعوبة:
-أيوه كويسة

تركها وخرجه .. نظرت الى الباب المغلق بحسرة وألم .. لكم تشناق الى وجوده معها والى حديثها معه .. دقائق ووجدته يدخل مرة أخرى حاملاً كوب تتصاعد منه الأبخرة وحبّة دواء .. نظرت اليه باستغراب .. مد يده بالحبّة .. فجلست وأخذتها .. ثم أعطاها الكوب قائلاً:
-اشربي ده .. ولو لسه حسه بالألم قوليلى وأنا أجبك حباية تانية
شعرت بالحرج الشديد أخذت منه الحبّة والكوب دون أن تنظر الى وجهه .. تمننت ان يرحل لكنه ظل واقفاً ينظر اليها .. أرادت أن تتحدث لكنه أوقفها بيده قائلاً بحزم:
-اشربي ونامى
ثم تركها وخرج ..

بعد عدة ساعات سمعت صوت الباب يفتح .. فتظاهرت بالنوم .. شعرت به وهو يغير ملابسه ثم يقترب منها ويمسح حبات العرق على جبينها بظهر يده .. يلفها بالغطاء جيداً .. ثم .. يحمل وسادته وغطائه ويفرشهم على الأرض وينام
استيقظت على آذان الفجر .. وقامت لتوقظه لكنه لم تجده نائماً .. بل وجدته واقفاً يصلى .. تابعته بعيناها حتى أنهى صلاته وتوجه الى مكانه على الأرض ونام .. شعرت بالحنق والضيق .. نظرت اليه لتجده يغط فى سبات عميق ..كانت تتألم من هذا البعد .. لم تعتد على بعده عنها بهذا الشكل .. قامت على فور وحملت وسادته وغطائه وفرشتهم على الأرض بجواره ..
ونامت وهى تتطلع الى وجهه
فى الصباح شعرت بيده توقظها .. فتحت عينيها فوجدته ينظر اليها بحزم قائلاً:
-ايه اللى منيمك على الأرض هنا
قالت بضعف:
-كده عشان انت نايم هنا
أمرها بحزم:

-الارض ساقعه وانتى تعبانه قومى اطلعى نامى على السرير
امتثلت لأوامره .. وهى تشعر بالحنق والضيق ..قام وغير ملابسه ثم خرج دون ان يتفوه بكلمه

بعد عدة أيام كانت "ياسمين" جالسه مع "كريمة" فى الحديقة

قالت "كريمه: "
" -نور" سافر النهاردة الصبح
قالت "ياسمين: "
- هيرجع امتى ؟
- كمان يومين سافر فى شغل مهم .. و"علاء" كمان مش هيكون موجود النهاردة لانه مسافر
.. بس ناوية أعمل سهرة حلوة فى الجينة
شردت "ياسمين" قليلاً ثم قالت:
-يعني مش هيكون فى رجالة موجودة النهاردة
-أبوة " ..عمر" بس
-كويس
-اشمعى
قالت بثقه:
-عشان أرد القلم
قالت "كريمه" باستغراب:
-مش فاهمة قلم ايه
ابتسمت "ياسمين: "
-هتعرفى النهاردة

فى المساء .. أخرجت "ياسمين" أحد الفساتين الذى أصر "عمر" على شراؤه يوم أن كانا معاً
فى المول لشراء ملابسها .. كان رقيقاً للغاية ومتناسقاً مع بشرتها الخمرية .. ارتدت حذاء ذو
كعب و صفت شعرها لأعلى وتركت بعض الشعيرات التى تتساقط على وجهها برقة .. كانت قد
تعلمت الكثير من "سماح" عن وضع المكياج فاستعانت بخبرتها وبأدوات الزينة التى تزين
التسريحة فى غرفة نومها .. كان مكياجها يتسم بالرقة والبساطة .. كانت راضية تماماً عن
شكلها .. كانت تشعر بالخجل من الظهور بهذا المظهر أمام الجميع وخاصة "عمر" .. لكنها
تشجعت ونزلت الدرج بعدما رأتهم من شرفة غرفتها وقد تجمعوا معاً فى الحديقة استعداداً
لتمضية الأمسية بها .. خرجت الى الحديقة وقلبها يرتجف .. لكنها حاولت رفع رأسها والسير
بإتزان دون أن يبدو عليها التوتر .. أول من لمحتها هى "كريمه" التى هتفت بدهشة:
" -ياسمين! "

ازدادت ضربات قلبها عندما وجدت أنظار الجميع تلتفت اليها .. لمحت نظرات التعالى فى عين
"ثريا" وهى تفحصها من رأسها الى أخمص قدميها .. أما "ايناس" فكانت نظراتها تتسم
بالحقد والغيرة .. كانت "ايناس" متحررة فى ملابسها .. وفى وضع الزينة .. لكن "ياسمين"
تفوقت عليها بحسن اختيارها لما يناسب لون بشرتها وطبيعة جسدها .. فلم تفعل مثل
"ايناس" وتحاول تغيير لون بشرتها بإضافة المزيد من مستحضرات التجميل التى جعلتها
تبدو كتمثال صب من الشمع فبدت مصطنعه الى حد كبير .. بل زينت ماهى عليه بالفعل .. فبدت
أكثر رقة وأكثر شفافية وأكثر جمالاً ..

أما نظرات "كريمه" فكانت تتسم بالفرح والاعجاب والحنان .. لكم تعشق تلك المرأة الحنون
الطيبة .. جلست ثم .. التفتت لتتطلع الى "عمر" .. خفق قلبها بجنون عندما ارتطمت بنظراته
الشغوفة التى تتأملها بصمت .. شعرت بقلبها وكأنه سيقفز من مكانه .. ودت لو نهضت
وارتمت بين ذراعيه
شعرت بالسعادة تسرى بداخلها وقد أيقنت بأنها أصابت عصفورين بحجر واحد ..

تعمد "عمر" طوال السهرة ألا ينظر اليها وألا يوليها أى انتباه .. ظلت تراقبه بطرف خفى ..
اقترحت "كريمه" فجأة:

" -عمر" قوم ارقص مع "ياسمين"
توترت "ياسمين" .. لم ترد احراج "كريمه" .. لكنها قالت بخفوت:
-معلش يا ماما بس مش بسمع موسيقى
فقال "ثريا" بعده:

-ليه بأه ان شاء الله .. رجز من عمل الشيطان
لم تجاريها "ياسمين" .. لأنها شعرت بأن المرأة تبغى شجاراً .. نهض "عمر" ومد يده الى
"ياسمين" بصمت .. نظرت اليه أسلمت كفها له ونهضت معه .. سار بها قليلاً فقالت بصوت
مضطرب:

-أنا مش بسمع موسيقى يا "عمر"
قال ببرود:
-محدثش قال ان أنا هشغل موسيقى
أوقفها أمامه فقالت بدهشة:
-هنرقص من غير موسيقى ازاي
قال ببرود:

-نحاول .. أحسن من الحرب اللي كانت هتحصل من شوية بينك وبين عمتو

أخذ يتحرك بها يرقصان بحركات يتقنها "عمر" جيداً .. كان صوت نبضات قلبها عالياً يصم
آذانها .. شعرت بالسعادة لقربها منه .. ظلت تنظر اليه .. لكنه بدا بعيداً عنها
نهضت "كريمه" بصحبه "ثريا" الى الداخل .. اقتربت منهما "ايناس" ووضعت يدها على
ذراع "عمر" قائله:

" -عمر" تعالى نرقص سوا
شعرت "ياسمين" بالغضب والحق والضيق ونظرت الى يدها الموضوعه على ذراع زوجها
بنظرات نارية .. أبعد "عمر" ذراعه عن يدها قائلاً بهدوء:
-مش هينفع يا "ايناس"

شعرت "ايناس" بالضيق .. وعادت مرة أخرى الى مقعدها وهى تشتعل غضباً
نظرت له "ياسمين" هامسه:
" -عمر"

لم يجبها .. ولم يلتفت اليها
تطلعت اليه بعينين حزينتين قائله:
-طيب أعمل ايه عشان تسامحنى .. قولى أعمل ايه وأنا أعمل

ظل متمسكاً بصمته .. فشعرت بالألم يغزو قلبها .. التفتت لتجد "ايناس" تنظر اليها بشماته ..
وقد بدأت "ايناس" تشعر بوجود خلاف بينها وبين "عمر" .. وانتبهت للوجوم البادى على
وجه كل منهما .. تلاقت نظرات المرأتين فى تحدى صارخ .. تبادلتا نظرات نارية .. نظرات
"ايناس" تقول : لن تملكيه أبداً لن يكون لك .. ونظرات "ياسمين" تقول : هو ملكى بالفعل
وهو لى وحدى .. اشتعلت نظرات التحدى بينهما .. وفجأة .. لا تعلم "ياسمين" كيف أتتها
الجرأة لتفعل ذلك .. لكنها .. نظرت الى "عمر" ألقت براسها فوق صدره .. أمام عيني
"ايناس" التى ضاقت من الغضب .. وقامت فى عصبية لتغادر المكان

قال "عمر" بصوت خافت:
-ايه اللي انتى عملتيه ده

رفعت رأسها وقالت له بعند وثقه:
-انت بتاعى يا "عمر" .. مش هسمحك تبعد عنى
قالت له هامسه:

-أنا اسفه .. سامحنى بأه
لم يقطعهما سوى صوت "كريمه" الآتى من الفيلا وهى تنادى على "عمر" .. همس اليها
"عمر" وهو يوصب تجاهها نظرات حنونه:
-خليكي هنا .. هشوف ماما عايزة ايه وأرجعلك

ابتسمت له و أومأت برأسها .. بدا وكأنه لا يريد مفارقتها .. وفتت "ياسمين" تنتظره وقد
وضعت يدها على قلبها وارتسمت ابتسامه على ثغرها .. فجأة شعرت بمن يطوقها بذراعه من
الخلف ويضع كفه على فمها .. حاولت التخلص منه فلم تستطع .. حاولت الصراخ .. فجاء
صراخها مكتوما .. شعرت بأنه يجرها فى اتجاه سور الحديقه التفتت اليه وهى تحاول التخلص
منه لتفاجأ بوجه "مصطفى" .. نظر اليها بعينين تشعان كرهاً وقال:
-حياتى قصاد حياتك يا ياسمين .. انتى اللى عملتى كده فى نفسك .. لو مكنتيش هربتى منى
مكئش ده كله حصل

حاولت التحرر منه لكنه كان يطبق عليها بقوة .. فجأة صرخ من الألم عندما تمكنت من عض
يده التى تكمم فمها حتى سال الدم منها .. أفلتت منه وأخذت تجرى فى اتجاه الفيلا وهى تصرخ

:" -عمر" .. "عمر" الحقتى

جرى "عمر" فى اتجاهها وتلقاها بين ذراعيه باكيه وهى تشير الى اتجاه السور وتقول:
" -مصطفى" .. "مصطفى" هنا

جرى "عمر" فى الاتجاه الذى أشارت منه "ياسمين" .. أسرع "مصطفى" بالجري وتسلق
سور الفيلا وقفز من فوقه الى الجانب الآخر بسرعة .. لم ينتبه الى تلك الدراجة النارية التى
أتت فى اتجاهه وتسير بسرعة جنونية .. ارتطمت به لتدفعه بقوة عدة أمتار قبل أن يسقط على
الأرض والدماء تنفجر من رأسه التى ارتطمت بالأرض بشدة .. ليسقط جثة هامة.

رحلت الشرطة بعدما أخذوا أقوال "ياسمين" التى بدت مضطربة للغاية .. جلست "ياسمين"
على احدى الأرائك وهى مازالت لا تستطيع ايقاف رجفة جسدها .. جلس "عمر" بجوارها ولف
ذراعيه حولها وقبل رأسها .. قالت "كريمه" بأسى:
-أدى آخرة الظلم .. ضيع حياته على الفاضى .. هيقابل ربنا يقوله ايه دلوقتى
قالت "ثريا" بضيق:

-كان ملنا ومال المشاكل دى .. ما كنا فى حالنا

نظر اليها "عمر" بحده .. وجذب "ياسمين" من يدها واستأذن من الجميع وصعدا الى
غرفتهما .. ألقت "ياسمين" بنفسها فى حضنه وطوقت رقبتة بذراعيها بشدة .. أحاطتها
بذراعيه وطمأنها قائلاً:

-خلاص يا "ياسمين" .. متخفيش

قالت بصوت مرتجف:

-خفت أوى لما شوفته .. ولما كتفنى .. معرفش كان ناوى يموتنى ولا كان ناوى يعمل ايه
قال "عمر" بحنان:

-خلاص انسى متفكريش فى الموضوع ده تانى .. خلاص مات ومعدش هيقدر يأديكي تانى
جذبها "عمر" قائلاً:

-يلا نامى انتى .. وأنا هروح أشوف الثغرة اللى فى السور اللى عرف يدخل منها .. عشان

أمنها وميحصلش حاجة زى كده تانى

قالت بلهفه:

-لازم تروح دلوقتى

-أيوة معلىش .. عشان أبقي مطمئن

أومات برأسها .. خرج .. دخلت الى الفراش وقد شعرت بأنها مرهقة للغاية .. حاولت السهر
لنتنظره لكنها لشدة تعبها استسلمت لنوم عميق

فى اليوم التالى زارتها أختها للإطمئنان عليها .. كانت "ياسمين" أفضل حالاً .. قالت "ريهام"

:

-سبحان الله فى ناس كده بتعيش مؤذية وتموت مؤذية

قالت "ياسمين" بخفوت:

-ربنا يرحمه بأه ويغفرله

-الحمد لله ان ربنا حماكى امبارح ونجاكى منه

-الحمد لله

رحلت "ريهام" بعدما اطمئنت على أختها .. جاءت الخادمة لتخبر "ياسمين" أن هناك من
يتصل بها على تليفون المنزل .. استغربت بشدة .. فمن يعرفها سيقوم بالاتصال بها على
الموبايل مباشرة .. كمان أنها لم تعطى أحداً تليفون المنزل بل هى نفسها لا تعرفه .. أخذت
الهاتف من الخادمة .. كانت تقف فى الردهة الواسعة بالأسفل .. قالت بإستغراب:

-السلام عليكم

أتاها صوت انثوى:

-هاى .. انتى "ياسمين"

-أيوة أنا .. مين حضرتك

-أنا "نانسى" .. خطيبة "عمر"

شعرت "ياسمين" بمزيج من الدهشة والغضب .. فهى ليست خطيبته بل خطيبته السابقة .. قالت

"ياسمين" ببرود:

-أفندم .. حضرتك عايزانى فى ايه

قالت "نانسى" بغل:

-عايزة بس أقولك حاجه يا مدام "ياسمين" .. اذا كنتى فاكره ان "عمر" نسانى تبقى غلطانه

.. عمر مستحيل ينسانى انتى متعرفيش ايه اللى حصل بينى وبينه فى بيت المزرعة

صمتت "ياسمين" للحظة ثم قالت بغضب:

-مسمحكيش تتكلمى عن جوزى بالطريقة دى

حاولت "نانسى" بث سمومها مرة أخرى فقالت:

-حتى لو قولتلك انى عندى دليل على اللى أنا بقوله

قالت "ياسمين" بثقه وبدون تردد:

-أنا واثقة فى جوزى جداً وفى أخلاقه .. وميهمنيش الدليل اللى بتقولى انه معاكى لانى

مستحيل أصدقك .. حتى لو "عمر" قالى الكلام ده بنفسه مش هصدق .. لو سمحتى متتصليش

ببيتي تانى .. يا إما هعملك مشاكل انتى مش قدها

قالت ذلك وأنهت المكالمة وهى تشعر بالحرق .. وقفت تستعيد هدوءها للحظات .. ثم .. التفتت

لتجد "عمر" فى مواجهتها .. تبادلا نظرة طويلة صامته .. كانت ملامحه خاليه من أى تعبير

ولم تستطع فهم نظرتة .. قال:

-مين اللى كان بيتكلم

قالت بصوت خافت:

"-نانسي"

-قالتك ايه

ابتلعت ريقها قائله:

-كانت بتحاول تقنعنى ان فى حاجه حصلت بينكم فى بيت المزرعة

نظر اليها قليلاً .. ولكن بصمت .. ثم تركها ودخل مكتبه حيث كان ينتظره والده فى الداخل .. اندمجا معاً فى العمل .. وقضت "ياسمين" يومها بصحبة "كريمة" .. كانت "ياسمين" تفكر فى مشكلتها مع "عمر" .. ترى هل سيسامحها يوماً .. هل سيلغى فكرة الطلاق من رأسه أم مازال مصر عليها .. كانت حائرة مشتتة .. لكنها لم تخبر "كريمة" أو أختها أو حتى "سامح" لوجود مشكلة بينها وبين "عمر" .. فى المساء بعد العشاء استأذنت "ياسمين" وقالت أنها متعبة وتريد النوم .. قالت "كريمة":

-هتنامى بدرى كده .. مش عادتك

قال "نور" بياهتمام:

-تعبانه ولا حاجه يا "ياسمين"

قالت بسرعة:

-لا يا عمو أنا كويسة بس حسه انى عايزة أريح شويه

قالت "كريمة" بحنان:

-طيب يا حبيبتي تصبى على خير

-تصبى على خير

قبل أن تغادر ألقت نظرة على "عمر" الجالس فى مكانه والذى بدا عليه الضيق لكنه لم يعيرها أى انتباه .. بعد ساعتين .. صعد "عمر" الى غرفتهما .. لم يجدها بالداخل وسمع صوتاً فى الحمام .. توجه الى الشرفة وفتحها ووقف فيها .. فجأة شعر بحركة خلفه .. استدار لتتسع عيناه من الدهشة .. أسند ظهره الى السور .. كانت "ياسمين" ترتدى فستان زفافها .. وهى بكامل زينتها .. كانت تبدو كأميرة .. بل كملكة متوجة .. أحسنت وضع زينتها .. فكانت فى أبهى صورة .. ووقفت على باب الشرفة .. تطلع اليها "عمر" وعيناه تلمعان اعجاباً وانبهاراً .. لكنه بقى صامتاً كما هو ... لم يوجه اليها كلمة .. ولم يقترب منها .. أتعبها هذا الصمت الذى طال .. فاقتربت ووقفت على بعد خطوتين منه .. قطعت هذا الصمت وهى تتطلع اليه قائله:

-أنا أسفة يا "عمر" .. عارفه انك زعلان منى أوى .. بس أنا أسفة

قطع صمته وقال بهدوء:

-أنا مش زعلان منك يا "ياسمين" .. أنا مجروح منك

نظرت اليه برجاء وقالت:

-انت قولتلى انى مكنتش صريحة معاك وده صح فعلاً .. وقولتلى انى مكنتش واثقة فيك وده صح فعلاً انا مكنتش بئق فيك زى ما أنا بئق دلوقتى .. بس انت قولتلى انى محبتكش .. انت

غلطان يا "عمر" ..

ثم قالت بصوت متهدج:

-انا بحبك أوى يا "عمر" .. ازاي مش حاسس بيا

قال بهدوء وهو مازال بعيداً عنها:

-انا مشفتش منك حاجه تدل على الحب ده يا "ياسمين" .. أنا اللي كنت طول الوقت بقربك

وانتى اللي كنتى بتبعدى

نظرت اليه بألم وقالت:

-أسفة بجد .. اتصرفت غلط .. سامحنى بأه يا "عمر"

اقتربت منه خطوة ونظرت الى فستانها وتطلعت الى عينيه قائله بهمس:

"-عمر" .. أنا أول مرة ألبس فستان فرح .. أنا لابساه عشانك انت .. عشان انا عروستك

قال بدهشة:

-يعنى ملبستيش فستان فرح قبل كده

-لا-

-ليه؟

-مكنتش حسه انى عايزة ألبسه

لانك ملامحه قليلاً وهو يتطلع اليها .. فعلمت أنها حققت هدفاً .. اقتربت منه أكثر وتطلعت اليه

بحب قائله:

-متقنعيش انك معدتش بتحبني لانى مش ممكن أصدق

لم يستطع الاستمرار فى غضبه منها .. والذى تدد بالفعل .. ارتسمت ابتسامه واسعه على شفثيه .. فابتسمت له بسعادة وهى تتطلع الى عينيه التى لم تفارق عينيها لحظة

بدأ حياتهما وقد تعاهدا على المصارحة فى كل امور حياتهما

فى صباح اليوم التالى أيقظها "عمر" بطريقته الخاصة .. ثم تركها وفتح الدولاب وأخرج منه علبة قطيفه وعاد الى جوارها .. ألبسها شبكتها ودبها وألبسته دبته .. ضحكت قائله:

-أول مرة فى حياتى أشوف عروسة بتلبس شبكتها فى السرير

-الحفلة بعد تلت أيام ان شاء الله .. لو تحبى ألبسهالك تانى فى الحفلة مفيش مشكلة

ابتسمت قائله:

-لا هتكسف تلبسهالى أدام الناس دى كلها .. وبعدين انت خلاص لبستهالى

لمس السلسلة التى لا تخلعها من رقبتها أبداً وقال:

-أيوه كده خليكي لبساها على طول .. مش عايزك تقلعيها خالص

قالت بدلال:

-حاضر يا حبيبي

مسح بيده على شعرها وهو ينظر اليها بحنان قائلًا:

-ليه ما قولتليش

نظرت اليه وقد فهمت ما يرمى اليه فابتسمت .. فضمها الى صدره فى حنان

حضرت عمته .. فنزل "عمر" و "ياسمين" التى كانت تبدو مختلفة .. فرحة سعيدة .. مبتهجة .. كانا يشبكان أصابعهما ببعض البعض .. ألقتهما عليهما "ايناس" نظرة حقود ثم أشاحت بوجهها فى عصبية .. أيضاً "ثرى" كانت ترمقهما بنظرات غير مريحة .. قالت "ثرى"

ساخرة:

-ايه عروستك وخدامك مننا ولا ايه

تنهدت "ياسمين" فى ضيق فقال "عمر":

-ايه لزمته الكلام ده يا عمته .. ما انا معاكوا أهو

التفتت اليها "ثرى" وقالت بنبرة ساخرة:

-اللى يشوف كده يقول عروسه جديده

احمرت وجنتاها خجلاً وغضباً فى آن واحد ..قال "عمر" بتحدى:

-هى فعلاً عروسة جديدة

نظرت اليه "ثريا" قائله:

-آه عروسه فرز تانى

كادت "ياسمين" أن تغادر .. لكن "عمر" أوقفها ولف ذراعيه حولها وقربها منه .. ثم نظر

الى عمته قائلاً بتحدى:

-يعني ايه فرز تانى

-يعني يا حبيبي كانت متجوزة قبل كده..

قال "عمر" بحزم:

-لأ مكنتش متجوزة قبل كده

رفعت "ياسمين" نظرها الى "عمر" قائله:

" -عمر" خلاص

حاولت التحرر من بين ذراعيه لكنه أطبق عليها بشدة وقال لعمته:

-الأولانى ده ملمسهاش .. يعني "ياسمين" كانت بكر لما اتجوزتها

نظرت اليه عمته بدهشة وقد أجم لسانها .. أما "ايناس" فقد شعرت بحقد فوق حقد .. فأكمل

"عمر" بصوت هادر:

-يعني مفيش داعى لكلامك وتلميحاتك كل شوية .. هى متفرقش حاجه عن أى بنت تانية

بتتجوز لأول مرة .. لأ مش بس كده .. هى أفضل من بنات كتير أوى بتتجوز لأول مرة .. مراتى

مش زى أى بنت .. هى بنت غالية أوى وعالية أوى وقيمتها عندى كبيرة أوى .. لانها عاشت

طول عمرها تحافظ على نفسها من مجرد لمسة ايد ممكن تغضب ربنا .. عاشت وهى بتبص

للحلال والحرام وتميز بينهم ..حافظت على نفسها لجوزها وبس .. وأنا معرفتش ان ربنا

بيحبنى الا بعد ما رزقنى بيها .. لان الطيبون للطيبات .. ومش عايز الموضوع ده يتفتح تانى

أبدأ

ابتسمت "كريمه" التى كانت تشفق على "ياسمين" من معاملة "ثريا" .. شعرت "ياسمين"

بالسعادة ودمعت عيناها فرحاً وهى ترى زوجها .. يرفع من شأنها أمام أهله .. ويتحدث عنها

بتلك الطريقة .. لم تبالي بنظرات أحد وألقت برأسها على صدره .. قبل "عمر" رأسها ومسح

على شعرها .. فقامت "ايناس" للتغادر مع "ثريا" التى تعلت بأن لديها بعض الأعمال الهامة

.. وما هى الا حجه بعدما أفلست وأجم لسانها ولم تجد ما تقوله من كلمات

أتى يوم الحفل .. فى صباح اليوم .. بدا الجميع مهتماً بتفاصيل اعداد الحفل ..كانت "ياسمين"

مع "ثريا" و "ريهام" فى غرفة المعيشة يتناقشون حول بعض تفاصيل الحفل .. عندما أتى

"عمر" قائلاً:

" -ياسمين" .. فين البدلة بتاعتي ؟

التفتت اليه قائله:

-فى الدولاب يا "عمر"

-لأ .. تعالى شوفها

قالت بدهشة:

-أنا واثقه انها فى الدولاب

قال بإصرار:

-طيب تعالى شوفهاالى

صعدا معاً الى غرفتهما وكادت أن تتجه الى الدولاب لكنها أوقفها وأطبق ذراعيه حولها قائلاً:

-وحشتيني

ابتسمت قائله:

-كنت بتستدرجنى يعني

ابتسم بخبث ومرح وقال:

-أيوه الله ينور عليكى .. كنت بستدرجك .. ودلوقتى انتى وقعتى أسيرة فى ايدي

ابتسمت بسعاده ... و ... بعده فترة .. قالت:

-ممكن ننزل بأه ماما "كريمه" على أعصابها من امبارح

ابتسم وقبلها قائلاً:

-ماشى يلا ننزل .. أنا عارف ماما وقت ما بيكون فى حفلة .. طول عمرها دقيقة وبتحب كل

حاجة تكون مطبوطه

بعد ساعة خرجا معاً الى غرفتها وهما ينزلان على الدرج أوقفها قائلاً:

-بقولك ايه متيجي نهرب من الحفلة دى .. وأخذك ونطلع على المزرعة

قالت بجديه وهى تحاول أن تبتعد عنه:

" - عمر " ماما "كريمه" زمانها على نار .. اتصلت بينا أكثر من مرة يلا انزل

تركها على مضض قائلاً:

-يلا انزلى روحى لماما "كريمه" بتاعتك ابقى خليها تنفحك

قالت "كريمه" وهى تصعد الدرج:

-آه ما شاء الله انتوا الاتنين واقفين تتسايروا مع بعض .. وأنا ملبوخه لوحدى تحت .. يلا يا

"عمر" شوف الناس اللي بيضططوا الترابيزات والزينه بره .. وانتى يا "ياسمين" يلا تعالى

معايا عايزاكى

نزلت "ياسمين" معها واندمج كل فى عمله .. فى المساء خرج الحفل بشكل رائع .. حضر

جميع أصدقاء ومعارف العائله .. وتعرفت عليهم "ياسمين" .. أحببت البعض وتحفظت تجاه

البعض .. وشعرت بسعادة غامرة عندما رفض "عمر" بأدب أن يسلم على النساء فى الحفل

بيده .. وأجاب بطريقه مرحة :

-معلش أصل المدام بتغير

كانت واقفه تتحدث الى احدى السيدات .. عندما اقترب منها "عمر" فابتسمت المرأة وقالت لـ

"عمر:"

-ازيك يا "عمر" .. ألف ألف مبروك عروستك عسوله أوى

ابتسم "عمر" قائلاً:

-الله يبارك فى حضرتك

استأذن "عمر" وجذب "ياسمين" من يدها .. قال وهو ينظر اليها بحنان:

-أنا النهارده حاسس بفرحه غير عاديه

ابتسمت قائله:

-اشمعنى النهاردة

قال وهو ينظر اليها بحب:

-عشان ايدي فى ايد مراتى أدام الناس كلها

توقف قائلاً بحنان:

-انا بحبك أوى يا "ياسمين" .. انتى غيرتى فى حاجات كثير .. غيرتيها للأحسن .. أنا بجد

كنت محتاج لوجودك فى حياتى أوى

ابتسمت قائله:

-أنا كمان كنت محتاجة وجودك فى حياتى أوى يا "عمر"
نظرا بحب وشوق الى بعضهما البعض وابتسما وكل منهما يشبك أصابعه بأصابع الآخر.. وكأنه
لا يريد أن يفارقه أبداً.

بعد سبعة أشهر...

استيقظت "ياسمين" وأيقظت "عمر" قائله:

"-عمر" الحقتى .. "عمر"

استيقظ فرعاً وقال:

-فى ايه

قالت وهى تتألم:

-بسرعة يا "عمر" شكلى بولد

هب "عمر" واقفاً وأحضر ملابسها سريعاً وصرخها يتعالى .. ألبسها بسرعة وقال:

-متخفيش يا حبيبتى متخفيش

قالت وهى تتألم بشدة:

-مش قادرة يا "عمر" .. مش قادرة

حملها وخرج بها مسرعاً وقال:

-قولتك بلاش نروح المزرعة دلوقتى انتى اللى اصريتى

قالت وهى وسط صرخاتها المتألمه:

-وأنا كنت أعرف يعنى انى هولد فى السابع

جرى "بها" "عمر" وأدخلها السيارة وانطلق بها الى المستشفى .. تعالت صرخاتها فقالت

الطبيبة بعد فحصها:

-لسه شوية

فقال "عمر" وهو ينظر الى زوجته بأسى:

-مينفعش تديها حاجه تخفف الألم شوية

التفتت له قائله ببرود:

-متقلقش كل ده طبيعى وأنا أفضل انها متاخذش حاجه

قالت "ياسمين" بغیظ وهى تصرخ:

-أنا أفضل آخذ .. هو أنا اللى هولد ولا انتى

خرجت الطبيبة وهى تعطى تعليماتها للمرضة .. التفتت "ياسمين" الى "عمر" قائله بغضب:

-انت السبب .. انت اللى عملت فىا كده

ضحك قائلاً:

-هو انا غصبتك على حاجه ما كله كان برضاكى يا "ياسمين"

ضحكت الممرضة مرة أخرى .. فنظرت اليها "ياسمين" نظرة قاتله فخرجت فوراً من الغرفة ..

اقترب "عمر" منها وجلس بجوارها وأمسك بيدها .. ووضع يده الأخرى على رأسها وظل

يقرأ ما حفظه فى الشهور الماضية من القرآن

بعد نصف ساعة فى غرفة العمليات سمع أصوات الرضيعه .. خرجت الممرضة تعطيها له وهى

تلفها .. حملها بين ذراعيه ونظر اليها .. خفق قلبه بشدة واغروقت عيناه بالدموع .. أمسك

كفها الصغير بأصابعها الصغيره الرقيقة وطبع عدة قبلات حانية عليها .. وأذن فى أذنها .. وقبل

جبينها .. ثم التفت الى الممرضة وسألها بلهفه:

"-ياسمين" كويسة

ابتسمت تطمئنه:

-أيوة كويسة شوية وهتخرج

اجتمع الجميع فى المستشفى وحضرت "ريهام" و "كرم" .. و "سماح" و "أيمن" وابنهما الرضيع "مازن" .. و "كريمة" و "نور" .. كانت سعادة الجميع غامرة بتلك الصغيره التى تبادلوا حملها فى سعادته .. اقتربت "ريهام" من "ياسمين" قائله:

"-ياسمين" هى الولادة دى حاجه صعبه

نظرت "ياسمين" الى "سماح" قائله:

-اسألى "سماح"

ضحكت "سماح" وقالت:

-لا بلاش أنا بالذات .. أنا فضحت الدنيا يوم ولادتى

قالت "ريهام" بقلق:

-انتوا هتقلقونى ليه بأه

وضعت "سماح" يدها على بطن "ريهام" المنتفخة قليلا وقالت:

-انتى لسه بدرى عليكى .. متقلقيش نفسك من دلوقتى

هتفت "ريهام": "

-ده انا هموت من القلق .. وانتوا بترعبونى اكثر

قالت "ياسمين" ضاحكة وهى تغمز لـ "سماح": "

-لأ متخافيش .. ده زى شكت الدبوس بالظبط

كتمت "سماح" ضحكتها وقالت:

-آه صح .. شكت دبوس

وقف الأصدقاء الثلاثة معاً فى الخارج .. قال "كرم" الذى يحمل الصغيرة:

-دى صغيره أوى يا "عمر" .. ده أنا حتى خايف أشيلها

ضحك "عمر" قائلاً:

-معلش بكرة تكبر يا "كرم"

ابتسم "أيمن" قائلاً:

-يلا عقبالك انت كمان .. ربنا يرزقك ببنوته زيها

هتف "كرم": "

-لا أنا مش عايز بنات .. كفايه عليا واحدة فى البيت .. اذا كان واحدة ومطلعة عيني .. مش

هقدر انا على اتنين حريم فى البيت .. أنا عايز ولد عشان نبقى اغلبيه ساحقه و "ريهام"

تحس انها أقلية

ضحك "أيمن" و "عمر" الذى قال:

-أغلبيه ايه وأقلية ايه يا ابنى هو برلمان

قال "كرم" بمرح:

-ما انتوا متعرفوش اللى بيحصل فى صاحبكوا .. أنا قولت من الأول مالى ومال الجواز

قالت له "ريهام" الواقفه خلفه:

-بتقول حاجه يا "كرم"

التفت اليها بسرعة قائلاً:

-كنت بقول ل "عمر" و "أيمن" .. ما أحلى الجوااااز .. نعيم نعيم نعيم

رفعت حاجبها قائله:

-آه .. ماشى

رحل الجميع الى بيت المزرعة .. وعاد "أيمن" و "سماح" وابنهما الى بيتهم

دخل "كرم" و "ريهام" الى احدى الغرف ببيت المزرعة .. ووقفت "ريهام" تغير ملابسها
فاقترب منها "كرم" التفتت اليه قائله:

-مخصمك على فكرة

ابتسم قائلاً:

-ليه يا حبيبتي

قالت بدلع:

-عشان اللي قولته لصحابك فى المستشفى .. ماشى يا "كرم" مكنتش أعرف انك ندمان على
جوازك منى بالشكل ده

لفها اليه ونظر فى عينيها قائلاً:

-انتى مجنونة .. أنا اندم انى اتجوزتك .. ده انتى حب حياتى .. ده انتى كل حاجة حلوة فى

حياتى يا "ريهام"

ابتسمت قائله:

-بجد يا "كرم"

-بجد يا حبيبة قلب "كرم" "ريهام"

ابتسمت له وتلاقت أعينها فى سعادة.

جلس "عمر" بجوار "ياسمين" على السرير وابتسم وهو يراها ترضع الصغيره وقال:

-مش قادرة أصدق .. القمر دى تبقى بنتى

ابتسمت "ياسمين" قائله:

-أموره أوى صح .. وصغونه أوى

أمسك "عمر" أصابعها الصغيره ولفهم على اصبعه وقبلها .. التفت الى "ياسمين" وقبل

رأسها قائلاً:

-ربنا يخليكوا ليا انتوا الاتنين وتفضلوا منورين حياتى على طول

نظرت اليه "ياسمين" قائله:

-هنسميها ايه .. أنا اخترت .. لسه ما استقرناش على اسم

قال "عمر":

-لأ أنا خلاص اخترت اسمها

-ايه هو؟

نظر اليها بشك قائلاً:

-خايف ميعجبكيش

ابتسمت وقالت:

-طالما انت اللي اخترته يا "عمر" أكيد هيعجبني

نظر فى عينيها قائلاً:

-نفسى اسميها "عائشة"

نظرت اليه:

-اشمعنى "عائشة"

نظر الى الصغيرة وهو يمسح وجهها بأصابعه وقال:

-على اسم أم المؤمنين عائشة .. لما قرأت عنها حبيتها أوى .. وحببت انى أسمى بنتى باسمها

ثم نظر الى "ياسمين" وقال:

-عجبك؟

انحن لتطبع قبلة على وجنته وقالت:
-طبعاً عجبني
نظر "عمر" اليها قائلاً:
-انت عمرى يا "ياسمين" .. ربنا يقدرنى وأحافظ عليكوا انتوا الاتنين
قالت بحنان:
-بحبك أوى يا أحن "عمر" فى الدنيا

ابتسمت ونظرت الى زوجها وابنتها بسعادة .. لم تنسى أن تحمد الله على ما رزقها .. وعلى ما عوضها به عن كل ما قاست فى حياتها فكان جزاء صبرها تلك السعادة التى بين يديها .. ودعت لوالديها بالرحمة والمغفرة .. نظر "عمر" الى ابنته الصغيره والى زوجته .. وقبل جبين كل منهما ولف ذراعيه حولهما وهو يعاهد الله عز وجل على أن يحافظ على تلك الأمانة التى انتمنه عليها .. تبادلنا نظرات صامته تشى بحب كل منهما للآخر وتمسك كل منهما بالآخر .. ورغبة كل منهما فى اسعاد الآخر .. والتفت العيون لتمضى عهداً بالحب والمودة والرحمة والتسامح والمشاركة .. طوال العمر.

...تمت بحمد الله 08:36pm 11/3/2013...